











Sample

1195

1195

AM III

AA
1418

F. xviii
7

1010-

CAIMUS, Pompeius. **De febrium putridarum indicationibus**
iuxta Galeni methodum colligendis, et adimplendis, libri duo. 4 leaves,
266 pp. 4to. Original vellum. Padua, 1628. Fr. 10. —
Several leaves slightly waterstained. Two small library stamps on title-page.

XIII

A14h

8 1266 p

1628

13 214

1628

47959
D E
FEBRIVM
PVTRIDARVM
INDICATIONIBVS

IVXTA GALENI METHODVM
colligendis, & adimplendis.

LIBRI DVO.

A V C T O R E

POMPEIO CAIMO VTINENSI, EQVITE,
*& in Patauino Gymnasio Theorice ordinariae
Professore Primario.*

Ad Amplissimum Senatorem

ANTONIVM BARBARVM,


D. MARCI PROCVRATOREM.



PATAVII

Apud Petrum Paulum Tozium. M DC XXVIII.

Superiorum permissu.





Illustriss. & Excell. Viro
ANTONIO BARBARO,
D. MARCI PROCVRATORI

P O M P E I V S C A I M V S

F.



Lurimum tibi debeo, Vir præstantissi-
me, quia tua me amplitudo magnis
potuit cumulare beneficijs, mini-
mum tecum præsto, quia tua in me
merita nullis meis pensari possunt offi-
cijs, omnis mihi gratia à te collata,
nulla tibi à me relata, quia primum tu potuisti ob
auctoritatis magnitudinem, voluisti ob naturæ sua-
uitatem, secundum ego si nolim, ingratus quid-
em sim omnium, at si sperem, ineptissimus om-
nium, qui oneris mihi à beneficijs tuis impositi non
agnoscam grauitatem, & vel sub hac tanta mole ali-
quam cogitem lacertorum commotionem. Mea-
rum quidem rerum status ità se habet, vt nil mihi




fit de referenda gratia cogitandum beneficentiæ tuæ
magnitudine oppresso, illud in agenda, habendaque
non desperandum tui celsitudinem animi meditato,
facile fore, ut quem gratiam videas referentem nul-
lam, cum humaniter excipias & agentem, & habentem
immensam, & cui multorum te benefactorum præ-
stitisti largitorem, hunc paucorum sustineas verbo-
rum expressorem, vel silentij potius, mutum chari-
tationis præbentis, æqui bonique facias observatorem.
nam maxima beneficia, qualia in me contulisti vber-
rima, non tam verbis cumulatis veniunt exprimen-
da, quam integro silentio excolenda, quia in eo ali-
quid facientes nil facimus, in hoc nil facientes ali-
quid facere videmur, dum facinoris non suscepti, tam-
quam non bene perficiendi, difficultatem maximam
confitemur. Hic est rebus magnis debitus silentij
cultus, diuinis etiam laudibus consentaneus, quas
quia humana vox nequit pro dignitate concinere, de-
bet eadem pro maiori maximi operis expressione,
conticescere. Hinc fit ut licet frequens mihi detur
tuorum in me meritorum ansa prædicandorum, &
lingua mea quodam grati animi quasi æstro percita
aliquam in hoc exerat copiam verborum, mentis ta-
men melius cogitantis accurrens subito recordatio
suo quasi freno impetum eius omnem coerceat, &
quæ corde comprehendere nequeunt, ea nec ore tenta-
re sinat. En modo, Senator Amplissime, in hunc
me campum honesta vocat occasio, dum ad librum
meum tibi dicandum omnis me trahit iusta cogita-
tio, multa hic essent mihi de tuis laudibus per om-
nium

nium ora volitantibus dicenda, & omnia statuo si-
lenda, quia satius est silentem omnia confiteri, quam
loquentem pauca effari. Sciunt omnes propemodum
quantum tibi debeam, quia si mea me tenuitas facit
ignotum, tua me præstantia efficit notum, & si qui
sunt, qui nesciant, hos docebit hæc facta sub tui no-
minis splendore huiusce libri editio, clamantis apud
omnes, testatum omnibus relinquentis, cuncta me ti-
bi debere, nil posse vel factis, vel verbis præstare,
nec ingrati tamen animi pertimescere crimen, quia
meas humilis obsequij plenas cogitationes obseruan-
tissimæ custodit memoriæ limen. Hoc si mihi non
facit satis, cui nihil potest in hoc facere satis, at fa-
ciet (nec vana fides) tibi, qui non aliud à tuis requi-
ris, nisi ut quos habes arctè deuinctos clientes (ha-
bes autem quam plurimos deuinctissimos omnes) eos
audias clarè sua vincula confitentes. Hoc apud om-
nes officium absoluet hoc meum Medicum opus par-
ti practicæ addictum, aliquot ab hinc annis, dum
in Romano Gymnasio auditoribus meis praxim ex-
plicarem, conscriptum, & hoc tempore, ut comitem se
præbeat libro Theorico, duobus ab hinc annis edito,
euulgatum, quod tibi fuerit, ut pro beneficentia,
debitum, sic pro humanitate forsitan gratum. Ma-
gnanimorum est parua munera magnificare, Anto-
niorum est Magnanimitatem exercere, eorum præ-
cipuè, qui non ad Barbaram malè instituti Regni ci-
uitatem, ut olim Romanus ille, delati, sed in Bar-
bara Diuinæ Reipublicæ familia, & alti, & nati, per-
fecto perfectæ humanitatis cultu semper apparuerunt

orna-

ornati, quia proprium est huius præclarissimæ fami-
liæ instar Belli per Antithesim nominari, vt ver-
bo sit Barbara, re autem ipsa sit Humanissima. Sed
ne tuas laudes attingens aliud facere videar, quàm ab
initio eram facturus, hunc finem scribendi imponam,
nullum tui obseruandi, & quasi pro numine colen-
di vllò vñquam tempore impositurus.





Catalogus capitum opere vniuerso contentorum.

CAPITA LIBRI PRIMI.

Proemium operis.



Vid fit Methodus in communi. Cap. I.	carte 9
Quid fit Methodus Medica curatiua.	
Cap. II.	car. 12
Quid fit indicatio, & quomodo distingua- tur à reliquis Medicinæ instrumentis.	
Cap. III.	car. 16
Dubitationis ex dictis emergentis examinatio, & so- lutio. Cap. IV.	car. 13
De speciebus Indicationum. Cap. V.	car. 16
De natura Putridæ febris. Cap. VI.	car. 18
De natura putredinis ad pleniorē putridæ febris no- titiam. Cap. VII.	car. 20
De duplici putredinis specie, altera secundum partem, altera secundum totum. Cap. VIII.	car. 25
De Medica Putredinis definitione Aristotelicæ cōformi.	
Cap. IX.	car. 26
Galenicæ definitionis ad explicandam putredinem alla- tæ examinatio. Cap. X.	car. 31
De Putridarum febrium causis. Cap. XI.	car. 35
	Gale-

Galenici dicti ad causas putridarum febrium attinentis explicatio.	Cap. XII.	car. 38
Dubitationis ad causas febrium putridarum attinentis examinatio, & solutio.	Cap. XIII.	car. 41
Quæ indicationes veniant in putridis febribus colligenda.	Cap. XIV.	car. 46
De Indicatione vitali, quæ à viribus deducitur.	Cap. XV.	car. 49
De Varijs Speciebus alimonix à viribus indicatæ.	Cap. XVI.	car. 51
De Alimonia indicata à viribus ratione spirituum.	Cap. XVII.	car. 54
De Alimonia indicata à viribus ratione partium carnosarum, & solidarum.	Cap. XVIII.	car. 57
De prædictarum alimonix indicationum sufficientia, & præstantia.	Cap. XIX.	car. 59
De Varia indicatione à viribus desumpta.	Cap. XX.	car. 61
De regulis quibusdam in vsu alimonix à viribus indicatæ obseruandis.	Cap. XXI.	car. 63
Quomodo à viribus indicatio sumatur alendi in vario accessionum tempore.	Cap. XXII.	car. 67
Exemplaris ex Galeno eiusdem rei ostensio.	Cap. XXIII.	car. 70
De Vini vsu in febribus putridis indicatione à viribus sumpta.	Cap. XXIV.	car. 72
De cautione seruanda in vino febricitantibus exhibendo.	Cap. XXV.	car. 76
De Varijs gradibus vini in febribus putridis exhibendi.	Cap. XXVI.	car. 81
De Ouorum vsu in febribus putridis.	Cap. XXVII.	car. 83.
De Alijs obseruationibus ad victus rationem, i deoque ad indicationem vitalem attinentibus.	Cap. XXVIII.	car. 88
De Animi cura à Medico fuscipienda.	Cap. XXIX.	car. 90

CAPITA LIBRI SECVNDI.



- D**E Indicatione curatoria, quam habeat naturam, & vnde sumatur. Cap. I. car. 97
 Dubitationis proposito, & solutio, & proposito problematis determinatio.
 Cap. I I. car. 100
- De Indicatione curatoria, quæ à febris putrida desumitur, qualis, & quotuplex sit. Cap. III. car. 104
- De Triplici febrium putridarum diuisione in colligendis indicationibus obseruanda. Cap. I V. car. 107
- De Indicatione curatoria febris putridæ, vt febris est. Cap. V. car. 109
- De sanguinis euacuatione per Phlebotomiam vt remedio refrigeratorio, & prius vnde indicetur absolute Phlebotomia. Cap VI. car. 112
- Eiusdem remedij diligentior discussio cum quarundam obseruationum additione. Cap. VII. car. 124
- De recta Phlebotomiæ administratione. Cap. VIII. car. 129
- De Vsu Lenientis vt remedij refrigeratorii. Cap. IX. car. 140
- De Vsu alimentorum vim medicamentosam habentium. Cap. X. car. 144
- De Vsu frigidæ vt remedio febris curatorio. Cap. XI. car. 148
- De Balneo sub eadem ratione remedij curatorij. Cap. XII. car. 152
- De decoctis, ac destillatis refrigerantibus ad explendam curatoriam febris indicationem. Cap. XIII. car. 159
- De remedijs per similia adhibitis. Cap. XIV. car. 160
- De Indicatione præseruatoria febrium putridarum. Cap. XV. car. 165
- De sanguinis missione vt remedio febris putridæ præseruatorio. Cap. XVI. car. 167
- Dubitationis ex dictis emergentis examinatio, & solutio. Cap. XVII. car. 171

An in febribus malignis, & pestilentibus secanda sit ve- na. Cap. XVIII.	car. 173
Rationum ab auctoribus venæ sectionem in febre pesti- lenti addutarum consideratio, & dilutio. Cap.	
XIX.	car. 181
De Vsu medicamenti vt remedij præseruatorij. Cap.	
XX.	car. 197
De Præparantibus, & concoquentibus ad purgationem efficiendam. Cap. XXI.	car. 206
De Vomitu prouocantibus. Cap. XXII.	car. 210
De remedijs vrinam prouocantibus, quæ vocantur diu- retica. Cap. XXIII.	car. 213
De remedijs per ambitum corporis euacuantibus. Cap.	
XXIV.	car. 216
De remedijs roborantibus viscera. Cap. XXV.	car. 220
De Indicatione à febrium putridarum symptomatibus sumpta. Cap. XXVI.	car. 225
De Tribus præcipuis symptomatibus, quæ in febribus putridis habent vim indicandi. Cap. XXVII.	
car. 228	
Conclusio operis cum appendice de præfagijs febrium pu- tridarum. Cap. XXVIII. & vlt.	car. 240



P R O E M I V M O P E R I S.



NULLVM est morbi genus, quod humana corpora vel afficiat frequentius, vel affligat periculosius, vel curationem suscipiat difficilius, quàm febris, cui ob hanc fortasse causam Romani veteres superstitionum inter omnes gentes refertissimi, & aras erexerunt, & sacrificia obtulerunt, & vota fecerunt ad aueruncandam ipsius iram, impetumque à se auertendum. Ara vetus (inquit Cicero in secundo de legibus) stat in Palatio febris, & altera Exquilij male fortuna, detestataque, qua omnia eiusmodi repudianda sunt; ut his verbis febris, & pessima fortuna conditionem iungat, & utramque ob suae prauitatis excessum cultu illo sibi temerè oblato indignam statuatur. Verum cum febres omnes celebri illo ternario contineantur, quem Galenus primo de ipsarum differentiis cumulatè explanat, genere scilicet Ephimerarum à spirituum feruore pendentium, hecticarum solidis partibus labem inferentium, putridarum ab humorum inquinamentis prodeuntium, his postremis potissimum conueniunt ea quæ à primordio diximus, quia Ephimera leuiiores sunt, ac tutissima, nec ad earum curationem ulli ferè Medici accersuntur, sed à sola natura propè semper vincuntur, hectica sunt infrequentes, & vel non valde difficulter curantur, vel omnem planè demunt curationis absolueda spem. At putrida sunt illa, quæ sapissimè innuadunt, maximum negotium facessunt, & sunt ipsa plerumque acuti morbi, & acutos morbos plerumque consectantur vel

ipso teste Hippocrate in primo de victus ratione in acutis, & aliquando subeunt non modo malignam, sed pestilentem etiam Ideam, ut ideo laborantes opem cogantur Medicorum exposcere, & eorum se curationibus tradere, quæ si salutare maiori ex parte accedunt, interdum etiam voti compotes non evadunt. Quod tamen mirum videri non debet, quia præclare in libro Prognosticorum dixit Hippocrates, *ὅτι οὐκ ἔστιν ἀποθανεῖν ἀπὸ παντὸς τοῦ ἀσθενέοντος ἀδύνατον*, hoc est sanos quidem facere agrotantes omnes est impossibile. Hæc cum ita se habeant, illud cuius satis, superque patere potest, nullam esse Medicæ facultatis partem vel opportuniorem, vel utiliorem ea, quæ curandarum febrium putridarum methodum tradit, quam quidem partem Galenus præcipue persecutus est adeo accuratè, adeo tractavit luculenter, ut cum in omnibus Medicinæ argumentis valde excolluerit enucleandis, & diuini gloriam Hippocratis, si vera fatenda sunt, doctiorum consensu ferè equauerit, in hoc ad putridas febris attinente talem se præstiterit, ut in reliquis reliquos omnes post eum, & cum eo ad scribendum accedentes longè reliquerit, in hoc autem non eos tantum, sed se etiam ipsum, si fieri potuit, quodammodo superauerit. Et quoniam curandarum febrium, ut reliquorum morborum, duplex est Medicis proposita via iuxta duo illa artis crura in nono Methodi ab eo perbelle descripta, & in libro de elegantia prius ab Hippocrate insinuata, quarum viarum altera experientia innuitur, eiusque ope inuenta remedia confectatur, altera autem Methodo dirigitur, & curatorias indicationes ratione duce venatur: hanc nimirum secundam nobili dignam artifice, & Asclepiadarum familia digno illustrandam suscepit, omnibusque numeris hoc munus ad miraculum usque explevit, ut nobis in hoc liceat dicere fuisse Galenum totius Medicinæ Methodo traditæ si non inuentorem, saltem perfectorem. nam si licuit Auerroï Aristotelem totius Philosophiæ & inuentorem, & perfectorem nuncupare, cum tamen constet ante ipsum fuisse tum alios, tum Platonem præsertim, in cuius Dialogis mira insunt philosophica semina, miri pullulant philosophantibus utilissimi fructus, ut nil fere explicent Aristotelici libri, quod prius non innuant Platonici dialogi; quanto nos magis perfectæ facultatis Medicæ, suoque Colaphone exornatæ impertiri laudem Galeno debemus? Persecutus est Plato omnia ferè Theoremata philosophica, sed quia obiter, & obscurè, non magnum fecisse opera prætium multis est visus, omne propterea

rea rectè philosophandi privilegium in Aristotelem traduentibus.
Sic etiam Hippocrates primæcivit Medicine fundamenta, omnisque
methodicæ rationis semina quadam reliquit, per suos Sparsum libros
disseminata, at levia fuerunt hæc artis principia, & magnis tene-
brarum inuolucris inuoluta, nec facili negotio à lectorum ingenijs
animaduertenda, vel potius fuerunt inchoamenta quadam, & ru-
dimenta ad aliorum excitandas mentes accomodata, quo ad elicien-
dam insurgerent delitescentem Methodum, virtute quidem in Hippo-
craticis verbis contentam, sed nondum tamen ad conspicuum actum
deductam. Nouerat eam quidem absolutissimè Hippocrates, Medico-
rum omnium sine controuersia Coripheus, summæque in arte, ve-
rusque Dictator, quem iure Plato summis sæpe laudibus effert, iure
Galenus quasi Deum quendam suspicit, eique bona artis omnia acce-
pta refert, sed sibi notissimam artificij vim reliquis reliquit ignotam,
nimum laconica illa breuiloquentia delectatus, quam antiquioribus
Sapientibus familiarem fuisse locuples est Plato testis in Protagora,
vel artificiosa forsan arcana occultare meditatus iuxta veterum mo-
rem, qui res præclaras obscuro genere dicendi velabant, quo solerti-
bus solum ingenijs innotescerent, hebetioribus autem manerent igno-
ta. Cuius rei non leuem nobis suspicionem potest incutere enigmati-
ca ferè scribendi ratio multis in locis à diuino sene seruata, & præ-
cipuè in libello de alimento, & in Epidemicis, ut primum de dieta
librum spurij nomine suspectum missum hic faciam. Hippocrates ergo
fuit ille, qui Latitantis Thesauri locum insinuauit, Galenus qui
eruendum suscepit, Hippocrates fuit qui suorum monumentorum
quasi arbore in opaca aureum ramum abdidit dictum Apollini sacrum,
Galenus qui auricomum hunc fatum, ut ait ille, ex arbore decerpit,
alteque oculis vestigatum, & ritè repertum manu carpsit, suumque
munus Apollini obtulit, omnibus Apollinæ artis Sæctatoribus vtilissi-
mum futurum. Hoc igitur nomine mirificis extolli Galenus laudibus
debet, quòd rem non modo abditam, ac delitescentem adduxit in lu-
cem, sed inchoatam exaggerauit, implicatam explicuit, contractam
diffudit. Hæc dicens non detraho Hippocratis gloriæ nulla temporis
longinquitate obscuranda. imò hunc assero ad omnia inuenienda fuisse
Galeno ducem, sed illud affirmo principia tantum methodi fuisse
ab antiquo Magistro insinuata, integram verò Methodum à solo
Galeno inductam, qui tamen ut gratissimi animi sui clara documen-

ea daret, facit Hippocratem totius artis, omniumque ad artem atti-
 nentium Theorematum inuentorem primum, sed tamquam primum
 nec omnibus ordinem debitum dedisse, nec singularum indicationum
 dignitatem ad vnguem finiuisse, & quasdam in ipsis discretionum omi-
 sisse, obscureque plurima pro antiqua dicendi breuitate esse interpre-
 tatum, & de Complicatis affectibus paucissima omnino precepisse.
 Verumtamen dum fatetur se primum omnia in ordinem redegis-
 se, iure optimo sibi vendicat integram methodi inuentionem, quia methodus
 nil est aliud, ut infra ostendemus, nisi ordo quidam, recteq; dispo-
 sita via, sine qua omnis disciplina, omnisque doctrina est inanis, ut
 monet in Epinomide Plato. Qui ergo Theoremata ordinauit, qui me-
 dendi indicationes distribuit, & in sua loca digessit, absolutus fuit
 methodi auctor, inchoatamque inuentionem expleuit. In Qua ta-
 men laude suum Hippocrati locum relinquimus, qui primum lapi-
 dem mouit, qui prima semina sparsit, qui prima fundamenta iecit,
 quae debent aedificijs iaci firma, veluti scaphis poni idonea carina,
 si quid aedificandorum, pangendorumque in his futurum est firmum.
 nam verè Aristoteles in Metaphysicis statuit multum illos af-
 fert adiumenti, qui animi nostri constitutionem, & aciem primi
 excoluerunt, quia si Timotheus non fuisset, magna Musicae parte
 Caruissimus, si verò Phrynis defuisset, ne Timotheus quidem exi-
 tisset. Quanto magis hoc venit de Hippocrate asseuerandum, qui
 omnia Medicinae arcana diuinitus calluit, licet non omnia scriptis
 mandauit? Idem perficienda Methodi gloriam quis erit tam ini-
 quus iudex qui Galeno censeat denegandam? Qui praclaro Tra-
 iani Imperatoris exemplo veteres in Romanorum terris vias varijs
 affectas viijs corrigentis, & elaborantis illud se in Medicina fe-
 cisse testatur, breuiter dicta extendentem, obscure illustrantem,
 omissa addentem, diminuta expletem, imperfecta demum suis nu-
 meris absoluentem: Quod Galeni testimonium in nono Methodi le-
 gimus, nec ambigere de ipsius veritate possumus, dum mente vo-
 luimus, quae nec Aretreus, nec Celsus, nec ullus ex antiquioribus
 praestitit, praestitisse Galenum in excolendis, perficiendisque Hip-
 pocraticis dogmatibus, nec ullum post eum idem tradenda artis
 dolium versantem, ut in Philosophia de Aristotele profert Auer-
 roes, aliquod vel erratum in Galenica doctrina animadnerisse, vel
 additamentum effatu dignum fecisse, quicquid vel Trallianus inter
 vetu-

vetustiores canilietur, Galenicam Confiteri eminentiam veritatis impetu sepe coactus, vel inter recentiores aut Cardanus multiplici eruditionis genere obiectet, aut Argenterius arguto dicendi genere blatteret, aut Fernelius veneranda quadam verborum Maiestate intonet, qui omnes ex Galenico uberi penu suam omnem suppellectilem traxerunt, sed sui profectus auctorem liuoris quadam suffusione dissimularunt, omnes tamen Medica doctrina eatenus florent, quatenus Galenica inhaerent, ac tantum exarescunt, quantum ab ea recedunt, ut Helitropio usu venit florenti ad solem conuerso, aurenti solaribus radijs destituito. Non possumus ergo oratione vlla complecti, quantum huius praestantissimi auctoris manibus debeamus, à quo tantum bonum accepimus, ut in curandis morbis, & ipsis praecipue febribus recta via incedamus, & in hoc artis propè laberintho eius norma quasi Ariadna filo ducti gressus nostros alioquin aberrataros dirigamus. nam Galenica Methodo ad curandas febres, ut in his modo Copsistamus, instituta quid potest esse pulchrius, quid omni ex parte absolutius? Hanc nos persequi cogitamus, hisque scriptis illustrare ad putridas febres attinentem ob allatas superius causas, non paruum opere praeium facturi, nec lenem forasse Medicinae studiosis operam nanaturi, si quæ tantus auctor in diuinis Methodi libris de hoc argumento conscripsit, adeo plana reddamus, ut quilibet artis orgys initiatus possit ea habere comperta. Non est nostrum propositum putridarum curationem febrium absolute prosequi, sed methodum à Galeno in hac curatione propositam expiscari, omnesque indicationes hac methodo inuentas illustrandas aggredi. Quam quidem spartam licet alij præclare vrserint clarissimi viri, nobis tamen aliquem etiam locum reliquerant, ut qualemcumque adhuc asferre symbolam possimus. nam præclare stoicus ille. Qui præcesserant non præripuisse videntur quæ dici poterant, sed aperuisse, & multum interest utrum ad consumptam materiam, an ad subactam accedas. Crescit in dies, & inueniendis inuenta non obstant. Febres ipsas putridas non deducemus ad ultimas species, sed ad communiores quandam, ideam redigemus generali quodam examine, unde facilis sit ad particularia progressus, contenti, Galeni semper vestigijs insistentes,

ſtentes , quorum in libris Methodi impreſſionem habemus admi-
randam . nam quis Apellis Venerem Coam non admiretur , cui
nil addi potuit , nil detrahi ? Quis hanc Galeni Methodum non
ſuſpiciat ad Vmbilicum ita perductam , vt quo magis conſpici-
tur , magis arrideat , quo magis arridet , amore ſui magis ac-
cendat , quo magis amatur , magis in arte factos ab amante
progreſſus inſinuet ? ille namque in Medicina valde profeciſſe
ſe ſciat , cui Galenus , in quo reuiuifcit Hippocrates , valde pla-
cuerit . Quod vt omnibus perſuaſum eſſet , latius in hoc argu-
mento vagari hic libuit , quia non deſunt hoc tempore à Galeni
ſcriptis abhorrentia ingenia , ad ſolem iuxta paramiam caligan-
tia , & ad eius excipiendam lucem omnino inepta .





LIBER PRIMVS.

QVIV SIT METHODVS IN COMMVNI.

Caput Primum.



AGGRESSVRO mihi curatrici in febribus putridis methodi explanationem illud primum onus incumbit, vt quid sit hæc Methodus, & quid putrida febris, ante omnia aperiã. nam præclarum Platonis fuit in Phædro præceptum omnem ratione susceptam aliqua de re institutionem debere à definitione proficisci, vt intelligatur quid sit id, de quo disputetur, Ac sanequam ridiculum foret verba de methodo facienti nullam subesse seruandæ methodi curam. At particularem non benè nouerit qui vniuersalem prius conpertam non habeat, vnde ab vniuersalibus ad minus vniuersalia seruandum progressum in primo Physicorum statuebar Aristoteles. Hanc artificiosam procedendi rationem ab ipso Hippocrate deducit in Phædro Plato, diligens Hippocraticorum dictorum in libro

de humana natura obseruator, in quo discimus non posse humanum corpus, quod Medicinæ proponitur considerandum, ab æque totius natura satis cognosci, quasi partis cognitio præcedentem exigat totius cognitionem. Huic ergo Hippocraticæ normæ tantopere à Philosophis commendatæ inhærentes, quid Methodus sit communiter primo consideremus, vtile Galeni documentum in quarto de differentiis pulsuum, ab Aristotele in libris posterioristicis mutuo acceptum memoria repetentes, duplicem esse rerum definitionem, aliam quidem, quæ nominis notioni intendit, aliam verò quæ veram essentiam cumulatè exprimit, vt prima nominalis sit, vt voeant, essentialis secunda, tantum altera ab altera dissidens, quantum à rei veritate dissidet umbra, & nominalis sit qualiscunque ad essentialem præparatio, ad sternendam illi viam inducta. Qualis igitur hæc erit in Methodo absolute considerata, non erit difficile hanc eruere vim, nominis accuratius attendenti, nam,

quæplex de
terum.

ad quid de
nois

de methodo
et nomen
methodi

vt quilibet Græcæ lingue vel parum peritus, potest animaduertere, Methodus dicitur quasi *Methodos*, hoc est cum via, doctrina videlicet, siue Ars viæ inhaerens, & viam habens adiunctam, vt Methodus vim habeat significandi artem viæ, & rationis, quadam comitatam. Hinc doctissimi viri hoc Methodi nomen in Romanum sermonem vertentes adhibuerunt vocem viæ, & rationis, viam quandam artificialem insinuant volentes, cum ratio, & ars in eandem significationem interdum conueniant vel ipso teste Galeno in primo de usu partium. Et quia ars omnis, omnisque doctrina ordinem præcipue insinuat, quippe quæ ordinatam inducat propositionum seriem in vnum finem tendentium, sine quo ordine non esset ars, nec doctrina (vnde Plato in Epinomide dixit præstare ab eo ~~discere~~ discere, qui ordinem in docendo non seruat) via autem, & ratio insinuat propriè argumentationem è noto ignotum concludentem, siue qua parum utilis esset qualiscunque institutus ordo; ideo hoc nomen methodi hæc duo videtur complecti, ordinem, & argumentum, nam methodus implicite, vt ita dicam, innuit artem, seu disciplinam, explicite autem viam, quatenus insinuat artem, insinuat ordinem, quatenus autem habet significatum viæ, innuit argumentum, vt scilicet appareat græcorum lingua vno vocabulo multas res plenè complexa. Hæc sunt illa duo, quæ frequentius in ore habet Auerroes, in Proemio præcipue Physicorum, ordinem dico doctrinæ, & viam doctrinæ, vt primus dispositionem tradendæ doctrinæ secundum prius, & posterius indicet, secunda eiusdem deductionem secundum notius, & ignotius declaret. Nec aliud est in scien-

tijs, & artibus quod possit requiri, nisi vt ordinate tractentur, & probationes habeant suæ naturæ consentaneas. Ordinem diuinis laudibus extollit Plato in Phædro, & in eius præcipue usu peritum artificem ab imperito iudicat secernendum, scriptisque artificiosis qualescumque attribuit animalium simulachrum, caput habentium, bustum, & pedes, suo loco disposita omnia, nec in alium locum transferenda. Probationes rebus tractandis consentaneas examinat tamquam necessarias in Timæo, & explicat accuratius in Phædro. Ordinem etiam Aristoteles partim in septimo diuinorum, partim in primo de partibus animalium proponit in tradendis scientijs, & artibus necessarium, & in libris Posteriorum rationes edocet cuique artifici usurpandas. Hæc sectatus vestigia Galenus in Methodis vtriusque condicionem requirit, & ordinem quidem docet in principio Artis Medicæ tres esse doctrinas affirmans ordini inhaerentes, primam ex notionæ finis, quæ per resolutionem fiat, secundam ex compositione conflatam eorum, quæ resolutione fuerint inuenta, tertiam ex definitionis dissolutione, quam tamè ad resolutionem redigit, vt duos veros ordines, præcipuosque relinquat, resolutionem, & compositionem, solos etiam ab Aristotele septimo illo diuinorum, & primo ethicorum, ex Platonis etiam sententia inductos. Probationum autem necessarium momentum nobis idem ob oculos posuit in libro de constitutione artis asseuerans omnibus scientiam aliquam assecuturis opus esse methodum, qua verum à falso discernatur, didicisse, quia ad veritatis inuentionem non sufficiat ardens ipsius cupiditas, sed via etiam aliqua

aliqua eius inuenienda requiratur expedita. Ex sola igitur consideratione nominis hæc omnia ad methodum pertinere colligimus, unde Galenus in primo Methodi huius nominis ætimologia, alludens dixit, Methodo quippiam inquirere, & inuenire ex aduerso opponitur ei; quod est fortuito, temereque reperire. Est autem id cum via quadam, & ordine, ita ut in disquisitione aliquid primum sit aliquid secundum, & tertium, & quartum, atque ita de reliquis omnibus deinceps, quoad demum ad ipsum, quod ab initio est propositum, sit peruentum. Hanc viam ordinatam donum Deorum vocat Plato in Philabo ad homines per Prometheus quendam vnâ cum lucidissimo igne deductum, quia humana mens diuinitus illustrata hunc ordinatum progressum in artibus, & scientijs inuenit, cum ordinare sit actus sapientis iuxta Aristotelis dictum in Proemio Metaphysico, & sapientia sit à Deo, qui alijs imperitur sapientiam instar solis imperientis lucem, ut docet in sexto de Republica Plato, & hoc ordinandi donum dicitur accessisse cum lucidissimo igne, hoc est cum facultate argumentandi, & inferendi aliud ex alio, ignotum videlicet ex noto, quæ lucem affert rebus obscuris, & lumen infert ingenijs, non enim ad cognitionem assequendam multum conduceret ordinata rerum considerandarum dispositio, nisi rationum quoque & argumentorum aliud ex alio, ignotum scilicet ex noto colligentium accederet illatio. Quod quidem Aristoteles in Proemio Physicorum declarauit aperte, quippe qui propositurus ibi methodum in naturalis scientiæ traditione seruandam, ordinem primo induxit à causis ad effectus, à principijs, & elementis com-

ponentibus ad ipsa composita, mox statim accessit ad innuendam rationem argumentandi à posteriori, ut vocant, quatenus insitam naturaliter habemus viam, ut à notioribus nobis ad notiora naturæ proficiscamur. Sic partim ordinem, partim viam doctrinæ docuit in tradenda naturali scientia seruandam, ex quibus duobus ordine, & viâ confurgit methodus, hanc suam geminam vim vel ipsa nomenclatura, vel ut ostendimus, insinuans, ut verissimum hinc etiam appareat Hippocratis in libro de arte monitum, artibus per formas nomina esse indita, quod à ratione sit alienum putare ex nominibus formas productas, cum nomina lege quadam naturæ sint sancita, formæ vero non sancita sint veluti quadam naturæ progermina. Ex his, quæ hæcenus dicta sunt, ad nominalem definitionem attinentia, colligete ea valeamus, quæ essentialem ipsam nobis aperiant, quam quidem non incongrue adducemus in medium si dixerimus, Methodum communiter sumptam nil aliud esse, nisi artificialem progressionem, siue etiam artem Logicam partim ordinis, partim argumentationis vsu aditum scientiarum nobis aperientem. Sumimus hic nomen scientiæ significatione latissima, secundum quam comprehenditur non solum contemplatiuos, sed actiuos etiam, & effectiuos mentis habitus, in quo sensu sumit interdum & Plato, & Aristoteles, & se sumpsisse proficitur Galenus in arte Medicinali Medicinam definiens. Statuitur Methodus ars logica, quia continet modum docendi, siue sciendi, quem Plato in Epinomide, & Aristoteles in secundo diuinorum vocat utriusque *τρόπος*, hoc nomine insinuates progressionem quandam, & viâ, & qualemcumque modum procedē-

etij methodi descriptio

descriptio explicita.

di. At Logici muneris est tractare hanc progressivam, & modum sciendi, quia, vt lepidè dixit Plato in Euthydemo, veluti venator persequitur, & capit lepores, quos demum captos tradit coquo tractandos, sic Logicus inquirat, & inueniat instrumenta sciendi, quæ inuenta scientiarum professoribus tradit arbitrato suo adhibenda. Pertinet ergo Methodus ad logicam, dum in se consistit nulli materiæ applicata, quæ tamen potest omnibus scientiis, & facultatibus applicari pro illarum varietate euarians, & quia applicata subit earum naturam, ideo fit vt ipsæmet scientiæ, & artes subeant nomen methodorum, quibus intercedentibus acceperunt tractationem. Hinc Arist. scientiam tum naturalem, tum diuinam vocat Methodos, tamquam proprijs methodis pertractatas, & non solum in contemplatiuis, sed in actiuis etiam scientiis hoc nomen adhibet, vnde in primo ethico-rum propriam moralis facultatis Methodum inducit, & proprium ei ordinem, propriam argumentandi rationem assignat. Dum ergo sola consistit methodus, est instrumentum Logicum siue habitus mentis instrumentalis ordini, & argumentationi inherens, at dum rebus ipsis apratur, & scientiis iungitur, in earum naturam abit, alienoque habitu induta dicitur methodus moralis, mathematica, naturalis, diuina, Medica, scientiæ formam suscipiens, cui inhaeret, quæ nil aliud est nisi Methodo illa explicatus habitus. Quod apud veteres philosophos, atque adeo probatos omnes auctores ita videtur receptum, vt in nullam dubitationem videatur reuocandum.

Quid sit Methodus Medica curatua. Cap. II.



HOC instrumentum, quod methodum dicimus, facultatibus omnibus accomodandum, Medicinæ etiam fuit aptatum alioquin ipsa non foret Ars, quam tamen artium omnium nobilissimam vocat Hippocrates, in libro legis nomine inscripto. Ac eam esse artem quidem colligit ex eo idem auctor in libro de arte, quod in ea & rectum, & prauum inest, & quod in ea non temere fiunt operationes, quæ temerè factæ nullo modo subsistere videntur, sed nomen tantum inane sunt, at in arte Medica quicquid fit, propter aliquid fieri deprehenditur, & ad aliquid refertur, & omne eius opus ob aliquam causam providentia quædam videtur institutum. Quod esse proprium Methodi colligebat Galenus loco superius commemorato, dum dixit Methodo aliquid inquirere, & inuenire ei ex aduerso opponi, quod est fortuito, temereq; reperire, ad hanc Hippocraticam procul dubio alludens doctrinam, quia temere in artibus incedens, seq; fortunæ committens est instar cæci hæc illac aberrantis, at methodum adhibens est instar propemodum Lyncei omnia vndiq; conspicientis. Rebus ergo Medicis applicata Methodus euasit Medica, & seiunctam ab alijs omnibus proprietatem est nacta. Verum cum Medicina duas habeat præcipuas partes, vt in libro ad Thrasibulum ostendit Galenus, quarum altera, conseruanda valitudini est addicta, altera verò curandis morbis dedita, quam

quam etiam partem magis Medici propriam facit in libro de Arte Hippocrates, secundæ quidem parti adiuncta methodus euasit curatiua, veluti primæ salubris, qua nunc dimissa solam curatiuam suscipiamus consideradâ. Huius nomine suū illud insigne opus quattuordecim libris confiatū inscripsit Galenus, non Medendi, quod nomen cōmunissimum est, sed curandi Methodum nuncupans, τὴν θεραπευτικὴν μέθοδον, curatoria Methodum; quasi à salubri distinctam, quarum vtrique Medendi muneri subiacer, & vtrique suam certam progressionem habet, quia vtrinque aliquid statuitur primum, aliquid secundum, ac tertium, & vltior sit diuīsiō, donec ad id, quod à primordio propositum est, fiat accessio. Vtrique à notione finis ad considerandum propositi inchoamentum facit, & altera quidem sanitatis, altera verò morbi causas omnes inuestigandas suscipit; & ad hanc venandam notionem signorum suppellectilem quasi necessariam opē accersit, & alia quidem habet tamquam concessa principia, à naturali quidem philosopho, vel primò etiā comprobanda, suisque fundamentis fulcienda, alia verò inde deducit conclusionum genera suis rationibus suffulta, suis argumentis confirmata vt in primo Methodi docet Galenus, & in prima sen primi libri cumulate explanat Auicennas. nam magnum est inter Medicos, qui experimento nituntur, & eos, qui methodo vtuntur, discrimen, magnumque interstitium, quantum nempe est inter rationem, & sensum, cuius solius sectatores sunt qui experientiam ducē sibi proponunt, veluti rationis pedisequi sunt qui methodum propositā habent. Nulla arte, rationeue experientia nititur (ait Galenus in primo

Methodi) imo vnius fortunæ fauorem ad ea, quæ querit, iuuenienda requirit. Qui verò rationem inuentionis suæ auctorem statuunt, ac ordinem vnamque viam, quæ ad finem ducat proposuerunt, his necessarium est à primo aliquo auspicari, de quo inter omnes conueniat, sic transire ad reliqua. Quod quidem Medicorum discrimen prius docuerat Hippocrates in libro de Elegantia, experimenti, & ratiocini; explicatis proprietatibus, & ab Hippocrate mutuatus Plato in quarto de legibus exposuerat vtrumque Medicum describens suis exornatum dotibus. Quidā (ait ibi Plato) Medici sunt, quidam Medicorum Ministri, quos etiam medicos dicimus. Qui & in Medicorum officinis versantur. & omnia circumeunt, nec rationem vllam de singulis feruorū morbis aut reddunt, aut accipiunt, sed quæ vñ prodesse videntur, quasi exactè scientes Tyrannorum instar superbè, pertinaciter imperant, atque ita à seruo ad seruū medentes transuolant. At Medicus alter liber liberorum vt plurimum morbos curat, atque considerat, ita vt à principio morbi naturam perquirat, communiterque cum agrotante, atque eius amicis versetur tū discendo ab illis non nihil, tū quoad fieri potest docendo, nec ante imperat quicquam, quàm persuaserit. Atque ita persuadendo semper mansuetè ad sanitatem perducere agrotantes conatur. Quorum quasi penicillo verborum nobis vtriusque Medici, Empirici scilicet in solo experimento consistentis, & rationalis Methodum comitem habentis indole m; & qualemcumque ideam delineauit perbellè Plato. Quam ergo rationem fugit Empiricus sola experientia contentus, hanc Methodi amicus persequitur experientiæ defectui

Qui diffusus Theoremata ordine disponit, principia congruè accipit conclusiones demonstratiuè confirmat. Quæ omnia non tangit inodo, sed ponderat etiam Galenus, dum in primo illo Methodi Medicum facit tum rationis, ordinisque seruatore, tum Certorum principiorum custodem. Si quis ergo inquirat, quid sit hæc Methodus Medica curatiua, quæ solam considerandam, enucleandamque suscepimus, is à nobis dicta superius de Methodo in communi attendentibus hanc responsionem accipiat, eam esse artem, quæ ordine, rationeque vfa inuenit remedia, eorumque rectum vsum ad morborum curationem. Vocantes artem distinguimus à facultate Empiricorum, quæ sola peritita est, nec artis nomine venit dignanda, vt preclare docet Plato in Gorgia, & magis distinguimus ordinem, & rationem adiungentes, quorum nullam habent Empirici rationem, vt non solum in libri Methodi, sed etiam in libro de sectis, & de optima secta ad Thrasybulum ostendit Galenus, & ordinem etiam, rationemque nominantes omnem Methodi proprietatē his quasi Cancellis circumscriptam insinuamus, & ad remedia pro curandis morbis inuenienda referentes curatricem à salubri methodo valetudinis conseruationem moliente separamus, quia curatrix methodus, nō attingit simplicem Medicinæ actum, in tuenda quoque valetudine interdū occupatum, sed respicit actum corporis correctiuum effectui dignis vitijs affecti, cuiusmodi vitia sunt morbi sensibilibiter operantur lædentes. Curare ergo per methodum est versari in depellendis morbis ordine intercedente, & ratione, & quia hic processus innititur indicationibus, quæ desumuntur à morbis, & à con-

nexis cum morbis, ideo curare per methodum est curare per indicationes, veluti ex altera parte curare per experientiam est curare per observationes. Nam, vt sæpe repetit Galenus, Medici Methodo inherentes non instar empiricorum inueniendis per vsum remedijs sunt addicti, sed rationem ducem sectantur, & ordinem, & viam quandam sibi proponunt, & rationis interuentu indicationes quasdam ex morbis, alijsque adiunctis eliciunt, quibus indicationibus intercedētibz remedium sibi suppeditilem parant, quæ in rectum vsum reuocata morborum prestant depulsionem. Hanc remedium inuentionem vocat Logicam Galenus vt ab experimentalis distinguat his verbis in secundo Methodi, ergo cum ipsi de experimentalis inuentione alibi egerimus, de logica in his commentarijs disserere proposuimus. Iure nominat logicā, quia experimentalis nil curans vlū ordinem, vllamue rationem à sola experientia deducit pratidia, eique soli acquiescit, at methodi sectatrix rationem sectatur, & ordinem, & viam quandam quæ ad finem ducat, à primo aliquo auspiciata, indeque ad alia ordinatim progressa, quem esse Logicū progressum dubitauerit nemo. Hic autem progressus per indicationes procedit, hoc est per quasdam insinuationes ab ipsa rerum natura petitas, indeque quod sequens est procul ab experientia commonstrantes. In quibus indicationibus si quomodo locum habeat ordo, & ratio methodum constituentes agnoscere velimus, memoria debemus repetere quæ secundo Methodi scribit Galenus, non posse videlicet indicationes sumi, nisi morborum nobis natura, numerusque innotescat, nec posse hanc notionem comparari, nisi sanita-

artis medicæ mot:
hinc seu de to

nitatis notio præcedat, nec posse hanc suppetere, nisi corporis humani constitutio, eiusque ex elementis constructio, explorata pateat, ut nos reuocet Galenus ad Hippocraticam Methodum in libro de humana natura indicatam, & à Platone in Phædro, ut supra diximus, explicatam, per quam ab elementis incipimus, ad temperamenta veniamus, hinc ad humores, & partes corporis tum similes, tum dissimiles, ad spiritus, ad facultates, & operationes accedamus, vnde mox naturalem constitutionem, & veram partium sanitatem inueniamus, ex qua cognitione prodeat morbi, & quoad naturam, & quoad numerum cognitio, hincque ortum suum suscipiat indicatio, ut hæc præcedentem, habeat enarratum ordinem, præcedentem habeat in rebus illis tractandis adhibitam fidem; qui ordo, & quæ fides vel in ipsismet indicationibus elucescit, & conspicuè apparet, ordo quidem quia in illis est quid primum, quid secundum, quid tertium, ut infra patebit, & à generalissima ad Specificam sit progressus, & in qualibet indicatione ordo seruatur resolutius, ut ab ipsa nominis notatione ad ipsam rei substantiam fiat accessus, à substantia ad causas, & ita à fine ad principia, ut docet Galenus in secundo Methodo, quem ordinem resolutiuum artium proprium cumulate explicauit Aristoteles septimo diuinorum in Medica intellectione, dum dixit à forma sanitatis in anima existente colligi substantiam morbi, ab hac necessitatem æqualitatis inducenda, ab hac usum caliditatis excitanda, ut sit progressio à fine ad ea, quæ inducunt finem. Huc accedit, quod in complicatarum affectionum indicationibus triplex proponitur finis ordinatum attingendus, vnus veluti à causis

sumptus eius quod post futurum est, alter ut qui rationem obtinet eius, siue quo non, tertius demum accelerantium, & urgentium, ut docet Galenus in tertio, & in septimo Methodo. Quantum ad fidem, siue probationem, cum indicationes sumantur à natura, & essentia rei, quæ definitione continetur, & definitio à demonstratione solo situ distinguatur, ut legimus in primo posteriorum, hinc deducitur viam per indicationes incedentem esse viam demonstratiuam, in qua quantus sit usus diuisionis ad demonstrationem tantopere conducentis plenè declarat Galenus in primo de arte curatiua ad Glauconem. Et omnis quidem indicatio arguendi continet vim, vñ ex alio colligens, & indicatum ex indicante deducens, & omnis quoque indicatio comunissimo illi fundamento innititur, & generali ratione illa fulcitur, quam affert Hippocrates in libro de flatibus, & abundè explanat Galenus vndecimo Methodo, contraria contrariorum sunt remedia, vnde prima oritur, & comunissima morbi indicatio, quæ dicitur contrarietas. Sic apparet in progressu indicationum inesse ordinem, inesse rationem, ideoque esse logicum progressum, & cum Methodo factum, hocque nomine ab experimentalis diuisum, vbi nulla ordinis, nulla habetur rationis cura, ut indicatorio acquiescat animus quasi non modo persuasus, sed conuictus, experimentalis non acquiescat quasi vanis spectris delusus. Ac differentiam vtriusque viæ exponens in secundo Methodo Galenus, ad superius positam Platonis doctrinam, alludens hæc ait. Qui nuda afferunt in arte verba, plus credi sibi postulant, quam qui cum demonstrationum fide loquuntur, qui si non aliud, saltem suadere,

ac docere auditorem student, non cogere, iubereque. Primi contra Tyrannorum ritu iubent, ne quaramus actionis causam. His nimirum verbis demonstratoriam indicationum naturam demonstrat Galenus, quam ideo vocat Logicam, tamquam logicis organis inhaerentem, atque suffultam, ex quo patet artem indicatoriam esse artem instrumentalem, quia species refert naturam sui generis, & logica, quæ genus est, instrumentalis est ars ad principalem directam, & licet ut aptata, & applicata artibus principalibus suscipiat, ut diximus, earum qualemcumque naturam, tamen per se ipsam instrumentalis est, & in se considerata talis semper existit, nec principalis apparet, nisi ut alienam quasi vestem induta. Quoniam ergo diffinitæ sunt viæ, planeque distinctæ, quæ per experientiam incedit, & quæ per indicationem progreditur, ne fieret earum confusio, separatim voluit Galenus in libris Methodi hanc ab indicationibus pendentem explicare, ut affirmat in tertio etiam Methodi, ad cuius notionem viæ Magis aperiendam, quid ipsa indicatio sit, breuiter aperire tentandum.

Quid sit indicatio, & quomodo distinguatur ab alijs Medicinæ instrumentis.

Caput III.



Quem locum habet methodus curatoria ad artem medicam relata, eundem habet propria indicatio ad ipsam methodum directam. Nam methodus est instrumentum constituens propriè artem, quæ sine me-

thodo non esset ars, sed sola peritia, & indicatio est instrumentum constituens methodum, quippe quæ afferat, & ordinem, & rationem, quæ duo faciunt viam artificialem ab vno ad aliud, quæ via nil aliud est nisi methodus. Vocatur hæc Methodus ars, sed logica, à logico instrumento condita, ideoque non est per se habitus principalis, sed instrumentalis ad principalem directus, euadit tamen, ac dici potest principalis ut ars Medicæ, cuius vsui inseruit, additus. Methodus scientiæ naturalis quatenus methodus est, est quid ab ea distinctum, ut instrumentum ad eam tradendam paratum, licet aliquando cum ea confundatur, & nomine methodi ipsa scientia vocetur, ordo compositiuius, ac demonstratio sunt instrumenta constituenta illam Methodum, quæ semper ex sui natura insinuat modum sciendi (τρόπον vocant Plato, & Aristoteles) non scientiam, sic in Medicina Methodus est modus sciendi, inseruiens ipsi scientiæ indicatio est instrumentum constituens illum modum, & qualis est in facultate naturali ordinata demonstratio, talis est in Medica indicatio. Ac veluti naturalem contempnas probabilibus solum rationibus philosophantem, ac demonstrationibus destitutum, ira Medicum flocci facias vsui soli addictum, & indicationes omittentem, & seruilem voces, seruorumq; curandis corporibus aptum, at amicum indicationum, ut dixisse Platonem supra annotauimus, nobilem, & nobilium tractandis corporibus accomodatum. Nam primus fortunam sequitur, temerariumque habet incessum, secundus rationem sibi ducem proponit, & naturæ ipsius obseruat nutum. Cuius rei veritas innotescit indicationis essentiam attendenti, & hæc notitia Galeno refe-

referenda venit accepta hanc multipliciter insinuanti. ipse namque explicaturus primo quid indicationis nomen significet hæc ait in secundo Methodi capite ultimo. λεκτίον υπέρ των θεραπευτικῶν ενδείξεων ὡς τοῦτο πρότερον ἐξηγησάμενός το τῆς ενδείξεως ὄνομα τὴν γὰρ οἶον ἐμφα- σιν τῆς ἀκολουθίας ενδείξιν λέγομεν. εὐ- ρίσκεται μὲν γὰρ κατ' τῆς πείρας τὸ ἀκο- λυτον, ἀλλ' οὐκ ὡς ἐμφαινόμενον τῷ ἄν- μιναν. hoc est, dicere debemus de curatorijs indicationibus, hoc ipsum primo nomen indicationis explicantes. nā indicationem dicimus veluti quandam insinuationem consequentiae. inuenitur namque etiam per experientiam id quod consequitur, sed non veluti apparens, & insinuatum in præcedenti. In quibus verbis illud prius animaduertendum non bene Linacrum vertisse Medendi, indicationes, cum dicere debuerit curatorias iuxta significatum græcæ vocis θεραπευτικῶν, quæ curationem insinuat, non medelam. nam medendi indicatio longè communior est Curatoria, quia illa complectitur omnes medicinæ partes, siue ad sanitatem tuendam, siue ad morbos curandos pertinentem, hæc autem ad Solam refertur partem morborum profligatricem. Hanc igitur curatoriam indicationem nil aliud esse decernit Galenus, quàm representationem quandam, seu significationem, seu insinuationem consequentis factam à præcedenti, vt præcedens cognitum inuehat, & inducat cognitionem consequentis in actum deducendi, hoc est remedij ad morbosum affectum expellendum adhibendi. Veluti intemperies calida vt talis insinuat nobis actum refrigerandi, & hæc insinuatio est indicatio curatoria, quia est designatio operationis vsurpanda pro curanda,

illa intemperie, & hæc designatio deducta est vt contenta, & apparens in præcedenti, nempe in calida intemperie; quia cum euident existat illud Hippocraticum axioma, cuius supra meminimus, omnium confirmatum consensu, contraria esse contrariorum remedia, morbus calidus statim insinuat vsum refrigerantiū, vnde possit curari. Hæc igitur insinuatio, hæc inductio consequentis facta per vim antecedentis est indicatio, per quam progrediuntur rationales Medici Methodo inhaerentes, & cuius nullam habent rationē empirici sola obseruatione directi, quia licet etiam vi experimentalium inueniantur consequentia depellendis morbis propositis accomodata, non tamen inueniuntur vt contenta, & designata in præcedentibus, sed solius obseruationis ope collecta, ideoque ipsorum progressio non appellatur indicatio, sed factæ pluries obseruationis applicatio. Quod instrumentorum in curando adhibitorum discrimen clarius percipitur ex his ponderandis, quæ Galenus scribit in libro de optima secta ad Thrasybulum de triplici modo procedendi, quem in remedijs inueniendis Medici seruant, per experientiam, per analogismum, & per indicationem, quorum primus obseruationem sequitur, & obseruatorum memoriam, secundus facit transitum de simili ad simile, & ab vnius rei essentia nota accedit ad alterius essentiam ignotam, quam à simili facit sibi notam, vt discursu quodam sit opus similitudinem considerante, & ab vno simili ad aliud deducente. Tertius progressus per indicationem factus à manifesta rerum essentia manat, in quo cum apparitione nocentium apparent statim ipsa etiam iuuuantia sine vlla cogitationis necessitate,

tate, quia ut sensus apprehendunt oblata sibi obiecta, veluti visus oblatores colores, ita mens in hoc apprehenso morbifico affectu apprehendit statim iuvans ei tollendo accommodatum, quia hoc elusceit, & refulget in illo ob vim communissimi axiomatis ad contrarietatem remedia referentis. Ac veluti naturalis propositionem mente retinens, quæ dicit naturam agere semper propter finem, simul ac inspicit qualemcumque animalis particulam, eam decernit ob usum factam, & usum colligit ex opere naturæ ut in eo contentum, ita Medicus rationalis, ac dogmaticus conspecta morbi essentia ob memoriam narrati axiomatis ex ea deducit remedium opportunum. Verum naturalis cognoscit quidem usum necessarium, sed qualitatem usus cogitur expiscari, quia non elucet in opere naturæ, at medicus non solum necessitatem remedij animadvertit, sed eiusdem etiam qualitatem colligit in morbi essentia apparentem. Ac veluti aduentante frigore, sensumque percellente oritur indicatio tegumenti, quod vestis est, & ex frigoris specie colligimus vestis necessitatem in frigoris phantasmate apparentem, quoniam talem facimus illationem unius ex altero, ut huius rationis conclusio sit ipse vestis apparatus ipsaque indutio, ut declarat Aristoteles in libro de motu animalium: ita urgente morbo in eius cognita essentia remedium ipsum quasi in speculo conspicuum animadvertimus. nam humanus animus aliqua notione informatus multas alias acquirit, aliamque ex alia deducit, quia sunt notiones inter se connexæ, & magno, quasi cognitionis vinculo deuinctæ, & sicuti vis magnetis annulis ferreis communicata facit ut ipsi annuli inuicem cohæreant, & alij

ab alijs pendeant iuxta præclaræ Platonis animaduersionem in Ione; ita vis veritatis notionibus indita est in causa, ut se inuicem illustrent, & simul coherentes alieno lumine appareant. Natura (inquit stoicus ille) quasi normam scientiæ, & principium sui dedit, unde postea notiones rerum in animis imprimerentur, e quibus non principia solum, sed latiores quædam ad rationem inveniendam viæ reperiuntur, errorem autem, & temeritatem, & ignorantiam, & opinionationem, & suspicionem, & vno verbo omnia quæ essent aliena firmæ, & constantis assensionis à virtute; sapientiaque remouebat. Ex quibus equidem verbis duo colligimus ad rem nostram maxime facientia primum quidem causam indicationis ab essentia nota morbi manantem, quæ nulla est alia, nisi quod natura notiones animorum colligauit, & inter se diuinxit adeo, ut altera ab altera pendeat, ac deducatur, & deducta animum faciat in assensione constantem, secundum autem causam vanitatis viæ experimentalis, quam Empirici sectantur, quæ causa pertinet ad temeritatem propriam iuxta Galeni dictum experientia, ad ignorantiam, ad opinionationem, ad suspicionem, unde nullus potest comparari firmus assensus. quin imo non solus experientia modus à firma assensione excluditur, sed alter etiam cum analogismo coniunctus, quia licet hic ratiocinio per similitudinem facto utatur, habet tamen ignotam affectus essentiam, quam ex simili suscipit comparandam, sed similitudinis, ut monebat Hippocrates in libro Medicatrinæ, vel doctissimis imponunt, & lubricum est admodum, plenumque discriminis, ut in Phædro considerat Plato, omne per similitudines factum.

Autum commentum, ut ab analogismo etiam non possit nisi suspicio, fallaxque opinatio generari. Soli ergo via indicationum sectatrici scientia conuenit, & scientiæ sectator verus assensus, planeque constans, ut ad hunc locum illustrandum adducere liceat lepidum illud Platonis exemplum in Memnone de Dædali statuis vel deuinctis, ideoque firmiter hærentibus, vel solutis, ideoque hac illac vagantibus; nec unquam consistentibus, quia notitia ab indicationibus parata est instar statuarum deuinctarum, quippe quæ menti firmiter inhæreat, & in assensu constantē efficiat, notitia experientiæ, & analogismi est instar earundem solutarum, quippe quæ non radices fixerit, & assensum nutantem relinquat.

Verum audiamus Galenum hanc triplicem in curando viam per indicationem, per experientiam, per analogismum in vndecimo capite commemorati superius libelli ad Thrasibulum ita definiendo explicantem.

ἐστὶ ἐνδείξεις ἡ σύμπτως πίπτουσα κατὰ ληψὶς τῷ ὀφελούντῳ, ἀπὸ τῆ τῷ βλάπτοντος κατὰ ληψὶς, ἀνευ τήρησεως, ἢ λογισμοῦ. πῆρα δὲ ὅτι τῷ πλεονακίῃ, καὶ κατὰ τὸ αὐτὸ ἐφαρμένῳ κατὰ ληψὶς, καὶ μνήμη. ἢ ὅτως. ἐνδείξεις ἰστίον ὅταν κατὰ λαμβανόμενοις πραγμασι σύμπτωσι πίπτῃ τὸ οὐ μείρον, ἀνευ ἀποδείξεως, καὶ παρατήρησεως. πῆρα δὲ ἰστί τῷ πλεονακίῃ, καὶ κατὰ τὸ αὐτὸ ἐφαρμένῳ τήρησις τε, καὶ μνήμη. ἐστὶ δὲ τὸ αὐτὸ τήρησις ὅτι καὶ πῆρα. ἀναλογισμὸς δὲ ἐστὶ ὁ ὅχρησις, καὶ τὰ λαλῶν ἀιτίον ὀφελὺν τῶν οὐ μοιότησιν. hoc est, indicatio est occurrens comprehensio iuuantis simul cum nocentis Comprehensione, sine obseruatione vel ratiocinio. experientia est rei multoties, & secundum idem conspecta comprehensio, & memoria. Vel ita indicatio est quando perceptis rebus occurrat iuuans sine demonstratione, & obser-

uatione. Experientia autem est rei multoties, & secundum idem conspecta obseruatio, & memoria. idem autem est obseruatio, & experientia. Analogismus autem est collatio, & comprehensio causarum iuuantium interuentu similitudinū. Ex quo Galeni loco clarè licet colligere naturam indicationis, eiusque, & ab experientia, & ab analogismo differentiam. nam indicatio dicitur illa iuuantis comprehensio, quæ statim sese offert habita nocentis comprehensione citra obseruationem, & discursum. quippe iuuantis comprehensio est fructus immediatus cogniti nocentis, veluti pulchritudo est immediatus fructus iuuentutis, & voluptas studiosæ operationis iuxta Aristotelis doctrinam in decimo ethicorum, nec ad hanc iuuantis comprehensionem opus est vlla vel obseruatione, vel ratiocinatione, sola nocentis comprehensione satis, superque faciente. Veluti comprehensio morbo frigido statim se offert tamquam iuuans vsus calefactiui, comprehensio verò calido occurrit vsus refrigerantium, & hæc oblatio non fit nostræ menti hæc iuuantia, comprehendenti ope vel obseruationis, vel discursus, fit ex ipsa rei natura conspecta, quæ cum sit præternaturalis, ideoque remonenda, insinuat ad sui ablationem vsus sui contrarij, à se quasi à speculo representati. At experientia est euentus frequenter secundum eandem rationem apparentis comprehensio, vel obseruatio, & memoria, & quia est euentuum particularium non attingit essentiam rerum, & sensitiuæ cognitioni acquiescit, cuius exemplum vel ab ipso Aristotele habemus in Proemio diuinorum de pharmaco multoties in biliosis humoribus, & morbis fructuosè experto, ut non

per indicationem hæc sit notitia facta, sed per solam frequentium euentuum obseruationem, & memoriam, vt patet etiam de Galenico exemplo ad portulacæ vsum pertinente, quem vsum in stupore dentium didicimus quia sæpe hanc herbam obseruauimus dentium stuporem aboleuisse, vnde solam memoriam comparauimus ipsius euentus, nulla vel affectionis, vel causæ notione acquisita. Ex quo liquet viam hanc experimentalem satis esse leuem, & lubricam, vt nihil reconditi, nihil solidi continentem, & in solis propemodum sensificis fundamentis consistentem. Vnde Aristoteles loco nuper adducto cum sensibus iungebat memoriam, & experientiam, & vltra hanc constituēbat artem vniuersalibus Theorematis informatam, nam, veluti ex sensuum spectris fit in quibusdam animalibus memoria, ita in homine multæ memoriæ faciunt experientiam, & experientia tandem producit artem, particularibus propositionibus experientia collectis in vnā vniuersalem, quæ communem inducat de similibus sententiā, faciens sensibus quæ progressum docet Hipp. in lib. Præceptionū. Tantū ergo abest experientia ab indicatione, quantū sensus à ratione, species particularis ab vniuersali, opinatio à certa notitia, temeritas demum, & casus à methodo rectè instituta. Analogismus facit transitum de simili ad simile, & iuuantes causas comprehendit virtute similitudinis, vt nulla accedat in proposito casu facta obseruatio, nulla præcedat à cognito affectu deducta indicatio, vt in exemplo Galenico patet hominis à serpente, hemorho vocato demorsu, & sanguinem largius effundentis, cui auxilijs ad sanguinis ob incisionē profluvia facientibus opitulati sunt hi, qui nec affectionis causam habebant com-

peratā, nec obseruationem obtinebāt paratam, sed solam casuum similitudinem eundem, seu quamsimillimum affectum ostendentium sequebantur ducem. Nec sequi poterant sine discussu, quippe qui conferebant simile cum simili, & omnis collatio est discursiua, & de simili ad simile, qui transit ab vno ad aliud progressum facit, qui progressus discursum includit, quinimo analogismo vt nil aliud est nisi à simili argumentari, quod de similibus idem sit iudicium. Ac naturam quidem analogi præclare expressit Aristoteles in quinto æthiorum, & in Poetica quoque dum scripsit, analogum dico quando similiter se habet secundum ad primum, & quartum ad tertium, veluti vt vespere ad diem, ita senectus ad vitam, vnde commutare possumus, & dicere senectutē diei, & vespere vitæ. Sicut ergo se habet sanguinis profluium in eo, qui incisionem sit perpeffus, ita in eo qui à serpente hemorho demorsus, nam in analogia vnico termino bis licet vt, vt docet Aristoteles in quinto æthiorum. Analogismus ergo est progressus per similia, & proportionē inter se habentia, quæ proportio ex casuum similitudine innotescit. Ex dictis colligi facile potest discrimen inter indicationem, experientiam, & analogismum; nam indicatio manat à cognita affectus essentia experientia, nullam habet huius notitiæ curam, & solos euentus eadem ratione factos attendit, analogismus pendet quidem à notitia, at non affectus curandi verum alterius quàm simillimi, à quo noto molitur transire ad curandum ignotum. indicatio respicit præsentem morbi essentiam, experientia respicit præteritos casuum euentus, & quia innititur memoriæ, quæ est rerum præteritarum, vt spes
fu-

futurarum, sensus presentium iuxta Aristotelis decretum in libro de memoria, & reminiscencia, ideo pendet magis à præteriti, quàm presentis consideratione. Sed dices, Empirici ex Galeno sectantur sensum, rationales intellectum, ergo Empirici rebus presentibus inhaerent, non præteritis, facilis est responsio dicentis eos sectari quidem sensum, at præcipue internum, nempe phantasiam, ubi residet, & memoria præteritorum custos. Analogismus transcendit cetere experientiam cum notitia vnus affectionis coniunctus, & ad notitiam alterius conuersus, sed cedit indicationi, quia hæc habet plenam cognitionem adiunctam principalis affectus, ille habet nullam, vel umbratilem, & aliunde inquirendam suscipit, & ad inueniendam ratiocinio, meditationeque indiget, at indicatio ex cognita affectus essentia illico prodit, & sine vlla cogitationis interpositione remedium insinuat, quia, vt ait Galenus, hæc est immediata comprehensio, quæ vel in ipsis belluis ratione destitutis locum habet vix obiectum alioris, vel æstus oblatum percipientibus, quod statim ad calidorum, vel frigidorum usum confugiunt. Quamobrem iure Galenus definiuit indicationem esse comprehensionem iuuantis simul cum nocentis comprehensione sine observatione, & discursu. Et vocauit comprehensionem, vt certitudinem, & celeritatem notitiæ innueret instar rerum à sensibus perceptarum, quæ illis oblata euadunt sine mora cognita, ita etiam insinuationes remediorum statim ex apparente affectus essentia emergunt tamquam propositiones immediatæ, emergunt, inquam, ex sola notitia affectus, nulla observatione, nullo ratiocinio indigentes. Et hæc quidem

videtur indicationis Curatiuæ, de qua hætenus locuti sumus, secundum Galeni placitum natura.

Dubitationis ex dictis emergentis examinatio, & solutio.

CAPVT. IV.



Voniam supra cum Galeno diximus, indicationem nec observationis, nec discursus indigam esse, huius dicti veritatem hic iuxta de causa considerandam suscipimus, videtur namque non leuem in se continere difficultatem: non quidem ex parte observationis, cuius expertem esse indicationem dubitauerit nemo, sed ex parte discursus, siue ratiocinationis, quam non apparet cur Galenus ab indicatione se iungat, nam si hæc indicatio constituit methodum, vt supra cum eodem Galeno ostendimus, & Methodus est via, & ratio, & ab vno ad aliud progressio, quomodo potest indicatio non esse cum ratiocinio coniuncta? Qui colligit indicationem, à nota essentia morbi ad ignotum remedium transit, quod tunc primum fit notum, sed hic transitus quid aliud est quàm discursus? Morbus est calidus (inquit) ergo refrigerandum, concludit febre conuenire auxilia refrigerantia, & humectantia, quia nouit eam esse intempestiæ calidam, & siccam, & ab hac notione ad illam conclusionem accedit, ad curandam febrem opus esse refrigerantibus, & humectantibus, quia morborum omnium hoc est ingenium, vt contrariorum usu curationem recipiant. Hic progressus non modo rationalis est, sed etiam illatius, quippe qui ex præcedentibus notis consequentia ignota deducit, quinimo non potest indicatio esse

indicatio ex observatione discursu.

obiectio

se

se cum ratione, nisi illationem habeat adiunctam: nam ratio, ut est apud Platonem in Thætetō, alterū ex tribus significat, vel orationem, vel discursum, vel definitionem, non possumus dicere indicationem esse cum ratione, ut ratio orationem insinuat, quia indicatio non distingueretur ab experientia, & analogismo, quibus utrisque communis est etiam oratio in colligendis remedijs, ergo vel ut significat discursum, vel ut definitionem, si primum, habemus propositum, si secundum, idem consequitur, quia definitio non differt à syllogismo, nisi terminorum positione, ut legimus in posterioribus Analyticis Aristotelis, & procedere à definitione est uti discursu à rei natura petito. Dum Galenus affirmat iuuantia colligi ex nocentium comprehensione, non ne manifestū nobis discursum ponit ob oculos? nā quid aliud est discursus quā progressio ab vno ad aliud cum notione ignota ex noto? indicatio habet notionem adiunctam essentiae ad affectum pertinentis, & ab hac manat consequentia remedij iuuantis, quod fieri cum discursu omni noto notius est. Seiungit ab experientia indicationem Galenus hoc potissimum nomine, quod experientia rationem contemnit solius sensus studiosa, solius observationis contenta, ad nullam considerandam essentiam conuersa; obseruandis solum frequentioribus euentibus addicta, at indicatio non respicit euentus, rationi est mancipata, & ab essentiae in affectu conspicuae meditatione nata. Verum quid opus est in hoc tempus contere-
re? & pluribus verbis in re nota versari? non ne Galenus experientiam, & indicationem seiungens in primis Methodi libris viam primam vocat empiricam, secundam verò logicam?

quia hæc nempe methodo vtitur, & intercedente ratione discursiva remedium venatur. Hæc ita se habentia dubium reddunt Galenicum dictum, ut diximus, de indicatione non solum citra obseruationem, sed citra etiam ratiocinationem procedente. Verum si rem ipsam æqualiter perpendamus, veritatem facili negotio animaduertemus. Volebat Galenus indicationem distinguere à processu experientiae, & analogismi, ideo dixit eam fieri sine obseruatione, & discursu, quia non adhibet memoriam præteritorum, siue obseruationem, ut experientia, nec adhibet discursum ad comperiendam rei naturam, ut analogismus vi similitudinum rei ignote notionem venatus, sed oblato affectu, eiusque natura perspecta iuuantium oblationem statim habet paratam. Propositio illa, unde manat iuuantis conclusio, est propositio indemonstrabilis, quia est propositio immediata, per se nota, tamquam posita in arte, quæ iuxta Aristotelis documentum in primo posteriorū in diuiditur suppositionem, & definitionem: nam quis probare in arte Medica molitur febrem esse morbum calidum, ac non id potius tamquam principium indemonstrabile accipiat, habeatque compertum, & ratum? hoc namque à Medicis non probandum, sed explicandum dumtaxat; declarandumque suscipitur. Quia ergo non indiget discursu, nec eius operam usurpat ad venandam notionem affectus, veluti facit analogismus, ideo qui per indicationem iuuantia comprehendit, dicitur non solum sine experientia sed etiam sine discursione comprehendere, quia vno, eodemque tempore, & nocentia, & iuuantia comprehendit, & ad inueniendam nocentium naturam non habet opus
di-

discursione, vt opus habet artifex analogismi, cui natura nocentis est immanifesta, & transitu à simili ad simile, ideoque discursu inuestiganda. Sed eadem incedenti per indicationem est manifesta, & aperta, & ab hac notione emergit illico notio iuuantis, qui processus cum sit à noto ad ignotum est procul dubio discursiuus, sed quia sit sine vilo ferè temporis intervallo, non apparet talis, & habitu potius, quam actu factus videtur, non expressus, sed compressus vt ita dicam, & potius discursus ratione dependentiæ vnus ab altero quàm ratione illationis actu deductæ vnus ab altero. Quia veluti artifex citharædus siue vlla meditatione pulsar fides, & sine vlla consultationis industria, ob firmum, constantemque Musicæ habitum, ita Medicus indicationibus addictus nō actu quidem ratiocinatur, & iuuantia à nocentibus ratiocinando deducit, sed cognitis nocentium differentijs perspectas statim habet, beneque exploratas iuuantium differentias, & ita in antecedenti conspicatur cōsequens quasi intiendo alterum in altero instar sensus ad sui obiecti notionem subito peruenientis, non vi discursiua alterum ex altero deducendo, vt sit reuera discursus, vt supra diximus, appareat tamen potius alteritis in altero, hoc est iuuantis in nocente, qualiscumque intuitus, præcipue ad processum analogismi proprium relatus, cum in analogismo sit mira obscuritas, in indicatione mira perspicuitas, in illo ad inferendam conclusionem magna exigatur probatio, in hac ad inuentionem remedij repentina irruat illatio. Quam quidem indicationis facilitatem nullo probationum labore indigentem, & à ratione argumentandi diffitam adeo præclare expressit M. Tullius in

primo de finibus bonorum, vt hinc forsitan Medici veteres, & præcipue Galenus, qui multus est in proponenda, considerandaque indicatione nusquam ab Hippocrate memorata, ansam acceperit eius inducendæ, quippè qui Tulliana scripta vel romano, vel Cræco saltem sermone, in quem erant tunc versa, potuerit legere, aut saltem latini interpretes quam Galenus vocauit *εὐδείξις*, hoc Ciceronis loco moniti vocarunt indicationem. Interest (ait Cicero) inter argumentum, conclusionemque rationis, & inter mediocrem animaduersionem, atque admonitionem, altera occulta quædam, & quasi inuoluta aperiuntur, altera prompta, & aperta indicantur. Quibus nimirum verbis vim indicationis explanat non indigentis exquisitis rationibus ad confirmandum, quibus indigent res occultæ, & inuolutæ vt aperiatur, sed in mediocri quadam animaduersione, & admonitione consistentis, vt quæ ipse inquit de argumento, & conclusione rationis perbellè faciant ad explicationem analogismi, cuius munus est occulta quædam, & inuoluta aperire, & quæ inquit de mediocri animaduersione, & admonitione res promptas, & apertas indicante ad exprimendam indicationis naturam conducunt. Quæ quidem ad analogismum relata videtur quasi discursu destituta, nec tamen hoc in ea imperfectionem innuit, perfectionem in analogismo, imo contrarium vsu venit, quia indicatio ob sui perspicuitatem non indiget exquisito, & expresso ratiocinio, analogismus ob sui obscuritatem indiget, & melior est notio simplici intuitu facta, quàm ratiocinatione suffulta. Est ergo indicatio inter analogismum, & experientiam media, non tam rationis indiga, quàm analogismus, non.

non tam rationis experts, quam experientia, quæ est simplex observatio præteritorum, unde deducit iuvantia, & pender à multiplici recordatione eiusdem rei, nulla habita rationis ratione, & est potius principium artis, quam effectus, ut docet Aristoteles in Proemio diuinorum, iuxta dictum Poliasferentis vsum esse artis genitorem, sed indicatio est fructus artis, est processus rationabilis, rei naturam consequens, & inde remedia insinuans, non respicit præteritorum successum, sed præsentium statum, & propriam constitutionem, quam qui videt simul videt iuvantium inde pendentium consecutionem. Processus ergo indicatorius, ut hoc utar verbo, habet rationem adiunctam, quam habet experimentalis seiunctam, & ratio indicationis dissidet à ratione analogismi, quia hæc ratiocinando vi similitudinum inuentarum quærit immanifestum, & occultum, illa sine discursu laboris in apparente necesse natura manifestam, & apertam, intuetur iuvantis consecutionem. Et quia ars est habitus cum recta ratione effectiuus, ut legimus in vi æthi-
corum, ideo indicatio est longè experientia præstantior, & quia ars eo melior, quo est in probando euidenter, ut legimus apud eundem philosophum in primo de anima, ideo indicatio analogismo potior, nam indicatio, & rectam rationem sectatur ab experientia desertam, & probationem habet claram in analogismo delitescentem, sed indicationis super reliquas vias incomparabilem præstantiam vberimè declarauit Galenus tum in libro de sectis, tum in libro de optima secta ad Thrasybulum. Ad propositam verò dubitationem, quomodo indicatio sit experts, & cōpos ratiocinij, hæc dicta sufficiant.

De speciebus indicationum.

CAPVT V.



Apparuit satis, ni fallior, necessitas indicationis, eiusque in arte nobilitas, quandoquidem apparuit non esse artificem eum, qui solo experimento ducitur, non esse certum artificem eum, qui analogismi norma dirigitur, sed primo nomen periti conuenire solum vsum sectantis, secundo nomen artificis quidem congruere, sed non bene scopum collimantis. nam licet hic ratiocinetur, & neglecto experimento ad rationes confugiat, non ratiocinatur tamen ex propria rerum natura, sed utitur transitu à simili ad simile, qui progressus plenus est discriminis, plenus incertitudinis. At indicationis studiosus non solum supra observationem, & qualemcumque vsum insurgit perpetuus rationis quasi venator, sed propriam etiam rationem, propriam rei cuiusque naturam attendit accuratus speculator, ut ex certitudine agnitæ essentiae certam deducat agendorum suppellectilem, vero quidem discursu, delitescente tamen, suffultus. In quo etiam aperta elucescit Platonici in Phædro dicti veritas, in quo legimus artes omnes magnas exercitatione dialectica, & contemplatione indigere, vel ipso Artis medicæ, & oratoris inducto exemplo, tamquam artium inter se mira cognatione iunctarum, quarum altera corporis, altera animæ naturam inquirendā, explicandamque suscipiat, & ex animaduersa totius, & partium natura remediorum quidē prima, persuasionum autem secunda qualitatem deducat. Verum cum

Me-

Medicina, vt ostendimus, Methodo innixæ indicationes prosequatur, earumq; ductu in propositi finis portum peruenire conetur, conueniunt omnes indicationes arti curatoriæ addictæ in illo communi, quod à contrarietate pendent, vnde nono Methodi dixit Galenus eas omnes vno quasi vinculo contrarietatis deuinciri, & vnam esse solam curationum indicationem generalissimam, ipsam videlicet contrarietatem. nam quid aliud molitur qui curat quàm morbum summouere, & amissam sanitatem restituere? At morbus sanitati contrariatur, & contraria se inuicem expellunt, atq; detrudunt, ideoque contrariorum. vsu contraria sunt expellenda, & in locum depulsi morbi sanitas reuocanda, vt in vndecimo Methodi cumulatè considerat Galenus Hippocraticum in libro de flatibus documentam, quod contraria sint contrariorum remedia, meditatus. Verum quia morbus sæpe materialis est, habetq; suam causam fouentem, & conseruantem, sine cuius ablatione non potest ille auferri, ideo non solum morbi, sed morbigificæ etiam causæ habenda ratio venit, & hæc adimenda vt ille faciliiori negotio adimatur, & non à morbo solum, sed ab ipsa etiam causa indicatio desumenda, & quia viribus sæpe morbus noxam, & qualercumq; labem infert, virium quoque cogitatio ineunda, earumq; custodia, & conseruationi opera impendenda, quia parum prodesset morbum minuere, & propemodum depellere, & vires ipsas in tribus facultatibus, naturali, vitali, animali constitutas adeo labefactare, vel tollabi sinere, vt nulla superesse posset vitæ vsura; ad ipsas igitur vires præcipuus mentis oculus conuertendus, quia vitam tueri debemus, & vires

tueri est ipsam vitam tueri, quæ vel virium possessio, vel earundem actio potest videri. Non licet ergo in multis morbis curatorium vsurpare indicationem, nisi adiuncta etiam fuerit & causa morbigificæ, & virium ipsarum sollicitudo, vt hæc omnia in eundem scopum dirigantur contrarietatis adhibendæ, & contrarietatis interuentu ægritudinis profligandæ. nam vt huius primarij voti compotes euadamus, & de præcedenda causa, & de conseruanda virtute solliciti sumus. Hic est finis communis, hic est vltimus scopus, hæc tendunt medentis remedia, hoc moluntur omnia ab eo inuenta præsidia. Vna est actio, nempe curatio; triplex ad hanc obtinendam adhibita administratio, contrariorum morbo expellendo applicatio, opportunorum causæ remouendæ adiectio, & similitum virtuti conseruandæ appulsio, nam vt morbus est affectus præter naturalis, ita virtus habitus naturalis, præternaturalis affectus expellendus, & expulsio fit per contraria, naturalis conseruandus, & conseruatio fit per similia, vt in memorato ad Thrasibulum libro, & sexcentis alijs in locis docet Galenus. Sed vsus similitum (dicet forsitan aliquis) quomodo locum habet in communissima indicatione curatoria, quæ, vt diximus, contrarietati propriè innititur, veluti vsus similitum ad partem tuendæ sanitatis præcipuè adigitur? quia hæc administratio non est in gratiam tuendæ sanitatis, quæ est absens, sed in gratiam profligandi morbi, qui est præsens, & adhibetur hæc similia virtuti amica, & vitæ conseruatiua non ad tuendum statum præsentem, sed ad immutandum, reuocandumq; absentem, vt alia ratione qui tuetur sanitatem viribus nauet operam, alia qui morbum

q. n. s. i. a. d. s. a. n. e. m. recuperatam.

obiectio

bum curat. Est ergo una indicatio generalissima, interuentu contrarietatis depulsio morbi, sed quia hæc obiri non potest, ni causa presens fuerit sublata, ni virtus languescens fuerit subleuata, ideo alie duæ suppeditas priori ferentes, & commune opus propria ratione perficientes indicationes accedunt, altera quidem causa morbisicæ addicta, altera verò virium custodiæ intenta, & veluti prima indicatio ad morbum contraria suscepit proprium nomen curatricis, quia contraria morbo adimere, est eum curare, ita indicatio causa addicta est præseruatoria, quia causam arcere est morbi imminens incrementum summouere, & indicatio virium nuncupata est vitalis, quia vires custodire est vitam retinere, quæ viribus euanescentibus euanesceat. Cuius vitalis indicationis momentum vel ex eo percipitur, ut considerat Galenus in libro ad Thrasibulum, quod ipsa remedia vel ab affectu, vel à causa indicata eatenus profunt, quatenus naturæ, quæ iuxta dictum Hippocratis est sola morborum medicatrix, opem suppeditant, & quasi manum porrigunt, & huius naturæ tutamini indicatio vitalis incumbit. Quo etiam nomine virtutis roboratio ad affectus curationem conducit, quia illa videlicet roboratio causam præcipuam curationis effectricem reddit vegetiorem, & ad sua munia obeunda paratiorem. Hinc Galenus in nono Methodi has tres indicationum species in examen reuocans vitalem reliquis duabus præferendam decernit, & longe facit dignitate priorem, & has omnes in putridarum febrium curatione locum habere statuit, quem in Ephemeris causa destituitis, & vires non habetis tantibus non habent. Vnde in decimo Methodi à primor-

dio ex superius discussis colligit trias prima esse, quæ in putridis febribus agendorum indicationem prebrant, vnum febrem ipsam, alterum effectricem eius causam, tertium virtutem, ut priora duo summouenda sint, tertium verò tuendum. Sic ad absoluendam generalissimam indicationem, quæ est sublatio morbi, tres species indicationum concurrunt, tribus determinatis addictæ muneribus, curatoria ex morbo deducta, præseruatoria ex causa morbisicæ, & ex virtute vitalis. Quarum indicationum singule suas accipiunt diuisiones non solum ratione maioris, minorisve communitatis, vnde vel genericæ, vel specificæ fiunt, verum etiam ratione propriarum differentiarum eas circumscribentium quas in libris Methodi plene recenset Galenus, nos hic libenter missas facimus, quibus non est propositum in vniuersam indicationum artem explicare, sed indicationes febribus tantum putridis congruentes ad communis examinis includendi redigere, quod ut commodius obire munus queamus, naturam putridæ febris compertam prius, exploratamque habere debemus, quia sic & orientium indicationum necessitatem, & earum adimplendarum rationem facili quidem negotio eruemus.

De Natura putridæ Febris.

CAPVT VI.

Ixiimus supra ex Galeno in primo de differentiis febrium tres esse ipsorum genericas formas, quippe quæ cum cor ipsum præcipue afficiant, id vel ratione spirituum in corde existentium, vel ratione humo-

rum,

rum, vel ratione partium solidarum efficiant, & primo quidem modo Ephemeræ, secundo putridæ, tertio demum hecticæ euadant. Ac veluti in hecticis febribus calor est ipsis membris solidis hærens, in Ephemeris ipsos spiritus occupans, ita in putridis humores lædens non quidem putrefaciendo, quia tunc non foret simplex putrida febris, sed pestilens, verum calidam intemperiem communicando, ut non solum calefiant, sed actu sint etiam adeo calefacti, ut inde manifesta prodeat actionum læsio. Illud tamen animaduersione dignissimum occurrit quod in Ephemeris, & putridis non modo spiritus, & humores, sed solidæ etiam cordis partes afficiuntur, calidiorique qualitate laborant, ut hoc singulis febrium generibus congruat, quia sola pars viuens est morbosæ affectionis compos, ea nempe, quæ sola etiam est sanitatis, ut docuit Aristoteles in libro de sensu, & sensibili. Sed solida cordis affici contingit dupliciter, vel ratione propriæ temperaturæ, vel ratione calidi innati sibi impacti, primo quidem modo afficiuntur solum in febribus hecticis propriam eorum temperaturam immutantibus, secundo modo afficiuntur in omnibus febribus, quia omnes lædunt innatum calidum, illud conuertendo in igneum, ut in primo Aphorism. comment. 16. decreuit Galenus. Illud etiam accedit, quod in hecticis immediatam cor percipit læsionem, in reliquis mediatam, interuentu scilicet spirituum, & humorum, qui licet non sint partes viuentes, constituunt tamen, & complent essentiam partis viuentis, nempe cordis sine spiritibus, & humoribus suum complementum non obtinentis, ut hoc etiam nomine & spiritus, & humores possint esse qualescumque febris

ipsum subiectum, ut existimauit Galenus triplicem febris materiam constituens, continentia, contenta, & impetum facientia, hoc est partes cordis solidas, humores, & spiritus, possunt, inquam, spiritus, & humores vocari aliquale febris subiectum, quatenus scilicet sunt substantiæ ad cordis complementum absoluedum cõcurrentes, suamque omnem labem insito eius calido impertientes, ut dicatur cor pati partim ob affectionem substantiarum ad sui absolutionem concurrèntium, partim ob labem inde innato suo calori accedentem, & in omni quidem febre cor patiatur adæquatè, in Ephemera tamen principaliter secundum spiritus, in putrida secundum humores, à quibus semper fiat qualiscumque vel ipsi solidæ substantiæ communicatio. Verum dimissis modo reliquis duobus febrium generibus, ad putridarum genus in examen reuocatum accedentes dicamus, febrem putridam nil aliud esse, nisi calorem præternaturalem in humoribus cordis accensum ob putridi vaporis præsentiam. Est calor præternaturalis, quia febris est, & febris essentia est in genere caloris præternaturæ, ut docet Galenus in primo illo de differentijs febrium, cuius etiam est illud celebre dictum superius commemoratum, febrem esse calidam, & siccam passionem tamquam conuersionem caliditatis naturæ ad igneam, ex quo manauit mos Hippocratis febrem nomine ignis in Epidemijs potissimum insinuantis, quem modum loquendi apprimè commendat Galenus in octauo de decretis, & modo Platonis præponendum iudicat, omnem animalium calorem, siue naturalis sit, siue præternaturalis, ignem vocantis. Est calor præternaturalis in humoribus cordis ac-

febris putrida quid

census, quia non proprie spiritus, ut
 in Ephemeris, non solida membra,
 ut in hecticis, sed humores in ventri-
 culis contenti primo incaluerunt, &
 accensio primo irrepsit in humores
 tamquam in proprium immedia-
 tum qualescumque subiectum, com-
 munita mox tamen etiam calido
 innato, & referenda etiam ad uni-
 uersum cor, quod non potest indi-
 cari in affectum in sui calidi, nedum
 suorum humorum ignea affectione,
 est calor demum accensus ibi ob praesentiam vaporis putridi, quia licet
 humores cordis non putrescant, ut
 usu venit in febribus pestilentibus,
 putrescunt tamen aliqui humores
 corporis siue in venis, siue extra ve-
 nas locati, à quibus prodeuntes va-
 pores putridi ad ventriculos cordis
 perueniunt, ibique contentos succos
 ad intemperiem febrilem traducunt,
 ut in primo illo de differentiis fe-
 brium docet Galenus. Huius igitur
 febris causa formalis est calor praeter
 naturam, & igneus, materialis, in-
 qua, sunt humores cordis, ipsumque
 cor, ut declarauimus (nam cum fe-
 bris sit accidens, instar accidentium
 non habet causam materialem ex
 qua) efficiens demum est putredo
 humorum, unde ignea fuligines hu-
 moribus cordis communicatae deri-
 uantur. Verum quomodo putredo
 hanc habeat efficientiam, & quo-
 modo putres vapores, & fuligines
 succis commixtae cordis vim habeant
 inducendi febrilem calorem non po-
 test bene innotescere, nisi prius na-
 tura putredinis fuerit explorata, ac-
 curatoque examine perpensa. Duas
 illius habemus per ora virorum vel
 medioeriter eruditorum volitantes
 definitiones, quarum altera est Ari-
 stotelis in Quarto Meteorologico,
 altera Galeni in Undecimo Metho-
 di, quae quidem definitiones licet

quibusdam doctissimis viris fuerint
 visae diuersas putredinum naturas
 insinuare, ut altera sit philosopho-
 rum, altera Medicorum, in eandem
 tamen reuera coeunt explicandi ra-
 tionem, eundem habent finem pro-
 positum, eandem suscipiunt eiusdem
 rei explicandam essentiam. Quod
 patebit nobis aperissime utramque
 definitionem accuratiuscule exami-
 nantibus.

*De natura putredinis ad plenorem
 putridae febris notitiam.*

CAPVT VII.



Vm in quarto Meteorolo-
 gicorum libro mixti gene-
 rationem, quam simpli-
 cem vocat generationem,
 definiuisset, ac declarasset Aristote-
 les, ad eiusdem naturalem interi-
 tum, maximum eius contrarium, pu-
 tredinem scilicet definiendam acce-
 dens haec ait. *τὸ φθαρτικὸν τὸ ἀπορροιατικὸν
 τὸ ἐκ τῆς φύσεως καὶ τῆς φύσεως
 τὸ ἐκ τῆς φύσεως καὶ τῆς φύσεως* hoc est, putre-
 do est corruptio in vnoquoque humi-
 do propria, & secundum naturam ca-
 liditatis ab aliena caliditate, ipsa au-
 tem est ambientis. Quibus nimirum
 verbis nobis ob oculos putredinis
 naturam constituit nam cum haec sit
 naturalis interitus mixti, eiusdem
 naturali ortui ex altera parte respon-
 dens, veluti ortus est productio mix-
 ti facta à qualitatibus actiuis domi-
 nantibus supra passiuas, hoc est à ca-
 lido, & frigido dominantibus humi-
 do, & sicco, ut sit caloris frigore con-
 temperati victoria quaedam, & inua-
 lescentia, ita putredo est corruptio
 eiusdem facta à dominio qualita-
 tum passiuarum actiuas opprimen-
 tium,

rium, ut calor naturalis langueat, & emarcescat, nec frigus amplius moderationis limites obtineat, & humidum, & siccum præpolleant, non tamen coniuncta, nec pristino miscellæ vinculo deuincta, sed abinuicem dissita, & in distinctas partes tendentia. nam in generatione quidem ob victoriam, & præpollentiam caloris humidum, & siccum arctè erant inter se commixta, & simul continebantur caloris dominantis quasi nexu validissimo. At in putredine ob eiusdem caloris insignem languorè, euanescentemq; vim dissiluit humidum à sicco, alterumque ab altero dispefcitur tamquam pristino vinculo destitutum. Generatio ergo mixti, eiusdemque conseruatio à caloris pendet vigore miscibilia inuicem connectentis, connexaq; detinentis, eiusdem mixti corruptio, quæ est ipsa putredo, ab eiusdem caloris prouenit infirmitate nequeutis amplius contrarias inter se qualitates, humidam, & siccam, in vnum iunctas coercere, & quam fecerat generatio istarum miscillam, eandem abolet, dissoluitque putredo, illa quia calor vigeat, hæc quia idem fatiscit. Vnus ergo, idemque calor contrario modo se habens contrariorum affectionum est causa, ortus nempe, & interitus mixti, ut ideo Aristoteles causalem adducturus putredinis definitionem vocauerit eam corruptio nem caloris proprii, & naturalis in vnoquoq; humido factam à calore alieno, qui sit corporis ambientis. est corruptio caloris proprii, & naturalis, quia dum mixtum putrescit, dissolutionem perpetitur humidi à sicco, hanc autem sustinet, quia proprium, & naturalem calorem, hoc est accommodatum propriæ naturæ, & latitudine naturali comprehensum amisit, quo vigente qualitates

illas passiuas simul complicatas derinebat, quo pereunte earundem sustinet secretionem, euanescentis caloris Comitem, veluti eiusdem vigentis est bona miscella, miscellæque conseruatio Comes. Et quia in mixto subiectum caloris naturalis est ipsum humidum, qualecumq; sit siue primigenium, siue aduëritium (omne enim humidum caloris euadit subiectum) ideo putredo corruptio dicitur caloris naturalis in vnoquoque humido, ut in eo calor elanguescat, ipsum autem humidum inualefcatur, viresq; vteriores acquirat, quia prius humidum succumbebat calori, eiusq; ductum, regimenq; sectabatur, apparente autem putredine omne caloris imperium detrectat, & imperantis potius vicem subit, quia à primordio putrescentia sunt humidiora partim quod humidum factum est sui iuris, nec amplius à calore coercetur, partim quod secernitur à sicco, & à penitioribus particulis ad exteriores dilabitur. Interit ergo calor proprius in humido, & vincit humidum victus succumbit calor, qui tamen e mixti corpore egrediens secum trahit etiam humidum, in quo residet, ut temporis lapsu post factam humidi euaporationem insignis superfit siccitas, terrestresq; remaneant putrescentis corporis reliquie. Sed quia omne, quod corrumpitur, suum habet corruptiuum, calor hic proprius, & naturalis in putredine corrumpendus sui corruptorem agnoscit calorem externum, qui validior existens interno calore corporis putrescibilis agit in illum, instar flammæ maioris agentis in minorem iuxta animaduersionem philosophi in libello de longitudine, & breuitate vitæ, & agit non alterando, & extinguendo (hoc namq; pertinet ad solum contrarium) sed alliciendo, ad

ad seq; trahendo, vt per modum similis agat, non per modum contrarij, ideoq; non aboleat, uec pessundet calorem, sed extrinsecus deducat, & à mixto seiungat, quo fit vt non tam corrumpatur calor vt calor, quàm vt proprius, & naturalis mixti, quippe qui non remaneat vel quantus, vel qualis erat, vel vbi erat, sed auctus à primordio, & acrior factus egrediatur è proprio subiecto, illudq; relinquat foras erumpens ab aliena caliditate attractus, quasi ferum trahentem Magnetem consecretans, quæ aliena, externaq; caliditas corporis est ambientis, quaecumque demum id sit, siue aer, siue aqua, siue solidum. & quodcumq; corpus putrescibilem substantiam contingens, & ambiens, quod intensiori calore præditum possit remissionem putrescibilis calorem prolectare, ad seq; allicere, vt si non absolute corruptus, mixto tamen, à quo recedit, verè dicatur corruptus. mixtum hoc namq; non habet amplius pristinum calorem, vnde eius constitutio seruabatur incolumis, quatenus à calore humidum cõtinēbatur cum sicco deuinctum, ad quam caloris in mixto efficientiam respiciens Plato in Philabo dixit mixtionis ptefidem esse Vulcanum, non habet autem, pristinum calorem quia surreptus illi fuit ab aliena caliditate attrahente, & corruptionem subiit non corruptus, corruptionem subiit in eo, in quo non est amplius qualis erat, nec fungitur officio quoungebatur, non corruptus in se, quia non extinctus à contrario, sed attractus à simili, non passus subiecti defectiōnem, sed solam egressionem. Hinc fit, vt mixtum suo destitutum calore frigidum euadat, cum inopia, & indigentia calidi seigescant omnia, ideoq; duæ sint putredinis causæ, in-

terna scilicet putrescentis frigiditas, & externa ambientis caliditas, cuius duplicis causæ putredo sit communis affectio, vt in Quarto illo Meteorologico decernit Philosophus. Cuius tamen dicta illum insinuant sensum, vt principia efficientia, primariaque putredinis causalitas ad alienam referenda sit caliditatem, non ad propriam frigiditatem, qui vltimus nihilominus sensus viris arrisit doctissimis, dicentibus putredinem præcipuè fieri à frigiditate interna, agente in proprium calorem, concurrente etiam calore ambientis. Verum hæc explicatio non consonat Aristotelicis verbis, nec est ratio consentanea, non primum, quia putredinis definitio causam ipsius continens eam refert in solam ambientis caliditatem, cum qua tamen coniungi mox ostenditur propria etiam frigiditas necessaria quadam consecutione, quæ comitatur caloris proprii defectum ab aliena caliditate factum, vt primaria, & antecedens causa putredinis sit caliditas aliena, secundaria, & consecutiua frigiditas propria. non habet secundum illam explicatio, hoc est non consonat rationi, quia effectus postrius referendus venit in causam positiuam, non in priuatiuam, at caliditas externa est positua, interna frigiditas priuatua, quæ consequitur defectum caloris, & est eius priuatio, & primo deficit calor, mox obrepit frigiditas, & qui efficit defectum caloris proprii efficit putredinem, quæ consistit in calore deficiente, vnde prouenit omnis humidi à sicco secretio, omnis mixti dissolutio. Dicitur tamen frigiditas quoq; propria à defectu caloris profecta aliquam habere in putredine efficientiam, quatenus significat absentiam caloris proprii, quæ absentia potest esse causa interitus

aus mixti eodem ferè pacto, quo absentia Gubernatoris est in Navi causa Naufragij, ut legimus in secundo Physicorum, nam idem Gubernator, qui presens facit Navem incolumem, absens facit perditam. Sed quis non videt differentiam efficientiæ? est causa salutis operando, est causa perditionis ab opere desistendo. At non irruit illa perditio, nisi vel procellarum impetus, vel scopulorum accedat obiectio, nam quia contrariorum eadem potest esse causa, dum contrario se habet modo, naturalis calor si adsit, servat mixtum incolumem, si absit, idem evertit, eius autem absentia est propria mixti frigiditas, quæ agere dicitur ad putredinem inducendam, veluti gubernatoris absentia ad naufragium excitandum, sed hæc non est actio positiva, sed actionis potius vacatio, quæ cessante actione ad salutem suæ mixti, sine Navis necessaria illud quidem putrescit, quia non habet amplius calorem suæ constitutionis presidem, pristinaque miscellæ tutorem, hæc autem subvertitur, quia non habet amplius gubernatorem, dirigentem, & à scopulis, salebris, procellisque omnibus avocantem. Perditur navis quia caret rectore illam conservante, & necessariam partibus unionem continente, putrescit mixtum, quia caret auctore, ac tutore suæ mixtionis, unionem partium humidarum cum siccis conservante. Hic erat calor proprius, & naturalis, quo recedente incipit mixti exitium, diffuente humido à siccis ob fractum vinculum à calore institutum. Dissolvitur ergo omnis miscella, & iuxta dictum Hippocratis in libro de natura humana abire humidum ad humidum, siccum ad siccum, calidum ad calidum, frigidum ad frigidum quia hæc omnia in mix-

to erant extra suam regionem, ut in secundo de Cælo considerat Aristoteles, ad quam sponte nature videntur reverti, nisi vi caloris vigentis contineantur. Qui destruit ergo mixti calorem, destruit mixtum, destruit autem calor ambientis illum ad se alliciens, illoque proprium subiectum spolians, calor igitur ambientis evertit mixtum, estque vera, & primaria causa putredinis, quæ secundum causalem definitionem est corruptio caloris mixti, secundum formalem est secretio humidi à siccis, corrumpit autem calorem mixti calor ambientis, quo corrupto obrepit illico dissolutio humidi à siccis, ut ambiens interuentu illius corruptionis hanc efficiat dissolutionem, nec alia nova, insurgit causa ad hunc promendum effectum, quia interna frigiditas nihil est aliud, nisi illa caloris interni absentia ab ambientis calore producta, cuius ambientis efficientia duplicem obit in mixto effectum, immediatum, & mediatum, immediatus effectus est caloris interni corruptio, mediatum verò partium humidarum à siccis secretio. Supponamus gubernatorem Navis vento rapidè afflante fuisse de puppi deiectum, & in Mare delapsum, navemque scopulis impingentem, indeque contractam subiisse exitium; Quam dicimus causam naufragij? Certè rapidum ventum, quia hic gubernatorem deiecit, cuius absentia navis perniciem aduentare permisit. Ventus verum effectum adduxit, Gubernatoris videlicet deiectionem, eius absentia nil facit, imò quia non facit quod conservaret, Gubernator, succedit ipsum naufragium, cuius ventus deijciens statui potest auctor mediatum tamen, quatenus interuentu deiectionis gubernatoris subersionem invehit Navis. Ventum refert calor ambien-

ambientis, deiectionem gubernatoris corruptio caloris in mixto, nauis subuersionem dissolutio humidi a sicco in eodem mixto. Hæc dissolutio, quæ est vera formalis putredo, pendet à corruptione caloris, quam sequitur interna mixti frigiditas omnem connectendi miscibilia vim evertens. Ad corrumpendum autem calorem nil agit hæc frigiditas, quia non est qualitas à calore distincta ad eum imminuendum nata, sed est ipsius caloris priuatio vacationem eius ab opere inducere parata, ut vim potius habeat significandi actionis defectum, quam actionem. Veluti absentia gubernatoris à Navi significat defectum regiminis, sine quo non seruatur nauis, illa autem absentia, consequitur contingentem interdum, ut supposuimus, deiectionem à vento factam, hanc gubernatoris absentiam comitatur temerarius nauis processus, qui non antecedit, sed succedit suppositæ deiectioni. Ita propria mixti frigiditas non facit corruptionem caloris, sed eam factam consequitur comes indiuidua, & hæc frigiditas in corruptione caloris continetur implicita, ut hæc putredinis causa non sit tamquam noua ab Aristotele adducta, sed tamquam obscurè in dictis inserta dilucidius explicata. Cum enim proprius mixti calor corrumpatur à calore ambientis, & cum in hac corruptione contineatur propria eiusdem mixti frigiditas, illud consequens est duas esse propositas putredinis formaliter consideratæ, & dissolutionem humidi à sicco continentis causas, propriam nempe frigiditatem, corrupti in mixto caloris pedissequam, & ambientis caliditatem illius corruptionis effectricem. Quarum tamen causarum hæc est primaria, & præcipua, quæ vim habet positiuam, efficien-

tiam exerceat, calorem mixti corrumpit, hacque corruptione internata eius frigiditatem inuehit, quæ frigiditas cooperatur non tam efficiendo, quam deficiendo ad putredinem, ut calor ambientis sit non solum causa primaria, sed auctor etiam secundaria causa, quippe qui calorem mixti corrumpens propriam in eo relinquat frigiditatem. Quæ mox frigiditas accidentaria euadit putredinis causa, quoniam laxat, ut ita dicam habenas qualitibus passiuis, ut sui iuris fiant, nec amplius caloris naturalis imperio succumbant, sed excurrant liberè, nullis adstrictæ legibus, & sponte sua diffuant, & ab inuicem separentur. Quod quidem præclare explicauit Auerroes duplicem constituens putredinis causam, primariam, & per se, extraneam scilicet calorem in ambiente positum, secundariam, & per accidens, frigiditatem calori proprio aduentatam, quæ concurrat ad putredinem producendam priuando calorem suam propriam functione congregandi materiam, & dominandi super ipsam, quæ functione cessante sequitur putredo, ut accidit in corporibus mortuorum, & senum, & vniuersaliter in rebus inanimatis frigefactis. In quo etiam Auerroes mirè est affectus, & interpretatus Aristotelis mentem, qui allatæ putredinis definitioni superius consideratæ hæc statim verba subiicit tamquam ex prioribus deducta. Quare quoniam secundum indigentiam patitur calidi, indigens autem tali virtute existit frigidum omne, ambæ utiq; cause erunt, & putrefactio communis passio & frigiditatis propria, & caliditatis alienæ. propter hoc enim & sicciota sunt putrefacta omnia, & tandem terra, & simus exeunte enim proprio calido, & evaporat quod secundum

P R I M U S.

candum naturam humidum, & inducens humiditatem non est amplius, inducit enim trahens propria caliditas. En quomodo frigiditatem mixti deducit ex indigentia, & priuatione caloris proprii, quam priuationem retulerat in definitione acceptam calori ambientis, ut ideo concludat putredinem esse sobolem & frigiditatis propriæ, & caliditatis alienæ, quæ prima fuit in operando, & ansam dedit frigiditati in apparendo, quinimo ex caloris indigentia in mixto non solum deducit eius consequentem frigiditatem, sed eodem consecutionis iure ficcitatem etiam, quatenus cum proprio calido ab ambientis caliditate educto, id eoq; exeunte coeuaporat simul insitum naturaliter humidum tamquam caloris subiectum, quod non potest remanere superstes, quia non superest amplius causa humidum cum sicco inducens, & connectens, quæ causa nulla erat alia, nisi pristina mixti caliditas propria, quasi Magnes ferrum, humidum ad se trahere nata, & complicatum cum sicco retinere. Ex his patet veram putredinis, primatiamq; causam esse calorem ambientis, non propriam mixti frigiditatem, nisi consecutiue, ut videlicet consequitur corruptionem caloris proprii in mixto, factam à calore ambientis, ut hinc suscipiat suam qualemcumque efficientiam, quæ accidentaria est, eamque ut talem exercent in permittenda separatione humidi à sicco, in qua constat præcipuam residere putredinis essentiam.

De duplici putredinis specie, altera secundam partem, altera secundum totum.

CAPVT VIII.

Putredinem duplicem ex Arist. in illo Quarto Meteorologico colligimus, aliam quidem secundum totum, per quam sola mixta perfecta putrescunt, aliam vero secundum partem, per quam putrescunt etiam elementa omnia igne excepto, quatenus scilicet alicuius mixtionis participantia euadunt, & priuantur qualicumq; calore aliunde contracto, ut non amittant propriam, insitamque naturam (hanc enim per simplicem interitum, non per putredinem amittunt) sed quandam potius ascititiam constitutionem cuiusdam naturæ æmulam. illud namq; est commune omni putredini, ut Alexander Aphrodisæus obseruat, calorem ipsum corrumpere, siue proprius, & genuinus sit, siue quocumq; modo appropriatus, ut vocant, & aduentitius, ideo in elementis tribus, ære, aqua, & terra, inducitur putredo ex eo, quod aliquam miscellam contraxerunt, & aliquem calorem sunt nata continentem, in vnumq; adigentem substantias inter se diuersas, quam miscellam dum deponunt, & quem calorem dum amittunt, dicuntur putrescere secundam partem, quia non deperdunt propriam substantiam elementarem, sed quandam constitutionem à qualicumq; miscella contractam, & per hanc putredinem fiunt potius puriora, quam secus, non tamen retinet elementa quam prius habebant mixtionem licet imperfectam, nec quem includebant calorem licet aduentitium. Hac eadem

putredine secundum partem dicuntur affici humores nostrorum corporum, proportionem elementis respondentem, bilis quidem igni, sanguis aeri, aqua pituita, terra melancholia; ut ex Hippocrate in libro de natura & ex Galeno in libris de elementis colligimus, nam hi quoque humores putrescunt plerumque secundum partem, quia ut caloris ambientis priuantur aliquatenus proprio calore sibi à visceribus impertito, ut non retineant pristinam formam unde quoque quam etiam possunt aliquando penitus deperdere, quando nempe tanta fit humiditas à sicco secretio, ut quaedam quasi incineratio ipsis obrepit, quo casu dicuntur putrescere secundum totum ob omnimodam substantiae deperditionem. Et sunt humores putredini totali obnoxij, & non sunt elementa, quia haec non sunt perfectae mixtionis capacia, illi sunt compotes, & maiorem, vel minorem subeunt propriae substantiae iacturam pro maiori, vel minori caloris corruptione, à quo calore vel insito, vel ascititio pendet mixtorum vel essentialis, vel accidentalis substantia. Quamobrem allata Aristotelis, explicataque definitio, qua putredinis naturam videtur complexus exacte, utramque putredinem comprehendit, & totalem, & partialem, quia in utraque calor corrumpitur, siue proprius, & naturalis, ut in totali, siue appropriatus, & naturalis semulus, ut in partiali, & in utraque est corruptio alicuius formae vel substantialis, vel substantialem emulantis. nam cum elementa impura putrescunt, amittunt vi putredinis secundum partem qualemcumque substantiam ipsis accedentem ex illa qualitarum imperfecta miscella, quod usu venit etiam in humoribus corporis, qui putrescentes interdum

deponunt non omnem suam formam, sed quam tempore incolumitatis retinebant integram, ut aliquid proprii caloris deperdant, & aliquam sustineant humiditas à sicco separationem, non qualem sustinent corpora solidiora, sed qualem admittunt corpora liquida, & fluxilia, in quibus plerumque non fit omnimodum humidorum, siccorumque separatio, licet aliquando (infrequenter tamen) ipsamet succedat in ipsis mixtis incineratio, quo tempore humores dicuntur putrescere totali putredine, non secundum partem dictam, quia totalem tunc amittunt sibi convenientem naturam, & in elementa dissoluuntur, qui terminus est absolutae, & secundum totum nuncupatae putredinis.

*De Medica putredinis definitione,
Aristotelica conformi.*

CAPVT IX.



Alenica putredinis definitio non differt ab Aristotelica, si lance iusta libretur, nisi vocabulorum varietate, miram habens sententiae convenientiam non enim oportet in eorum errorem abire, qui dicere audent aliam à Philosopho considerari putredinem, à Medico aliam. Quam nimirum sententiam inter primores olim tutatus est in Gymnasio Patavino Acorombonius Medicinae practicae professor ordinarius, & nuper renouandam susceperunt clarissimi viri eandem obtinentes sedem, quorum doctissima de febribus scripta cum applausu leguntur impressa. Inter se conueniunt isti in hoc praecipue dicto, putredinem philosophorum esse communiorē, omnia mixta com-

complectentem, à Medicis consideratam esse angustiore, solos humores, & qualescumq; humani corporis substantias respicientem, illam esse interitum naturalem post certa temporum curricula, statasq; durationis periodos mixtis omnibus contingentem, placida quadam, mitiq; ratione factum, hanc esse interitum violentum quocumque tempore ex inferentibus vim causis, ex morbosis occasionibus a duentatem, rapidoq; impetu insultantem, vt carnes bubulae exempli gratia decem dierum spatio imputres permanfuræ, si decimo solam die putrescant, subire dicantur putredinem à philosopho consideratam, quia pereunt naturali ratione suæ mixtionis debita, & tunc solummodo in elementa soluuntur, cum ea continere amplius iunctæ nequeunt, at humores nostri, qui per multos annos possent durare incolumes, si cito putrescant, nec statum suæ dissolutionis tempus expectent, putredine à Medicis ponderata vocentur correpti, quippe qui non fatalem experiantur corruptionem, sed intempestiuam, & cum impetu factam, à morbosis causis profectam. Sic faciunt philosophorum putredinem vniuersalem, naturaliter interimentem, Medicorum particularem, violentia comitatam, à priori valde diffitam, Vnde varias vtriusq; conditiones deducunt plurimum abinvicem differentes. Verum hoc placitum rectè philosophanti nulla potest ratione placere. nam & philosophorum consideratio complectitur omnia mixta, cuiuscumq; sint generis, eisq; omnibus communem facit interitum putredinem, & quæ Medicorum est in particulari subiecto vniuersalem agnoscit ideam, & communissimam mixtorum omnium corruptionem humanæ potissimum sub

stantiæ, in qua sola versatur, adiungit. Considerat Philosophus eam putredinem, quæ est naturalis interitus mixtorum omnium, est interitus communissimus simplici generationi, hoc est mixtionis, oppositus, vt hæc putredinosa corruptio suo quasi ambitu mixtorum omnium, qualiacumq; sint, quatenus mixta sunt, corruptionem includat naturaliter factam, ideoq; humorum etiam putredinem contineat in humano corpore existentium, quicum sint corpora humida fluida, vt dicebat Auicennas, sint corpora ex quattuor elementis mixta, vt in quarto Meteorologico, & in secundo de partibus considerat Aristoteles, & cum eo in libris de elementis Galenus, ambo ab Hippocratis libro de humana natura hanc doctrinam mutuati, non possunt eam effugere, si naturaliter pereant, rationem pereundi, cui sunt omnia mixta sponte sui obnoxia ab Aristotelica definitione insinuata, vt sint humores vtriusq; compotes putredinis, & eius, quæ dicitur secundum totum, & eius, quæ secundum partem, licet huius frequentius, infrequentius illius. Quod in commentario illius Aphorismi secundæ particulæ, in quo sermo est de cibo præter naturam ingestio, declarauit Galenus vinorum exemplo, quæ vel ex toto acida facta non redeunt amplius ad vini naturam, vel paruo aciditatis sapore suscepto pristinam repetunt conditionem, vt sanguis etiam vel ita corruptatur, vt nulla supersit recuperandi habitus naturalis spes, vel tam paucam labem recipiat, vt recuperandæ prioris integritatis suppetat facultas. Hinc dicebat idem Galenus in tertio Artis Medicinalis in humoribus putrescentibus, vnde febris accenditur, duplicem esse indicationem, euacuationem, & alterationem,

hanc quidem que putredinem finiât manente adhuc substantia, illam vero que totam ex corpore substantiam educat. At dicunt doctissimi illi Medici, superius commemorati distinguunt humorem putredinem à mixtorum putredine, cuius definitionem habemus ab Aristotele, quia illa est violentus interitus ante statutum sepe tempus ex morbofis causis factus, hæc est interitus naturalis transacta propria periodo mixtis contingens. Cui dicto respondere debemus omnem putredinem esse naturalem mixti interitum, si rationem consideremus, quæ compulsus Philosophus eam vocauit naturalem, quæ ratio nulla est alia, cui acquiescere animus possit, nisi hæc, quod decreto nature vniuersalis contingit, vt mixtum ex elementis constatum in eadem elementa putrescendo facefcat, & non combustionem intereat, qui interitus est, nominaturque violentus, sed putredo ex altera parte naturalis non quidem vt ab interno principio factus, cum ab externo semper appareat profectus, sed vt naturalibus legibus, naturalibus decretis consentaneus. Hac igitur communi ratione etiam humorum putredo est naturalis corruptio, quia hæc etiam sectatur eundem nature ordinem, subeunda dissolutionis in elementa, quacumque tandem ratione fiat, non enim illud occurrit discrimen, vt hæc fiat ab externo principio, aliorum mixtorum putredo ab interno, sed omnes omnium sunt ab externo, ambientis videlicet calore, & omnes tamen vocantur naturalis interitus ob apparentem cum decreto naturali conformitatem, habita ratione combustionis, quæ huic refragata decreto violentiæ suscepit nomen. est igitur communis condicio putredinis, quatenus est putredo, esse na-

turalem interitum, nec modus putrescendi tollit hanc, vt ita dicamus naturalitatem, quia non tollit dissolutionem in elementa ab ambiente factam, & modus rei, vt doctè considerat Albertus in quarto Meteorologico, insequitur rem, cuius est modus, proinde causa eius esse non potest, fieri celeriter, vel tardè, hoc, vel illo tempore, est modus consequens rem vel naturalem, vel violentam, ideo non potest esse causa vel naturalitatis, vel violentiæ, sed alia prior ratio esse debet, cur naturalis res dicatur, aut violenta, veluti putredo euasit naturalis, quia licet ab externo principio pendens ordini tamen naturali est conformis, & combustio euasit violenta, quia non solum ab externo principio producta, sed naturali etiam ordini dissentanea. Nec valet dicere mortem distribui in naturalem, & violentam à philosopho partim in quinto physicorum, partim in libello de vita, vt naturalis sit quæ paulatim fit per consumptionem humidi primigenij, violenta quæ morbo, gladio, alijs id genus causis vim inferentibus, & prima in solo senio, secunda in reliquis etiam aetatibus, quam diuisionem inuexit primus Hippocrates in libris de morbis, sectatus est Plato in Timæo, & ab omnibus acceptam confirmauit sepe Galenus, & præcipuè in primo de sanitæ tuenda, non valet, inquâ, hoc dicere, quia in hoc duplici genere mortis duplex effulget corruptionis principium, internum alterum, alterum externum, quorum primum locum habet in morte naturali, secundum in violenta. At in nulla putredine principium conspicitur internum, quod qui statuunt, ab Aristotelis, & Auerrois, addo etiam, Galeni mente planè recedunt, & in omni putredine externum viget principium

in ambiente situm, in omni apparet cum naturali pereundi decreto conformitas, ut ideo omnis euadat hac ratione naturalis, cui postea accedit particularis putrescendi modus naturalitatem non adimens. Quae de causa putredo dicta est naturalis interitus; non quidem quia sensim, vel celeriter fiat, non quia placide, vel impetuose, non quia post breue, vel longum durationis tempus, sed quia ex naturali instituto mixtum in simplicia ob ambientis calorem dissoluit. haec ratio, unde proprie pendet naturalitas, locum habet in omni putredine, ergo omnis est naturalis interitus, siue sensim fiat, siue affatim, siue tempestiue, siue intempestiue, est naturalis, quia distinguitur à combustionem, quae praeter naturale institutum vertit mixtum in solum ignem. Ad quam combustionem relata quaecumque putredo retinet vim naturalitatis. Quod si putredines inter se conferantur, altera quidem & quoad Communem Ideam, & quoad proprium modum est magis naturalis, altera verò minus, quia facta sensim, & statuto solum tempore, habet etiam modum naturae cognatiorem, facta contraria ratione modum eidem naturae difformiorem, sed quoad communem rationem omnis est naturalis, & à combustionis modulo diffita, omnis fit per corruptionem proprii caloris in humido ab externa ambientis caliditate inuectam, omnis fit per separationem humidi à sicco, omnis fit per dissolutionem mixtae substantiae in simplices. Nulla est ergo putredo, quae non cadat sub communissima definitione Aristotelis, à qua nec humorum, nec vilius alterius mixti se subtrahit corruptio, alioquin humores non forent corpora mixta, de quibus mixtis putredo per se, quatenus ip-

sum, & vniuersaliter praedicatur iuxta doctrinam in primo Posteriorum traditam. Medicorum igitur consideratio non aliam inducit putredinem, sed eandem plane redigit in examen, quam tamen coarctat non ratione formalitatis, sed ratione subiecti, dum communissimam mixtorum omnium affectionem in peculiari mixto ad humores, vel qualescumque substantias humanas referendo considerat, & veluti proprium subiectum ex naturali philosophia, seligit; humanum scilicet corpus, in cuius solius meditatione versatur, ita propriam putredinem, quasi ratam sibi congruentem portionem, excerpit, quam pertractandam, examinandumque suscipit, sed & illud subiectum, & hanc passionem aliter examinat, ac philosophia, quia haec cognoscit ut cognoscat, Medicina cognoscit ut operetur, quo potissimum discrimine philosophum à Medico in primo colliget Auerroes distinguunt. Sed hoc discrimen non est ex parte rei consideratae, verum ex parte considerantis, nec est ex parte obiecti, sed ex parte facultatis cognoscentis.

Vna est, eademque sanitas secundum communem rationem, quam philosophus in viuentibus omnibus considerat, & Medicus in humano corpore, ita vna est, eademque putredo, quam ille in mixtis omnibus, hic in humanis vel succis, vel substantijs examinat. Non est haec putredo magis violenta, quam illa, quia omnis putredo ut ab externo pendens principio dici potest violenta, omnis tamen ut naturali instituto conformis, dicta est naturalis, ut uti supra ostendimus, & hic addere etiam possumus vel ex eo quoque apparere putredinem non verè violentam, quod cum violentum sit illud, quod pendet ab externo principio non conferente

rente vim passo, vt legimus in tertio ethicorum, quæ collatio virtutis ex parte passi intelligi potest vel vt per se dantis, vel vt aliunde recipientis, veluti subtiliter in sexto Quolibeto quæst. 14. explicat Egidius, putredo pendet quidem ab externo principio, hoc est à calore ambientis, sed hoc principium confert vim putrescibili corpori, quatenus ei tribuit à primordio præternaturales caloris gradus facessentes demum in propriam frigiditatem, quam in putredine habere qualemcumq; efficientiam superius cum Aristotele ostendimus. Quod non contingit in combustionem, in qua omnis alteratio, omnis mutatio solius externi principij est soboles, at in putredine externum quidem dominatur principium, & veram sibi vendicat efficientiam, interius tamen etiam ipsum passum aliquam vim suscipit effectui confectam ab externo tamen principio profectam. Non sunt ergo constituendæ duæ putredines, altera philosophorum, quæ naturalis sit, altera Medicorum, quæ præter naturam, nec admittendæ sunt illæ differentia, quas inter istas viri illi clarissimi constituunt. Distinguunt primo genere, quia naturalis sit corruptio vique ad elementa, in præternaturali hoc non sit necessarium, corrumpit hoc discrimen, quia in omni putredine hoc usu venit, vt modo fiat cum abolitione formæ substantialis, quando est perfecta, modo cum sola immutatione accidentalis, quando est imperfecta, vt patet etiam ex Aristotelica diuisione in putredinem secundum totum, & secundum partem, & ex definitione viam, & terminum corruptionis complectente. Secundo distinguunt subiecto, quia naturalis putredinis subiectum sit mixtum integrum per se subsistens, vel pars se-

parata à toto habens rationem totius, putredinis præternaturalis subiectum sit pars in toto, humores in corpore putrescentes, sed respondendum, quamlibet putredinem respicere & totum, & partes, hoc est posse fieri tum in toto, tum in partibus, quia respicit mixtum vt mixtum, non vt totum, vel partem, ad illud, & hanc indifferenter se habens, quod expressit Aristoteles dicens simplicem generationem, & putredinem inesse animalibus, & plantis, & horum partibus. At Medici non possunt considerare nisi putredinem substantia partialis, quia considerant in corpore viuente, quod, dum vita superest, non potest totum putrescere, cum hoc pacto post mortem solum putrescat, vnde dixit philosophus corruptionem esse viam ad putredinem. Ex quo pater inanitas eorum distinctio, qui putredinem philosophicam faciunt morte posteriorem, Medicam eadem priorem, quia philosophica potest esse & prior, & posterior, considerata à Medicis non potest ab illata causam esse nisi prior, vt distinguantur non secundum essentiam, sed secundum maiorem, vel minorem ambitum. Tertia differentia nulla etiam est, quæ asserunt per putredinem naturalem corrumpi mixta etiam bene temperata, per alteram plerumque perperam temperata, quia dupliciter respondemus, primo quodlibet putrescens corpus eatenus putrescere, quatenus à bona temperie recedit, dominantibus qualitatibus passivis supra actiuas, secundo ex mala corporum temperatura non fieri vt alio genere putredinis pereant, sed vt citius, & intempestius pereant. Quarta differentia, quod in naturali humidum necessario desinat in fimum, in altera non contingat, refelli etiam potest ex eo, quod omnis

omnis completa putredo hunc parit effectum, cuius rei locuples est Galenus testis in primo de differentiis febrium testatus humores in febribus putrescentes interdum facessere in cineres. Quintum discrimen de causa interna in putredine naturali, externa in altera nullum planè est, cum omnem putredinem statuerit Aristoteles ab alieno calore pendere, qui sit ambientis, in quo vniuersa interpretum schola concordat. Ultimam differentiam non habere locum dubitauerit nemo vel parum in Aristotelica lectione versatus, hanc differentiam in eo constituunt, quòd in putredine naturali externa causa sit aer tantum, in altera putredine sit aer, aqua, & quodlibet corpus ambiens, sed hoc sustineri non potest, quia causam putredinis adducens Philosophus nominat calorem alienum, hunc autem explicans dicit esse calorem ambientis, quo communi nomine omne corpus circumpositum, & putrescibilem substantiam circumambiens insinuat, vt interpretes ferè omnes explanant. Frustra ergo inquiritur discrimen ad separandam philosophorum putredinem à putredine Medicorum, quæ vnā habent, eandemque essentiam, Quod notissimum fuit Galeno magnis laudibus Aristotelicam definitionem extollenti, eandem putredinis formam, eandem causam efficientem adducenti, & eandem definendi rationem æmulanti, vt inferius ostendemus. Hinc Vallesius, qui quartum Meteorologicum doctissimis illustrauit commentarijs, hanc putredinis considerationem examinans hæc scripsit. Errant multi Medici asserentes, de alia putredine differere hic Aristotelem, atque de alia Galenum, vbi de succorum, aut excrementorum, aut membrorum putredine

disputat, eo quòd hic de putredine, quæ est naturalis interitus, sit disputatio, apud illum de putredine, quæ sit per morbos. Verum vt melius innotescat vnā esse, eandemque putredinem, Galeni definitionem in medium allatam, examinemus, & cum Aristotelica conferamus.

Galenicæ definitionis ad explicandam putredinem allatæ examinationis.

CAPVT X.

Galenus igitur in secundo de differentiis febrium, dicebat excrementa corporis talem habere proportionem ad putredinosum calorem in eis accensum, qualem ligna ad ignem obtinent, quia ex ipsis lignis, dum alterantur, generatur ignis, hæc tamen minimè in infinitum tempus sufficiunt ad alterationem, sed terminus alterationis ipsis est humoris innati consumptio, cuius consumptionis accessus cremationis inuehit finem, & eorum reliquijs imponitur cineris nomen, Putrescentium quoque humorum calor permanet dum prorsus sint assati, sed reliquias terrestres habent exiguas, non multas, instar lignorum, quòd in propria substantia elementi humidi non sic includant affluentiam. corruptio illa quidem lignorum violenta, quia combustio, at humorum considerata corruptio naturalis, quia putredo. Ita Galenus mixtorum corruptionem & violentam, & naturalem ponit ob oculos, & vtriusque conuenientiam, & differentiam exponit, violentam corruptionem facit combustionem, naturalem putredinem, vnde aperte colligitur error asserentium.

rium quandam esse putredinem violentam, qualis apparet in humoribus, cum Galenus humorum corruptionem vocet naturalem, quia putredo sit, quasi dicere velit omnem putredinem, qua putredo est, esse naturalem. Hanc ergo definiturus Galenus, qui in secundo illo de differentiis febrium Aristotelicam definitionem extulerat laudibus, huius Philosophi insistens vestigijs vsus est hisce in Vndecimo Methodi verbis. *σημείον τῆ μεταβολῆ τῆς ολῆς τῆ σώματος ὅτι πομένῃς οὐσίας ἐπὶ φθορὰν ὑπὸ τῆς ἐξ ὅθεν ἡρμασίας.* hoc est putredo est mutatio vniuersæ corporis putrescentis substantiæ ad corruptelam ab extrinseca caliditate. Quæ verba caloris proprii, & naturalis in putrescente corpore corruptionem insinuant. nam quid est aliud mutari vniuersam corporis putrescentem substantiam ad corruptelam, quam corrumpi proprium, & naturalem eius calorem, cuius incolumitas arguit formæ incolumitatem, & corruptionem, vt calore corrupto, & euanescente nulla sit amplius mixti forma superstes? A calore igitur pendet omnis mixti corporis substantia, quia cum hæc sit soboles formæ substantialis, forma calorem habet individuum Comitæ, nec potest sine eo consistere. Ac tanto quidem magis hoc verum est in Galenica doctrina, quanto hæc magis desert corporum temperaturæ, primarumq; qualitatem mixtioni, à qua omnem omnium deducit, deducendamq; censet substantiam, vt patet in libris de elementis, ac de temperamentis, & in primo de vsu partium. Quod quidem vel ex eo liquet, quod paullo post allatam superiorem definitionem, quædam verba addit Galenus, quibus plurimam animalium substantiam in calido, & humido postquam confi-

tetur. Quod si constituamus etiam formam substantialem in mixto a temperatura distinctam, vt ponunt Peripatetici, & confirmat interdum Galenus, tunc valde quoq; accommodata est Galenica definitio, quia insinuat qualemcumq; caloris proprii corruptionem, quæ via est ad corruptionem substantiæ, à propria formæ pendentis. nam dicere mutationem totius substantiæ putrescibilis corporis ad corruptelam est innuere non solum totalem, sed etiam partialem putredinem, in qua nondum est corrupta substantia rei, sed est mutatio ad corruptionem, quæ progrediente labe potest contingere, vt Galenica definitio complectatur, & viam, & terminum, & prima cōtineatur mutationis vocabulo, secundus nomine corruptelæ. Et quia tota mixtorum substantia pendet à proprio, & naturali calore, qui primus fuit mixtionis opifex, & est perpetuus, dum viget, conseruator, ideo hæc mutatio ad corruptelam insinuat præcipuè labem in hoc excitatam calore, cuius labis eadem planè affertur causa, quam attulerat Aristoteles, externa scilicet caliditas, quæ tantum obest mixti incolumitati, quantum propria, & genuina prodest, hæc enim proprium subiectum sospes tuetur, & omnem ab eo longè repellit iacturam, extrinseca verò hanc promouet, omnemq; mixti substantiam demolitur, vt ibidem considerat Galenus. Qui cum eandem in putredine consideret, constituatq; causam cum Aristotele, eundem etiam putrescendi innuit modum, per profectionem scilicet caloris proprii factâ à calore ambientis, qui similitudinis iure ad se allicit insitam in mixto caliditatem, & quanto maior est externa caliditas extensiuè potius, quam intensiuè, tanto est interna ad succum,

cumbendum paratior, & quanto hæc validior, tanto illa ad vincendum ineptior, vt yehementia caloris proprii summoueat putredinem magnitudo caloris alieni eandem promoueat. In quo simul conspicitur prædictæ opinionis falsitas, quæ humorum putredinem à causa interna deducebat, & vocabat interitum violentum, cum Galenus omnem putredinem in calorem externum tamquam in causam referat, & naturalem interitum nominet. Nec verò dammandus in eo Galenus, quòd nullam fecerit frigiditatis mentionem, tamquam causæ ad putredinem efficiendam concurrentis, vt fecit Aristoteles, quia cum mutatio ad corruptelam totius substantiæ putrescibilis corporis, quod est solum mixtum, arguat corruptionem caloris proprii veram cuiusq; substantiam vel constituentis, vel comitantis, arguere etiam videtur accessum propriæ frigiditatis, quæ recessum caloris necessario consequitur, vt hæc frigiditas non minus in Galenica, quam in Aristotelica definitione innoscescat, tamquam Implicito modo contenta à solertibus ingenijs eruenda. Nec instatia de combustione vrget, quasi huic etiam definitio illa sit communis, quia præter alias responsiones habemus istam, quòd in combustione non est mutatio totius putrescibilis substantiæ ad corruptelam, vt dissoluantur miscibilia, & reuertantur in pristinam simplicitatem, & corrumpatur illa integritas mixti ex pluribus constituta, vt contingit in putredine, quæ nil aliud quærit, nisi vt dissoluantur mixta in simplicia, & corrumpatur media forma ex pluribus conflata, & remaneant pristinae elementorum formæ, at in combustionem dissolutio mixti in simplicia non quæritur, sed eius mutatio in

ignem, cuius forma proponitur generanda, vt combustio non propriè sit mutatio totius substantiæ ad corruptelam, sed ad generationem ignis pro fine propositam, vt calori putrefacienti sit propositum dissoluere miscellam, & plura simplicia excitare pristino nexu soluta, calori autem comburenti sibi patiens assimilare, mixtiq; vniuersam substantiam, exceptis paucissimis quibusdam reliquijs terreis in ignem conuertere. Huc accedit, quòd nomine caloris alieni malè possumus intelligere calorem comburentem, hunc enim dicere debemus igueum, qui est in summo, & solus potest comburere, dicentes autem calorem extrinsecum intelligimus recedentem à summo gradu, & eiusdem ferè ordinis cum calore mixti, nisi quòd hic intrinsecus, alter autem est extrinsecus. Non potest ergo Galenica definitio accommodari combustionem rectè, partim quia combustio pendet à calore igneo, qui non venit nominandus simpliciter calor externus, sed suo nomine exprimendus, partim quia combustio respicit præcipuè conuersionem mixti in ignem, non eius dissolutionem in simplicia, & respicit potius terminum ad quem, quàm terminum à quo, putredo autem, & Galenica eius definitio e contra se habet, & insinuat potissimum dissolutionem mixti in elementa, separationem humidi à sicco, non nouam corporum generationem, sed educationem eorum, quæ delitescabant in mixto si non actu perfecto, actu saltem imperfecto, qui modus existendi dicitur ab Aristotele secundum potentiam, & virtutem in primo libro de ortu. Hæc ergo separatio insinuat, & maior habetur ratio termini à quo, quàm termini ad quem, quia consideratur mixti mutatio ad

F corru-

corruptelam, quatenus amittit nexum, & vinculum humida cum siccis exnectens, hoc est calorem proprium, ut pristinae formae a mixtione productae proponatur factura, non alterius nisi per genitae acquisitione. Est ergo sola putredo, si vera fatenda sunt, mutatio totius substantiae corporis putrescibilis ad corruptelam ab alieno calore, quia in sola putredine perit universa mixti substantia, & prodeunt elementa suo nexu soluta, nec illa sit novi corporis generatio. Verum alicui negotium fortasse facessent illa Galeni in secundo de differentiis febrium verba, superius commemorata, quibus excrementa putrescentia talem habere proportionem ad calorem ex eis actum assuevit, qualem ligna ad ignem obtinent, sed ligna combustionem perpetiuntur, ut hanc eandem excrementa putrescentia perpeti videantur. At responsio fuerit esse inter haec convenientiam cum magno coniunctam discrimine, conveniant ligna, & excrementa, quia utraq; corrumpuntur a calido, illa quidem igneo, haec autem putredinosa, differunt, quia ligna combusta corrumpuntur violenter, excrementa putrescentia pereunt naturaliter, in lignorum combustionem est nova generatio ignis, & humoris innati omnimoda consumptio, in excrementorum putredine non fit nova generatio, & humidi innati non consumptio, sedeductio, & exeunte calore comitati extractio. Quae omnia Galenicam sententiam, & dictionem diligentius attendenti innotescunt. Ex dictis constat magnam esse convenientiam inter Aristotelis, & Galeni definitionem, siue genus putredinis conspicietur, siue subiectum, siue causam efficientem, nam quan-

tum ad genus, hoc Aristoteles facit corruptionem proprii caloris, Galenus mutationem ad corruptelam totius substantiae putrescibilis corporis, quod idem est, cum propria huius corporis substantia pendeat a calore proprio, subiectum Aristoteles facit humidum unumquodq; quia humidum est illud, quod priuatum calore suo secernitur in putredine a sicco, hoc idem subiectum colligitur ex Galeno, qui asserit animalium corpora, in quibus considerat putrescentes humores, suam habere essentiam in calido, & humido constitutam, ut ad primum pertineat genus corruptionis, ad secundum subiectum putredinis humidum a sicco secernentis, causam demum efficientem Aristoteles facit extraneam caliditatem, quam vocat ambiens, hanc eandem constituit ipse Galenus externae caliditati omnem putredinem referens acceptam, & externam vocans quamcumq; a propria, & interna separatam, tantum corrumpere valentem, quantum interna, & nativa valet concoquere. Unde idem Galenus in 3. Comment. 3. Epidem. dixit, videtur ex materia humida ois fieri putredo, causa vero effectrice externo, & praeter naturam calore. Id satis patere potest, quomodo in animalium corporibus putrescant humores, nam locis contenti calidioribus, & vberiori scatentes humiditate, contrahunt facili negotio putredinem, quia proprius eorum, naturalisq; calor vincitur, corrumpiturque ab externa caliditate, ea scilicet quae residet in corpore continente, quae calorem succorum proprium ad se alliciendo prolestat, ut pro eo ac fieri possit humidum a sicco recedat, qui recessus perierumq; ob humorum liquiditatem non est insignis, nec valde

valde conspicuus, vt ex Galeno in secundo de differentijs febrium commemorato colligitur. Dum putrescunt humores, incrementum sustinent caliditatis partim ob natiuam exterius progredientem, partim ob aduentitiam eis ab ambiente impertitam, & vt calidiores facti fulgines depromunt, & emittunt calefaciendi facultatem habentes, quæ in cordis sinus ingrediendo possunt contentos inibi succos ad præternaturalem quendam feruorem, febris nomine insinuat, traducere. Quamobrem Galenus calidorum morborum in libro de morbis causis causas enumerans refert eas omnes in motum, in putredinem, in calidi corporis viciniam, in constipationem, in calidorum ciborum vsum. Ac de putredine verba faciens ait ex ea calefieri tum reliqua corpora omnia, tum maxime semina, aut stercorea, proficiturque se vidisse columbarum stercorea, quæ ob putredinem accensa arderent. Verum hic oritur dubitatio, si putredo est corruptio caloris, vt supra conclusimus, quomodo ergo incalescunt putrescentia corpora, & pristini caloris accipiunt incrementum? responsio multiplex est, primo quod augetur calor præternaturalis, non qui naturalis est, additur aduentitius, & demitur proprius, & proprius etiam ab internis ad externa euocatus magis sensum pellit, secundo quod à primordio corpus putrescens euadit calidius partim ob externæ caliditatis participationem, partim ob propriæ diffusionem, sed temporis processu idem refrigerescit omni calore, tum proprio, tum alieno destitutum. Putrescentes ergo humores in corpore calidiores existunt, indeque geniti vapores ad cor peruenientes eius succos ad febrem usque calefaciunt, vt calor hu-

morum putrescentium pendeat à putredine, calor succorum cordis à vicinia corporum calidorum, hoc est fuliginum putridarum ab humoribus elatarum, & ad cordis sinus peruenientium. Pater iam quid sit putrida febris, & quam habeat generationem, & quid sit ipsa putredo, & quomodo hæc humoribus addita generandæ febris habeat vim. Nunc putridarum febrium causas breuiter considerandas suscipiamus.

De putridarum febrium causis.

CAPVT XI.



Putridarum febrium, vt putridarum proximæ cause sunt vapores ipsi putrescor impetentes, vaporum ipsi humores corporis putrescentes, humorum putrescentium vt putrescentium transpiratio prohibita, prohibita transpirationis obstructio, obstructionis demum copia, crassities, visciditas succorum, nam confluentibus multis, crassis, viscidis humoribus in partes, inde excitantur obstructiones consuetis vijs obicemponentes, à quibus obstructionibus inhihetur consueta, insensibilis tamen corporis difflatio, qua cessante, coercitisque euacuandis excrementis acrioribus inaugetur, exaggeraturque calor in partibus hanc difflationis prohibitionem sustentibus, qui calor ad humores inibi contentos relatus habet rationem alieni, & quasi calor ambientis vim retinet proximis succos ad putredinem adigendi. Non fit ergo hæc febris sine putridis fuliginibus, nec iste sine putredine, nec talis putredo sine prohibita transpiratione, nec prohibita transpiratio sine obstructione, nec obstructio

etio sine multis, vel crassis, vel viscidis succis. quia si debent incallescere, imo calefacti esse humores cordis, necesse est ut calidiores fuligines, quales e putri minera extolluntur, illuc pervenerint, sunt autem istae fuligines putrescentium humorum soboles, & putrescunt humores quando non habent congruam diffusionem, quae diffusio obstructionis impeditur interuentu, & est obstructio multorum, crassorum, viscidorumque humorum fructus. Quam rem cumulatè explanat omnem Galenus tum in secundo de differentiis febrium, tum in Vndecimo Methodi, ubi alibi traditam doctrinam repetit, illa tantum putrescere corpora, quae cum calida, humidaque sint naturalia, nec perflata, nec ventilata, in calido, humidoque loco maneat, ut horum putredo supponat opportunam transpirationis impedimentum. Sed hoc decernit non posse fieri impedimentum in uniuerso praesertim corpore nisi vel finibus vasorum stipatis, vel tota cute, & accidere in finibus vasorum stipationem vel ex vehementi extrinsecus refrigeratione, vel ex succorum extrorsum in ipsis confertim ruentium crassitudine, multitudine, vel lentitia, ut prohibere transpirationis causa sit vel constipatio, vel obstructio. Quae quidem obstructio habet praecipue locum in ea efficienda transpirationis prohibitione, à qua pendet putrida febris. Verum hic dubitauerit aliquis. Si potest esse putredo sine prohibita transpiratione, & à putredine humorum manare possunt fuligines febre putridam inducentes, quid opus ad eius generationem est prohibita transpiratione? Quod autem sine ista possit esse putredo ambigat nemo, qui consideret prauos cibos in ventriculo posse putrescere nulla inter-

cedente diffusionè prohibita, ut semiputres ingredientes cibi completam ibi facili negotio putredinem contrahant, quod confirmatur clario Galeni testimonio in libro de inaequali intemperie afferentis sine obstructione dari putredinem his verbis. Non ea solum, quae impacta sunt, & perspiratu carent, putrescunt, verum ea quidem celeriter, & maxime, sed putrescunt & alia multa, quae putredini sunt opportuna. Ex quibus liquet verbis obstructionem esse non necessariam, licet valde opportunam ad putredinem inducendam. Huic dubitationi haec afferatur responsio, aliud esse loqui de putredine, aliud de putrida febre, illa potest esse sine prohibita transpiratione, & sine obstructione, haec verò non potest. nam putrescunt ea omnia, quae mixta sunt, & quaecumque humidum habent, dum internus eorum calor extrahitur, educiturque ab externo vincente, siue haec mixta obstructis locis contineantur, siue apertis, licet longè facilius putrescant obstructionibus comitata, quia tunc destituntur congrua ventilatione proprii caloris conservatrice, cuius defectu inualefcit, viresque acquirit hostilis calor externus, & longè difficilius ob contrariam causam putrescant in apertis, liberisque locis constituta. Iure igitur Galenus dicebat non impacta solum, & perspiratu carentia putrescere, quamquam haec celeriter, & maxime, sed alia omnia, quae sunt putredini opportuna. Quasi diceret, putrescunt omnia, quae & subiectum habent dispositum ad contrahendam putredinem, humidum, nempe cum calido mixtum, & principium effectuum ad eam producendam paratum, calorem nempe externum validiorem, quia simul iunctis actiuis & passiuis, remoto impedi-

impedimento, quæ inde nata est egredi passio, egreditur, vt in nono Metaphysicorum docuit Aristoteles. Non est ergo necessaria vel impedita transpiratio, vel obstructio ad inducendam putredinem, quæ sponte sua potest irrepere in corpora ad eam recipiendam accomoda, debitamque dispositionem adepta; hæc tamen impedita difflationis, & obstructionis necessitas habet locum ad inducendam febrem putridam, nam posita quacunq; putredine in humoribus corporis nulla sit generatio febris, nisi putres vapores ex illa minera geniti pertingant ad cordis ventriculos, inibi; contentos humores faciant calefactos, vt in primo de differentiis febrium docet Galenus, & in Vndecimo Methodi, & sexcentis alijs in locis repetit, at si non foret impedita corporis transpiratio, si præsto non foret obstructio, vapores non peruenirent ad cor, sed per *ἐκδιαιρέσιν*, hoc est per immanifestam transpirationem ex vniuersi ambitus meatibus, egrederentur. Ad putridam febrem exiguntur plura, quam ad putredinem, quia ad hanc sufficiunt condiciones illæ, copia humiditatis ex parte rei putrescibilis, vigor caliditatis ex parte ambientis, sed ad putridam febrem non satis est hæc condiciones, suppetere, non satis est ipsam putredinem vigere, verum opus etiam est vaporum putridorum ad cordis sinus aduentu, qui patet expeditus in oclusa constitutione, consuetam difflationem prohibente, apparet autem interruptus in asperione meatuum liberam transpirationem efficiente. Sed vrgebit adhuc aliquis fortasse, quod non solum putredo, sed putrida etiam febris fieri sine transpirationis prohibitione possit, quandoquidem in aere verantes pestilenti inquinamentum in-

de frequenter accipiunt, & putridis pestilentibus febribus affliguntur, licet nullam habeant molestam obstructionem, nullam impeditam difflationem, imo quanto isti meatus habent rationes, tanto sunt ad hanc febrem subeundam paratiores, quantum attinet ad aeris infesti ingressum, licet aliter se habeat quantum pertinet ad apparatus morbosum. Quod ex præclara Hippocratis doctrina colligitur in libro de Alimento, & ex his Galeni verbis elucescit in primo de differentiis febrium. Supponatur pro exemplo in ipso aere inuehi quadam pestilentia semina, atq; eorum corporum, quæ versantur in eo, hæc esse variorum excrementorum plena, paratorum quidem ex se ipsis putrescere, illa sine excrementis, ac pura, atq; addatur prioribus inesse obstructionem meatuum vndiq; ac plethoram appellatam, ac vitam otiosam in multis epulis, & ebrietatibus, & Veneris vsu immodico, & cruditatibus, quæ omnia prædicta necessario consequuntur. Alijs autem omnibus corporibus puris, ac sine excrementis insit vltra ea, quæ diximus, commodum, quod omnibus spiraculis corporis neq; obstructis, neq; pressis angustia bene transpirat, exercitatio vero prudenter instituta, ac victus ratio moderata, deinde his ita subiectis cogitabis num sit verisimile, vtraq; corpora conspiratione putridi aeris affici. Nonne consonum est hæc statim à prima inspiratione initium putredinis accipere, vnde in maiorem noxam prolabantur, quæcumq; autem vacua excrementis, & pura sunt, ea vel vlllo modo, vel exigua labefici, vt facile ad habitum naturæ recurrant. Ex his quidem Galenicis verbis innotescit corpora excrementosa, & obstructa esse magis in pestilenti

lenti aere febribus obnoxia (quia iuxta dictum philosophi in secundo de anima actiuorum actus sunt in subiecto bene disposito) sed tamen nec putra, & obstructionum expertia esse ab eisdem tuta, vt hinc patet non esse obstructionem, seu prohibitionem transpirationem ad has inducendas febres necessariam. Verum huic etiam dubitationi respondere licet, differte pestilentem febrem a putrida simpliciter dicta, quia pestilens putrida ponit humores cordis in putrida dispositione, febres autem simpliciter putrida ponit eosdem in sola calefacta. Quod colligitur ex Galeno in tertio de praesagitione ex pulsibus duplicem praecipue pestilentem febrem memorantem, quorum altera ipsam cordis substantiam putrescentem excipit, altera vero humores in eius sinibus contentos solum putrescentes. Vnde Auicennas prima Pen. Quarti Canonis loquens de pestilenti febre dixit aërem pestilentem venire ad cor, & corrumpere temperiem spiritus, qui est in ipso, & putrefacere circumdantem ipsum humiditatem, vt inde per vniuersum corpus praeternaturalis caliditas diffundatur. Possunt ergo putrescere cordis humores per solum putridi aeris adhaesum nulla etiam intercedente obstructione, quia quod tangitur a putrido putridum fit, sed non possunt reddi calefacti in simplici putrida febre nisi per accessum vaporum a putri minera procedentium, nec possunt isti vapores ad cor accedere, nisi praclusum habeant in corpore per alias vias egressum, vt non sit ad generationem febbris pestilentis necessaria obstructio, sine qua potest illa etiam putrida excitari, sit tamen ad ortum putridae simplicis adeo necessaria, vt sine eius interuentu, nullum persit habere lo-

cum. Concludamus ergo putridae febris causam esse ipsam putredinem, putredinis causam esse transpirabilis excrementi retentionem, huius retentionis obstructionem, obstructionis multitudinem, crassitudinem, & lentorem humorum, vt haec sit affectuum, & causarum ordinata conexio, putrida febris, putredo, promixta transpiratio, obstructio, humorum crassities, lentor, multitudo. Qua de re consonum est rationi Galeni verba perpendere in Vndecimo Methodi sita, rem hanc omnem non minus eleganter, quam cumulatè explicantia, sic tamen vt ad exactum sensum eruendum solertiori indagine videantur indigentia.

Galenici dicti ad causas putridarum febrium attinentis explicatio.

CAPVT XII.

Cum vellet Galenus in memorato libro curatorias indicationes ad genus putridarum febrium attinentes excerptare, summam primo singula genera, quae in nobis praeter naturam sunt in his febribus dicta repetendo collegit sic inquit. Ad curatorias indicationes propositi nobis febrium generis reuertamur, repetamusque singula genera, quae in nobis praeter naturam sunt, non causarum modò, verum etiam morborum, & symptomatum. Et causarum quidem genera sunt multitudo, & crassitudo, & lentor humoris. Causa simul, & symptoma est transpirabilis excrementi retentio. simili modo causa pariter, & affectus est ipsa putredo. Morbus verò tum obstructio, tum febris ipsa, symptoma verò est ipsa transpirabilis excrementi retentio. Recenset his verbis inter

inter causas Galenus multitudinem, crassitudinem, & lentorem humoris, quia causa hæc sunt obstructionū, quibus viscera, & vasa corripuntur, quæ multis, vel crassis, vel lentis repleta succis vias deferunt obstructas, nec ad naturalis effluuii egressum, pristino more expeditas. Vnde transpirabilis consequitur excrementi retentio, obstructarum viarum soboles, quam vocat causam simul, & symptoma. est. n. causa putredinis, symptoma obstructionis, causa quidem putredinis, quia hæc transpirabilis excrementi retentio auget, exag-geratque alienam caliditatem humoris infestantem, & ad putridum inquinamentū adigentem, est symptoma obstructionis, quia à viarum obstructione pendet hæc effluuii retentio, tamquā symptoma, pertinens ad retentum immodicum, simili modo causam, & affectum vocat ipsam putredinem, hæc. n. est causa febris orientis à vaporibus putridis ad cordis sinus accedentibus, & humores inibi contentos ad calidam intemperiem adigentibus, eadem vocatur *Diathesis*. Græce, hoc est dispositio, seu constitutio præter naturam, quia de rebus præter naturam omnibus erat sermo propositus, & est putredo affectus præter naturam, ut symptoma, quo symptomatis nomine, in quinto de simplicium medicamentorum facultatibus insinuauit putredinem Galenus, est autem symptoma, pertinens ad affectum corporis præter naturalem, ad qualitatem nempe mutaram, quia in humorum putredine immutantur colores partium, qui iuxta dictum Hippocratis efflorescunt in cute similes dominantibus humoribus, immutantur odores, saporis ab ægotantibus percepti, immutantur tactiles qualitates, tum primæ, tum secundæ à natura-

li statu recedentes, & hæc omnis immutatio est ipsius putredinis indiuidua Comes, quia putrescentes humores sunt fluxiliores, molliores, calidiores, odorem, saporem, colorem à naturali difformem præferentes, ut non solum sint causa febris, sed immutata etiam qualitatis, ideoque symptomatice affectus subiecta, ut hoc pacto putredo, & causa naturam obtineat, & naturam symptomatis si non formaliter, saltem connotanter. Et quia affectus, seu dispositio non solum significat symptoma, sed etiam morbum, vel ipso Galeno teste in primo de symptomatum differentiis, possumus etiam dicere putredinem esse affectum non modo, ut symptoma, verum etiam, ut morbum quatenus putredo est comitata calore alieno, & intemperie calidiori attinente ad partē, ubi humores putrescunt, in qua parte dicitur focus residere putredinis, ut hæc intemperies calidior sit morbus partis illius, vel etiam partium omnium in vniuersali putredine, nec tamen est febris nisi prius cor fuerit affectum, & à corde calidum reliquis partibus fuerit communicatum. Putredo quidem sumpta formaliter nil aliud est, nisi humidi à sicco secretio, at sumpta causaliter, ut vocant, innuit semper, & connotat alienam caliditatem, quæ ratione remanentis in partibus inquinamenti incrementum accipit, & morbosa enadit, ipsa igitur putredo considerata cum sua causa contentiua, vel quasi contentiua habere potest rationem affectus morboſi, & potest eadem esse, & causa morbi, & morbus, morbi causa quia febrem efficit, morbus quia calidam intemperiem partis, vel partium connotat, nec unquam ab hac intemperie recedit, dum vigenſ putredo consistit. Putredinem quidem.

dem Fernelius vocat morbum formæ, ac totius substantiæ, cuius naturam morbi ab intemperie facit toto celo disiunctam, sed hanc doctrinam in nouationem iure merito à clarissimis viris explosam neque admittendam censemus; leuibus fundamentis innixam, & præclara Galeni dogmata communi doctorum confirmata consensu perturbantem. Satiùs ergo est putredinem ad intemperiem redigere, vt declarauimus, & sic Galeni dictum explicare causam simul; & affectum vocantis putredinem ipsam, quamuis magis ardeat prima explicatio, eam inter symptomata recensentes, quæ magis ardent eo præcipue homine, quod Galenus inquit simili modo, & causam, & affectum esse ipsam putredinem, referens modum similitudinem ad prædictum transpirabilis excrementi retentionem, quam simul esse dixerat causam, & symptomata, vt pariter ipsa putredo partim inter causas, partim inter symptomata veniat referenda. Quod confirmatur vel eiusdem Galeni testimonio putredinem his verbis in Quinto de simpli medicam. facult. symptoma nuncupatis. Septica medicamenta ita vocantur; licet non sint verè putrefaciencia, symptomatis similitudine, cum vtraque corrumpant corpus citra doloris sensum. multis. n. modis corrumpi quid potest, si quidem quæ nimio plus refrigerata sūt, aut exalfecta, tum exiccata, aut humectata, ea omnia corrumpuntur, cæterum non quicquid corrumpitur, putrescere dicimus, sed quibus id cum fœtore accidit. Hæc Galenus, ex quibus apparet ab eo putredinem vocari symptoma, quasi malam qualitatem, ab intemperie cum fœtore coniuncta manantem. Iam obstructionem, & febrem voca-

uit tantummodo morbum, quarum rerum primam constat pertinere ad morbum instrumentalem in mala conformatione, & in via constitutū, secundam ad morbum partium similiarium in intemperie collocatum. Et ad ipsam obstructionem tamquam ad morbum referens rursus ipsam transpirabilis excrementi retentionem vocat eam tantummodo symptomata, quia vt vmbra corporis, ita obstructionem cōsectatur huius excrementi retentio, & est symptoma, ab ipso obstructionis morbo productum, quia ex partibus, vel vasculis humore vel multo, vel crasso, vel lento infarctis, & obstructis non potest fieri consueta difflatio, sed cohibetur pristini effluuij egressio, & sic symptomatica excrementorum euacuationi destinatorum retentio. Quæ superius non solum symptoma, sed etiam causa fuerat nuncupata, quia tunc ad plura referebatur, non ad solam scilicet obstructionem, cuius est soboles, verum etiam ad putredinem cuius est auctrix, vt prima ratio ne sit symptoma, secunda verò causa. At quando ad solam obstructionem refertur, vt postremo loco fecit Galenus ansam facienti accipiens ex obstructione commemorata, solius symptomatis nomenclaturam suscipit, nec est inanis repetitio, sed accommodata variarum in considerando rationum distinctio. Sunt igitur septem præter naturam subordinata in febribus putridis humorum multitudo, crassitudo, lentor, obstructio, excrementi transpirabilis retentio, putredo, febris, vt tria prima sint causa quarti, quartum quinti, quintum sexti, sextum demum septimi, & hæc dicta sint de causis putridarum febrium internis tamen, & proximioribus, quia externarum, & remotiorum nullam suscepimus faciendam

men-

mentionem, illas tantum considerasse communi quadam ratione contenti, quæ potiores habent ad suppediandas indicationes facultatem. nam præclaram habemus Galeni doctrinam in quarto Methodi, quæ docet nullam externarum, seu primitiuarum causarum curationis indictricem esse, quamuis Empiricis pars sit totius syndromes, siue concursus ad curandum obseruati, rectæ tamen sectatoribus methodi nil indicare, sed ad affectus aliquando cognitionem conferre.

Dubitationis ad causas febrium putridarum attingentis examinatior, & solutio.

CAP V T. XIII.



HÆc de causis febrium putridarum sententia, quam communis Medicorum excepit consensus tamquā à Galeno propositam, & frequentius repetitam, non arrisit clarissimis viris, quorum in putredine explicanda suo etiam Marte philosophantium commemorationem superius fecimus, aliam circa huiusmodi causas doctrinam paucis, ut ipsi rentur, animaduersam in medium adducuntibus. Damnant ipsi perulgatissimam hanc opinionem existimantium putridis febribus nullas alias congruere causas, nisi prohibitam transpirationem, & obstructionem, quatenus hæc necessariam euentationem inhibeat, & euentatio inhibita putredinem inducat putridarum febrium auctricem. Hanc igitur opinionem damnant, & ratione, auctoritateq; conuincendam suscipiunt. Ratio illorum hæc est, quod

cum putredo omnis siue naturalis, siue præter naturā sit corruptio mixti similis ab extranea caliditate, non ob solam prohibitam transpirationem augetur hic calor extraneus, sed ob alias etiam causas, in quas etiam referenda erit putredo. Auctoritas multiplex Galeni adducitur ostendentis ex pluribus causis augeri calorem extraneum, quas in libro de causis morborum, & in primo de differentiis febrium quinario complectitur numero, transpiratione videlicet prohibita, motu, vicinia corporis calidi, calidorum assumptione, & putredine, ut his quinque modis fieri debeat putrida febris. Adiungunt auctoritatem aliam ex secundo de differentiis febrium in capite de febre sanguinis, qui non ex vnica, sed ex multiplici causa declaratur putrescens. Ex libro tandem Galenico de inæquali intemperie deducunt clarissimum testimonium non ex sola obstructione putredinem fieri, sed ex pluribus causis alibi relatis, quos locos præcipuè referunt partim ad libros de differentiis febrium, partim ad librum de causis morborum. Nec admittunt responsionem eorum, qui affirmant posse dari quidem putrescentes humores sine obstructione, & prohibita transpiratione ex alia causa pendentes, sed hoc non efficere putridam febrem, hanc non admittunt responsionem, quia de humoribus primas obsidibus vias statui hoc possit, ut nisi obstructio intercedat, veritaq; euentatio, febrilem non inducant calorem, non possit de humoribus intra venas ex defectu facultatis putrescentibus asseuerari, qui nulla interposita obstructione putrescentes necessariam inuehant febrem. Falsum ergo esse, concludunt ex sola obstructione, & constipatione transpirationem impediente

diente fieri febrem putridam, imo hanc plures habere causas, vade pendeat, partim externas, partim internas, vt inter externas referant aërem, cibos assumptos, medicamenta putrescentia, inter internas contactum rei putridæ, intemperiem humoris putrescentis, & caliditatem externam. Ac vt externarum missam faciamus considerationem in nullum dubium reuocandum, contractum rei putridæ afferunt fieri vel ratione partis solidæ putrescentis, vel ratione humoris, intemperiem humoris intelligunt, cum euadit intemperatus vel ob humiditatem, vel ob frigiditatem putredini magis obnoxius nomine caliditatis externæ comprehendunt non solam prohibitam transpirationem, sed omnem causam, quæ potest extrahere calidum innatum ab humore putrescente, siue sit calor solis, siue motus medicamenti accepti, vel ira immodica, siue alia quæcumque causa. Sed non solam obstructionem faciunt prohibitæ transpirationis causam, verum facultatem etiam, & instrumentorum inobedientiam adiungunt, eum facultas nempe est imbecilla, & arteriæ, venæque corporis malè obediunt. Sed quoniam hæc determinatio videtur esse contra Galeni auctoritatem afferentis nono, & Vnde eimo Methodi a sola prohibita transpiratione fieri febrilem putredinē, & hanc solam causam commemorantis, respondent ipsi hoc esse de solis synochis febribus intelligendum, de quibus solis sit Galenicus ibi sermo. Ad auctoritatem eiusdem Galeni in primo de differentiis febrium capite tertio scribentis corpora posse humores corruptos contrahere ex malis cibis, nec tamen febri laborare, nisi obstructio accedat, & prohibita transpiratio, respondent verba

tunc fieri de humoribus corruptis, qui primas vias obsederint, non de his, qui venarum ambitu contineantur, sine obstructione etiam putredinem subituri. Hæc est illorum de causis putridarum febrium explanata opinio, his, quæ narrauimus, fundamentis suffulta. Cui tamen nulla esse ratione acquiescendum censemus, quia habet & rationem, & auctoritatem valdè repugnantem. ratio est ex eo deducta, quod non potest fieri febris putrida simplex, hoc est pestilentia expers, nisi putridæ fuligines ad cordis sinus perueniant, & morbosam caliditatem humoribus illis imprimant, at non potest fieri hic putridarum fuliginum accessus, nisi obstructio, & verita transpiratio præsens sit, his namque absentibus genitæ fuligines euanescent, & per ambitum corporis detruduntur, vel saltem à natura providentiæ plena à penetralibus cordis arcentur, Vnde prodijt Hippocratis dictum in libro de alimento ab iniurijs internis tutos esse illos, qui raros habent, & patulos corporis meatus, his autem iniurijs obnoxios illos, quæ eorundem meatuum angustiam fuerint passi. Potest nimirum fieri putredo sine obstructione, vt supra etiam diximus, sed hæc putredo non potest esse febrilis causa, quia licet ex se promat fuligines putridas, hæ tamen non retinentur ad cordis sinus peruenturæ, sed foras excluduntur in tenues auras abituræ. Nec oportet dicere id verum esse in humoribus, qui in primis vijs contenti putrescant, qui febrem non faciunt nisi adiunctam obstructionem habeant, non esse verum in his, qui intra venas ex facultatis languore putruerint citrà obstructionem etiam febrem facturi. nam quicquid sit de hac labe humorum, obstructionis non indiga, ex hac.

hac quidem ortæ fulgines putres, si meatus pressio fuerint aperti, suam habebunt diffationem, nec ventriculos impetuerint cordis ad excitandam febrem. Accedit clarissima Galeni auctoritas hoc testatum sapius relinquentis, & præcipue in Vndecimo Methodi, atq; adeo prius in nono cum febrili putredine prohibitam etiam transpirationem assidue coniungentis, imo de hac prohibita transpiratione pulchram distinctionem afferentis, posse hanc fieri vel constipatis corporis partibus, vel obstructis, & primo quidem modo fieri plerumq; febrem, licet continentem, non putrem, at secundo modo fieri etiam putrem, si constipatio in primo sit vehemens, obstructio in secundo insignis. Nec admittenda venit allata responsio, Galeno in his libris sermonem esse de febribus synochis, & continentibus ad omnia vasa atinentibus, quia licet fateamur in Vndecimo præcipue Methodi synochos in exemplum assumi, vniuersalis tamen methodus particulari adiungitur febrium generi, & vniuersalis methodus ex vniuersali desumitur putredinis, & causæ eam facientis natura, vt declarauit ipse Galenus in sexto capite scribens. Aliæ quidem curationis indicationes ex communi genere earum, quæ ex putredine sint ortæ, accipiuntur, aliæ ex propria earum substantia. Quibus verbis indicationem proponit putridarum febrium communem, & particularem, & præmissa in septimo capite ipsarum diuisione triplici, vt febres aliæ putredinis causam præsentem habeant, aliæ non habeant, vt vel per totum animal, vel per partem aliquam diffusa putredo sit, vt vel cum inflammatione sint coniunctæ, vel citra hanc consistentes, & proposita ad considerandum

indicatione communi, quæ à causa sumitur adhuc manente, & quæ à putredine, vt inde possit fieri ad magis particularia accessus, aggreditur in octauo capite examinare communem indicationem à putredine, & causa putredinis desumptam, ac de putredine, & causa sic loquitur, vt prohibita transpirationis, & obstructionis necessariam mentionem faciat, & in diffationis debita defectum febrilis caloris originem referat. Hac non est peculiaris indicatio febrium continentium quatenus continentes sunt, sed est generalis indicatio earum quatenus sunt putridæ, secundum quam consideratio nem cum vniuerso putridarum genere habent communitatem. præclarum enim ordinem, vt diximus, proposuerat Galenus in illo septimo capite indicationum omnium ad febres putridas atinentium, indicationem nempe à causa adhuc manente putredinis indicationem ab ipsa putredine, indicationem à putredine per totum corpus diffusa, aut per maximè principalia vasa, indicationem à putredine vnam partem corporis occupante, indicationem à putredine vnam quandam partem obfidente, indicationem à curandis particulis suggestam, indicationem deum à viribus ægotatis præstitam, qua indicationum serie affirmat absolutam contineri de sanandis putridis febribus methodum. Hinc in octauo capite Methodum hanc perfectus à putredine primum indicationes deducebat per quas putridus, corruptusque humor omni ratione vacuetur, putrescens moderatis motibus, & refrigerante perspiratu ad exactam symmetriam adducatur, & ad indicationem à causa putredinis petitam descendens hanc causam nil aliud esse dicebat nisi prohibitam

transpirationem per contraria summouendam, & quia vel densatis exiguus meatibus fit, vt constrictis corporibus, vel humoribus tum abundantia, tum crassitudine, tum lentitia sua obstruentibus, densitatem quidem indicare rarefacientia, constrictionem fundentia, abundantiam vacuantia, crassitudinem dissecantia, lentorem detergentia. Verum quia diuersae causae vel totum afficere corpus possunt, vel vnam quampiam partem, ideo statuebat vel toti corpori indicata remedia esse adhibenda, vel parti solum affectae; varianda tamen pro varietate partis. Quibus verbis clarissimè ostendit eandem putredinis causam habere locum & in synochis febribus, quarum putredo vniuersum corpus, vel maximam, & praecipua vasa occupat, & in reliquis omnibus putridis, quarum putredo partibus dumtaxat est addita, vt prohibita transpiratio, tamquam immediata putredinis causa, in omnibus vrgeat, in omnibus contrariorum vsu sit summouenda, illo tantum intercedente discrimine, quod in synochis remedia sunt toti corpori adiungenda, in reliquis febribus verò partibus solum affectis. Quae si vera sunt, vt esse verissima constat, quomodo possunt asserere Galenum in solis continentibus febribus prohibitam transpirationem facere putredinis causam? non ne ostendimus nos eandem in omnibus putridis proponi, quia omnes habent putredinem, & putredo omnis est prohibita transpirationis soboles? non ne ostendimus illud solum intercedere discrimen, quod in continentibus prohibita transpiratio obsidet vniuersum corpus, vel plurimas eius partes, in reliquis putridis ad partes determinatas venit referenda? Non est ergo haec synocharum proprietas,

sed putridarum omnium communitas. Quod nisi dicamus, corrumpitur tota machina ad curandas putridas febres à Galeno in illo vndecimo pulcherrimè extructa, corrumpitur illa praecleara Methodus Galenica, cuius in praecedentibus capitulis meminimus, vt curaturus febrem necesse habeat putredinem inhibere, vt altera indicatio oriatur à febre, altera à putredine, & à febre rursus duae, vt accensa febris portio curetur, accendenda inhibeatur, & aliae duae à putredine, vt putredo facta sanetur, generanda sistatur, & quia generanda pender à transpiratione impedita, ab hac etià aliae duae indicationes, vt humor retentus euacuetur, retinendus prohibeatur, & quia prohibitio praesidijs fit de obstruentibus, aliae duae emergunt indicationes, vt facta obstructio sanetur, futura propulsetur, sanatio fit per deobstruentia, propulsatio per affluxum obstructiui succorum compescencia. Haec est pulcherrima Methodus, quam vel omnibus putridis sanandis communem fecit Galenus, vel solis continentibus propria, si communem, habemus id, quod volumus, omnes putridas pendere à prohibita transpiratione, si propria, quis non videt auctoris defectum, nullam regulam tradentis curandarum reliquarum febrium, quae plures sunt, & frequentiores, & solas continentes considerantis, quae pauciores sunt, & rariores, cum tamen vniuersalem curandarum omnium, rationem fuerit & pollicitus, & professus? Nec valet Vallesij consideratio Galenum quasi per necessarias causas resolvere febrem putridam in putredinem, hanc in prohibitam transpirationem, hanc in obstructionem, hanc in abundantiam, crassitiem, lentorem humorum, non quod putauerit non posse fieri putredinem
fine

sine impedita transpiratione, sed quod censuerit in curatione perinde esse, ac si non possit fieri, quia in laborantibus febris putrida optima semper sint remedia aperientia; non valet, inquam, hæc animaduersio, nam si potest esse febris sine impedita transpiratione, quid opus est aperientibus vim augendæ febris habentibus; etsi aperientia semper iuuant, contrarietatem in corpore supponunt, clausiorem videlicet, & impeditam transpirationem; cum contrariorum contraria sint remedia. Ex dictis ergo innotescit nullam esse responsionem eorum, qui ad continentes solas febres referunt prohibitam transpirationem tamquam putredinis causam, quam cum Galeno explicauimus omnium putridarum communem, veluti nulla est etiam eorundem responsio ad locum Galeni allata in primo de diff. feb. cap. 3. ubi humores posse corrumpi affirmat, & febrem tamen non inducere, si desit obstructio, & impedita transpiratio, quem locum de humoribus primarum viarum intelligendum contendunt, non sufficit hæc responsio, quia Galenus humores ibi considerat in vniuerso corpore consistentes, & plethoram efficientes, qui vel in ventriculo, & iecore coctionem temporis processu nanciscuntur, vel in vniuersum etiam corporis habitum per apertos meatus euacuandi transmuntur, si corpora benè diffidentur. At si meatus obstruantur, humoresque stipentur, putridarum febrium decernit fieri insultum, quia promptissimè putrescant, quæcumque calida, & humida, & multa sunt in locis calidis, nisi diffidentur, ac refrigerentur. Restat ut rationes eorum soluamus post labefactatas responsiones. Arguebant ergo ex na-

tura putredinis, quæ pendet ab extranea caliditate, & caliditas extranea non à sola manat transpiratione prohibita, sed ab alijs etiam causis sæpius à Galeno commemoratis, respondemus caliditatem extraneam à multiplici quidem prodire causa, sed caliditatem putredinis febrilis simplicis, non pestilentis effectricem à sola impedita diffusione, & hanc solam caliditatem considerari à Galeno putridas febres examinante. Aliud est considerare putredinem absolute, aliud putredinem febrilem, illa potest citra impeditum transpiratum consistere, hæc non potest nisi in febribus pestilentibus, ut supra explicauimus, ad quam pestilentem putredinem respiciens Galenus in libello de inæquali intemperie dixit accendi posse febrem & citra phlegmonem ex solis humoribus putrescentibus, quod non ea sola, quæ inculcata sunt, & perspiratu prohibita putrescant, verum celeriter ea, maximeque, ceterum putrescant & alia multa, quæ putredini sunt opportuna. Quod Galenicum dictum veritatem habet in pestilentibus febribus, & habere etiam potest in simplicibus putridis, si distinguamus prohibitam transpirationem in apprehensam sensu, & ratione contemplabilem, quasi dicere velit Galenus non solum in prima, sed in secunda etiam febricitate homines posse, quæ explicatio colligi potest ex illis verbis (quæ inculcata sunt, & perspiratu prohibita) ex quibus innui videtur diffusio impedita sensui manifesta, qualis solet esse in partibus phlegmone affectis, præterquàm febris quod fieri potest etià ex impedita transpiratione solo ratiocinio contemplabili, quam etiam complectens in Vndecimo Methodi omnem febrem putridam

tridam in difflationem retulit impeditam. Quantum ad auctoritatem secundi de diff. febr. in capite de febre sanguinis, ubi Galenus eum putrescere asserit cum à natura non vincitur, respondemus sanguinem, ut febrem facit, duplici nomine ab eo constitui putridum, & quia non diffilatur, & quia à natura non vincitur, imò hæc naturæ, seu facultatis imbecillitas, cuius defectu non vincitur sanguis, est cum impedita transpiratione coniuncta, siue in venis sit hæc imbecillitas, siue in arterijs, nā cum vis earum languet, retinentur excrementa euacuanda, unde emergit obstructio, & impedita difflatio, Quod ex quarto Capite Vndecimi Methodi, in quo illi multum constituunt momenti, aperte innotescit, ubi hæc inquit Galenus. Ostensum est, ubi morborum causas reddidimus, illa tantum putrescere corpora, quæ cum calida, humidaq; natura sint, neque perflata, neq; ventilata, in calido, humidoq; loco maneant. Quod si in motu sint, ventilenturq; ac perflentur, posse ea non putria, integraque seruari, potissimum quæ corpora sua ipsorum natura reguntur, ut animalium, & stirpium. Ea namq; (sicut in opere de natural. facult. est proditum) ab initio congenitos secum motus habent, quibus superflua excernant. Ostensum non iniussu & in alijs duobus libellis est, quæ sit tum respirationis, tum pulsuum utilitas ad perflatum, ventilationemq; corporis, atque eius natium calorem tuendum. Itaq; si quid in eo manifestè putrescere debeat, dictas transpirationes impeditas esse oportet. Ex his Galenicis verbis patet non fieri putredinem insignem sine aliquo transpirationis impedimento, & facultatem imbecillam non per se, sed interuentu impeditæ difflationis fieri

ri putredinis causam. Maneat ergo inconcussa Galeni doctrina in libris methodicis omnem febrem putridam in putredinem, omnem putredinem in impeditam transpirationem, omnem impeditam transpirationem in obstructionem referentis.

Quæ indicationes veniant in putridis febribus colligenda.

CAPVT XIV.

SI dicta de communibus indicationum speciebus memoria repetamus, facile inueniemus quot sint, & quales in putridis febribus colligenda. nam in his omnes illæ locū habet, quæ in quibusvis morbis veniunt adimplenda. erat Galeni sententia xi. Methodi diariorum, & hecticarum febrium esse veram, propriamque curationem, quia in his de summouendo præternaturali affectu vniuersa est Medici cogitatio, at febrium putridarum vocatam curationem secum habere prouisoriam etiam partem quam *προφύλακην* appellant, coniunctam, cum de causa, quæ morbum creat, adimenda in hoc febrium genere onus incumbat. Quæ tamen artis pars curatricis retinet nomen, quia ab ea, quæ purè, sincereque prophylatica dicitur, in eo dissidet, quòd sub hac iam sensibiliter ex ipsa causa morbus est genitus, in prophylatica imminet generandus. Ad curationem igitur putridæ febris non solum essentia morbi, sed ipsa etiam causa venit indicatoriè consideranda, & quia morbo seu aduersatrix virtus est opposita, quam solet hæc febris labefactare, hæc toto medici conatu occurrit subleuanda, ideoque aliam etiam

etiam à virtutē indicatio apparet elicienda. Ita fit (quod supra etiam ostendimus) ut iuxta Galeni in decimo Methodi decretum tria prima sint, quæ in propositis ob putredinem febribus agendorum indicationem præbeant, febris nempe, effectoria eius causa, tertia virtus ipsa; ita quidem ut duo prima summouenda sint, tertium verò retinendū quia quod naturale est bonum est, & vitæ, incolumitatisque amicū, at quæ præter naturam sunt mala sunt omnia, salutisque inimica. Tres ergo sunt primæ, & quasi familiam ducentes indicationes, quæ omnes omnium morborum complectuntur, ut supra ostendimus, indicationes, à causa febris, à febre, à virtute, ut prima sit indicatio quasi præseruatoria, quæ tamen curatricis nomen ob allatam superius causam nanciscitur, secunda verò, propriæque curatoria, quia de profligando affectu sollicitudinem præfert, tertia verò vitalis, quia virium tutelam molitur, cum quæ vitæ ipsius tutela coniungitur. In qua quidem indicationum concursione solerti opus erit ingenio. Medici, qui eas iustas librandas lance suscipiat, & causam, febrem, virtutem inuicem conferat, eisdemque tum à febre, tum à causa remedijs indicatis, ad eorum usum promptè accedat, & pugnantibus inuicem indicationibus, vnā præferat vel quæ à viribus sumitur, vel quæ à causa, vel quæ à febre, & eā, quæ ponderis plus habeat, magis excipiat, eique magis indulgeat, sic tamen, ut nec reliquas, licet infirmiores, despicatur ducat nam verissimum est fundamentum à Galeno in quarto Methodi iactum, appellendum esse animū ad id præcipue, quod magis vrget, altero non neglecto. Et hic etiam habet locum Hippocratis di-

ctum in Epidemijs asserentis nihil temerè, nihil negligere, quia nec temerè accedendum est ad eam absolvendam indicationem, quæ minus habet momenti, minusque videtur vrgerè, nec obiter, vel etiam negligenter versandum in his, quæ licet minus vrgeant, locum tamen in indicando suū habent. Virtus quidem, & morbus, & causa morbifica quid indicent supra ostendimus abundè, virtutem nempe ut re naturalem, vitæque amicam indicare sui custodiam, & conseruationem omnimodam, & morbum, & causam morbificam ut res præternaturales vitæque aduersantes indicare sui ablationem, & custodiam, conseruationemque fieri per similia, ablationem per contraria ut ideo in febribus putridis oriantur indicationes partim similibus, partim contrariorum, similibus quidem ad conseruandam ægri virtutem, contrariorum ad depellendum morbosum eiusdem affectum. In quo etiam apparet putridarum febrium à diarijs, & hecticis diffidium, nam diariæ nullam ferè, vel exiguam habent à virtute indicationem, habent inter dum à causa, & semper ab essentia febris, ut declarat Galenus in octauo Methodi, hecticæ à virtute, & à morbo indicationes suppeditat, nullam per se à causa deducit, quia sunt immateriales febres, nec alter indicatur vsus euacuantium, quàm ob affluentiam excrementorū corrupta replentium, ut obicem ponant remedijs, & febrem, & virtutem respicientibus. At putridæ febres, & materiales sunt morbi, ideoque causæ necessariam animaduersionem inuehunt, & viribus effatū dignam labem asserunt, ideoque earum habendam rationem insinuant & morbi sunt in intemperie, ideoque:

que deductam à propria essentia indicationem habent. Quod in duobus primis de victu acutorum libris nec semel, nec obscure docuit Hippocrates, & in decimo, & vndecimo Methodi plenè explicauit Galenus, à quo omnes indicationes ad curationem putridarum necessarias ad tria prima genera, ad tres generales, vniuersalesque modos redactas diximus, febrem scilicet ipsam, huius efficientem causam, & ægrotantis virtutem. Nec aliæ excogitari præter istas indicationes possunt, vt patet ex superiori capite de speciebus indicationum in communi, quia vel fuerint præseruatoriæ, & has præbet causa, vel curatoriæ, & has affert febris, vel demum vitales, & has demum impertit virtus. Quòd si tres curatorios scopos in nono Methodi constituit Galenus, eosque ad morbum ipsum, ad corporis temperamentum, & ambientem nos aerem adigit, considerat ibi scopos verè curatorios tantum, in quorum censu nec indicatio à viribus, nec indicatio à causa propriè continetur, quarum postrema præseruationem qualemcumque respicit, prima verò vitæ custodiam, & conseruationem. Vnde hæc legimus in eo libro dicta à Galeno. Prima omnium indicatio est quæ à virtute sumitur, verum non sic prima vt quæ curationem doceat, cum ex numero curatricium indicationū non sit, verum, vt ita dixerim, vitalium, seu ad vitæ custodiam attinentium. A virtute deductam indicationem vocat non curatricem Galenus, quia curatio insinuat affectionis præternaturalis remotionem, virtutis consideratio naturalium affectio num custodiam, & conseruationem, in qua consistit vitæ tutela, ideoque huiusmodi indicatio vitalis obtinuit nomen. nam hæc nil nobis conducit

primo, & per se nec ad valetudinem, nec ad ipsam à morbis liberationem, sed ad solam vitam, licet secundario, & ex accidenti interdum virtutis roboratio ad morbi curationem conferat, vt in nono, & Vndecimo Methodi docet Galenus, quatenus scilicet virtus facta validior, & calor innatus euadens vegetior & concoquere potest quæ concoquenda, & expellere quæ expellenda, & alterare quæ alteranda, vt morbosa remoueatur affectio, & pristina restituatur sanitatis possessio. Verum virtutis tutela vitam præcipuè tuetur, ac seruat, & hic est eius primarius finis, sed si valet vltèrius ad profligandum morbum, hoc ei conuenit accidentaria, quadam consecutione primarium finem comitante. Virtutis ergo indicatio est per se vitalis, & potest solum per accidens euadere curatoria. Causæ etiam indicatio suoapte nutu præseruatoria propriè est, arcendæ imminenti morbi generationi intenta, sed quia in febribus putridis hæc causa partim fecit, partim factura est morbum, ideo potest quodam modo ad curatricem etiam redigi, vt supra diximus, licet non sit propriè talis, verum præseruatoria, vnde mirandum non sit, si Galenus de propriè dictis curatorijs indicationibus loquens omisit indicationes à causa, & à virtute, & commemorauit eam, quæ ducitur à morbo, eiq; adiunxit duas, alteram à temperamento, alteram ab aere, quæ licet ad curationem propriè pertineant, sunt tamen in febribus curandis potius signa, principali indicationi affectum consecretanti inseruiencia, quàm verè indicationes, vt Galenica verba ponderanti apparet manifestum.

*De indicatione Vitali, quæ à viri-
bus deducitur.*

CAPVT XV.



Voniam vitalis indicatio prima est dignitate, vt in nono Methodi docet abundè Galenus, sit hæc eadem nobis considerantibus prima ordine. Diximus hanc vocari vitalem, quæ à viribus desumitur, quia intendere viribus est intendere vitæ siue viribus consistere nequeunt. Hæc indicatio est solius alimonix, quia vires indicant sui custodiam, atq; tutelam, vires perennem sustinent lapsum ob necessariam nostræ substantiæ dissolutionem, perennem debent recipere sui restorationem ob additum alimonix vsum, nam cum custodia ac tutela fiat per similia, alimonia est similis, quia licet alimētum à primordio sit contrarium alito, in fine tamen euadit simile, vt docet Hippocratis in libro de alimento, Plato in Timeo, Aristoteles in secundo de anima, & Galenus in secundo de naturalibus facultatibus. Quod si morbosam affectionem, & febrem ipsam nullo pacto offenderet alimonia, nos viribus solis intenti ægros instar sanorum aleremus, vt considerat Galenus circa finem primi de victus ratione in acutis. Sed quia vt sapo robur, ita ægroto morbosum affert additamentum iuxta celebrem Hippocratis animaduersionem, ob id morbosa affectio venit in examen reuocanda tamquam vi prædita alimonia prohibenda, nam quanto maior morbus, tanto maior ex alimento veniens iactura, quia diuertit, & auocat naturam à morbificæ materiæ coctione, & qualicumq; elaboratione, innatumq; ca-

lorem in alimentali alteranda substantia detinet occupatum. Vnde Hippocrates in prima Aphorismorum particula decernebat, quando morbus extremos habet labores, tenuissimo victu tunc esse vtendum, quia, vt ait Galenus in commentario, tunc phlegmasiæ maximè existunt, siue quis per phlegmasias velit intelligere illas, quæ propriè dicuntur inflammationes, siue etiam libeat febres vnà complecti secundum antiquam vocabuli acceptionem. Accedit illa etiam ratio, quod melius est naturam permittere circa morbi coctionem vacare, morbo in suo vigore consistente, nec eam distrahere ad cibos nuper acceptos conficiendos. Hinc idem Hippocratis in secundo de victus ratione in acutis ciborum adiectioni intendendum multo minus decreuit, quia, vt animaduertit Galenus in commentario, quantitas ciborum ægris exhibendorum tutiorem habet defectum, quàm excessum, excessu maiorem noxam, & correctu difficiliorem inuehente, defectu verò minorem, & correctioni magis subiectā. Nec documentum huic contrarium tradit antiquus Magister dum in prima Aphorismorum particula statuit in tenui victu ægros delinquere, ideoq; magis obladi ob difficiliorem erratorum in eo tolerantiam, quàm in paullo pleniore, vnde tutiorem, & minus periculosum concludit non modo sanis, verum etiam ægrotantibus paullo pleniorum victum, quàm tenuem, & admodum exquisitum. Quæ dictio videtur antecedenti quasi diametro repugnare, quatenus in antecedente victus tenuis commendatur, atq; præfertur, in hac verò aphoristica paullo plenior laudatur, tutiorque censetur. At si quis dicta rime-

H tur.

tur attentius, omne apparens diffidium de medio tollet facilius. nam primo licet Aphorismum sic explicare, ut dicamus non fieri in eo victus tenuis, & plenioris collationem in ægrotantibus, sed noxarum ex erratis in utroque victu commissis emergentium comparationem, mox dicere valeamus documentum esse Hippocraticum intendendum quidem esse tenuitati victus in morbis præcipue vigentibus, & huic magis, quam copiam, illud tamen respiciendum, quod errata quædam quasi necessario obrepunt, ad quorum sustinenda detrimenta parum est victus tenuior aptus, ut ideo Medicus in cibis instituendis non eam omnem tenuitatem amplectetur, quæ sit ægritudinis grauitati consentanea, sed errorum etiam obrepentium, & noxarum inde prodeuntium rationem habeat, ideoque aliquid adiungat ad illam quantitatem, quam viribus sustinendis censeat opportunam, tantillum scilicet, quantum errata committenda, & commodè perferenda videantur exigere, ut modus ciborum non viribus modo retinendis, sed erratis etiam tolerandis adaptetur, quasi innuat Hippocrates non ad extremam victus tenuitatem accedendum in morbis, ubi erratorum imminet discrimen, quia secundum communem paræmiam quod nimis attenuatur facili negotio dirumpitur, sed ad paullo pleniorē, minus exquisitam transeundum, ut non prohibeat tenuitatem, quam semper plenitudini præferendam indicat, sed tenuitati modum qualemcumque imponat, & quosdam quasi cæcellos circumscribat. Quam ergo præbet alimoniam indicationem virtus, adimit ex altera parte morbus, quia illa debet conseruari, hic

aboleri, conseruatio fit per similia, abolitio per contraria, conseruatio virtutis per alimenta, morbi abolitio per machinamenta naturæ ab innato calore pendentia, ad conseruandam ergo virtutem alimenta, sunt vsurpanda, ad profligandum morbum caliditas innata in officio continenda, ideoque quoad eius fieri potest liberanda, & eximenda ab onere conficiendorum ciborum, ut morbus sibi vendicat abstinentiam, virtus quærat alimoniam. Verum hanc aliter quærit in sanitate, aliter in morbo, ut obseruat Galenus in Commentario Quarti Aphorismi primæ particulæ, nam in sanis corporibus semper oportet alimentis vel seruare, vel augere naturæ robur, numquam autem demoliri, ut ideo semper sit opus vel plena victus ratione, vel modica, numquam autem tenui, quæ vim habet comminuendi, verum in ægris raro quidem, aliquando tamen maiores, quam acceperimus, efficere vires debemus, sed plerumque in morbis quidem longis eas fouere, in acutis autem aliquanto imbecilliores tue ri studemus. At dicet forsitan hic aliquis. Si vires indicant, ut superius ex Galeno dictum est, sui custodiam, quæ sit alimentorum vsu, quomodo ergo debet aliquando Medicus earum imbecillitati operam dare? responsio sit indicari semper custodiam virium, ut vires sunt, sed non semper ut vires tales, quia modo maiores, modo minores, modo æquales his, quas acceperimus, veniunt custodiendæ, semper tamen remanent vires vitæ tuendæ accommodatæ, quia nunquam ad tantam virium infirmitatem vel in acutissimis morbis est accedendum, quin æger sit aptus ægritudini ferendæ, conseruandæque vitæ. nam si natura est

est Morborum Medica iuxta Hippocratis dictum in Epidemijs, & hæc agit tantummodo cum est suis viribus Comitata, semper tantum virium est relinquendum, quantum ad ægritudinem superandam satis fore sit sperandum. Huc accedit, quod vires per se indicant solam sui custodiam, ab alimentis opportunis expectandam, & si diminutionem earum aliquando molimur, hoc fit ratione morbi acutè vrgentis, & ratione materiæ morbificæ partim euacuationem, partim coctionem desiderantis, quæ quidem euacuatione, & coctio licet accidentaria ratione per inediam etiam aliquatenus fieri potest, quatenus scilicet calor innatus humores naturæ rebelles attenuando dissipat, & eius gratiam recepturos alterando concoquit, vt ostendit Galenus Quarto & Vndecimo Methodi, & in Commentario decimoseptimo secundi Aphorismo rum, & in libello aduersus Erasistræos, & sexcentis alijs in locis. Hoc est illud, quod idem dixit Galenus in commentario superius memorato primi de victus ratione in acutis, nisi esset morbosa affectio, quam alimonia offendit, nos virtuti soli intendentes, ægris vt sanis alimenta fore daturus, sed quia morbus sæpius noxam affert, ideo eum non tamquam cibi indicatiuum, sed tamquam prohibitium in examen reuocari. morbus namq; auxilia indicat, plebotomiam videlicet, clystma, cataplasma, purgationem, oxymel, aquam mulsam, & aliorum vnumquodque & vt indicat remedia, sic vetat alimēta. at virtus e contrario suoapte nutu indicat alimonia, remediorum vsum non solum non indicat, sed interdum etiam prohibet. nam virtus vel est valida, vel imbecilla, valida non reclamationem

quidem euacuationi, eam tamen non insinuat aliunde insinuatam, sed imbecilla euacuationem inhibet ipsam, & arcet. Morbus ergo indicat remedia vt depellatur, virtus indicat alimenta vt conseruetur, & quia depulsio fit per contraria, conseruatio per similia, ideo in morbo depellendo contrarijs contendendum, in virtute conseruanda similibus vtendum.

De Varijs speciebus alimonia à viribus indicata.

CAPVT XVI.



Conseruatio calidi innati est conseruatio vitæ in eo residentis, ab eo pendentis. nam viuere, quatenus significat iuxta philosophos actum secundum, nihil aliud est nisi munia, & operationes obire animæ potissimum nutrientis, vt in libris de anima, & in opusculo de vita, & morte Aristoteles docet, sed hæc munia, & istæ operationes non obeuntur nisi ope innati calidi, quod ita se habet ad animam, vt se habet instrumentum ad artem. At calidum innatum perpetua indiget alimonia, qua non suppetente absuitur corpus, vt in decimo quarto Aphorismo primæ particulæ dixit Hippocrates, qui ex maiori, vel minori caloris copia claram deducebat vberioris, vel paucioris alimenti necessitatem. nam calor noster est instar flammæ, vt ex Aristotele docet Galenus in libello de marasmo. flamma perpetuam habet corruptionem, & generationem, ideoq; perpetuum exigit pabulum, tamquam necessarium suæ substantiæ fulcrum. Flammæ, & ignis naturæ reliqua

p. aph. 6. 14

tria elementa sunt alimenta. nam & aere, & aqua, & ipsa terra nutritur ignis. Nostro pariter calori, quasi nostro igniculo iuxta Platonis etiam in Timeo sententiam triplex congruit alimentum, quod quadam analogie ratione triplex redollet elementum; cibus nempe, potus, & spiritus, ut cibus terram quidem redoleat, potus aquam, spiritus aërem, non quod cibus solam terrenam includat substantiam, potus solam aqueam, spiritus solam aëream, sed quod singula hæc alimenta ex hac præcipua elementari constant natura, dum prædominantis habetur ratio. Hinc Hippocrates in libro de flatibus dixit corpora, omnia tum hominum, tum reliquorum animantium à triplici nutrimento sustentari, quorum hæc sint nomina, cibus, potus, spiritus. Quem Hippocratis locum pulchrè expressit in secundo de natura Deorum M. Tullius tribus rebus animantium vitam teneri profatus, cibo, potione, spiritu. Cuius dicti veritas facili negotio innotescet intuenti nulum esse aliud, ut diximus, in nutritione propositum, nisi calidi innati tutelam, & qualemcumque deficientis refectionem, calidi autem ipsius naturam & in solidis partibus residere primigenium humidum calore superfusum continentibus, & in succis humoralibus in deficientis humidi naturam quocumque modo faceffentibus, & in spiritibus ipsis partim insitis, partim infusis suauem vite æstum suo quasi igniculo fouentibus, ut in Quinto de simplicium medicamentorum facultatibus, ut eius sexcenti alij mittantur loci, abunde explanat Galenus. Qui ob hanc etiam causam in Undecimo Methodi dixit virium substantiam tum ex spiritu, tum ex carnosa

specie, tum solidis ipsis compleri, & ex his, quæ similia sunt, suam cuique *διαφορην*, hoc est custodiam nos debere moliri. Spiritui quidem ex respiratione, ac transpiratione, & qui ex sanguine attolitur vapore, solidorum generi ex solido nutrimento, carnoso generi per eam naturam, quæ in medio solidorum ac humidorum corporum est. Quibus nimirum verbis clarè nos docuit quæ nam sint ex parte virtutis, ad quam solam pertinet indicatio vitalis, indicantia omnia, & quæ nam indicata omnia, nam cum virtutem in tribus constitutam affirmet, in spiritibus, in partibus solidis, & in carnosis, hæc tria facit indicantia, quatenus hæc tria sunt virtutem referentia, indicata verò facit etiam tria illis proportionem respondentia, alimoniam tenuem spiritibus respondentem, crassam solidis partibus, mediocrem uerò carnosis. Dicamus ergo uirtutem in communi cōsideratam indicare alimoniam in communi, unde pendet eius custodia, uirtutem particularem indicare alimoniam particularem, residentem in spiritibus indicare alimoniam tenuem, in solidis crassam, in carnosis mediocrem. Quæ quidem partes carnosæ complectuntur humores, & succos ad celebrem tripartitam Hippocratis diuisionem superius commemoratam attinentes, in humano corpore spiritus, solida, humores considerantis, & impetentia, contentia, contenta uocantis. nam apposti, agglutinatique humores, accedente substantiæ similitudine, in carnem faceffunt. Quæ caro tamquam ex humoribus confecta non eandem requirit sui custodiā, quam uel spiritus, uel solida exigunt, sed tenuiorem alimoniam, quàm ista, crassiorem, quàm illi, nam cum alimonia

monia debeat realitate esse consentanea, & caro nec crassam consistentiam habeat, quæ reperitur in solidis, nec tenuissimam, quæ in spiritibus inest, sed mediam quasi naturam possideat, ideo alimoniam etiam indicat mediocritate quadam præditam, ut solidorum alimentum plus debeat obtinere substantiæ terrenæ, spirituum plus aeræ, carnosarum partium plus aqueæ. Cibo-
rū tres præcipuos facit gradus Hippocrates in libro de veteri Medicina, quia vel solidos cibos considerat, vel sorbitiones, vel potiones, ut fiat semper ad maiorem tenuitatem accessus, quatenus cibi solidi crassiores sunt sorbitionibus, sorbitiones portionibus, ut sorbitiones in medio solidorum, & portionum consistent, ideoque cibi solidi solidis potissimum partibus contineant, sorbitiones carnosæ, potiones spiritibus, quia facile potiones in sanguinem faceffunt, & ex sanguineo etiam vapore spiritus ipsi reficiuntur, & quia in omnibus edulijs, siue soliditatem habeant, siue sorbitiones sint, siue potiones, omnes continentur elementares substantiæ, ut in singulis insit & ignea, & aerea, & aquea, & terrena natura, ut docet Galenus in libris de elementis, & de alimentis, ideo in singulis edulijs quod magis terreum est, pertinet ad solidas partes, quod magis æreum ad spiritus, quod magis ædum aqueum, & intermediam quasi sortem nactum ad partes carnosas. Talis est indicatio virtutis alimoniam indicantis, ac talem alimoniam indicantis ut in tali, vel tali substantia residet. Sed quia virtus in febricitante, & putrida febre laborante consideratur ut iuncta, & comitata tali morbo, ac tali morbifica causa, ideo vim habet indicandi alimentum non

modo quoad substantiam, verum etiam quoad qualitatem, quia virtus ratione febris indicat alimentum refrigerans, & humectans, ut ostendit Galenus in octavo Methodi, ratione causæ febrilis, quæ est putredo, indicat refrigerans, & exiccans, ut idem explanat in undecimo Methodi, ut substantia alimenti deducatur à virtute, qualitas eiusdem à comitantibus virtutem, nempe morbo, & causa morbifica, nam alimentum ut refrigerans, & humectans habet rationem sanantis, ut refrigerans, & exiccans habet rationem etiam præservantis, ideoque non à virtute propriè ut tale, sed à morbo, & causa morbifica iudicatur, ut substantia alimenti à viribus, qualitas à morbo, & causa pendeat, & substantia similitudinem quærat ut indicationi vitali satisfaciens, qualitas contrarietatem inuehat indicationi curatoria, & præservatoria intenta. Verum hic dubitatio emergit ex eo, quod Galenus in eodem Undecimi Methodi capite, in quo affirmavit à triplici virium substantia, solida, spirituosæ, carnosæ, triplicem indicari alimoniam, consistentem, tenuem, mediam, adiunxit eius quidem modum inueniri ex conservandæ substantiæ modo, qualitatem verò ex eius temperie, Quæcum vel optima sit, vel aliquatenus vitiosa, primam semper esse seruandam, secundam in sanis vel seruandam, vel alterandam, in egris autem seruandam, quippe temperamētum præsens maxima indicandi vi præditum sit retinendum, & pro varietate partium varium sit similibus retinendum. Ex qua Galeni sententia colligitur alimoniam febricitantibus similem ad proprii temperamenti tutelam esse exhibendam. Quomodo ergo indicatur contraria,

ria, vt diximus, ratione morbi, & causæ morbigicæ? responsio hæc sit, quòd in ægris duplicem temperiem vitiosam possumus attendere, alteram quidem intra latitudinem sanitatis, & vt naturalem munia ob- eunda non lædentem, alteram ex- tra hanc latitudinem, & functioni- bus incommodantem, prima con- seruanda venit, quia non datur an- sa eius in morbo corrigendæ etiam vitiosæ existentis, vt declarat Gale- nus in libris de sanitate tuenda, & conseruatio fit vsu similium, secun- da verò adimenda, & pro virili abo- lenda tamquam præternaturalis, & morbosa, abolitio autem fit vsu con- trariorum, quæ tamen contrarieta- tis indicatio ita fuerit in febribus explenda, vt altera similitudinis stu- diosa nullo pacto sit negligenda, quam rem à Galeno in octauo Me- thodi abundè explicatam habemus, vbi discimus à febris iure contrarie- tatis semper frigidum, & humi- dum indicari victum, ab ætate fe- bricitantis, natura, consuetudine, colligi similium indicationem, ve- luti etiam à regione, anni tempore, statu cœli, si temperata sint, at si hæc intemperata, contrariorum prodi- re insinuationem, vt opus sit solerti Medicorum iudicio indicationes omnes modo conformes, modo con- trarias conferentium, & vrgentio- rem, & plus obtinentem momenti præferentium, quæ vrgentior, & magis momentanea indicatio sit quæ sumitur à febris, modò sit ma- gna febris, vt hæc vnica reliquis omnibus præponderet, sed si parua sit febris, reliquas omnes vnà con- iunctas expendendas, & si æquè in suo genere indicent cum febris, nec- ubi inclinandum, sed medium vi- ctus modum seruandum, at si alte- ra indicatio exuperet, vel febrilis,

vel aliunde deducta, tantum à tem- perato, medioque victu receden- dum, quantum ea, quæ pollent, sua contraria superant.

*De alimonia indicata à viribus ra-
tione spirituum.*

CAPVT XVII.



Ires corporis spiritibus in- nixas fouet, ac retinet ali- monia, vt diximus, te- nuis, quæ alendæ substan- tiæ propriam æmulatur naturam. Hæc autem ducitur alimonia par- tim ex aere, partim ex sanguineo vapore, vt superius ex Galeno dedu- ximus. nam spiritus nostri, vt ex eo- dem constat auctore in tertio de na- turalibus facultatibus, & in libello de sanguine in arterijs contento, conflat sunt ex aerea substantia, & ex tenuissimo sanguinis halitu, & quoniam est constitutionis, & repa- rationis materia eadem, ab eodem aeris, sanguinisque halitu veniunt spiritus reparandi. Ambientis qui- dem, vt considerat Galenus in Vn- decimo Methodi, proprium pro na- tura sua nomen est aer, & in hac ab- soluta significatione nil aliud est, vel dicitur quàm aer, at relatus ad nos auxilium euadit, vel detrimen- tum, & vel salubris causa, vel mor- bosa efficitur, quatenus scilicet vel opem corpori vel noxam imperti- tur, vt aeris naturam semper obti- neat tamquam originariam, & pro- priam, auxilij, vel detrimenti nun- cupationem interdum inducat tam- quam aduentitiam, & aliunde su- sceptam. Ad spiritus ergo fouen- dos, & renouandos aer exigitur tem- peratus, ab omni labe alienus, qua- lis in duodecimo Methodi describi- tur,

tur, qui nihil ex metallis, aut caminis, aut barathris sibi admisceat, nihil ex putredine leguminum, vel olerum, vel animalium, vel cuiuscumq; rei contrahat, nullos ex paludibus, vel stagnis, vel fluuiis haliitus recipiat. nam hæc inspirata substantia spirituosam potest vim illasam tueri, nec inspirata solum, sed per occultos etiam corporis meatus attracta, per quos vi transpirationis insensibilis fuliginosa prodit materia exclusa. Vnde manauit Hippocratis dictum in sexto Epidemiorum, carnes ex ventre, & externis partibus trahunt, sensus ostendit quod corpus tum intro, tum foras spirabile sit. Verum quia febricitantes caloris quendam perpetiuntur excessum æstu molesto confictati, ideo aere opus habent refrigeratorium vim habente, vt aer indicetur purus quidem, & illibatus, sed refrigeratorius, vt sit auxilium non solum alimentarium, sed etiam medicamentosum, quippe qui ad corrigendam intemperiem febrilem appareat opportunus, quo nomine est quid indicatum non à virtute, quæ indicationem solum vitalem facit, sed à febris, cuius est propria indicatio curatoria. Hinc Hippocrates in sexto Epidemiorum remedia proponens arcendæ siti accommoda, quæ teste Galeno ad vniuersum victum febrientibus opportunum pertinet, continentiam oris consulebat, taciturnitatem, spiritus cum potu frigidi introductionem, quia hinc non leuis datur refrigerij inducendi ansa, dum non modo bona aeris substantia, sed frigidiuscula etiam qualitas ad ipsum pulmonem, atq; adeo cor perreptat, & penetrat. Quæ obrem Galenus in decimo Methodi aerem suscipiens pro febricitantium vsu considerandum, ita decernit, vt

si temperatus sit, qualem se exhibet, tali vtamur nihil amplius de illo solliciti. Quod Galenicum dictum rationi est apprimè consentaneum, quia licet ratione febris sit indicatio refrigerandi, & refrigeratorius exigatur aer, hoc tamen munus prestare etiam temperatus potest ob vim naturaliter medio insitam, veluti sæpe in problematis ostendit Aristoteles, vt alteri extremo collatum alterius extremi facultatem obtineat, ideoque tepidum relatum ad frigidum calefaciendum, ad calidum refrigerandi vim possideat. Temperatum ergo aerem sine alteratione vsurpandum proponit Galenus, sed si calidus valde fuerit, in contrariam qualitatem arte vertendum, subterraneis inuentis domibus frigidissimis, maximè perslatis, & ad septentrionem versis, tum auri- bus quibusdam suauioribus operanostra paratis, vel alio aquarum confluxu, vel aqua frigida de vasis in vasa transfusa, & domo continenter aqua frigida aspersa, rosisque humi fusis, vel vitium capreolis, vel ruborum summitatibus, vel lentis ramis, vel alijs refrigeratorijs stirpibus, hominumque turba à cubi- culi ingressu prohibita. Sic aer calidissimus, qui in æstate solum calida, & sicca potest contingere, non in hieme locum habere, proponitur alterandus, at qui modice frigidus sit, talis sinendus, qui verò frigidissimus, ad respirationem talis admit- tendus, vt præclarum æstus in corde existentis refrigerandi instrumen- tum, sed ad externum per ambitum corporis ingressum non admit- tendus, quippe densat, cogitq; cutem, ac putrescentium humorum efflu- xum transpirare prohibet. ea nam- que aeris vel substantia, vel quali- tas, quæ per pulmonem raritatis

plenum habet ad cor accessum facilem, per cutem iam prius stipatam habet nullum, ut nimium frigidus aer cutim densando sibi ipsi præcludat uiam. Notandum tamen præbet Galenus maius fore ex frigida inspiratione commodum, quam ex eute densanda incommodum, præsertim cum operimentis hanc calfacere liceat. Quæ præclara Galeni animaduersio ad Hippocraticam alludit sententiam in sexto Epidemiorum exarata, quæ somnum in frigore sic iubet capere, ut sit dormiens stragulis opertus. nam cum in dormiente calor sit intro adactus iuxta regulam asserentem uigilantis exteriora calidiora, interiora frigidiora, dormientis contrariam esse rationem, & tamquam intro reuocatus sit admodum etiam adactus, refrigerio opus habet, quod ambientis frigidioris accessus præbet, sed hic accessus fieri per inspirationem debet, per quam ad cordis sedem expedita uia patet, non per transpirationem, quia ob ambientem refrigeratam, ac densatam cute profundæ corporis partes incallescere magis, & inspirati aeris refrigerium iuuaret minus, ut satius sit retrahere calorem, ad cutim calefacientium usu operimentorum, frigidum uero inspirare, ut utrinque ad mediocritatem temperamenti calidum corpus agatur, sicut in commentario inquit Galenus, qui illam Hippocratis sententiam non seorsum, quod multis placuit, enarrandam, sed cum præcedenti censuit coniungendam, quæ calidæ naturæ refrigerationem, potum aquam, quietem consulebat, ut eadem naturæ somnum in frigore cum stragulorum operimentis capiendum suadeat. nam corporis operimentum duo præstat, impedit cutis

stipationem, quæ exaggerandi caloris interni facultatem habet, & facit eiusdem cutis apertionem, quæ internarum fuliginum effluxum, unde magis interior temperatur æstus, promouet, ut uersari in aere frigido, corpore recto, sit uti in inspiratione, ac transpiratione ad spirituum custodiam percommoda, ut superius ex Galeno in Undecimo Methodi diximus, cum inspiratio non solum refrigeret, sed materiam etiam inuehat, transpiratio in festam, excrementitiâque substantiam educendo euehat. Ad quam faciliorem educationem conferunt etiam membrorum frictiones in examen inferius reuocandæ. Frigida igitur in aere inspirato existit ratione febris qualitas, non frigida in exterius attracto, & ob eandem febrilem intemperiem requiritur etiam in inspirato humida, ut sicca febricitantium caliditati opponatur frigidus, humidusque aer, at ratione putredinis frigidus quidem indicatur non tamen humidus, sed siccus, cum in putrescente materia caliditas uigeat, humiditasque præternaturalis contrarium appulsu corrigenda, ut ideo in putridis febribus temperato sit opus in passiuo aere, ut aliquid & febrile, & causæ condonetur, in actiuis autem tum frigido arte facto, cum se non temperatum offert, sed intensiori aliquo æstu præditum. Ita fit, ut his febricitantibus inspiratio congruat refrigeratoria, transpiratio copiosa, quia hoc pacto & febribus intemperies emendatur, & morbifica causa corrigitur putridarum diffusione fuliginum, succorum dissolutione obstruentium, & debilita spiritibus custodia adhibetur congruæ alimonie tenuitatem obtinentis ingressu, excrementitiâ materiæ

germanam eorum constitutionem infestantis egressu. Verum iure Galenus respirationi, ac transpirationi vaporem e sanguine sublatum adiungebat ad spiritus recreandos, qui non aerem solum, bonamque temperiem requirunt ad sui constitutionem, sed tenuem etiam, ac vaporosam e sanguine profectam substantiam, cuius cumulatam prebent boni cibi, & temperato sanguini generando idonei suppellectilem, ut ex hac vaporosa sanguinis substantia cum accedente per inspirationem aere commixta, opportuno transpirationis usu adiuta, spiritus foueantur, debitamque renouationem accipiant, tenui suppetente alimonia, qualis eorum substantie congruit, tenuitatem adeo amanti, ut iuxta egregiam Auicennae in libro de viribus cordis animaduersionem sit coelestis naturae quasi æmula, & ideo luminosa, rebusque lucidis delectata, quo nomine tenuissimum sibi vendicat alimentum à respiratione, transpiratione, ac sanguineo vapore deductum, nobis ante Galenum ab Hippocrate insinuatum, qui in opusculo de alimento dixit Principium alimenti spiritus esse nares, os, guttur, pulmonem, ac reliquam transpirationem, ut respirationis, ac transpirationis, & vaporis ex ingestis per os, & in sanguinem conuersis manantis non obscuram apud solertia ingenia excitaret mentionem.

De alimonia indicata à viribus ratione partium carnosarum, & solidarum.

CAPVT XVIII.



On eadem partibus carnis, & solidis debetur alimonia, quam debent spiritibus diximus, quia non eadem illis, quæ istis, subest natura, & similia similibus sunt adiungenda, quippe in proprio quantum fieri potest statu veniunt conseruanda. Ut ergo spiritus tenuis indicat alimentum, sic partes solidæ solidum, carnosæ mediocre & humidum, solidorumque corporum medium. Quod insinuat Hippocratis in libro de alimento dixit eos, qui velocissima indigent appositione, per olfactum esse nutriendos, qui minus veloci, his humidum alimentum esse accommodum, qui adhuc tardiori, his solidum conuepire, per primos spirituum nutritionem innuens, per secundos carnosarum præcipue partium, per vltimos solidarum. Quo etiam factum est, ut more suo quasi ænigmaticè loquens humidum alimentum facilius transmutati affirmauerit, quàm siccum, & siccum facilius quàm humidum, quod licet absolute verum sit, quia facilius vinum alteratur, quàm caro, & iusculum, quàm panis, & facilius caro hædina, vel auium transmutatur, quàm vinum coctum, vel etiam carnis bouinæ contusum, tamen hunc etiam habet sensum, humida à carnis partibus, solida à solidis melius transmutari ratione intercedentis similitudinis, & cuiusdam quasi naturalis cognitionis, quam in alterandis, conuer-

tendisque edulij plurimum habere momenti locuples est auctor in primo de alimentis Galenus. hæc enim similitudo, & cognatio facit, vt proprias habeat, sibi que consentaneas humana natura escas, & alijs alienas agnoscat, penitusque dissimilaneas, vt quæ feris conueniunt, sint hominibus aduersæ, & inter homines quæ sanis commodæ, ægrotantibus incommodæ, vt considerat Hippocrates in libro de veteri medicina, ideo inuenta esse in humanum vsum ostendens & alia edulia, & panem præcipue, & mazam, & aduentante morbo solidis cibis suffectas esse sorbitiones, & potiones, tanto ad coctionem suscipiendam paratiores, quanto minorem habent concoquenti calori vim resistendi. Sed hic emergit non prætereunda dubitatio. nam si ægrotantibus sorbitiones, vel potiones conueniunt, non conueniunt solida edulia sanorum propria, vt decernit Hippocrates, quæ ratio habebitur solidarum partium, quæ solidam exigunt alimoniam, vt supra cum Galeno diximus, quandoquidem sorbitionum, potionumque administratio carnosarum potius partium, & spirituosæ substantiæ reparationem respicit. Confirmatur dubitatio ex illo Hippocratis decreto, quo in Aphorismis victum humidum febricitantibus adaptat, & pueris, & talem seruare victum assuetis, sumpta à febris contrarietatis indicatione, similitudinis ab ætate, & consuetudine, vt Galenus non solum in commentario Aphorismi, sed in octauo etiam Methodi declarat. Quomodo ergo ægroti, & multo minus febricitantes, siue quomodo febricitantes vel quæ ægroti, vel quæ febricitantes solidos cibos efflagitabunt, at si non accipient, quomodo solidarum de-

fectum partium supplebunt? non possumus dicere in putridis non inferri labem solidis partibus, sed solum affici spiritus, affici partes carnosas vt ex humoribus conflatas, & conseruandas, quia quicquid sit de partium solidarum affectione in putridis, illud compertum, exploratumque existit tempore etiam sanitatis perennem esse, nec vniquam deficientem solidarum qualemcumque dissolutionem, cui quasi ex altera parte respondens reparatio sit debita. nam licet Galenus in Vndecimo Methodi dicat in partibus considerari tum qualitatem, tum quantitatem, & hanc semper manere eandem qualitate immutata in solidis, ita vt in his, qui augentur, numero dumtaxat maneat eadem, in adultis autem, & absolutis etiam magnitudine, hæc tamen permanens, hæc eiusdem status conseruatio quoad sensum præcipue venit intelligenda, secundum quem nulla videtur animaduerti varietas, vt in libro ad Thrasibulum de omni varietate sanis contingere decernit Galenus. Dicamus ergo ad propositam dubitationem eximendam in omni cibo, siue sit tenuis, siue mediocris, siue crassiusculus, aliquid contineri solidi, quia cibus omnis est quid mixtum, alioquin non esset cibus, nec vim nutriendi nactus, vt apparet ex Aristotele in libro de sensu, & sensibili, & ex Galeno in primo de alimentis. Ac veluti pars quidem solida ita suam habet soliditatem, vt non respuat suam etiam aquositatem, & suam qualemcumque spirituositatem, & humor præter hanc aliquam etiam habet soliditatem, & spiritus insuper humorosam quandam, & solidam præfert substantiam, ita nutrientia corpora siue maxime ærea sint, suam habent soliditatem, siue

sive maximè terrea suam spirituositatem, siue intermedia habent vtrumque sic fiet vt vel ex humido alimento suscepto febricitans solidas partes reficere possit, ex ea nempe portione, quæ in humido plus retineat solidi. Huc addamus, quòd licet febricitantibus humidus victus præscribatur, non ideo tamen omnis solidus interdicatur, quippe non desunt solida edulia, quæ sint faciliora concoctu, quàm sint vel ipsa humida, veluti auicularum carnes, quas & Hippocrates in secundo de diæta, & Galenus in primo de alimentis cõcoctu facillimas statuit, ideoque Aristoteles in primo æthi-
corum in exemplum cibi leuissimi adducit, hæc, inquam, carnes citius, & commodius, quàm ius bouillum, concoquuntur. Et quoniam cibaria sunt vel valentis, vel mediæ, vel imbecillæ materiæ, vt docet abundè celsus in secundo libro, & Galenus in libello de cibis boni, & mali succi, prima ad solidas præcipuè partes, secunda ad carnosas, postrema ad spiritus fouendos, ac renouandos opportuniora videntur, omnia sunt tamen omnibus sustinendis idonea secundum ratam portionem, & nutriendis accomodatam. Portiones ergo odoratiores spiritibus præcipuè aptabuntur, iuscula bonarum carniū partibus carnosiss, iuscula concretiora, & cuiusdam quasi gelu formam præferentia, qualia sunt contusa, & ob inditam crassitudinem coalescentia partibus solidis, quibus etiam carnes omnes, omniaque edulia nondum in formam liquoris adacta sunt opportuna alimenta. Hinc factum est, vt Galenus in omni syncope, siue homini contingat crudorum onere humorum oppresso, siue tenuium succorum nimiam dissipationem patien-

ti, vinum conuenire dixerit in duodecimo Methodi, quia syncopes tamquam præceptum virium lapsus, spirituum iacturam habet adiunctam ope vini propinati, tenuem, celeremque alimoniam præbentis, opportune reparabilem, in quo libro illud etiam venit obseruandum, quòd in iactura spirituum alimenta proponuntur tenuia reparandæ spirituosæ substantiæ accomodata, in iactura partium solidarum alimenta inducuntur crassam consistentiam habentia solidis reparandis opportuna.

De prædictarum alimoniarum indicationum sufficientia, & præstantia.

CAPVT XIX.

DIxi cum Galeno conseruandam alimentis esse spirituosam, carnosam, & solidam substantiam, quia hoc pacto conseruamus virtutem in his tribus constitutam, quibus continetur innatum etiam calidum, per hæc tria diffusum, & in solidis potissimum implantatum, & præter carnosam molem spiritibus etiam comprehensum, vt cuilibet innotescit Galeni librum aduersus Lijcum, & Quintum de simplicium medicamentorum facultatibus vel oscitant er legenti. Hinc mirari non debemus, si Galenus tres illas substantias tamquam virium fundamenta, veraque fulcra enumerans nullam fecit innati calidi mentionem in illis tribus cumulatè comprehensi. Verum admirabitur forsitan aliquis, cur idem in duodecimo Methodi essentiam virium, quibus nostrum regitur corpus, ad solos spi-

ritus, & solidorum temperamen-
tum corporum adegerit, nulla facta
carnium, excitataue animaduersione;
sed hanc deponere admiratio-
nem debuerit hoc meditatus sermo
nem ibi fuisse de præcipiti virium
lapsu per syncopem facto, ad quam
syncopem carnosum genus parum
facit, præterquam quod ibi solido-
rum nomine carnes etiam ipsas fir-
miores spiritibus consistentiam
habentes, ideoque interdum inter
solida relatas, intelligere commodè
licet. Sunt autem vires istæ in tri-
bus illis facultatibus positæ animal
gubernantibus, toti corpori ex suo
quodam veluti Fonte sigillatim di-
stributis facultate videlicet natura-
li ad hepar præcipuè relata, indeq;
per venas vndequaue permeante
aliqua, vitali in corde constituta,
indeque per arterias partibus
omnibus se communicante, ac de-
nique animali cerebrum insidente,
indeque per nervos suam vim vni-
uerso corpori impertiente, harum
quidem facultatum robur est vi-
rium robur, harum salus est virium
conseruatio, quia nil aliud est vires
conseruare, vt cum Galeno dixi-
mus, quàm vitam tueri, nec aliud
vitam tueri, quàm harum faculta-
tum actiones integras, incolumesq;
seruare. nam vita vel est viuientis ef-
fentia iuxta Aristotelis dictum in se-
cundo de anima, si sumatur nempe
pro actu primo, vel viuientis pro-
pria operatio, si sumatur pro actu
secundo, & pendet omnis viuèrium
operatio ab enumeratis facultati-
bus, quarum incolumitas operatio-
num parit incolumitatem, vnde
conspicius prodit, manifestusque
vitæ actus. Qui ergo nouit quan-
tum sit in vita momenti, nouit si-
mul quantum sit in conseruandis
viribus ponderis, quarum indicatio

reliquis omnibus præcellit, & præ-
ponderat, quippe vita est omnium
fundamentum, nec potest morbo-
rum curatio induci, nisi vbi vitæ ad-
sit, suppetatque vigor, quia iuxta
dictum Hippocraticum in Epide-
mijs, Natura est morborum medi-
catricæ, & hæc est natura viuientis,
quæ non medetur nisi vigeat, nec
viget nisi aliquale virium robur re-
tineat. Prima igitur, & præcipua
omnium est à viribus sumpta indi-
catio, non quidem vt curatoria, quia
non respicit primario, nec per se
morborum curationem, sed vt vita-
lis, quod supra etiam ostendimus,
quia tendit ad vitæ tutelam, & in-
colomitatem, quamquam si non
per se, & primario, per accidens sal-
tem, & secundario morbis etiam
curandis suam operam præstat.
Quod præclare in Vndecimo Me-
thodi explanat Galenus ex eo, quòd
putredo morbosa non fit in corpore
inanimato, sed in viuente, quod
tùm alterare potest, tum concoque-
re, tum vtile reddere, & ad melio-
rem quandam frugem adigere,
quicquid putrescentium velut se-
miputrescens, semique malum est,
quæ quidem viuientis corporis po-
tentia, & facultas excitatur, auge-
turque inducto virium robore, vt
hac ratione virium conseruatio ac-
cidentario quodam modo ad
morbi etiam curationem
conducat, quatenus
validiorem na-
turam ef-
ficat
ad coctiones, aliasque fun-
ctiones depellendo mor-
bo idoneas ob-
eundas.

*De varia indicatione à viribus
desumpta.*

CAPVT XX.



Erum licet hæc vera sint, tamen non tam ad morbum curandum, quam ad vitam tuendam conservandæ vires accipiuntur, quas quidem in ægris à Medico ita considerandas decreuit Galenus in Methodi Nono, vt aliquando hanc animaduersionem maxime necessariam affirmet, omnibus, quæ circa ægrum administrantur, in solam ipsarum gratiam relatis, aliquando mediocriter necessariam, vt hinc quoque aliquid consilij ad faciendam hanc vergat ratio, aliquando tam leuiter ad remedium inuentionem conferre, vt ob leuitatem lateat, aliquando omitti, silentioque obuolui, quasi nulla ex hac animaduersione percipiatur utilitas. Primus quidem casus apparet in ægrotantibus insignem præferentibus virium infirmitatem, in quibus desipit qui de curando morbo cogitat, & non omnes cogitationes, omnemque industriam ad reparandas, subleuandasque collapsas vires conuertit, & soli indicationi vitali, neglecta interim curatiua, intendit, alioquin iure audiet obiectamentum illud, cuius argutè dicti meminit Galenus, morbus quidem curatus est, ægrotus autem mortuus est. nam ille est terminus in ægrotantibus propositus, quem non transibit is, qui ex arte generosè contra morbum pugnat, vt tuto medeatur, veluti in duodecimo Methodi statuit Galenus, at non potest mederi tuto, qui

finit vires collabi, nec eas suffulcit, quarum dissolutio vitæ dissolutionem habet adiunctam. His ergo fulciendis opera tunc danda, cum earum abolendarum imminens apparet discrimen, hinc vel in ipso accessionum principio licet febricitantes nutrire, quando præ inedia in summam inciderunt imbecillitatem, vt solet vsu venire picrocholis, ac temperamento calidiori, sicciori, que præditis diuturnius ieiunium, perpeffis, quibus nulla habita febris, & incipientis accessionis ratione veniunt opportuna alimenta propinanda ad imminentem à virium casu mortem arcendam, vt se factitasse in iuvene quodam febricitante, alijs reclamantibus Medicis, qui curationi intererant, auctor est in Decimo Methodi Galenus. Nec alimenta solum tunc temporis adhibenda, sed ea etiam alimenta, quæ morbi facultatem augendi retineat, quale in febribus fuerit vinum, quod quia calidum, & siccum, fouere febre, inaugereque valet, sed quia, celeriter refectorium est, & citam præbet alimoniam, vel in summo febris ardore, si vires vndique languent, & fatiscant, exhiberi secundum rationem potest, vt in proposito casu fecit Galenus, & in synopsis, in qua præceps sit virium lapsus, accessione faciendum in duodecimo Methodi suafit. Sic igitur maxime necessaria est virium indicatio, vt vniuersum medentis consilium ad earum tutelam, refectoremque dirigatur, quamuis manifestum immineat ex faciendis morbi incrementum. Si vires etenim quacumque ratione sustinentur, quamuis morbosus affectus augeatur, semper spes remanet eius diminuendi, ac superandi, at si vires collabantur, & corruant, licet magna fiat morbi remissio,

missio, nulla spes superest cōsequen-
dæ salutis, quæ sine virium tutami-
ne nullum potest habere locum. Se-
cundus casus patet in his ægris, qui
febrem deferunt cum humorum
corruptela coniunctam, nam in his
oritur indicatio euacuandi, quia
quod corruptum est, id alienum est
à natura, & quod est tale, id se aufe-
rendum dicitur, sed hanc ablationem
ipsa corruptela virium faciens im-
becillitatem inhibet, & quod est
affectus remedium, id virtutis custo-
diæ est dissentaneum, affectu eua-
cuationem vsu vel phlebotomiæ,
vel purgationis factam præcipient-
te, virium autem infirmitate vtrum
que auxilium respuente. In qua
indicationum contrarietate illud
capiendum consilij, vt partim eua-
cuando, partim nutriendo proceda-
mus, & per euacuationem affectui,
per nutritionem virium infirmitati
obuiam sumus, quod vitiosum est,
per primam detrudentes, quod sa-
lubre est per secundum reponentes,
& vtramque non confertim, & affa-
tim, sed senim, & paulatim præ-
stantes, quam curandi rationem à
Medicis vocatam *ἐπιμασιν* in Me-
thodi nono proponit Galenus. nam
per boni alimenti adiectionem fit
prauū, corruptiq; humoris contem-
peratio quædam, vade hæc vox *ἐπι-
μασις* est deducta, quasi contempe-
rationem dixeris. Hinc Galenus in
primo Aphorismorum dicebat, si
vires ægri debiles fuerint, & mor-
bosa dispositio sit ex corruptione
humorum, uel defectu, parum ali-
menti, & sæpius talibus afferendum,
parum quidem, quia virium imbec-
illitas non potest vniuersam simul
alimenti copiam sustinere, sæpius
autem, quia multis indiget disposi-
tio, defectus siquidem exigit adie-
ctionem, corruptio verò contempe-

ramentum. Sed illud habet defe-
ctus humorum à corruptione discri-
men, quòd in illo nullo euacuandi,
omnis est suscipienda alendi sollici-
tudo, quia defectus solam adiectionem
insinuat ab alimentis opportu-
nè oblati petendam, in hac tum
euacuandi, tum nutriendi viger cū-
ra, quia humor corruptus partim
euacuandus, partim contemperan-
dus, euacuationem requirit quatenus
recipere naturæ gratiam non
potest, contemperationem exigit,
quatenus melioris adiectione succi,
& qualicumque alteratione ad me-
liorem adigi frugem valet, & quan-
tum vis languens alimoniam dicitur,
tantum humor peccans euacuatio-
nem suadet, vt non præcipua qui-
dem, nec omnis ratio virium habea-
tur, sed mediocris illa, & omnis in-
alternum morbi, & virium respec-
tum distribuatur, modo ad mor-
bum tollendum, modo ad vires ip-
sas reficiendas præsidij vsurpatis.
Quo in casu quia indicationes inter
se pugnant, & se inuicem oppu-
gnant, curatoria scilicet & vitalis, ad
eam nempe methodum est confu-
giendum, quam nos docet Galenus
in nono, & in Vndecimo Methodi,
vt indicantium tum dignitas, tum
magnitudo perpendatur, & ea, quæ
dignior, maiorque sit indicatio præ-
ponatur. Ac dignitas quidem vel
à vitæ pendet, vel à sanitatis respec-
tu, magnitudo autem vel propriæ
indicantium substantiæ rationem,
vel à naturali habitu consequitur
recessum. Virium ergo vitalium in-
dicatio dignitatem dicitur habere,
quia vitæ ipsius momentum conti-
nent, insignis febris indicatio habet
magnitudinem, quia præternatura-
lis hic calor secundum propriam
substantiam est magnus, & ma-
gnum habet à naturali constitutio-
ne re-

ne recessum. In hoc ergo præcipue casu verissimum est illud Galeni in septimo Methodi præceptum, quod vbiq; memoria tenendum propositum, in harum pugna indicationum committendum non esse; ut dum alteri nimium sis intentus, alterius omnino obliuiscaris, sed vtriusque memor quoad licet vtrunque misceas. Tertia virium animaduersio est, cum illa quidem in parandis remedijs adeo latet ob leuissimam vim, quam retinet, indicandi, ut vix aliquam sui notionem præbeat, quod quidem vsu venit, cum vacuantia remedia citra virtutis noxam vsurpari possunt, ut inde nec vtilitatem effatu dignam, nec iacturam ipsa reportet, vnde leuissimum illud est, quod ipsa ad sui conseruationem indicat. Quod si nullum planè vel commodum, vel incommodum ex his, quæ ad profligandum morbum adhibentur, ad vires accedit, tunc ipsarum consideratio tamquam inutilis, & superuacanea omittitur, & postremus quattuor propositorum casus oboritur; nam cum vel commodum magnum, vel incommodum ex vacuantibus præfidijs ad vires accedit, ab his magna sumitur indicatio, quia cum euacuatio viribus valde officit, prætermittenda venit, & harum custodia præcipue procuranda, & cum euacuando ipsas erigimus, & subleuamus, ut contingit in plenitudine quoad vires nuncupata, tanto magis euacuationi operam nauare debemus, quanto magis non solum minuere morbum, sed vires etiam augere speramus, quodam quasi onere, vnde prius premebantur, solutas nam quæ vno, eodemque tempore & affectus curationi, & virium conseruationi conducunt, sunt hæc quidem præfidia calculum omnem re-

ferentiã, omneque punctum ferentia, ut cum primæ notæ indicatio sit quæ sumitur à virtute, secunda quæ à morbo, horum præfidiolorum indicatio vtramque notam contineat, ideoque ipsorum vsus citra controuersiam adhibendus veniat. Quæ omnia à Galeno partim in nono Methodi, partim in Vndecimo cummulata oratione explicantur.

De regulis quibusdam in vsu alimonia à viribus indicata obseruandus.

CAPVT XXI.

EX hæcenus dictis apparet maximam, omniumque primam esse virium insinuationem, quæ nil aliud dictant, nisi sui custodiam, veluti morbus sui ablationem, hæc autem custodia in duobus consistit, veluti apparet in duodecimo Methodi, ut earum substantia seruetur incolumis, ab inanitioneque immunis, & earum temperatura, & qualitas naturali constitutioni retineatur consentanea, quæ si præsens fuerit, seruanda, si absens, inducenda. Temperatura quidem in substantijs solidis, & carnosis præcipue attendenda, quæ præcipue viuunt, qualitas in spiritibus obseruanda. Partibus ergo magis terreis, ut supra ex Galeno in Vndecimo Methodi animaduertimus, conuenient alimenta magis terrea, humidioribus magis humida, magis aereis quæ plus habent aeræ substantiæ, sicut calidioribus quæ magis igneæ naturæ participant. Hinc deducenda erunt materiæ particulares omnes in cibis, potione, aere, & omnibus peragi solitis. Et quia in alimentis.

mentis considerare possumus quatuor illa, quæ in omnibus præsidijis consideranda proponit Galenus in primo de Arte ad Glauconem, qualitatē, quantitatem, modum, & opportunitatem, horum quidem omnium indicationes ex ipsis viribus commodè eliciuntur. nam veluti alimentalis substantia ab ipsa virium substantia, quæ in ipsarum organis, siue subiectis attenditur, indicatur, ita qualitas à partium temperamento, & spirituum qualitate, cuius temperamenti, & qualitatis conseruationi nuper diximus esse incumbendum. Quantitas autem alimentorum indicatur à quantitate virtutis in tribus illis superius enumeratis subiectis residentis, quorum singula propriam pro natura suarum qualitatem habere, tum quantitatem dicebat Galenus in Vndecimo Methodi, ut qualitas indicet alimentorum qualitatem qualitas, inquam, in congruo calidi, frigidi, humidi, sicci temperamento constituta, quantitas autem insinuet quantitatem, quantitas, inquam, hoc est magnitudo solidarum partium, quæ in corporibus incrementibus non manet eadem, in adultis manet eadem, & carnosarum, & spiritualium substantiarum, quarum quantitas in omnibus pariter corporibus siue incrementibus, siue adultis euariet, & modo incrementum accipit, modo verò decrementum. A maioribus ergo solidis indicatur plus nutrimenti, à minoribus minus, eademque animaduersio partibus carnosis, atque adeo spiritibus congruit. Vnde aliquando febricitantibus sufficient leuiora fercula, ut pissana, panis contritus, aliquando erit ad validiora accedendum, ut firmiora iuscula ouis comitata recentibus, ut carniū confusa. Quantitas ergo

alimenti indicatur à quantitate virtutis, siue organorum, vel subiectorum, in quibus residet virtus, atque adeo à quantitate actionis à virtute profectæ, nam quo maior, & vegetior est coctio à virtute usurpata in alimentis elaborandis, eo maior, & largior esse debet eorundem suppeditatio, quia quantum concoqui potest, tantum ingeri debet ratione virtutis concoquentis, & quod pertinet ad quantitatem virium, ut ex Galeno colligitur in primo ad Glauconem. Ac veluti actio uaria virtutis uariam indicat ciborum multitudinem, ita uaria eiusdem passio uarium insinuat eorundem modum, quia si parum uirtus patitur, conuenit solidiorum ciborum usus, si patitur multum, conuenit liquidiorum, quam quidem uirtutis maiorem, uel minorem in conficiendis cibariis passionem, & hinc derivatam uariandi modi, seu formæ assumendis cibariis congruentis insinuationem pulchrè explicat Hippocrates in libro de arte Veteri, ubi discrimen inter cibos sanorum, & aegrotantium à uaria passione deducit facultatis concoquentis, quæ minor sit in sanis, maior in ægris, ut supra etiam considerauimus. Tempus, & opportunitas cibandi ultima erat in cibis obseruanda condicio. nam, ut ait in secundo libro Celsus, ægro uehementer nocet, quoties in eius, quod assumitur, uel tempore, uel modo, uel genere peccatur, & multus est Hippocrates & in primo Aphorismorum, & in primo de uictus ratione in acutis in opportunitate cibandi exponenda. Hæc igitur pendet, si Galeno credimus in Vndecimo Methodi, à maiori urgentia uirtutis, quàm morbi, & morbificæ causæ, quando illa scilicet plus potest indicare, quàm hæc ualeant prohibere. Et quia putrida p~~er~~ se

febres vel continuæ sunt, vel intermittentes, in continuis quidem, & continentibus, præcipuè, quæ unicam habent accessionem, facilis tolerantia, & consuetudo spectari debet, ut cibus tunc temporis offeratur, quando meliusculè quam prius se habent febricitantes, & quando in sanitate cibos erant assueti assumere. hoc enim tempore nec morbus, nec materia morbifica præcipuè urget inhibendo, & plus premit ipsa virtus indicando, quippe quæ & commodius concoquere possit ut minus à morbo conflictata, & magis cibum exposcat ut ei tunc assueti, cuius assuetudinis maximam esse vim & in secundo de victus ratione in acutis, & in libro de Arte veteri declarat Hippocrates. At in febribus intermittentibus hæc adhibenda cautio, ut opportunum cibandi tempus ex duplici coniectemus respectu, ex summo præcedentis accessionis vigore, & futuræ principio, ut quàm longissime ab utroque nutriamus. Si spatium inter hæc duo tempora fuerit amplum, facile fuerit cibandi opportunitatem inuenire, at si exiguum, alterutrum usu veniet, ut vel ægrum adhuc valdè calentem nutriamus, vel sequentis accessionis inuasionem iam iam affuturam. Quo in casu necesse erit discernere tempus minus noxium, ac distinguere à magis nocituro tum ex loco affecto vñ cum affectu, tum accessionis, & principij, & summi etiam vigoris consuetudine. nam iecore, vel ventriculo inflammato pessimum est ante accessionem proximam nutrire, ubi non adest hæc inflammatio, infirmiori virtute præditis utilissimum. In alijs verò animalis instrumentis ex ratione tum situs, tum dignitatis quòd iam dictis proportionem respondeat æsti-

mandum. Iam summi vigoris, & principij accessionis morem sic oportebit animaduertere. In summo vigore notandum, an citra magnitudinem febrilis calor siccus sit, & squallens, an citra siccitatem vrens, in primo casu humectante victu madefacere oportet, ut excedens mitigetur siccitas magnum negotium allatura. in secundo magna caloris expectanda remissio, ne ignis igni addatur. In principio accessionis obseruandum num corporis extrema perfrigeret, & magnam caloris ad interiora reuocationem faciat, an omnino corpus non premat. hoc secundum ut facile, & mansuetum erit despiciatui ducendum; in priore facienda distinctio, nam vel sine visceris inflammatione, & succorum plenitudine fiet illa caloris interioris retrocessio, & poterunt tunc cibaria sine damno paullo ante exhiberi, quia nec augebitur inflammatio, nec irritabitur plenitudo. At propter contrarias causas vel urgente phlegmone, vel premente plenitudine, cauenda erit ante accessionem ciborum administratio, quippe quæ magni futura sit detrimenti causa. Hæc est Galeni sententia in illo vndecimo Methodi, qui in febribus huiusmodi inediam tam diu sustinendam proponit, quam diu vires sint ferendo, ut in quibusdam febribus continuis septimo die terminandis toto progressu inediam usurpandam statuatur, modo virtus permittat. Quod suis illis temporibus, quæcumque tandem fuerit causa, contingere potuit, nostris certè non potest. Verùm Galenica nutriendi doctrina in hoc consistit, tunc esse præbendam alimoniam, cum indicatio virtutis vincit morborum affectus prohibitionem. Vnde Hippocrates in primo acutorum statuens tempus

K valere.

valere plurimum in morbis omnibus, & præsertim in acutis, & potissimum quibus febris vehementior suberit, summumque periculum, tale tempus dandæ sorbitionis tum per initia, tum per omnem morbi decursum decernebat seruandum, vt si pedes frigidi fuerint, non modo à sorbitione, verum etiam à potu caueatur, sed cum caliditas ad pedes descenderit, tunc dare expediat. In cuius sententiæ commentario annotabat Galenus, quod veluti vnus alimonie scopus est virtutis custodia, necessaria accedente simul morbi contemplatione, ita ex morbo non prohibente cibi offerendi tempus inuenitur. Quibus verbis id volebat innuere, non indicari quidem cibandi opportunitatem à morbo, qui potius nutritioni reluctatur, sed ab eo permitti ab vrgente virtute indicatam, permitti, inquam, ita, vt administrari alimonia, & ingeri sine vlla ferè noxa possit, cui noxæ obnoxia est in accessionum & principijs, & incrementis facta cibatio, quia tunc viget calor febrilis vsu ciborum necessarium accipiens incrementum. nam cum optimum nutriendi languentes tempus sit cum moderatissime habuerint tum Thorax, tum Venter, deterrimum cum hæc viscera deterrime habuerint, quod secundum contingit in accessionum principijs, primum autem in declinationibus, ideo in his cibaria probè propinātur, in illis eadem summouentur, quia in declinationibus virtus indicat, & morbus non prohibet, in principijs autem morbus prohibet, licet indicet virtus, & plus ille vrget prohibendo, quàm hæc indicando. Iure ergo dixit Galenus tempus nutriendi sumi à morbo non prohibente, non quia indicetur à morbo, sed quia permittatur,

quatenus virtus quidem indicat, sed morbus non semper permittit, non enim in principio accessionum, nec in vigore permittit. Quamquam aliquando tanta est vis indicandi in virtute, vt inchoantibus etiam, atq; vigentibus accessionibus sit necessarium alere, vnde in commentario dicebat Galenus quātum est ex primo virtutis scopo interdum per accessionum initia alimonia existere necessitatem. Quæ omnia prius etiam breui summa complexus fuerat Celsus, hæc in tertio libro conscribens. Cum febris instet, incipiat, augeatur, consistat, decedat, deinde in decessione consistat, aut finiatur, scire licet, optimum cibo tempus esse febre finita, deinde cum decessio eius consistit, tertio, si necesse est, quodocunque decedit, cætera omnia periculosa esse. Si tamen propter infirmitatem necessitas vrget, satius esse consistente iam incremento febris aliquid offerre, quàm incremente, satius esse instante, quàm incipiente, cum eo tamen, vt nullo tempore is, qui deficit, non sit sustinendus. Hæc Celsus, cuius etiam illud est eadem loco monitum non contemnendum, operam esse dandam, vt securo animo ægri cibum accipiant, vt corpore tantum, non etiam animo laborent, ideoque nutritionis tempore omnem esse molestum nuncium, cuius oblata sit occasio, omittendum, in aliamque horam differendum. Sed quomodo sit verum quolibet febris tempore posse agrum aliquando nutrirī, in sequenti capite venit examinandum.

Quo-

*Quomodo à viribus sumatur indicatio alendi in vario accessio-
num tempore.*

CAPVT XXII.

MOrbus, vt ex dictis constat, tantum abest vt alimoniam indicet, vt eam potius inhibeat, dimittendamque suadeat, quippe qui præter naturam existens sui tantum ablationem insinuet vi contrariorum molendam, & ab innato calore perficiendam. quia ipsa contraria vsurpata ad morbosam affectionem tollendam ab ipso calore dirigi debent, in vsumque propositum conuersti, non potest autem hæc præstare calor si ad elaborandam, conficiendamque alimoniam fuerit conuersus, & à proposito sibi scopo deterritus. Et quanto magis viget morbus, maioresque affert ægrotanti labores, tanto magis conflictatur virtus, maiusque sustinet deferendum onus, ideoq; non est addenda afflictio afflictæ nouo cibariorum onere imposito, sed sinendum cum materia illam morbifica colluctari, vt paucioribus intentata possit commodius voti euadere compos. Morbi ergo consideratio nutrimenti inhibet vsum, & quantum ad ipsum pertinet, numquam de cibis cogitamus, quia sapius noxam afferunt, ideoque à morbo prohibentur nullum inde leuamētum, sed irritamentum potius accepturo. Quod quidem de cibis, quatenus vim habent nutritoriam, venit intelligendum, non quatenus suscipiunt facultatem medicamentosam, vt apparet in prissana, quia hoc nomine à morbosa affectione non mo-

do admittuntur, verum etiam indicantur, vt non solum in commentario primi de victu acutorum, sed sæpius in Methodo medendi declarat Galenus. Vt alentes ergo prohibentur à morbo cibi, & quo maior est vis morbi, magisque viget, eo maior est nutriendi ab eo profecta inhibiti-
tio, vnde dixit Hippocrates in primo Aphorismorum, cum morbus extremos habet labores tenuissimo victu esse vtendum, vt interdum vsque ad septimam vel sola aqua prissana cum oximelite, vel solo eiusdem prissana Cremore sint veteres vsi, vt patet ex Hippocrate in libris acutorum, & sæpius testatur Galenus sexcentis in locis. Hinc etiam pender, quodd in febribus vel inchoantibus, vel vigentibus non est opportunus ciborum vsus, quia tunc temporis est conflictata natura, deterrimè se habente & thorace, & ventre, cum hæc viscera sint præter naturali, febrilique calore tunc referta, qui calor nequitiam est ad conficiendam alimoniam accommodatus, sed ad accipiendam potius inde irritationem dispositus. Ex quo fit, vt hisce febrium temporibus importunissima sit alimonia, in declinationis ideo tempus differenda, cum febrilis caliditas à medijs partibus corporis ad infimas, ab internis ad externas progreditur, tantum pedibus infesta, quantum prius fuerat thoraci, & Ventri ad meliorem tunc dispositionem reductis, ideoq; commodius, & leuius impositum ciborum vsum laturis. Hac de causa Hippocrates in primo Aphorismorum scriptum reliquit in accessionibus esse abstinendum, quia sit nocuum dare cibum, & qui per circuitum habent accessiones, hos in ipsa accessione abstinere debere; vt sic commune præceptum in accessio-

bus non esse cibandum, siue sint accessiones febrium cōtinuarum, quæ licet semper habeant febrilem calorem adiunctum, habent tamen statis quibusdam horis illum remissionem (endosin hanc solet vocare Galenus) alijs autem intensiorem, siue sint accessiones febrium intermittentium, quæ habent suam periodum, in qua non solum declinatio, sed etiam intermissio febris, quam apirexiam idem vacat Galenus, habet locum. In utroque febrium genere continuitatem vel includente, vel excludente accessio arguit peiorem temporis partem, quia in continuis significat factam exacerbationem, & consequens incrementum quousque calor incipiat lentescere, in intermittentibus denotat principium febris, & incrementum, & statum usque ad declinationis aduentum, & quia tunc natura conflictatur valde, pugnatque cum materia moribifica, & viscera naturalis æconomix sunt malè parata, magnumque sustinent negotium, vt docet Galenus non solum in secundo de differentijs febrium, sed etiam tertio de presagijs pulsuum, ideo decernit Hippocrates cibum hoc tempore exhibitum esse apprime nocuum, quia naturam magis affligit afflictam, ad nouum opus auertit occupatam, & nouo caloris additamento lacescit magno prius incendio vexatam. Hoc nimirum tempore contingit illud celebre D. Pauli ad Corinthios, esca uentri, & Venter escis, imo potius esca uentrem, quàm uenter escam afficit ob maiorem ciborum in uiscus, quàm uisceris in cibos actiuitatem. Abstinentium ergo in accessionibus, quæ in continuis febribus proportionem, ut uocant, habentibus occupant deterriorem morbi partem, in intermittentibus autem

continentur insultum, incrementum, & statum, ut utrinque alimoniam respiciant, importunissimo, si detur, tempore administratam. Quare non solum in aphorismis, sed sexcentis alijs in locis hanc doctrinam inculcat Hippocrates indelebili memorix mandandam, ut accessiones alturi fugiamus, magnum alioquin miseris ægrotantibus detrimentum importaturi. Et non solum in primo acutorum hoc scriptum reliquit mandatum, ut superius annotauimus, sed in quarto etiam libro uel ipse, uel ipsius æmulus auctor idem censuit repetendum, uerbisq; tum uberioribus, tum clarioribus explicandum. obseruentur (inquit) ita febrium accessiones, ut nunquam, cum adsunt, uel cum futurae sunt, sorbitiones exhibeas, sed uel cum cessant, uel quieuerunt, & maxime à principio recesserunt. Frigentibus ergo pedibus nec potum, nec sorbitionem, nec aliud quippiam huiusmodi dabis, sed maximum existimato, si id tantisper obseruaueris donec ualde incaluerint, deinde ita quod confert exhibe. Quibus quidem uerbis, atq; adeo consequentibus docet Hippocrates uerum nutriendi febricitantes tempus, quod quidem nec imminente, nec inuadente accessione est opportunum, sed declinante solum, cum febrilis calor ad pedes, relictis supernis partibus, descenderit, & urina, reserratis omnibus fere corporis meatibus, cœperit currere, quia tunc cessant omnia symptomata prius infesta, & cibi exhibitionem prohibentia, quæ ibidem recensentur, uentris calorem dico, & nauseam, hypochondrij intensionem, corporis iactationem, mentis turbationem, ægri dolorem, lancinationem, uellicationem, uomendi affectationem, & ab humorum uomitu

vomitu molestiam. Hanc quidem nutriendi normam adeo mordicus retinendam, autumavit Galenus, ut in primo ad Glauconem tertiana, febris laborantes alternis dumtaxat diebus alendos proponeret, noxam veritus in die infestantis accessionis à ciborum captu imminente. Quod Celsi etiam fuerat in tertio suæ Medicinæ expressum placitum. Verum, licet hæc verissima sint, & concordi Medicorum omnium confirmata consensu, non habent tamen veritatem perpetuam, quam nulla medica præcepta habent contingenti materiæ in hærentia, cuius proprium est Aristotelis testimonio in sexto ethicorum numquam habere immutabilem veritatis constantiam, quia incidit aliquando tempus, ut non solum in ipsa accessione, sed in ipso accessionis principio cogamur nutrire. Quod ni fecerimus, superiori de vitanda accessione inherentes præcepto, morientem interdum, & semper in extremum vitæ discrimen deductum ægotantem viderimus. At quanam sunt hæc incidentia tempora, quæ accedentes occasiones? illæ nimirum, si virium vrgeat insignis imbecillitas, præsertim, cum febris ex inedia suum habuerit ortum, si vrgeat imminens, & quasi properans syncopes, cuius proprium est præcipitem inuehere virium lapsus. nam tunc plus habet momenti virtus indicando alimoniam sustinendis corruentibus viribus necessariam, quam habeat morbus eam inhibendo, tamquam curationi, & minori ægotantis molestiæ aduersantem. indicatio enim vitalis, à viribus suam nata originem, familiam ducit inter omnes indicationes, ut superius ex Galeni doctrina, in Methodi nono declarauimus, illo etiam addito, quando plures in-

ter se indicationes altercantur contrarietatem præferentes, ei semper plus deferendum, quæ plus mouet, eam verò plus mouere, quam digniora, maioraque indicantia, præscribunt, quorum dignitatem, vel vitæ, vel sanitatis respectu iudicamus, magnitudinem autem vel ad propriæ substantiæ vel ad declinationis à naturali habitu rationem referimus, ut docet vndecimus Methodi. Sed quis non videt quàm digniora, maioraque indicantia vitalem indicationem præscribant in magna, atque præcipiti febricitantis infirmitate? Cui nisi opem feramus alentes, certum instat securitæ mortis periculum. nam virtus, quatenus vitam conseruat, sine qua nulla potest sanitatis esse possessio, habet vehementiam dignitatis, quatenus consideratur ut dissipabilis vel ob temperaturam, vel ob ætatem, vel ob aliam causam habet vehementiam propriæ essentis, quatenus demum consideratur ut in aliquo ægotante dissipata, & à primo tono valde diffusa, habet vehementiam declinationis à naturali statu, ut eadem sibi vendicat omnem vehementiam tum dignitatis, tum propriæ essentis, tum declinationis enarrata, cui parem non habet indicandi vehementiam morbus, sed longè remissiorem, ideoque subit vicem permittentis, quatenus scilicet non amplius prohibet indicatum à virtute, nempe alimoniam, sed eius usum permittit. Non ergo mirum, si quando virtus habet omnem vim indicandi, siue dignitatem respicias, siue magnitudinem vel ratione propriæ essentis, vel ratione declinationis à naturali habitu, tunc trahit ad se omnia, & potest omnia, nec vllius indicantis repugnantiam moratur, sed ita suam indi-

indicatum vrget, vt adhibendum nulla interposita mora suadeat, ad hocque vim coactiuam inferat; quia alimoniam magna quasi voce clamat, labentes vires reparandas dicit, quibus reparandis nullus competit alius modus, quàm ab alimentis deductus; vt alimenta suppeditare cogamur, nulla habita morbi, seu causæ morbificæ ratione, nullo temporis facto delectu, nulla suscepta accessionis, febrilisque inuasionis animaduersione. nam facta collatione indicantium, intendendum est ei quod vehementissimè indicat, cæteris tunc quasi silentibus, veluti contingit in maxima virium infirmitate adeo febricitantem aggressa, vt proximam sincopem minitetur, tunc enim virtus maximè omnium, & ferè sola indicat, cuius conseruatio est vitæ conseruatio, at vita ipsa nihil est in animalis corpore potius, vt ideo virtus omnium prima sit custodienda, eiusque indicatio sit in primo loco sita, secundum locum sibi vendicet indicatio à curando affectu deducta, mox reliquæ indicationes consequantur. Quod vberimè fuisse à Galeno in nono Methodi explanatum sæpius animaduertimus. Quidquid ergo indicationi vitali repugnat, id secundi est loci, posterioremque vim habet ad indicata vitalia relatum. Et si aliqua cum viribus consonant, & vno quasi consensu in idem coeunt, hæc omne ferunt punctum, & sunt citra vllam controuersiam vsurpanda. Sed cum aduersam inter se vim habent, quæ viribus aduersantur, interdum sunt omittenda, interdum paulatim adhibenda, nam si curandus affectus vacuationem requirit, vires autem ad extremum infirmitatis corruerunt, reficiendis viribus intenti sanantium præsidio.

rum simus oblit. Sed vbi tantum acceperunt leuamenti, vt nullam, vel perexiguam ab euacuatione sint percepturæ offensionem, affectui etiam curando poterimus ex parte operam dare. Sic statuit Galenus in proposito nono Methodi primum indicationis à virtute pendentis insinuans, quam vocat primam indicationem non vt curatricem, sed vt vitalem, seu vitæ custodem, quia quod ab ea primum desumitur est vt viuamus, additum autem in sermone illud primum monet, quod ex accidente aliquando virtutis roboratio ad affectus curationem conducit. Verum nos modo consideramus indicatum à virtute pro vita tuenda, fugandoque urgente virium lapsu, quod indicatum tanti est momenti (quæ præcipua fuit in hoc capite sollicitudo) vt ne dum in accessione ipsa, sed vel in ipso accessionis insultu primo, quasi regularum Medicarum immemores, cogamur ægrotantes nutrire.

Exemplaris ex Galeno eiusdem rei ostensio.

CAPVT XXIII.



Anc modo explicatam rem nemo melius, nemo solidius, nemo vberius docuit ipso Galeno, qui eam in decimo Methodi sic examinat, ponderandamque suscipit, vt nihil amplius desiderandum relinquat. Proponit ibi pulchrum casum febricitantis acuta febri, ac temperamentum calidum, & siccum habentis, plenumque squalore, vt caninam quandam videretur præferre temperiem. Huius curationi cum non ipse

ipse solum afforet, sed alij etiam Medici diatritariæ viæ agrotos fame conscientis sectatores, placuisse illis quidem per plures dies inediæ usum, sibi autem quotidianam ciborum administrationem affirmat, quam usurpatam cum illi increparent, & magni causam detrimenti fuisse prædicarent, à se factum commemorat, ut statuta die accessionem ieiuno fieri sineret, sed inde tantam fuisse noxam consecutam, ut Hippocraticam planè faciem ad extremum ferè marasimum deductam febricitans ille præferet, & morti iam proximus videretur, conclamantibus, & conquærentibus eius propinquis, quòd Medicorum dissidium miserabiliter perderet ægrum. Hinc factum est, ut tunc Galenus, qui ad coarguendos, & conuincendos diatritarios illos Medicos inediæ illam permiserat, imò imperauerat, & Cremoris Ptisanæ, & vini tenuis aqua diluti ciathos aliquot ægrotanti exhibuerit, vel in ipsa nutriendi accessione, cuius integrum discessum, plenamque febricitantis integritatem si voluisset expectare, non tam diu, ut ipse testatur, mors ægrotanti expectasset obrepere. Ad hanc igitur euitandam, nulla interposita mora, cibauit, simulque omnes docuit, non solum in ipsa accessione, sed in prima etiam accessionis inuasionem cibandos interdum ægros, eos nempe, qui ob calidiorem, siccio remque temperiem, ob fluxilem, & facile dissipabile substantiam nequeunt inediæ incommodum sustinere, quippe qui non humorum modoeffluuescentiam, insignemque calidorum halituum prouentum, & internam quandam quasi phlogosum ob ciborum defectum perpetiantur, unde febrium & inchoamentorum frequentia, & incrementa fiunt

maxima, sed animi quoque deliquis, & præcipitibus uirium lapsibus corripantur, ac diuexentur. Hos igitur qui fame cruciat, & uel in ipsa accessione non nutrit, certus est mortis eorum auctor, ad quam obeundam expeditum illis parat, & compendiarium cursum. Hoc idem legimus in duodecimo Methodi, ubi de febribus magnorum genere symptomatum comitatils uerba fiunt, & febres præcipuè syncopales in examen reuocantur in his corporibus contingentes, quæ tenuioribus affluencia humoribus faciem, insignemque substantiæ dissipationem subeunt, quibus quocumque tempore febris cogimur cibum dare, ut syncopem uel præsentem curemus, uel imminentem arceamus. non enim tantum potest febris inualescens impedire, quantum uirtus concidens alimentum insinuare. In quocumque igitur casu destituta, & prostrata uirtutis siue ob intemperiem calidiorem, & siccio rem uel naturam, uel aduentitiam, inediæ onus sustinentem, siue ob syncopis casum quacumque tandem ratione accedentem, non oportet antiquum seruare documentum de cibis in febrium insultu omittendis, sed nullo habitu febris respectu, nullo factotemporum delectu, nutrimentis est manus danda, alioquin uirtus tota, euanescit, sine qua nec ulla potest esse morbi curatio, nec ulla uita superstes, & qui tunc febri curandæ uult operam dare, non animaduertit se curationem tentare cum dispendio, uel potius exitio auctoris illius, qui curationem omnem molitur, & perficit. Quem quidem auctorem quis nescit esse calorem innatum, siue naturam suis uiribus nitentem? Quam ideo Hippocrates in Epidemijs. uocauit medicatri-

cem, & Galenus in undecimo Methodi sanitatis causam ostendit arte ipsa, quæ solum ministerium præbet, longè priorem, & potiore. Hæc igitur nobis præcipue respicienda uenit, & conseruanda. Vnde Galenus in commentario loci illius Hippocratici, cuius supra fecimus mentionem, de tempore exhibendæ sorbitionis, dicebat hoc quidem tempus ex morbo non prohibente inueniri, sed quantum attinet ad primum uirtutis scopum interdum & per accessionum initia alimonie existere necessitatem, sicuti & in sanis, ubi primum in naturalibus euacuationibus quis eò deuenerit, ut propè laborare uideatur, refocillatione est opus. Sed huic præbendæ alimonie necessitati non semper paremus, sed tum solum, cum insuperabilis est necessitas, & periculum est, certumque uitæ discrimen in mora, alioquin nutritionem in commodius tempus differimus, ut ibidem explanat Galenus, cui quidem dilationi nullum relinquunt locum superius enumerati casus fatiscen-
tis, & undique deiectæ uirtutis, ad quam leuandam, & quomodocumque sustinendam quocumq; febrium tempore ad ciborum præsidium, tam quam ad sacram anchoram, confugere debemus, adeo ut uel in primo insultu, uel in summo ardore ne dum alia edulia, sed ipsa etiam oua recentia, ipsum etiam uinum suppeditare possimus. Ex his liquet, rectè dictum à Galeno fuisse tempus exhibendæ alimonie sumi à morbo non prohibente, quia à uirtute non sumitur indicatio temporis, sed solius exhibitionis alimentorum, quæ administranda, nullo habito temporis delectu, uirtus ipsa suadet, interdumque cogit, & morbus tunc non prohibet, quia eius indicatio

obruitur, eius inhibitiō obscuratur, & ueluti leges inter arma silent, ut ait ille, ita curatorie leges conticescunt inter imbecillitatis arma uirtutem prosternere aggressa.

De Vini usu in febribus putridis indicatione à uiribus sumpta.

C A P V T XXIV.



Inum esse liquorem, & succum corpori nostro tum nutriendo, tum curando idoneum, ut ideo & nutrimenti, & medicamenti operam præstet, nemo est uel mediocriter in arte uersatus qui nesciat. nam sæpe apud Hippocratem, & Galenum Lectori sese offert hæc uaria uini consideratio, ut modo eius alteratoria, modo nutritoria facultas in examen reuocetur, ueluti apud Hippocratem in libello de liquidorum usu consideratur ut medicamentum, in tertio de uictus ratione in acutis ut alimentum, & apud Galenum in libris de alimentis, & de Methodo redigitur ad utrumque examen. Nunc dimissa facultate medicamentosa, quæ nullam habet cum indicatione uitali propriam cognationem, solam nutritoriam considerandam suscipimus, quam qui à uino remouendam censent (cuius opinionis non defuerunt auctores) hi uidentur nodum in scirpo querere iuxta paræmiam, & in luce meridiana caligare. nam uinum mixtum ex elementis omnibus conflatum, in quo si materiam consideres, præualet humor aqueus, unde Aristoteles quarto Meteorologicorum illud redigebat ad aquam, quippe quod sue substantiæ fundamentum, & quasi stratum

habeat aqueum vitis humorem, sed si eiusdem quasi formam confideres, multum habet caloris inclusam extrinsecus accedentis, partim nempe à solo communicati, partim à sole impertiti, vt duplici hoc nomine caleat, mixtumq; euadat humidū, & calidum, humanoque temperamento his qualitatibus gaudenti accommodatissimum, absque vllō dubio in censu alimentorum vinum ipsum est reponendum. nam mixtum illud, quod naturæ nostræ cognatum est, & quodam familiaritatis iure deuinctum, à nostroque calore immutari in nostræ substantiæ similitudinem potest, verò nutriendi priuilegio fruitur, talem autem naturam vino congruere infitiri possit nemo. Nec enim valet illa obiectio, quod ipsum non crassescat tamquam aquea natura præditum, cuius proprium dixit Philosophus in Meteorologicis non crassescere, quia vel ipso experimento innotescit tantum ipsum à calore incrassationis sortiri, quantum ad præstandam alimoniam videtur requiri. Nec vllōs mouere debet celebre illud Hippocratis dictum in fine libri de alimento, quo humidum vocat *ὄχυμα τῆς τροφῆς*, vehiculum nutritiis, quasi omnis humor, liquor omnis hunc duntaxat vsum habeat, quod alimentum per se alioquin non permeaturum ob crassitiem per partes nutriendas instar vehiculi, & quasi currus ratione suæ tenuitatis vnde quaque perreptantis inuehat, & perducatur hoc, inquam, dictum non debet mouere, quia aquam potissimum respicit, cuius est præcipua, & inseparabilis proprietas vt humida sit, vt præclare considerat Galenus in primo de simpl. facultate, & hunc fuisse germanum Hippocrati ci dicti sensum locuples est testis idē

Galenus in quarto de Vsu partium. Huc accedit, quod vinum considerari potest vt humidum, & vt transmutabile ratione cognationis in nostrum succum, vt humidum habet rationem vehiculi, & confert etiam ad reliquam alimentalem substantiam deducendam, vt transmutabile in nostrum succum habet rationem veri alimenti. Hinc Galenus tum in tertio de temperamētis, tum in eodem de alimentis asseruit vinum tanto celerius nutrire nostra corpora, quanto minore exposcit mutationem vt vertatur in sanguinem, qui cum magnam obtinet similitudinem, nam verissimum est Aristotelis in secundo de ortu proloquium, in rebus habentibus symbolum dari transitum faciliorem. Quamobrem Hippocrates in libello de alimento velut his, qui tardiori appositione opus habent, solidum proponebat alimentum, ita his, qui celeri appositione indigent, humidum ad resumendas vires dicebat optimum, his autem, qui adhuc celeriori indigerent, ad olfactum confugere suadebat. Hoc iacto fundamento de vi nutritiæ vini, quod nullatenus concuti, conuellique potest, & concedi ab omnibus rectam doctrinæ viam ineuntibus debet, illud statim consequitur, vinum vt materiam alimenti congruam conuenire indicari virtuti, idem tamen à febris ipsa putrida sæpius prohiberi. nam cum febris hæc & intemperies sit calida, ac sicca, & materiam morbificam habeat sæpius crudiusculam, & cum insigni obstructione coniunctam, non potest admittere, vinum vi calefactoria, & exiccatoria præditum, crudioris materiæ agitatiuum, & per fluentium humorum inuersionem amplificandis obstructionibus opportunum. Quod si

in Epidemijs Hippocrates calidis naturis consulit potum aquam, refrigerationem, quietem, veritus ne vsu calidorum excedens calor accipiat incrementum, labemque maiorem sustineat: quāto magis hoc præbet consilium febricitantibus, in quibus iam calor adeo inualuit, ut præter naturalis, promendisq; actio nibus ineptus euaserit? Hinc Celsus, quasi alter Hippocrates Latinus, in tertio libro asseruit in acutis præcipuè morbis summouendum statim esse vinum, quod subtrahum, plus quam si cibo aliquid dematur, adiunget. Vinum ergo non conuenit putridis inchoantibus, inualescentibus, & vigentibus febribus, ne ignis addatur igni iuxta Platonis in libris de legibus dictum, Vnde Galenus in septimo Methodi in ipsismet tabescentibus, qui magna indigent, celerique refectione, vini vsu, si febricitent, pertimescit, & in octauo Methodi rerum febricitantis corpus calfacere valentium censum quendam efficiens ipsum etiam vinum enumerat, & in primo de arte ad Glauconem in tertiana febris non statim ad vini vsu accedit, sed expectandam morbi declinationem, materiæq; coctionem qualemcumque proponit, & hoc quidem vel in ipsa febris intermittente, ut hinc suspectiorē hunc esse potum appareat non opportuno tempore adhibitum nam, ut præclare dixit Erasistratus, quæ alimenta fortes habent, validasque vires, ut opportunè adhibita miram afferunt utilitatem, sic intempestiuè vsurpata effatu dignum inuehunt detrimentum. Verum tamen licet hæc verissima sint, incidunt tamen aliquando occasiones, ut quocumque tempore, nullo habito delectu, liceat, ac tuto libeat vinum propinare febrientibus, &

hæc quidem occasiones tum obrepunt, cum maximus adest virium languor, maximaque imbecillitas, celerem, nec leuē refectionem exposcens, ut indicatio vitalis trahat ad se totam Medici cogitationem, & plus ipsa valeat talem alimoniam, cuius materia est vinum inter cetera, indicando, quā febris hanc vltioris caloris, & siccitatis, aliorumque malorum ministram prohibendo, nam nisi vires sustineantur, nisi necessaria vsurpetur refectio, repentinus irruit interitus, & omnem adimit curandæ febris ansam, ut sit augere paullisper morbi tutius, dummodo augeantur vires, & vita melius consistat, & natura quodammodo reuiuiscat, quæ cum sit præcipua curationis effectrix, frustra expectat à ministrantibus causis operam auxiliatricem, si ipsa languet prostrata, atq; fatiscit. Sed quia non omnis virium infirmitas eadem est, nec ab eodem quasi Fonte deducta, verum alia quidem vasorum sequitur inanitionem, alia excrementorum copiam quasi opprimentem, alia demum morbi acumen, & prauitatem, ut licet ex Hippocrate colligere in secundo acutorum, distinguendæ erunt variae infirmitatum in viribus apparentium species, quia iuxta Hippocraticum dictum cognita quidem salutem, ignoratæ autem pernitiem possunt asferre. Viribus ergo ob inanitionem languescentibus alimoniam præsidium est adhibendum, ideoque vinum præbendum, quia corrigenda venit facta substantiæ dissipatio, & contrarij ope sarcienda præcedens detractio, hoc autem contrarium est adiectio, quæ vino commodius, quā vllō esculento fieri potest, non solum quia facilius est impleri potu, quam cibo, ut dixit Hippocrates in Aphorismis (hæc

(hæc enim ratio Galeni testimonio completitur liquidiora omnia) sed etiam quia vinum celerem facit, paucaque indigentem mutatione nutritionem; ut superius ex eodem Galeno annotauimus. nã cum duo præcipua sint, quæ valdè, repenteq; nutriunt, stillatitius liquor ex capi, alteriusve id genus Auis carne confectus, & ipsum vinum, hoc magis, quàm ille hanc operam nauat, quia vinum maiorem habet cum sanguine similitudinem, & flagrantiorum habet odorem, cuius non exiguam esse vim ad citius nutriendum clara est Hippocratis auctoritas in annotato superius loco libelli de alimento. At si virium imbecillitas non inanitionis sit soboles, sed grauantis materię, & propemodum opprimen- tis multitudinis fructus, non eadem adest exhibendi vini occasio, sed vr- get potius inhibitio, quia tunc non adijcere oportet, verum detrudere, nec est defectus in necessarijs, sed in supernuacaneis excessus, & exuperatio, ut non faciendæ nutritionis, ve- rum moliendæ euacuationis sub- eunda sit cogitatio. Quod apposi- tè docet Hippocrates in commemo- rato secundi acutorum loco, & Ga- lenus in duodecimo Methodi, vbi febricitantium ad animi syncopale deliquium examinat propensionem ex varia causa pendentem, quarum altera sit insignis succorum tenuitas dissipandæ substantiæ opportunissi- ma, altera verò eorundem crassities, & copia ad innatum calorem oppri- mendum, & quasi suffocandum ap- tissima. Quid si virium languor à febris proueniat prauitate, maloque more? Considerandum erit qualis sit febrilis calor, num intensus, an remissior, & num plus vrgeat febris, an imbecillitas, & num humores

adhuc integrè crudi, an aliquam co- ctionem sint adepti. nam si feruidus calor, & febris, materiæque cruditas vrgeat prohibendo, abstinendum fuerit à vino, sin calor ipse remissior, licet cum prauo more coniunctus, & vires langueant, humoresque co- cti aliquantisper appareant, erit ad- hibendum vinum, benè tamen lym- phatum, non solum quia ad vires re- focillandas, & ad meliorem tonum adigendas aptissimum, sed etiam quia compescendæ, coercendæque putredini accommodatum, ut ex Ga- leno inferius considerabimus, pu- tredinis autem inualecentis effe- ctus est ipsa febris malignitas, ut pa- tet ex eodem Galeno in tertio Epi- demiorum. Quare qui putredini re- pugnat, & reluctatur, malignitaris etiam interrumpit progressum, ut ideo possit vinum in hac vltima vi- rium infirmitate non solum viram tueri viribus reparandis, sed mor- bum quoque reddere mitiorem pu- tredine compescenda. Ita fit ut ex- triplici specie virium infirmarum in duplici ferè opus sit vino ad repa- randam, erigendamq; collabentem naturam vitali indicatione vigente, & curatrici non parum præponde- rante, ut plus moueat imbecilla vir- tus roborans auxilium indicando, quàm febris vim calefactoriam, & agitatoriam inhibendo. nam cor- ruentibus viribus, & ad extremum ferè languorem tendentibus, quolibet febris tempore, siue inchoantis nempe, siue incrementis, siue vigen- tis, siue declinantis, in quolibet mor- bificæ materiæ statu, siue tenuis, & crudioris, siue crassæ, & concoctæ vi- num venit porrigendum, quia licet alia sint ad nutriendum validiora, ut aqua carnis, & destillatum, & contusum, hæc tamen omnia maiori

naturæ conatu ad necessariam immutationem perficiendam indigent, nec ita celerem præstāt alimoniam, quem conatum minus sustinent vires languidiusculæ, quam celeritatem eadem exposcunt euanescentes, vt hoc nomine vinum, quod & leuē exigit transmutationem, & celerem inuehit nutritionem, longè fuerit præponendum.

De cautione seruanda in vino febricitantibus exhibendo.

CAPVT XXV.



N magna virium infirmitate quomodo febricitantibus vinū sit porrigendum apparuit. Nunc adiiciendum est, quod si tanta non fuerit uirtutis imbecillitas, & maior appareat urgentis febris indicatio, in aliud erit commodius tempus uini usus differendus, cum ipsa scilicet febris manifestam habuerit declinationem, & hoc qui dem tutius in genere intermittentium, & cum succi claram prætulerint coctionis significationem, quia tunc tutior est eius exhibitio non lædētis calore, ubi non magna supersunt febrilis caloris uestigia, non lædētis agitatione, & confusa quadam perturbatione, ubi materia immobilior, & constantior est dominantis naturæ nutum sectata. Quo quidem tempore uinum ualet non modo ad vires fouēdas, sed ad morbi etiam reliquias profligandas, ut & uitalem, & curatricem indicationem respiciat. Vnde Galenus in octauo de medicamentis secundum loca optimum de uino testimonium perhibuit dicens uinum conuenien-

tissimum esse citra inflammationē, aut erysipelas, aut abscessum, aut calidam temperaturam agrotantibus, quia & nutriet, & concoquat, & roboret, & putrefactioni resistat, & si intemperies ex humiditate facta sit, & frigiditate, eam citra omnem molestiam, & securè persanet. Neq; hic potest aliquis insurgere dicendo, hæc Galeni uerba potius Medicum detertere à uino porrigendo in febribus, quando quidem excipiunt agrotantes ex inflammatione, & calida temperatura, quales sunt febricitantes, quia facile fuerit hanc obiectionem diluere partim ex eo, quod Galenus ibi loquitur de uino sincero, & aquæ experti, quod in febribus non est usurpandum, partim ex eo, quod intelligit calidas intemperaturas uigentes, & præ sui uigore negotium facessentes, quales non sunt in febribus declinantibus, præcipuè si fuerint numero intermittentium, in quibus cum magno agrorum commodo licet uinum propinare, ut ideo Galenus in primo ad Glauconem tertianæ exquisitæ curationem proponens asserat agrotantes, antequam concoquatur morbus, à uino prorsus arcendos esse, sed ubi concoqui cæperit, tenuē, & aquosum, & paucum ab initio esse dandum, & cum proximus est solutioni, copiosius. In cuius explicatione sententiæ eruditissimus Stephanus Atheniensis prudenter notat in potum proponi non aquam, quæ in Hippocondrijs morando alioqui nocet, sed uinum, quod ob celerem distributionem potest tum excretionēs uniuersas prouocare, tum facultates roborare, tum succos in bonam temperaturam transferre, dum ipsum in sanguinem conuertitur, & inutiles materias exonerat, ac transmutat, non dandum tamen crudi-

eruditatis tempore, quia tunc materias fundendo obstructions auget, sed post concoctionem, ut memoratas res efficiat, illa seruata cautela, ut tenue sit, valdeque lymphatum, non antiquum, nec natura calidum, & album potius, quam nigrum. Quo in loco animaduertendum venit Galenum timidiusculè ad vini usum accedere, quia tertianam exquisitam susceperat curandam, quæ non cadit nisi in calidissimas naturas, quibus vini potionem aduersam esse restatur in Epidemijs Hippocrates, ut diximus, at in minus exquisitis, & spurij tertianis, ubi calidiores succi frigidiorum miscella restitutio nem quandam sunt nacti, audentius vinum innuit præbendum, cum in eis victus rationem eam laudet, quæ vi quadam calidiori sit, & secantiori prædita sed in vndecimo Methodi vel in ipsis continuis, quas vocat synochos, vinum putat concedendum; nam cum proposuisset in his febribus moliendas euacuationes per vinum, per aluum, per sudorem, interdum etiam per vomitionem, adiungit post euacuationem totius corporis licere uti medicamento aliquo, cui calor tepidus insit ad rarefaciendum, & in hoc tempore si vinum quoque aquosum bibatur, id omnes vacuationes promouere. Et paullo post in eodem capite vinum consulit non modo ut materiam remedij curatorij, seu præseruatorij, sed etiam ut vitalis, per accidens tamen ad morbi sanationem collatur, quatenus vinum vires potest restaurare, & facultatem concoctricem excitare, & firmare, quæ & alterare valet, & concoquere, & utile reddere quicquid putrescentium in corpore humorum veluti semiputrescens, seminalumque est. Vnde apparentibus signis co-

ctionis non solum Balneum laudat, vel medicamenta habitum rarefacientia, vel aquam frigidam, sed ipsum etiam vinum. nam si vires valide, & febris ardentissima cum signis coctionis euidentibus, frigida potionem audacter suadet, at si vires non validæ, & febris mediocris cum notis concoctionis, balneum proponit, & vnctiones rarefactorias, & vini potionem. Quam tamen censet omittendam ubi nec notæ adsunt coctionis, nec vires valide, ea ductus ratione, quod desperata tunc sit egrotantis salus, & imprudentis consilij sit apud vulgum infamare præsidia quæ multis fuere salutis. Quod quidem Galeni dictum ita debemus interpretari, ut in morbis ad certam mortem tendentibus nullo vtamur remedio, sed solo præsidio ad nostræ existimationis tutelam, vel saltem non vtamur nisi præuia protestatione futuri euentus, quæ sola tueri potest artis, & Artificis dignitatem, ut consilium de omittendis præsidij omnibus tradat Galenus potius ut securum faciat medicum à calumnijs, quibus nimium viuere obnoxius, quam ut eum deterreat à tentandis remedijs, quæ aliquando præter omnium expectationem agris vel deploratis fuere salutis. mira enim est varietas, & incredibilis inconstantia euentuum in morbis apparentium, vnde coniecturalis manat artis natura, quam ideo Plato in Epinomide vocauit artem incertis coniecturis, opinionibusque procedentem, in qua, ut dicebat Celsus, obrepit aliquando deceptio tum in his, quæ pestifera, tum in his, quæ salutaria sunt, ut interdum conualescant qui certo videbantur morituri, & moriantur, qui pro comperto iudicati sunt conualituri. Alioquin crudelis fuerit quodammodo hominis agrum.

ægrum vel in extremo situm periculo deferere, & ad corporis afflictionem animi etiam molestiam eidem adiungere omnibus se præsidij destitutum videnti, & se quasi Philoctetem in Lemno soli morti aduenturæ relictum consideranti. Galenicum ergo illud præceptum quarit quid Medico conueniat, non quid ægro commodum sit, cui magis conducit aliquod tentari præsidium, quàm nullum, & quem constat confidentia repleri dum auxiliares Medici manus experitur, vel quocunque modo eas sibi admoueri sentit, vel si incurabili se morbo laborare agnoscat, vt ait Hippocrates in libro Præceptionum. Adde, quod Galenus in morbis deploratis non laudat vinum vt remedium curatorium, quatenus coctiones, & euacuationes potest promouere, non improbat vt præsidium vitale, quatenus vires collabentes potest aliquatenus sustinere, & vitam diutius tueri. est enim Galenica propositio sæpius in libris Methodi reperta in concursu duarum indicationum, vitalis, & curatoriæ, si prima magis urgeat, esse illi incumbendum, altera contempta, quia prima vitam conseruat, cui conseruandæ omnè præcipuum est impertiendum studium. Quare languentibus omnino viribus etiam cum cruditate succorum non debet vinum omitti, quia licet non possit adhiberi tamquam præsidium profligandi morbi, debet nihilominus tamquam materia celeris, probæq; alimonie ad retinendam vitam accomodatissima. Hac de causa credendum est Hippocratem in tertio acutorum, vel in ipsis morbis acutis, in quibus adsit suspicio de insigni vel capitis grauitate, vel mentis læsione, non solum proponere aquæ potionem,

sed vinum etiam aquosum concedere, flauumque & prorsus inodorum, ea seruata conditione, vt post eius potionem aquæ exiguum superbibatur, vt vini potentia caput, mentemque minus tentet. nam quis non videt, quod vrgente capitis dolore, imminenteque mentis hallucinatione vinum non conueniat, magna euaporandi vi præditum, vt docet quartus Meteorologicus, ideoque ad caput replendum, deliramenta-que inducenda peropportunum. Et si vllum tempus, in quo non conueniat eius vsus, si vllus affectus est qui eundem vsu prohibeat, tale quidem tempus est hoc, talis affectus est proposita capitis dispositio, & ad delirandum propensio. Sed nihilominus præbet vinum Hippocrates saltem aquosum, odorisque omnis expers, & euaporatoria vi destitutum ob insinuatam cautelam, quia considerat vires interdum adeo languescere, ac deprimi, vt per aquæ potum multa incommoda ab eo relata præstantis magis, magisque euanescent, & solo propositi vini quasi fulcro sustineri valeant. Verum quia magnus est metus, ne grauiissima illa symptomata inualescant, non exhibet vinum generosum, at oligophorum, & suapte natura aquosum, ac tenuissimum, nec exhibet solum, sed cum consequente pauculæ aquæ portione. Quasi dicat Hippocrates in omnibus acutis morbis, vbi nulla est vel de capitis grauitate, vel de mentis læsione suspitio, vinum pro potu esse aquæ præponendum, quâdoquidem in casu horum etiam symptomatum liceat vti vino tenuissimo, cuius potionem excipiat aquæ sorbitio. Vnde Galenus in octauo Methodi colligebat ex Hippocrate in libris acutorum non diarijs modo febribus, verum etiam

etiam acutis vinum esse dandum. Vinum (inquit ibi Galenus) ipse conscius es omnibus me eiusmodi naturis concedere, sed quod tum aspectu, tum viribus sit aquosum. id enim ad omnia vtilius, quàm aqua est, utpote quod & concoctiones iuuat, & vrinas, ac sudores prouocet. Constat autem & Hippocratem nō in diarijs modo febribus, verum etiam in acutis, ex his, quæ de acutarum victu prodiit, vinum dare. Hæc Galenus, qui statim sententiæ in Epidemijs scriptæ de uino calidis naturis verando satisfacit dicens, quòd dum calidis temperamenti proponit Hippocrates refrigerationem, aquæ potionem, quietem, vberiorē aquæ, quam vini copiam ipsis consulit vsurpandam, ut aquæ nomen non puram & simplicem aquam, sed paucissimo vino comitatam, ut uinum transeat in nomen aquæ uideatur insinuare. Quam quidem interpretationem non solum in octauo Methodi, sed in commentario etiam illius propositionis Epidemicæ affert in medium Galenus. Hæc quidem paucissimam uini portionem multæ aquæ adiunctam si reuocauerimus in examen, illud forsitan optimo nixi fundamento constituemus, nullum esse febris tempus, nullam ferè materiæ morbificæ dispositionem, in qua non liceat tali uti porione; quia hæc uim habet humectatoriam, atque adeo refrigeratorem, ut docet Galenus in libro de cibis boni, & mali succi, in commentarijs secundi, ac tertij de victu acutorum, ac sexcentis alijs in locis, & non solum humectat, ac refrigerat, sed quoquo etiam pacto nutrit, bilem coercet, ac temperat, uerum euadit nutrimenti uehiculum, mæstitiam pellit, & morositatem, quas maximè excitat, fouetque aquæ po-

tio. De quo perbellum habemus uel apud ipsum Demosthenem testimonium, qui se in Philippicis tueretur aduersus inimicorum conuitia, illud sibi præter cætera obiectantium, quòd tamquam abstemius, & aquæ potator morosus esset homo, moribusque difficillioribus, & asperioribus præditus. Cuius quidem euctus rationem colligimus ex his, quæ ad aquam improbandam memoriæ mandauit Hippocrates in tertio acutorum, ubi inter cæteras prauas ipsius conditiones annotat ipsam esse biliosissimam omnium, ac tardè permeantem hære hypochondrijs, & uiscera tumefacere, ut necessarium sit magnum fieri melan colici humoris prouentum, in què bilis humorem faceat, magnum fieri uaporum tenebricosorum ad cerebrum ascensum, tristes cogitationes, morositatisque plenas inuentum. At uini diuersam uim quis non nouit? cuius usu non aliter animorum durities emollescit, ac ferri durities igne, ut est apud Platonem in libris de legibus, ubi etiam legimus uinum fuisse donum Deorum humanas ærumnas miserentium, ut esset qualecumque lacerantium curarum leuamentum. Et fuit præclarum Stoici dictum uel ipsius Galeni testimonio in libro de symphonia morum, ac temperamento, ut lupinos aqua maceratos amarorem, sic animos humanos uino percitos deponere mærorem. Hinc in eodem libro Galenus admiratur consilium Homeri inducentis in Odyssea Helenam proflentem arcenum quoddam de succo in uinum immittendo, quo uim animi lætificandi acquireret, admiratur, in quâ Galenus hoc consilium, quòd nihil sit uino opportunius ad mentem exhilarandam, nihil accommodatius, in quo

quo confirmat Psalmographi dictum afferentis uinum lätificare cor hominis. Verum quanti referat cordis exhilaratio ad pellendos morbos infestantes locuples est testis Galenus in primo de sanitate tuenda, & in libello de parua pila, ubi multos ex animi solo mærore in grauissimas incidisse ægitudines testatur, multos ex sola lætitia ex alijs grauissimis euasisse. Erit ergo portiuncula uini plurimę aque iniecta quasi Helenę Nepente, quod potionem reddet exhilaratoriam, & cogitationum tristium quasi nebularum depultricem. Nec uenit hæc potio eo nomine pertimescenda, ac prætereunda, quod possit materias exagitare, & ante apparentem coctionem sudores, & urinas ciere, ante congruam totius corporis euacuationem humoribus impetum præbere, & obstructions in partibus maiores efficere, quia hæc præstari non possunt à potione omnino ferè aquea, perexiguam uini portiunculam continente, quę non tam gustatum titillare, quàm aquam ualeat corrigere. In hac tanta aque copia delitescit uis uini, licet possit aque impertire quędam commoda, abolere eius damna, & quędam suę beneficę naturę uestigia relinquere, nam Galenus in commentario tertij acutorum miris laudibus effert uinum aquosum, quod etiam oligophorum, seu pauciferum dicitur, pro febrientibus, quod ab Hippocrate ibidem uocatur album, tenue, pauciferum, & inodorum, cui soli datum esse affirmat Galenus, ut tum aque, tum uini mala effugeret, quia secundum ipsum est quasi aqua, quę paullulum sit terre, calideque substantię particeps, cui non fuerit opus ad horum unionem multa ope. Hoc ergo febricitantibus per-

mittit, & iucundissimum uocat. Dices hanc permissionem fieri suppositis supponendis conditionibus, ut non sit febris incipiens, non sit materia excrementitia uberior, non crudior, respondeo has conditiones exigi à Galeno ad usum uini pauciferi cum pauca aque portione, quia adhuc potest esse suspitio calefactionis alicuius, atque adeo agitationis, sed cum uinũ hoc pauciferum multa diluitur aqua, cessat, & euanescit omnis suspitio, quia ipsum fractum, infirmumque & ad potum inutile, reddi affirmat Galenus, si multa fuerit aqua dilutum. Vocat autem inutile ad potum tamquam uinum, quia non retinet incolumes uini proprietates. Hoc modo uti uino est uidere potius, quam potare uinum, ut dixerunt Medici quidam Galenum conspicati seni cuidam ægotanti quotidie uinum aquosum exhibentem, & uini minimum aque ipsi instillantem, ut legimus in commentario tertij acutorum. Quę quidem minima uini portio est iuxta dictum Galenicum excitatio quędam, quę ad distributionem aquam trahat, ut dumtaxat aqua tollatur sinceritas, non autem aqua uinum euadat. Quis hanc miscellam audeat arguere? non enim potest calorem inducere, sed uim potius habet refrigerandi, ut affirmat sæpius Galenus in illo tertio acutorum, imo Hippocrates in tertio de morbis uariis potiones adducens refrigeratorias aquam proponit cū perexigua uini chij portione permixtam, nec potest proposita illa potio, de qua loquimur, materias agitare, & humorum confluxum excitare ad obstructions augendas, sed potest potius aque moram in hypocondrijs contingentem remouere, ex qua mora & bilis potest augeri prouentus,

tus, & viscerum fieri tumor. Ac mihi quidem hac de re cogitanti venit in mentem admirari, quomodo Medicorum aliqui vereantur exiguam vini portiunculam in multa aqua copia febrientibus exhibere, materia agitationem, celeremque & intempestiuam distributionem suspicari, & audacter tamen aquam exhibeant vel cinamomo, vel succo limonum alteratam, vnde maiorem fieri ad vias urinarias deductionem dubitauerit nemo. Hæc ita se habentia clarè ostendunt quid statuere debeamus de usu vini in febribus putridis ex Hippocratis, & Galeni mente.

De Varijs gradibus vini in febribus putridis exhibendi.

CAPVT XXVI.



T hæc, quam habemus præ manibus, innotescat magis, ac dilucidior fiat utilissima materia, & curiositatis plena, non abs re fuerit Vini potionem in tres quasi gradus distinguere, in quorum primo sit vinum parum dilutum, in secundo vinum & sui natura aquosum, & valde dilutum, in tertio idem vinum aquosum dilutissimum. Vini potionem primi gradus non admittit, nec exposcunt febricitates, nisi cum urget virium infirmitas, & indicatio vitalis præponderat ob imminens periculum vel syncopis, vel alterius id genus dissolutionis, quo nomine Galenus in duodecimo Methodi non timidum in propinatione vini se præbet, & hæc propinatio virium languori debita non certum requirit tempus, sed omni morbi tempore fieri potest. Potio secun-

di ordinis, hac non urgente indicatione, exhiberi potest euacuato corpore, & apparentibus coctionis signis, quia ad omnia vinum utilius aqua, ut octauo Methodi dicebat Galenus, & ad coctiones iuuandas, & ad euacuationes promouendas. Potio tandem tertij gradus quocumque morbi tempore vsurpari potest, quia est potio quasi aquea omnino, sed non habet incommoda insignia aquæ sinceræ, quæ fuit correctæ, & ad meliorem quandam frugem redacta instillatione paucissimi vini, ut eodem instillationis vocabulo utar, quo utebatur Galenus ad insinuandam paucissimam vini adiecti portionem. Quare si aliquando Galenus inhibet vini usum in putridis febribus, nobis dicendum videtur non inhiberi potionem huiusce tertij gradus, sed reliquorum, quia hanc tertiam nunquam vel pertimuit, vel pertimescere potuit, quinimo audacter semper vsurpauit, & huic potioni aquæ nomen attribuendum putauit, ut patet in explicatione sententiæ Hippocraticæ de aqua calidis naturis consentanea, cuius supra fecimus mentionem. Et quia hæc potio euadit aliquantisper nutritoria ob illam qualemunque vini adiectionem, cuius absentia eandem relinquit alitorum facultatis expertem, ideo in gratiam etiam virium, quarum semper habenda ratio in his febribus, huius propinanda suscipitur cogitatio. Quam quidem rem hoc præcipue tempore considerandam accepimus, quippe qui non tam medicamentosam, quam alimentalem vini facultatem in examen reuocemus. Quæ quidem facultate maxime opus est cum vires languent, & fulcrum exposcunt, & præcipue in ætate senili, Vnde Galenus in tertio illo de victus ra-

tione febricitanti seni, vt diximus, quod cotidie se vinum hoc pacto præbuisse confirmat, & dum dicit quotidie, omnem morbi progressum complectitur, nullam eius diem, nullum statum excludit. Sed hæc indicatio etiam cum vires consistunt est ponderanda, quia semper in putridis febribus aliquid labis contrahunt, & omni studio conseruandæ veniunt, & à maiori, quàm deceat, casu muniendæ. Quarum etiam animaduersio facit, vt non modo ob imbecillitatem, sed etiam ob confirmatam consuetudinem ad vinum febrientibus concedendum toto morbi progressu accedamus, nam qui ab aquæ usu abhorrent, & vinum potare assidue sunt assueti, nec mutationem admittere sustinent, his nullatenus imperanda venit vini abstinentia, quia hæc omnem naturæ æconomiam in his euertit, vires labefacit, & ad extremam ægros infirmitatem deducit. Non negligenda ergo, sed maximi facienda vetus, confirmataque consuetudo, cuius quantum sit momentum vberrius explicat Hippocrates in secundo de victus ratione, vbi hanc etiam à vino ad aquam, vel aqua ad vinum mutationem examinat, vnde in primo Aphorismorum quomodo à consuetudine sumatur indicatio explicuit per celebrem illam sententiam, Victus humidus febricitantibus omnibus confert, maximè vero pueris, & alijs, qui tali victu yti consueverunt. Vbi triplex proponitur indicatio vsurpandi victus humidi in febrientibus, prima à morbo, secunda ab ætate, tertia à consuetudine, & quia morbus est quid præter naturam, & præternaturalia sunt contrarijs corrigenda, iure contrarietatis conuenit victus humidus in febre, quæ est intemperies calida, & sicca.

sed quia ætas puerilis, & consuetudo sunt res naturales, & istæ similibus sunt fouendæ, ideo iure similitudinis ob istas febrientibus hunc eundem humidum victum adiangimus; vt prima indicatio sit curatiua, reliquæ duæ sint vitales; quatenus viribus conseruandis, in quibus vita consistit, intentæ. Hinc Galenus in nono Methodi magnam indicandi vim consuetudini deservit, & in octauo examinat præfatum Hippocratis aphorismum docentem indicationes colligere tum à morbo contrariorum, tum ab ætate, & consuetudine similibus, quatenus & ætas, & consuetudo similem sibi exposcunt victum, & à consuetudine semper præberi quousque egrotant homines. Et quamuis indicationes quæ à febre, à temperamento, ab ætate, à consuetudine, ab alijsque id genus colliguntur inter se interdum discrepantes, inuicem conferendas proponat ibi Galenus, & primas potioresque partes indicationi à febre exortæ videatur deferre, tamen si habeatur ratio consuetudinis, cuius contemptus sit absoluta, virium labefactio, non possumus cum eius methodo negare huius indicationem esse præponendam, quia huic repugnare consuetudini est naturæ reluctari, cui qui aduersatur, vult more Gygantum, vt ait ille, alterecari cum Dijs, & dum consuetudinem destruit, destruit naturam, & vires pessumdat, sine quibus non potest vita consistere.

Quod consuetum est (inquit Galenus loquens de somno in commentario secundi Prognosticorum) id bonum est, inconsumum verò malum, vt maioris faciendæ videatur consuetudo, quàm natura, quia consuetudo etiam est altera natura, vel saltem.

Saltem naturæ simillima, vt dixit Philosophus in septimo ethicorum, hæc præclara eueni adducens carmina.

Temporis hanc multi curam affirmamus, amice,

Postremamq; homini naturam, dicimus esse.

Hinc diuidere possumus naturam in originariam, & ascititiam, vt colligitur ex Galeno in Vndecimo Methodi, & consuetudo inducit naturam præsentem, & præfenti tempore virgentem, quam ideo Euenus rectè vocauit postremam hominis naturam, quæ originariam quodam modo obscurat, & quasi delet. Vnde mirum videri non debet, si tantum venit condonandum consuetudini, vt vel huius consideratio solius satis esse possit ad vinum febrientibus præbendum, cum nempe adeo inualuit, vt semper vsi fuerint vino, numquam perferre potuerint aqua, vel aliam potionem, quam qui pertinaciter eis præbet, vniuersum ventriculi tonum subuertit, vt ingestos cibos non modo non concoquere, sed ne opportuno etiam tempore valeant retinere. Redigitur ergo hæc indicatio ad vitalem, quippe quæ virium conseruandarum curam suscipiat, quas, neglecta consuetudine, collapsuras euidenter appareat.

De Ouorum vsu in febribus putridis.

CAPVT XXVII.



Via superius diximus & vinum, & oua recentia interdum febrientibus vel in primo accessionis insul-
tu vtiliter exhiberi, veluti de vniuer-

so vini in febribus putridis vsu multa hætenus diximus, ita nunc aliqua communiter de Ouis dicamus, ac eo quidem magis, quod multis etiam doctis viris horum in febri-
tantibus administrationem suspensam esse non ignoramus. Neque verò in hoc proposito illud dicam, quod Galenus in Vndecimo de simplicibus medicamentis considerat, oua non esse partes animalium, ceu nec arborum fructus, nec grauidarum fœtus, sed proportionem respondere his, quæ agnascuntur, & cum agnata quædam aliena sint, quædam familiaria, & propria plantarum, & animalium, ex hoc secundo genere esse oua instar fœtuum ad generis successionem, perpetuitatemque facta, hæc, inquam, & alia huius farinae non attingam, quia non est mihi propositum ouorum hic naturam indagandam, enucleandamque suscipere, sed eorum dumtaxat in propositis febribus legitimum, & rationi consentaneum vsu aperire. Illud potius adducam ex eodem Galeno in tertio de alimentorum facultatibus, ouorum triplicem esse præcipuam differentiam, primam quidem penes propriam substantiam, quia Galinarum, & Phasianarum sunt præstantiora, peiora anserum, ac struthio camelorum, secundam penes tempus, quia vel vetera sunt, vel recentia, tertiam penes cocturæ modum, secundum quem alia diutius cocta fuerunt, alia ad mediocrem vsque consistentiam, alia dumtaxat excelsa, vt alia cocta, alia tremula, alia sorbilia nuncupentur. Medicorum quidem de gallinaceis potissimum ouis sermo est, quia phasianarum magna est inopia, Gallinarum copia, ideoque infrequentissime illa, frequentissime hæc vsur-

pantur, & non veterum, & longo prius tempore natorum ouorum, sed recentium habetur examen, quia vetustiora malam præbent nutritionem, & sunt ad subeundam facile corruptelam disposita. Et ad cocturam quod attinet, sorbillum præcipue, ac tremulorum habenda venit in febricitantibus ratio. Gallinarum ergo oua cum ex duplici substantia instar cæterorum constant, albumine scilicet, & vitello, temperaturam habent parum à simmetria discedentem, quia albumen frigidiusculum quodammodo est, ideoque ad calidiores affectiones demulcendas peropportunum, ipse autem vitellus non tantam habet vim refrigeratorem, nec tamen effatu dignam calefactoriam. Vnde Galenus in Vndecimo illo de medicamentis simplicibus eiusdem ferè naturæ utramque substantiam dixit, parum à simmetria recedentem, quia utraque substantia sanguinea est, magis, vel minus alterata, maiorem, vel minorem elaborationem à naturali calore nacta, ideoque difformem etiam colorem adeptam, utraq; præter calorem propriæ temperaturæ viuificum quendam calorem includit, vnde animalis fit generatio, eiusdemque nutritio, ut docet Aristoteles in primo capite tertij de generatione animalium, qui in hoc tamen dissidet à Medicorum sententia, quam Hippocrates expressit in libro de natura pueri asserens ex omni vitello nasci pullum, ex albumine nutriri, quod ipse albumen facit materiam animalis generandi, vitellum escam nutriendi, vnde calidiorem substantiam vocat albumen, tamquam animali calore repletum, frigidiorē statuit vitellum, in quo multum terrenæ naturæ con-

tineatur. At Galenus Hippocratica sectatus vestigia aliter sentit, & experimento magis consentit, Hippocraticis verbis insinuato, facitque oualem naturam temperatam, tamquam recentem, nec multum immutatam sanguinis sobolem, cuius sanguinis proprietates est ab extremis qualitatibus recedere, & simmetriam constitutionem attingere, ut legimus in libro, & in commentario libri Hippocratici de humana natura, quo etiam nomine veri similis temperiem æqualem possidenti censetur, in hac tamen temperie albumini maior ad frigidum propensio, vitello maior ad calidum attribuitur, & in primo viscidior quædam conditio, in secundo friabilior agnoscitur, in utroque ob magnam cum sanguine cognationem bona ad nutriendum dispositio constituitur, ut præclare considerat Galeni pedissequus Auicennas in secundo libro tractatu secundo instituta de Ovis oratione, quibus temperiem moderatam attribuit frigidiusculum albumen, calidiusculum efficiens vitellum, ut hæc duæ substantiæ alteram sibi præstent operam, & alteram alterius qualemcumque à moderato compescat, coerceatque declinationem. Cuius etiam Auicennæ illud est celebre dictum, oua tantum habere nutrimenti, quantum habent ponderis, quasi uoluerit dicere oua esse ex eorum ciborum censu, quæ plurimum habent alimenti, parum, uel nihil excrementi. Quo in proposito memoratu digna sunt illa Galeni uerba in octauo Methodi de nutrimento febricitantibus biliosis, & gracilibus exhibendo hæc proferentis. Sanè illud non latet & boni succi, & exquisita debere esse quæ his exhibentur nutrimenta, non ta-

meni

men ea, quæ boni succi, propterea quod exiguum huiusmodi substantiæ in se habent, nominentur, ac nutrire nequeant, imo quod vile plurimum in se contineant sunt namque & maluar, & brassicæ, & betæ, & lactuca, ac denique omnia olera, & fructus nutrimenta, cum substantia in his habilis ad alendum contineatur. Verum sicut in his exiguum est quod nutrit, non exiguum quod est inutile, ita in pane puro, & ouis, & carne, & alica plurimum est quod nutrit, minimum quod est inutile. Ex quibus Galenicis verbis colligitur bonam esse ouorum alimoniam, & adeo plenam, ut tantum ferè nutriant, quantum ponderant. Hinc etiam Celsus in secundo suæ Medicinæ oua facit valentissimæ materię, ad quam id omne edulium redigit, in quo plurimum sit alimenti. Quæ sententia fuerat prius Hippocratis hæc de ouis in secundo de diætâ scribentis. Volucrum oua validum quid, & nutriens, & insans habent, validum quidem, quia animalis generationem continent, nutriens verò, quod hoc in pullo lactis rationem habeat, insans autem, quia ex parua mole in multam diffundantur. Sic breuissimè ouorum vim explicuit validitatem deducens ex eo, quod substantia, quæ animalis potest esse constitutiva, multo magis potest esse refectionis, & quod animalis constitutio opus est multo caloris, & multorum spirituum, nutritionem ex eo, quod lacteam continet naturam ad pullum alendum aptissimam, facultatem inslandi ex eo, quod ex parvis dimensionibus diffunditur, ac diffunditur in magnas ob copiam spirituum contentorum diffusionem illam efficientium, quam ouorum diffusionem Aristoteles etiam in tertio illo de generatione

consideravit. Nec tamen hæc spirituum cum calore affluentia iusto calidiorem facit ouorum substantiam, quia spiritus illi sunt naturales, & calor ille viuificus, & naturali substantia copiosus, qualitate non acris, sed potius mitissimus, & ad mirificum quoddam qualitarum æquilibrium redactus. Ex his patet Eulichum cibum esse ab ouis petiti, nec huic veritati repugnat Alexandri Tralliani dictum in octauo libro de iecoris inflammatione loquentis, & oua à ciborum censu remouentis, quia crassi sint succi, & flatuosi; nam ibi Trallianus consideranda suscepit tenuis substantiæ edulia, qualia non sunt oua ratione saltem albuminis crassiorem sibi consistentiam vindicantis, vitello quidem tenuiori existente, paucam præsertim coctionem adepti. Conuenient ergo in febribus putridis & ratione febris, & ratione putredinis, ratione febris, quia vim habent refrigeratorem, Vnde Galenus in secundo de medicamentis per loca cibos refrigerantes in dolore capitis ex ebrietate proponens, oua adducit in medium, & Auicennas Fen prima tractatu secundo libri tertij ad eiusdem curationem affectus inter cibos refrigerantes vitellum oni recenset. Qui quidem vitellus licet vergat, ut diximus, ad calidum, quia tamen calorem habet tepescens, calidiores temperaturas potest demulcere, tepidioribus rebus magis interdum refrigerantibus, ut in nono lib. Trallianus de Nephriticis affectibus loquens considerat, qui etiam Trallianus inibi inflammationem renum laborantibus victum instituens inter cætera cibaria consulit oua gallinarum cohortalium tepida, & molissima. Ego sanè (ait ipse) non inueniam, qui oua quamprimum essent posita,

posita, sorbebat citra coctionem, dicebatque se plurimum adiuuari, & rosiones, ac dolores, qui circa vesicam oriebantur, mitiores fieri, ut ferre posset, affirmabat. Ex quibus verbis duo nimirum colligimus, alterum est, vim refrigerandi ovis sponte sua inesse, alterum hanc vim, ubi minor, vel nulla adhibetur coctio, magis erumpere, & elucescere. Ratione etiam putredinis conuenire possunt oua & qua refrigeratoria ad compescendam putredinem, & quæ Euchima ad emendam succorum corruptelam, nam ut acutè animaduertit Celsus in tertio libro, non caret illud ab Heraclide Tarentino dictum ratione, ubi aut bilis ægeum, aut cruditas malè habet, expedire quoque per medicas portiones (addamus nos & sorbitiones) misceri nouam materiam corruptæ. Cui alludens placitò Galenus in commentario decimoseptimo primi Aphorismorum illam præclaram regulam protulit, ab humorum defectu exigi adiectionem, à corruptione verò contemperamentum, quod à probis eduljis prouenire constat, & unde melius contemperamentum prouenire possit, quàm ab ouis temperaturæ mediocritatem nactis? Ac veluti facultate refrigeratoria conueniunt febribus putridis oua, ita facultate humectatoria conuenient omnibus ferè febribus, habita ratione Hippocrati præcepti victum humidum febricitantibus imperantis, quam humectationem ouorum etiam esse propriam locuples est auctor Galenus in libello de Pitiana, cui consenit Auicennas non solum loco superius commemorato, sed etiam in libro de viribus cordis tractatu secundo. Hac quidem ratione hic cibus febribus omnibus conueniret, nisi illa intercederet confi-

deratio, quod quædam sunt febres ex nimia plenitudine ortæ, quæ ideo oua tamquam nimis nutrientia respiciunt, & victum potius apprimè attenuantem exposcunt, quales sunt synocha siue putredinem expertæ, siue putredinis expertes, & quales illæ omnes, quæ adiectione non egent, sed potius detractio. nam cum adiectione est opus vel ratione causæ morbificæ, vel ratione virtutis infirmæ, nulla est febris quæ ouorum exhibitionem renuat. Hinc Galenus in primo ad Glauconem in curatione febrium tertianarum exhibet audacter oua, & exhibet tamquam refrigerantia, & humectantia alimenta, tantum abest, ut eorum pertimescas in biliosos humores conuersionem, quæ cogitatio multis ad paucā respicientibus negotium facessit, quos non ineptè vocare possumus *νερόβες* Galenum imitati, qui in Methodi nono sanguinis mittendi timidos vocat *αἱμορροβες*, & frigida exhibenda formidantes *ψυποβες*. Horum pellere ridiculum timorem deberet clara Galeni aliter statuentis auctoritas, qui in duodecimo etiam Methodi biliosis febribus laborantes, & in synopim propensos ipsis Ovis, & præcipuè vitellis nutrit, quod facit etiam Trallianus in ardentium febrium curatione, asserens lactucæ caules refrigeratas, oua, similiterque intybum agrestem, & domesticum, & cucurbitas his, qui perardenti febre laborant, omnia conducere, quibus verbis insinuat vini quandam refrigeratoriā, & humectatoriam ouis se impertire. Quam quidem vim in vitellis potissimum vigere contendit Auerroës in commentario primi capituli tertij de generatione animalium vel eo fundamento suffultus, quia extra vitellus citius corrumpitur, quàm albu-

albumen, & quia animalium frigidiorum oua plus habeat de vitello, quam de albumine, adiungiturque Medicos vitellum vocantes calidiorum albumine, id non secundum seipsum, sed respectu corporis humani affirmare, quia nil vetet aliquas res esse calidiores alijs, cum tamen sint frigidiores in relatione ad corpus humanum, ut exemplum habemus de vino nouo, & veteri, cum nouum sit absolute calidius veteri, sed respectu hominis hoc illo calidius. Verum hanc Auerrois explanationem non facile admiseris, quia Hippocrates, & cum eo Medici calidiorum simpliciter faciunt vitellum, ut substantiam generationi auis destinatam, non nutritioni, ut existimauit Aristoteles, faciunt tamen eundem refrigerandi vi præditum ut ad humanum corpus relatum, & alimenti vicem subiturum, quam tamen refrigerationem retinet vitellus etiam calidiusculus existens, quia, ut diximus, tepidiusculus est ille calor ad inducendum contemptamentum aptissimus. Illa verò consideratio Auerrois magni æstimanda, quam facit in Quinto colliget, asserens oui vitellum esse meliorem albo, nec album esse valde malum, nisi nimis sit coagulatum, & conquassatum, ac tremulum existens fieri valde bonum, ut Galeni dictum in duodecimo Methodi albumen ægre concoctile vocantis trahi ad bonum sensum possit, & colligi regula corrigendi defectum in albumine, existentem per miscellam albuminis cum vitello perexigua adiecta coctione. Quod si magis libeat mordicus Galenica verba retinere, separato albumine, vitellus erit tutissimus, & utilissimus pariter in febribus putridis non solum cum vires collabentes subsidium citum expo-

scunt, sed alijs etiam temporibus, dum non subest nimis inducendæ repletionis metus in febribus cum plethora coniunctis, dum non exigitur inedia in acutissimis febribus, quibus exceptis, reliquæ omnes, & præcipue longiusculæ ouorum alimoniam & commodè excipiunt, & experiuntur fructuosæ, si recentia sint, non ab ortu remota, si forbilis sint, vel tremula, non durata, quia quantum addis coctionis, tantum addis alimoniam quidem, sed facilitatis ad immutationem subeundam, & alterationem à ventriculo detrahis, tantum etiam facultatis refrigeratoriæ minuis, vnde vel cruda oua ut valde refrigerantia vtiliter assumi testem adduximus Trallianum, hoc in renum inflammatione laudantem. Sed hunc de ouis sermonem claudere lubet hoc præclaro Galeni decreto in aureo libello de cibis boni, & mali succi. Oua (inquit) crassi succi censentur, quæ vel elixa, vel tosta penitus sint densata. Frixæ verò mali succi, fumosæq; in ventriculo cocturæ existunt, secum etiam corrumpentes admixtos cibos. Mediocriter verò cocta, quæ ideo appellantur tremula, ad coctionem, digestionem, nutritionem, bonique succi generationem, sicuti & quæ forbilis dicimus, ad leniendas gutturis asperitates, idoneæ sunt.



*De alijs observationibus ad victus
rationem, ideoq; ad indicatio-
nem vitalem attinen-
tibus.*

CAPVT XXVIII.



Ultā diximus ad vi-
ctus rationem atti-
nentia, quibus obser-
uandis tueri, & pro-
virili sustinere vires
possimus, pauca adhuc supersunt in
eodem proposito dicenda. nam non
solum de aere, de cibo, & potu sol-
licitudo ineunda, sed de motu et-
iam, & quiete, de somno, & vigi-
lia, de excrementorum eductio-
ne, de affectionum animi confor-
matione. nam in his sex rebus, quas
vocant non naturales, recta viuendi
residet ratio, & virtutis consistit cu-
stodia, vt docet Galenus in arte me-
dica, & in primo de sanitate tuen-
da. Motus quidem febricitantibus
non conuenit, nisi quartana inter-
mittente laborent, in qua diebus
melioribus concedit Galenus in pri-
mo ad Glauconem ad consueta mu-
nia accedete, nec lectulo se contine-
re, alij febricitantes quiescere debēt,
ac decumbere maiori ex parte, vnde
iure optimo Hippocrates in sexto
Epidemiorum carpit Prodicum fe-
brientes necantem cursibus, lucta-
tione, fomentis, quodd febrile sit cibo
rum parsimonia inimicum, periodis
multis, cursibus, refractioni, labo-
rem labore his. In cuius explica-
tione sententia hanc effatu digna in-
duxit verba Galenus. Prodicus non
solum rationalem remediorum in-
uentionem ignorare visus est, ve-
rum etiam obseruationem Empiri-
cam. Nempē ratio laborem labore

sanandum esse interdicit, idest dam-
num damno, & malum malo, con-
traria siquidem contristanti affectui
auxilia, non similia adhibere oportet.
Videtur autem similia adhibe-
re, si vtique & ambulationes, & lu-
ctationem perfricationemq; & πυ-
πlav, i. fotum, & famem adhibet.
Hæc Galenus communissimē illi in-
herens indicationi, contraria contra-
rijs tollenda, cuius & communita-
tem, & veritatem abundē explanat
in Vndecimo Methodi. Ad labo-
rem igitur febris non debet accede-
re motus labor, sed quiescendi re-
creatio, quia tā grata defessio quies,
quam dulce multa locuto silentium
ut ait Plato in Critia. Perbelle er-
go facit apud Euripidem Hippocra-
tis contemperoneum Electra, quæ
fratrem Orestem phræneticum lau-
dat, quod nolite cubili surgere, sed
uolens, lubensq; decumbat, ut me-
lius ferocientem morbi impetum
compescat,

*Ecce lectulus est carnis agrotanti,
Molestus possessio, sed tamen neces-
saria.*

In somno, & uigilia ita se gerant
febrientes, ut præcipit Hippocrates
in Prognosticis, noctu quidem dor-
miant si possint, uigilent interdium,
sin minus hunc ordinem seruare pos-
sint, diem traducant ut noctem dor-
mientes, & quacumque liceat hora
somnum arripientes, ut docet Hip-
pocrates in libris acutorum. Et quia
somnus concoquit, uigilia digerit
iuxta Galenicum dictum in duode-
cimo Methodi, ideo in quibus febr-
bus maiori concoctione opus esse ui-
detur, maiorem somno operam dēt,
in quibus maior digestio exigitur,
non minorem uigilia. Quæ inua-
dentibus præcipue accessionibus e-
rit usurpanda, ubi somnus laborem
facit

facit iuxta celebrem Hippocratis aphorismum, in cuius explicatione ostendit Galenus quanta sit somni iactura in principio accessionis suscepti, ut non solum producat accensio, & febrilis calor conducatur, sed sœua interdum excitentur symptomata, qualia recenset Hippocrates in illo aphorismo Quartæ particulæ, in febribus ex somno timores, & conuulsiones, malum, in cuius commentario notat Galenus somnum ut materias ad interna reuocantem semper futurum fuisse noxium, nisi ratione coctionis elaboratæ maius afferret commodum, quàm sit ex motu ad interiora consecutum detrimentum. Alius sit quotidie excernendis excrementis intenta, & vrina liberè prodeat, quia si hæ excretiones in sanis exiguntur quotidianæ iuxta monitum Hippocratis in libris de diætâ, & si alui adstrictio est vniuersi corporis confusio iuxta eiusdè dictum in sexto Epidemiorum, multo magis hoc habet in febrientibus veritatem. Animi demum, componendi pro virili veniunt affectus, ut non sit mens nubila, & perturbationum quâ procillis obruta. nam præclarissima est illa Socratis apud Platonem in charmide nuncupata incantatio, quæ animû prius accipit curis omnibus expiandum, ut inde ad salutem corpori impertiendam fiat accessus, in quod mirificus ab animo prodeat boni, malique influxus, in tertio etiam de Rep. ab eodem Socrate insinuat. Vnde Galenus in primo de sanitate tuenda hanc affectuum conformationem plurimum habere momenti asseruit ad morborum depulsionem, & in libello de parua pila tantum, in hoc posse affectiones affirmavit, ut ex solo animi mœore in morbos

incurabiles aliqui inciderint, & ex sola letitia è grauissimis alij euaserint. Sint ergo ægri corpore tales, non animo, hunc habeant spei plenum, & quam desiderio sectantur salutem, spe etiam amplectantur memores pulcherrimi illius moniti, quod sibimet Orestes apud Euripidem affert.

*Habet hoc opinionem sanitatis,
Præstat putare, etiam si reueraita nō sit.*

Tantum sperent rebus infestis, quantum metuant secundis, ut in his tueri præsentem, in illis recuperare valetudinem possint absentem. Timor in ægro vires deiecit naturæ, spes erigit, timor mæstus calorem innatum contrahit, & cordis quasi foco coercet, spes læta diffundit, & ad omnia membra extendit, ut docet Galenus in tertio de symptomatum causis, in timore ergo augetur febrilis calor, & naturæ actio impeditur, in spe verò ille minuitur, hæc promouetur, Quæ sola morbos curat, arte solum ministerium præbente. Hinc prodijt celebre Auicennæ dictum, cum æger timet, time etiam tu. Excitat Medicum ad timendum, quia tunc ars agit sola naturæ destituta beneficio, torporè indutæ, & fatiscensis, sine qua irrita fiunt omnia artis auxilia. Nec solum in se speret æger, sed Medico potissimum confidat, cuius confidentiæ magnam habendam esse rationem auctor est Hippocrates in Prognosticis, & in libro Præceptionum, cui tantum deferendum censuit Auicennas, ut in sexto naturalium dixerit ægrum confidentem, longe magis ad sanitatem ex hoc solo adduct, quàm ex omnibus Medici operibus. Attende (inquit ille) dispositionem infirmi cum credit

se conualescere, aut sani cum credit se agrotare, multoties contingit ex hoc, ut cum corroboratur forma in anima eius, patiat ex ea ipsius materia, & propeniant ex hoc sanitas, aut infirmitas, & est actio hæc efficacior, quam id quod agit Medicus instrumentis, & medijs suis. Ex quibus Auicennæ verbis innotescit quantæ molis sit animus ægri bene esse dispositum, & cum in morborum curationibus non exiguum sibi locum fortuna vendicet, ut est auctor Galenus in undecimo Methodi, quam licet videatur excludere Hippocrates in libro de locis in homine, non tamen, si rectè attendamus, excludit; hæc quidem fortuna cum in alijs, tum in eo præcipuè consistit, ut agrotus animum deferat erectum, parum timeat, multum speret, quod ostendit clarissimè Celsus in principio tertij libri, dum dixit, in nullo morbo minus fortuna sibi vendicare, quam ars potest, ut pote cum repugnante natura, nihil Medicina proficiat. Scio quosdā textus habere, ut potè cum repugnante fortuna sed hæc lectio non debet admitti, quia in illis verbis vult Celsus reddere sui dicti rationem, quæ ratio nulla esset posito nomine fortunæ imo potius esset principij petitiō, at, posito nomine naturæ, clara apparet ratio, quia bonæ fortunæ euentus est ægri animum bene esse compositum, suaq; spe, & confidentia artis operationes fortunantem, quæ irritæ fiunt votique expertes si naturā offenderint morore deiectam, ideoque nil sibi adminiculantem. Verum ut melius innotescat quantum animi affectus ad immutandum corporis statum valeant, non fuerit à proposito alienum illud breuiter ostendere, non solius philosophi munus esse, sed

Medico etiam hoc onus incumbere, ut conformandi, componendique animi curam suscipiat, incolumitari corporis vel tuendæ, vel reparandæ utilissimam futuram.

De Animi cura à Medico suscipienda.

CAPVT XXIX.

DIctum à nobis sæpius fuit quod à Galeno in libris Methodi sæpe dicitur, indicationis vitalis propriū esse vires tueri, quia vita pendet à viribus, quarum incolumitas est vitæ custodia, pernicies est vitæ abolitio, cum uita nihil aliud sit, nisi virium vel possessio, vel actio. Sed vires non plautarum proprias quarrit Medicus, non proprias animalium, sed hominis proprias, veluti moralis etiam philosophus humanas quarrit actiones à plautarum, & animalium actionibus diffitas, ut docet Aristoteles in primo ethicorum; At vires hominis triplices sūt, quippe tres sunt eius facultates, alia alitrix in iecore residens, & per venarum canales alimoniam diffundens, alia vitalis in corde consistens, & per arteriarum canales spiritum, & calorem viuificum distribuens, alia ratiocinatrix in cerebro domicilium habens, voluntarijs actionibus vnā cum sensibus præsidens, & per neruorum Canales sensum, motumq; in cuncta membra transmittens. Qui vult ergo humanam vitam seruare, has facultates, & harum facultatum actiones incolumes debet retinere, quia mutuum habent consensionem, mutuum obtinent nexum, talemque con-

constituunt triangulum, ut vno pereunte angulo non possint reliqui duo consistere, & simul omnes vel ad salutem, vel ad perniciem videntur conspirare. nam siue vis alitrix langueat, siue vitalis siue rationalis vniuersa hominis constitutio fatiscit, atque labascit, & vel citius, vel serius labes vnius facultatis fit reliquis duabus communis, & novæ alteri communicatæ nulla tempore labente degit immunis, ut docet Galenus in nono Methodi, & in quinto de locis affectis. Quam rem eleganter ab auctore habemus expressam in libro primo de diatæ his verbis. In corpore triplices circuitus ignis fecit, vicissim intro, ac foras commeantes, alios quidem ad Cauas partes humorum Lunæ facultate, alios verò ad externam circumferentiam, ad ambientem consistentiam, Astorum facultate, Medij vero intro, & foras permeantes, calidissimum, ac fortissimum ignem continent, qui omnibus dominatur, omnia secundum naturam obiens, sine strepitu tum ad visum, tum ad tactum. In hoc anima, mens, prudentia, augmentum, motus, imminutio, permutatio, somnus, vigilia; Hic omnia per omnia gubernat, & hæc, & illa, numquam quiescens. Triplicem circuitum vocat triplicem hominis facultatem, naturalem, vitalem, animalem, corpus vniuersum sigillatim circueuntem, mutuo nexu iunctam, & communem concentum harmoniæ efficientem, quam harmoniam corpori saluberrimam à communi consensu fieri, à particulari vnius dissidio dissolui docet. Hunc consensum, hunc concentum, hanc harmoniam respicit, & conservandam assumit indicatio vitalis, quæ non modo vim concoctoriam, & altricem, non modo vim

vitalem, & animosam tuetur, sed vim etiam cognoscentem, & rationalem custodit, & fouet. nam cum hæc langueat, ac torpescit, reliquæ etiam duæ ad corruptelam temporis intervallo non multo interiecto successuram vergunt, quippe vires omnes talem, ut diximus, à natura sortitæ sunt connexionem, ut simul habeant incolumitatem, simul subeant corruptionem, amantes inuicem, & redamantes instar Erotis, & Anterotis, quos simul, & inualefcentes, & languescentes præclaro figmento descripsit Themistius. Exigunt ergo singulæ vires suum, suum, & suam alimoniam, & habent singulæ sua fulcra. Vis naturalis alimentis ex cibo potuque deductis sustinetur, & corporeis voluptatibus fouetur, vitalis ex aere, puroque sanguine conseruatur, & animosis affectionibus ad sui tutelam vititur, animalis aura ætherea, vitalibusque spiritibus ad temperiæ, moderationemque redactis fruatur, propriisque notionibus, & meditationibus recreatur. Sic induci in singulis partibus sua potest virtus, in altrice, quam concupiscibilem à Platone uocatam ostendit Galenus in sexto de Decretis, temperantia, in vitali irascibilis nomen, nacta, fortitudo, in animali ad ratiocinium Euecta prudentia, in omnibus simul quod suum est affectus, & quod alienum non vsurpantibus absoluta iustitia, ut diuinitus ostendit Plato in quarto de Republica. inducitur exemplo ab Urbanis artificibus, militibus, Magistratibus petito. Aliud ergo humana vita exposcit, quam alimoniam, vel potius nil aliud exposcit, quam alimoniam, sed hæc non est vniformis, nec vniuoca, sed multiformis, & analogica, quia multiformes sunt, & ana-

nalogue vires alendæ, & conseruandæ. Non ex solo pane viuit Homo, vt Sacræ testantur litteræ. Hoc profunde meditatus Hippocrates, qui nil molitur ineptè pro corporis constitutione bona seruanda illud tradidit in tertio Epidemiorum documentum, vt in laboribus vitetur pigritia, in cibis satietas quia hæc duo ex parte corporis videtur sufficere, exercitamentum, & alimentum, ut dixit Plato in Minoe, & explicauit Hippocrates in primo de Diæta, corpori superfluum subtractionem, deficientium adiectionem necessariam, & gratia primæ exercitationem, secundæ alimoniam opportunam ostendens. At pro bona totius hominis constitutione, pro eius integra, absolutaque sanitate seruanda non cibos solos, nec cum cibis exercitationem solam proposuit; sed his mentis etiam meditationes adiecit, vt suum corpori, suum animæ suppetere pabulum, suum corpus haberet, suum & animæ exercitamentum, suum utraq; pars obtineret incolumitatis suæ fulcrum, ideo illa obseruatu dignissima verba in sexto Epidemiorum exarauit, Labor articulis, carnibus cibus, somnus visceribus, animæ deambulatione cogitatio hominibus. Quibus omnia prisco breuiloquo complexus est, quæ totum possunt hominem sospitem facere, nullaque re indigentem. nam vel corporis queritur incolumitas, vel bonus animæ status. Corporis incolumitatem faciunt labor, cibus, somnus, cum enim in corpore vel ventres consideremus, vel artus, & in artubus vel articulos, vel carnes, in ventribus viscera, articulis satisfacit labor, qui à noxia humiditate vindicat, exuccos facit, & ad opus agiles, carnibus ministerium præbet. cibus in eam præcipuè molè faciens,

suamque eis substantificam humiditatem impertiens, viscera fouet somnus internam faciens reuocationem spirituum, externam calidi innati emissionem prohibens ad vsum laborum, & hæc sunt in gratia corporis naturaliter instituta ministeria, at in gratiam animæ, quæ pars hominis nobilior est, & longè maiori digna studio, adhibenda. proponitur ipsa cogitatio, ipsa meditatio vsurpanda, ipsa in rebus cognoscendis, propriisque obiectis examinandis occupatio. hæc enim fuerit propria animæ deambulatione, proprius motus, propria exercitatio, quia qualis est incessus corpori, talis est cogitatus animæ, per incessum mouetur corpus, se subtrahit otio, proprium munus obit, per cogitatum mouetur anima (nam teste Platone in x. de legibus cognoscere, sentire, intelligere, amare, odisse, sunt motus animæ, quicquid Aristoteles in primo de anima aduersus hoc dixerit) desidiam deserit, & functionem propriam exerit. Sed cur Hippocrates meditationem vocauit deambulationem animæ, non cibum, & alimoniam à quam tamen constat & esse, & ab omnibus vocari, cum animam non aliter nutrit cogitatio, ac comestio corpus, vt Plato docet in Philabo, & in Phædone, & Aristoteles in sexto, & in decimo ethicorum. Vocauit motum potius, quam cibum animæ, quia cibus imperfectionem significat ab indigentia profectus, motus perfectionem à virtute motiua deductus, vnde in octauo Physico legimus motum esse perfectum, cibus generationem respicit, & ideo actum primū, motus operationē, & ideo actū secundum, imperfectio, & generatio pertinent ad corpus, & igitur ei magis congruit cibus, per se

fectio, & operatio ad animam, & ideo ei magis aptatur motus, & non quilibet aptatur motus, sed deambulatio, ut insinuetur factus cum nullo propemodum labore, quia mentis functio, & meditatio est actus facultatis non organicæ, licet connexæ cum facultate organica, non est motus vehemens, qui laboriosus, est deambulatio, quæ est motus iucundus, & parum distans à quiete, seu statione, unde scientia vocatur à Græcis *επιστήμη*, ut notat Plato in Cratillo, quod ansam dedit Aristoteli dicendi in septimo Physicorum, animam fieri sapientem sedendo, & quiescendo, hoc est ab affectionibus, & perturbationibus vacando, quæ tenebras ingenio offundunt, eique lucem veritatis eripiunt. Sic à labore ad suauem operationem progressus est Hippocrates, ab actu articulorum ad actum mentis, & admirabilem obseruauit ordinem, primo currum corporis nominans, nempe articulos artubus contentos, quos Plato in Timæo vocat currum, seu vehiculum, secundo recensens indumentum partium præcipuarum, quia Carnes sunt indumenta viscerum, quæ sunt partes præcipuæ, tertio inducens partes corporeas præcipuas, nempe viscera, postremo memorans formalem hominis substantiam, nempe animam quæ humanam naturam & constituit, & nobilitat, ut nostram vitam à labore traducat ad quietem, & in ea requirat exercitamentum, alimentum, somnum corporis, vigiliam animæ, alioquin esset vita non hominis, sed pulmonis, ut ait socrates in Philabo, & vera vita est actio, non vacatio, motus, non quies, nisi quietis nomine perturbationum vacationem insinuemus, unde affirmavit ille, sibi

non esse videri eum, qui nihil agat. Hanc Hippocraticam de humano regimine pro sanitate integra obtinenda sententiam clarè est æmulatus Plato in Timæo, dum corporis, animique salutem adipiscendam proponens dicit omne bonum esse pulchrum, omne pulchrum commensuratum ideoque animal esse debere conuenienti mensura moderatum, & ad bonam, & malam valetudinem moderationem, vel immoderationem animæ ad corpus præcipuum habere momentum, ut nec valida anima cum debili corpore, nec validum corpus cum debili anima debeat esse coniunctum. Hinc vnam concludit ad vtrumque salutem, & conseruationem, ut neque animam sine corpore, neque corpus sine anima moueamus, & in mutua contentione exæquatis inuicem viribus bonam totius valetudinem tueamur, animam meditationibus assuefacientes, exercitationibus corpus, & motionibus, ut illud corporis vniuersi, Mundi nomine insigniti, nullo vnquam tempore quiescentis, faciamus quodammodo æmulum, triplicem motum adhibentes, à se ipso, qui motus optimus est, in alio, qui in equo vel curru factus est mediocris, ab alio, qui pharmacis excitatus sine urgente necessitate est malus sed animam multo magis, ac prius corpore, tamquam partem potiorem, & ius dominij nactam excolendam decernit, & cum tres sint animæ species, concupiscens, irascibilis, rationalis, quas Medici vocant naturalem, vitalem, animale, ut explicat Galenus in libris de Placitis, singulis suos esse motus adiungendos, ut nulla torpeat otiosa, quo torpore fieret imbecillissima, sed qualibet motus suos inter se moderatos conuenien-

uenienti modulo conseruet. Ita pars rationalis omnium domina, & cuiusdam diuinitatis particeps discendæ veritati intenta suis fruatur discursionibus, suis vratur meditationibus, ita vis concupiscens moderatas suas obeat appetitiones, moderatas percipiat voluptates, vis tandem irascibilis non langueat, sed animosas suas commotiones exerat, vt hoc pacto quælibet animæ pars proprium motum, propriumq; pabulum obtineat, vt dicere verè possumus hominis salutem corporis & animi tutela seruari, & hanc tutelam partim exercitamento, partim alimento niti, vt hæc duarum rerum copula non soli corpori, sed toti homini seruando inseruiat, cum non corpus solum, sed anima quoque suum proprium motum, suum proprium pabulum, vt inquit Plato, habeat. Nec solum anima, sed quælibet animæ pars propriam agnoscat alimoniam, propriam quærat commotionem ad suæ naturæ conseruandâ integritatem. Nec dicat aliquis motus facultatum appetentium, concupiscibilis, & irascibilis, esse irracionales, & ad vicia pertrahentes, quia moderationem adepti sunt rationales motus, instar puerorum pædagogis obedientium, rationi obedientes, & virtutum habitum generantes, vt in primo æthi corum monstrat Aristoteles. ob hanc igitur corporis, & animæ Connexionem ad humanæ salutis complementum necessariam Hippocrates sexcentis in locis, sed præcipuè in Epidemijs, in libris de victus ratione, in aphorismis, in Prognosticis, in libris de morbis multa ad animæ naturam attinentia his adiunxit. quæ de corporeis affectionibus tradidit, eiusque in hærens vestigijs Plato homi-

nis curam in animæ potissimum cura statuit in primo Alcibiade, & in tertio de Repub. Socratem inducit dicentem non videri sibi corpus bene affectum virtute sua animum bonum facere sed potius animum bene affectum virtute sua corpus quoad fieri potest optimum reddere. Vnde idem in charmide eundem Socratem facit, vt diximus, loquentem, & iuueni caput dolenti demonstrantem non esse curandum corpus, ni prius curetur animus, à quo omne bonum, & malum insluit in corpus, & Barbaros Medicos illud Græcis iure obiecisse affirmat, quod hi corporis curam acciperent neglecta animæ cura ad salutem corpori quærendam necessaria, vt quantum anima ad conferendâ substantiam prestat corpori tantum eadem ad inferendam salutem præpolleat eidem. Debent ergo Medici elegantes, & à vili plebecula semoti non solius sibi corporis notitiam comparare, sed animæ quoque notionem acquirere, & sibi mutuam operam debent morales, & Medicus præstare, nam cum primus animæ cognitionem, secundus corporis sibi propriè vendiceret, quantum scilicet attinet ad vtriusque curam, vt auctor est Aristoteles in primo æthi corum, & primus corporis, & secundus animi notionem aliquam exposcit, primus corporis, quia animi mores sequuntur non parum corporis temperamenta, vt peculiari libello ostendit Galenus, secundus animi, quia huius pathemata ad immutandum corpus plurimum valent, vt idem Galenus docet in tertio de symptomatum causis, & in primo de sanitate tuenda. Quo factum est, vt idem Galenus breui opusculo disputauerit optimum Medicum optimum esse debere philosophum, nec

nec solius contemplatricis philosophiæ sectatorem, sed actiuae quoque ad morum conformationem conuersæ, ut ob hanc ipsæ causam moralia conscripserit opuscula à Medico munere non aliena, partim de cognoscendis, curandisque animi morbis, partim de peccatorum notitiis, atque medela: Ac in memorato quidem libro de sanitate tuenda demonstrat non solius philosophi, sed Medici etiam munus esse, animum componere, affectus compescere, mores conformare, quorum quidem conformatione multorum se propensiones ad ægotandum profiteretur exemisse, multorum valetudinarias habitudines ad bonam frugem redexisse, ut inducta temperantia non solum animæ fuerit salubris, sed corpori etiam apprimè utilis, quod huius virtutis proprium esse & Aristoteles affirmat in æthicis, & Plato declarat in libris de legibus. Neque verò mirari quis debeat tantam esse vim animæ in corpus, quoniam affectiones, & actiones illius sunt huic etiam communes, non animæ solius existentes, sed compositi, ut docet Philosophus in primo de anima, unde pro varietate temperamentorum intensiores, vel remissiores fiunt affectiones, quæ multum etiam valent ad alteranda temperamenta, quod quidem abundè docet Galenus in libris de causis pulsuum, unde prodijt Erasistrati nobile iudicium amorem Antiochi Regis erga stratonicam Nouercam ex solo pulsus contactu agnoscentis, ut narrat in bello Syriaco Appianus, cui simile se iudicium in alia persona protulisse ex eodem pulsus contactu gloriatur Galenus in libello de præfagitione ad posthumum, tantum possunt animi affectus corporis ha-

bitum immutare. Quos ideo affectus ad morborum curationem ipsam adhibet Hippocrates hæc in secundo Epidemico scribens, curandum iram inferre, & reuocandi caloris causam, & effusionis succorum, & lætitiæ, & timorem, & huiusmodi, atque si aliud corpus simul ægrotet, simul curare, si autem non, hoc. In quibus verbis apparet iram esse medelam contracti caloris, contracti sanguinis tamquam vtriusque diffusiuam, & lætitiæ, timorem, aliosque affectus alijs pathematis mederi, nam lætitiæ valet ad abolendos morbos è mæiore profectos, unde Galenus in primo ad Glauconem affirmavit diariam ex mæstitia ortam contraria lætitiæ esse curandam, timor valet ad coercendam nimiam caloris, humorisque effusionem, ad augendum viscerum tonum per factam spirituum reuocationem, & alij affectus alios edunt in corpore salubres effectus, & si uniformis est totius corporis ægritudo, simul totum accipit ab affectu medelam, at si dissidentia, & multiplex, affectu id peculiari curandum, quod se obtulit considerandum. Ita fit ut animæ affectiones ad corpus relatæ & tollantur, & tollant, tollantur à varijs corporis dispositionibus earum vel generationem, vel progressionem inhibentibus, tollant varia corporis pathemata contrarium statum inducentes. Sic animum corpus, corpus immutat animus, quia ad vnius constitutionem coeunt, & in hoc congressionis commercio compatiuntur adinuicem, ut in Physiologicis Aristotelicis explicatum legimus. Maiorem tamen Platonici agnoscunt ab anima in corpus, quàm à corpore in animam, validioremque influxum, huncque referunt

ferunt animæ dominio acceptum, quia cum hæc sit domina, sit forma arbitratu suo corporis rectorix, illud suo quasi nutu moderatur, ac temperat, & dum dominatur, ac regit benè disposita, bonum in eo habitum parit, & facit nedum sanum, verum etiam pulchrum, vt pulchritudo sit externus corporis flos ab interno animæ fructu germinans, & sit flos victricis formæ, quæ materiæ vndique dominatur, vt explanat Plotinus in libro de pulchritudine, qui ob hanc etiam causam in libro contra Gnosticos disputat in pulchro corpore subesse animam pulchram, ab huius forma illius pendente forma, & si in corpore formoso deformis interdum appareat anima, hanc statuit natura fuisse formosam, sed euentu euasit

se deformem. Adeo sibi arridet supra iactum Platonis fundamentum de præcipua animæ in corpus influentia, à Galeno etiam in primo illo, quem diximus, sanitatis tuenda libro verbis, & pluribus explicata, & grauibus confirmata. In cuius meditatione versati in hoc capite sumus eo libentius, vt veritas dictorum in superiori capite fulgeret lucidius, & vtilissima in toto artis ambitu doctrina appareret cumulatius. Verum de his, quæ pertinebant ad indicationem vitalem, satis hæc sunt; Nunc reliquas duas indicationes, curatoriam, & præseruatoriam examinabimus, quam partem multorum plenam problematicam, multarumque refertam difficultatum, in librum secundum differemus.

Finis Libri Primī.



DE INDICATIONIBVS FEBRIVM PVTRIDARVM LIBER SECVNDVS.

DE INDICATIONE CVRATORIA
quam habeat naturam, & unde sumatur.

CAPVT PRIMVM.



QUAE pertinebant ad communem indicationum animaduersionem, & pertinebant ad propriam indicationis vitalis notionem satis, ni fallor, in primo libro persecuti sumus, vt nihil effatu dignum cum hoc argumento coniunctum omiserimus, restat nunc vt in hoc libro secundo, quem modo aggredimur, attinentia ad reliquas duas indicationes, curatoriam, & praeuulatoriam, persequamur. Et quia in putridis febribus, in quibus causae morbificae non manent otiose facturum dumtaxat morbum minitantes, sed actu ipso morbum

faciunt, & vltiorem minatur, non habet locum simplex, puraque praeseruat, sed curationi quodammodo implicita, vt in commentario vigesimo secundi Aphorismi praeclare confiderat Galenus, & in secundae sectionis Vndecimo Methodi abunde etiam explicat, ideo curatoriam prius indicationem, tamquam praeseruatoariae antesignanam, reuocabimus in examen. Iam superius diximus curatoriam indicationem vocari à Galeno eam, quae ipsius morbi depulsionem, ipsius praeternaturalis affectionis abolitionem insinuat. nam curare nil aliud est, nisi morbum infestantem depellere. Haec igitur in febribus putridis ducitur à febris essentia, à temperamento febricitantis, ab aere, in quo febricitans degit. nam ipsa febris indicat, insinuatque agenda

agenda pro tollendo excessu à naturali statu, quem intulit febris, temperamentum ostendit gradum excessus relatum ad gradum naturalis constitutionis, ostendit quanta sit alteratio inducenda ad huius constitutionis reuocationem. Aer ambiens tum febris magnitudinem declarat, tum se præbet vel materiam sanantem, vel causam morbi conseruatricem, fouendique vim habentem. Exempli gratia, febris cum sit interperies calida, & sicca, & sit affectio præternaturalis contrarijs amouenda, indicat refrigerationem, & humectationem, tamquam propria, germanaque remedia contrarietatis appulsu quæsitæ, cuius contrarietatis appulsu, auxiliaremque vim vel ipse etiam Plato Hippocraticis insistentis vestigijs in Lyfide animaduertit, sed quousque sit progrediendum refrigerando, & humectando non liquet ex sola febris animaduersione, sed oportet etiam mentem conuere ad proprium hominis temperamentum, quale fuit tempore inuadentis febris, cum sanitatis aderat dispositio, considerando num calidum fuerit, an frigidum, quia in primo minor est factus recessus à statu naturali, ideoque minor est usurpanda refrigeratio, in secundo maior est ipse recessus, ideoque maiori refrigeratione est opus. Ita febris alterationem in contrarium insinuat, temperatura mensuram, & modum alterationis innuit. Sed quia nec morbus, nec sanitas, ideoque nec febris, nec temperatura consistere potest sine aere, & reliquas quidem materias & deligere, & fugere nostro arbitrato possumus, quam autem ipse aer præbet non possumus enitare, præsentique cœli statu cogimur. vii, ideo ambiens etiam aeri debemus esse intenti, qui remedijs à

febre indicatis aliquando apparet concors, aliquando discors, & planè dissidens, quatenus vel eandem retinet cum febrili intemperiem, vel contrariam præferat, ideoque suscipit interdum sanantis causæ rationem, interdum morbum fouentis, nam si indicatam à febre humectationem, & refrigerationem præstare, promouereque possit, sanantis causæ vim induit, & econtra si ad calefaciendum, & exiccandum fuerit paratus, materiæ morbificæ naturam suscipit, & in primo quidem casu omnibus ut ita dicam vlnis est amplexandus, habendaque ei gratia benefaciendi, in secundo autem auersandus, obuiamque ei eundum ut noxam molienti. Sic igitur tria sunt primo indicantia curationem, febris ipsa, temperatura febrientis, & aer ambiens, quo duo primæ continentur. Febris quidem diuidenda venit in differentias, non in causas, at reliqua duo, nempe temperatura, & aer in causas, non in differentias, nam febris consideratur ut est vel diaria, vel hæctica, vel putrida, & hæc putrida ut habet vel putredinem vniuersalem, vel particularem, vel iunctam inflammationi viscerum, vel ab ea seiunctam. Quæ omnia pertinent ad febrium differentias. At in temperatura attenditur natura, ætas, consuetudo, & ambiens cœlum, unde tamquam à causis ortum habet ipsa temperies; in aere examinatur regio ipsa, anni tempus, cœli status, à quibus causis suam constitutionem ambiens est sortitus. Hæc nos docet Galenus in nono Methodi præcipua curationem febrium indicantia proponens, in examenque reuocans, ubi etiam docet & plures, & pauciores fieri posse curatorias in febribus indicationes; quatenus has tres enumeratas vel magis scindimus,

mus, & in minutiores partimur, vel magis contrahimus, & ad generaliora capita redigimus. possumus namque presenti affectu, qui morbus dicitur, & præterito, qui sanitas nominatur, omnes complecti hoc binario conclusas; quandoquidem nil aliud sibi proponit, nil aliud molitur curatio, nil aliud est ipsa sanatio, quam præsentis in corpore vitiosæ affectionis in naturalem commutatio. vitiosa quippe affectio naturali implicita dissidium illud facit, illamque seditionem in corpore excitat, in qua morbum consistere auctor erat Plato in Sophista, cuius sententiam præclaram & confirmat, & explanat Galenus in opere de decretis. Hoc ergo dissidium, hanc seditionem morbosam tollere vult curatio, quod alienum est à naturali secernendo, extraneamque affectionem in habitum naturalem commutando. Sed hæc discretio fieri non potest, nec ista naturæ pristina restitutio, nisi & præter naturalis passio pateat, & prior ipsa naturalis constitutio innotescat, quod enim vitiosum separandum, quod naturale autem relinquendum, ideo utriusque notio necessaria, & utriusque indicatio opportuna, altero quidem indicante quid agendum altero terminum actionis insinuante. nam febris ut præternaturalis intemperies indicat alterantia, quæ corrigere eam possint, & emendare, atque adeo de medio tollere, at febricitantis temperatura modum insinuat alterationis, & ad quem usque terminum progredi alterando conveniat, ne plus, vel minus iusto alteremus, quia utrumque noxium, alterum quidem ut immoderatum, & contrariam inuehens intemperiem, alterum verò ut deficiens, & inutilem præstans operam. Et quia hæc

alteratio fit per contrarium, quippe quæ contrarij in contrarium conuersionem molitur, vitiosæ nempe affectionis in naturalem, quæ inter se contrariæ sunt, ideo fit ut ad vnam solam redigere indicationes possimus, ad ipsam videlicet contrarietatem, ad quam omnem curandi rationem diximus redeisse Hippocratem in libro de flatibus dum asseruit contraria esse contrariorum remedia. Erit ergo contrarietas generalissima curandæ febris indicatio, quæ & alterationem complectatur à febre indicatam, & mensuram alterationis potentia contineat à febricitantis temperatura insinuatam. Verum in hac indicationis communitate non licet quiescere, gradumque sistere, quia non sufficit inuenisse per contraria viam ineundam, non sufficit scire necessarium esse contrariorum usum, sed oportet etiam in contrarijs inuenire modum. Quo ignorato fieri facile potest, ut eorum vel excessus afferat noxam, vel defectus non afferat opem, aut non afferat saltem completam. nam febrili calido affectui non satis est admovisse frigida, nisi id congrua fiat, iustaque mensura ad prædictum imminens periculum euitandum vel contrarij morbi frigidi inducendi, si frigidorum administratio excedat, vel pristini calidi magna ex parte relinquendi, si eadem deficiat. Sic ergo à communissima indicatione contrarietatis discedentes, quæ sola numeros omnes in curando non explet, affectui vitioso pristinam constitutionem naturalem adiungimus, quatenus ut à primo alterationem per contraria moliendam accipimus, ita à secunda determinatam alterandi mensuram haurimus. Et quia reliquorum præsidiorum materiam à nostro pendente arbitratu, &

in nostra manu sunt constituta, sed quam præstat aer, illa necessaria est, non arbitraria, ac talem accipimus, qualem à natura oblatam habemus, ideo ab aere quoque propria quædam desumitur indicatio, ternarium absolvens. Quo nimirum ternario indicationes omnes curatorias Galenus complectitur, quæ ut in reliquis morbis, sic etiam in febribus habent locum, ut prima pertineat, atque præcipua ad febrem ipsam, secunda ad febricitantis temperiem, tertia demum, & postrema ad ambientis aeris constitutionem. Vocare debemus primum, & præcipuum Fontem indicationis curatoria febre ipsam, quia febris est affectus præternaturalis curandus, affectus contrariis abigendus, ut remaneat pristina constitutio naturalis, affectus contrariam indicans alterationem, & quid agendum insinuans, ut præcipua remedia curatoria deducantur à febris insinuatione ad curandum proposita. At reliqua duo, temperatura hominis, & cæli ipsius dispositio indicant & ipsa quidem secundum mentem Galeni, qui hæc tria morbum, temperaturam, & aerem in morbis omnibus indicationem præstare curatoriam testatur in tertio Methodi, sed hæc duo accuratius considerata coindicandi potius, quam indicandi vim præferunt, quia promouent, & perficiunt indicationem febris, quæ indicatio horum præsidio duorum destituta manca foret, & imperfecta, sed eorundem accedente quasi lumine illustrior fit, & complementum accipit. nam cum febris refrigeratoriam alterationem indicet, non solum refrigeratio adhibenda, sed determinata etiam, & certis quasi cancellis circumscripta refrigeratio, quam assequi mensuram,

& collimare non possumus, nisi febris magnitudinem, & factum à naturali statu recessum compertum, exploratumque habeamus, hanc autem notionem commodè præstat temperies ægri, & aeris observata, quia in calido temperamento minor est qualiscumque febris ob minorem à naturali habitu transgressionem, in frigido maior ob contrariam causam, & econverso in calido aere maior febris, quia fouetur magis, magisque ab ambiente febrilis feruor, in frigido minor, quia compescitur, ac retunditur ab eodem idem feruor, ut in primo casu habeat aer rationem causæ insalubris, & morbificæ, quatenus auget, exaggeratque accensum calorem, in secundo autem subeat vicem causæ salubris, & sanantis, quatenus eadem calorem contemperat, ac remittit.

*Dubitationis propositio, & solutio,
& propositi Problematis determinatio.*

CAPVT II.



Væ diximus de febris maiore in aere calido, quæ in frigido exactius veniunt discutienda. nam dubitauerit aliquis forsan, ne

contrarium sit asserendum, quod febris hiemalis peior sit æstiva, & vincatur difficilior. Quod quidem vel ipse Aristoteles nouit, pleneque declarauit in prima problematum particula, in qua ostendit per hiemem minus quidem, quam per æstatem, sed perniciosius homines ægrotare, eamque attulit causam quod in æstate morbi leui quacumque de causa existunt in hieme non nisi à

maxima excitantur, vt ideo maiora sint mala quę maiorem sunt causam consecuta. Vnde etiam fieri dixit vt athletę, & bonum habitum nacti vel non ægrotent, vel ægrotantes vitę discrimen subeant, quippe qui nisi magna cum causā ægredere nequeant. Hanc doctrinam tamquam verissimam approbavit, clarisq; verbis expressit Galenus in commentario trigésimi Quarti Aphorismi secundę particulę hiemalem febrem æstiuā peiorem ita decernens. Duarum febrium ardentium magnitudine parium illa, quę aduenit hieme, est perniciosior, nam dum in calidiori temporis cōstitutione ortum habuerit, & subita ad frigidiorē mutatio facta fuerit, non parum iuuatur hęc febris ardens ab ambientis aeris frigiditate, cum ipsi duplex insit commoditas, prior quidem temporis constitutio, in qua morbus genitus est tamquam signum, altera, verò in qua solutus est tamquam causa. Quibus verbis æstiuam febrem minus periculosam facit, & magis solutioni paratam, quam sit hiemalis, quę quia non fit illo anni tempore nisi ob maximam causam, magno statuitur discrimine prædita, quippe quę non esset orta nisi causa potentior temporis contrarietatem vicisset, & cum anni tempus cohibere non potuerit causę magnitudinem, licet illud habuerit sanitatem sibi suffragantem, multo minus morbo iam facto superauerit, non assistente amplius sanitatis robore. Ex hac igitur doctrina continuis confirmata experimentis indubium quis vocauerit superius allatam sententiam de febris vehementia ab aeris caliditate insinuatā, vt ideo remissior à frigiditate indicetur. Sed ad omnem eximendam dubitationem animaduerten-

dum est, quòd aliud est dicere febrem maiorem, aliud perniciosiorem, quia primum respicit essentiam febris, secundum autem arguit futurum morbi euentum vel succumbentis, vel dominantis naturę, & clarū habemus exemplum in febris maligna, quę Galeni testimonio in nono de simplici Medicina capite de bolo armena sepe remissior est, & magnitudinis effatu dignę expers, & magni tamen periculi compos, quale sepius non habet adiunctum febris longē vehementior. Quod etiā declarauit idem Galenus in secundo ac tertio de crisi- bus, vbi quattuor in febribus attendenda proposuit, Ideam, magnitudinem motum, & morem. Dicamus ergo febrem significari maiorem æstiuam, quia habet causam fouentem, & exaggerantem, perniciosiorem apparere hiemalem, quam constat à maiori causa ortam, vt prima, faciliorem habeat generationem, & accretionem ob ambientis calorem, sed faciliorem etiam solutionem, si fiat ambientis ad frigiditatem conuersio, & sic febris æstiuā habet duplicem ab aere commoditatem, facilis originis ob antecedentem caliditatem febrilis intemperiei generatricem, & facilis solutionis ob consequentem ambientis frigiditatem, instar causę salubris morbofi caloris correctricem. At febris hiemalis habet difficiliorem quidem generationem, non exorians nisi ex maxima causa, vim quasi inferens externę aeris constitutioni caloris excessum retundenti, sed habet etiam difficiliorem solutionem, quia vis maximę causę egerimē vincitur ab ea natura morbo confictata, à qua sanitatem adhuc retinente vinci nō potuit. Hinc manauit celebris ille Hippocratis loco Commemorato

Aphorismus, in Morbis minus periclitari, quorum naturę, aut etati, aut consuetudini, aut anni tempore magis congruit morbus, quam ubi nulli istorum congruit, ad cuius confirmationem Aphorismi ea statuit Galenus quę diximus de febris æstiva, & hiemali, Dioclis aliter sentientis falsam redarguens opinionem. Satis ergo patet quomodo ex aere calidiori maioris febris significatio colligatur, & quomodo ex ægri temperatura, & aere absolutior febris notitia deducatur, ut non solum quod refrigerare oporteat, sed quousque etiam oporteat, exploratum, compertumque habeatur. Hęc duo igitur, temperamentum, & aer indicant potius per modum signi, quam per modum affectus, hoc enim modo sola febris indicat, sed ad significandum assumitur etiam corporis temperies, & ambientis dispositio, quatenus hęc affectus naturam, ac grauitatem explicant magis, ac depromunt, & instar signorum ab affectu inseparabilium, eumque illustrantium eundem ob oculos ponunt. Sunt signa inseparabilia ab affectu temperatura, & aer, quia affectum necessario comitantur, illa quidem per se, hęc autem per accidens, temperatura est per se iuncta affectui, quia hic est præternaturam, & præternaturale supponit naturale, ut docet Aristoteles in primo de cœlo, & veluti malum residet, habetque fundamentum in bono, ut docet Plotinus in libro Vnde mala, ita morboſa affectio supponit naturalem, quę naturalis adhuc remanet materialiter, non autem formaliter ut ita dicam, quatenus deperdidit proprios gradus, & morboſos acquisiuit. At aer per accidens quodammodo comitatur febrem, quippe qui necessarius sit febricitanti, nec

febricitare, nec valere sine aere queunt, qui aer ideo videtur habere rationem causę sine qua non. Concurrent ergo hęc duo ad indicandum, vel potius ad significandum, manifestandumque magis affectum verè indicantem, nempe febrim. nam quod non indicent propriè inde colligitur, quod si propria vi indicarent, cum sint res naturales, indicarent similia, & non præberent indicationem curatoriam, quę semper insinuat contraria. nam curatio innuit affectum præternaturalem abigendum, quod sit ope contrariorum, at res naturales sunt conseruandę, & cōseruatio sit per similia, veluti abolitio per cōtraria, ut in libris de sanitate tuenda, & de methodo medendi sepius decernit Galenus. Sed per temperaturam, & aerem colligimus attinentia ad contrarium indicatum pro curatione febris, modum saltem, & mensuram adhibendam in vsu contrarij, ut hinc perficiatur indicatio principalis à febris orta, argumento temperatura, & aeris absoluenda. Accedit quod ipsa temperies non consideratur qualis est tempore morbi, sed qualis fuit tempore sanitatis ante morbi aduentum, sed omnis indicatio vera sumitur à re præſenti, non remota, ut docet Galenus, in quarto Methodi, Ergo non potest ipsa temperies verè indicare curationem, nisi quā concurrat ad explendam affectus indicationem, coarctando indicatum communius ad determinatum quendam modulum. Si sermo ergo fiat de vero, & proprio indicante curatorio in hoc genere, est febris sola, & ita aliquando loquitur Galenus, at si communius hoc nomen accipiat, & latius, ut complectitur quicquid concurrat ad indicandam, perficiendamque

damque curationem siue primario, siue secundo, siue per modum affectus remouendi, siue per modum signi illustrantis, tunc tria dicuntur indicantia curatoria, febris, temperatura, aer, veluti triplex est etiam, indicans absolute consideratum, curatorium, praeuatorium, vitale, vt abunde in primo libro explicuimus. In illo autem ternario curatrices indicationes complectente contingit, vt diximus, vnam esse praeipuum indicationem à febre desumptam, reliquas duas esse quasi appendices instar signorum, & praeipuum quidem illam innuere alterationem per contraria iuxta regulam communissimam omni morbo, qui per contraria venit summovendus. Hinc Galenus in primo capite vndecimi libri de Methodo hæc memorabilia verba exarauit. Nunc quomodo modum, quæ ex putrescentibus excitantur febres methodo sint sanandæ aggredi statui. Quæ curationem indicant, prout in quo diuiduntur, affectus quem curamus, & partium ægrotantis temperies sunt. Licet autem ea, vt dictum est, & vna summa interpretemur, dicentes vnam esse omnium morborum communem curationis indicationem, nempe contrarietatem ipsam, qua rursus diuisa duas existere, morbo scilicet ex his, quæ sibi contraria sunt, adhibenda remedia indicante, laborantis verò temperie vnâ cum ipso morbo contrarietatis mensuram definiente. Porro dictum in illis est ambientem quoque nos aerem vnâ efficere indicationem posse, & cum primâ sectionem in duo tâto facimus, ambientem vel ægritudinis causis, vel sanitatis annumerandum esse. Quibus nimirum verbis colligit Galenus ex superius dictis in nono Methodi, vbi

hæc ab vndè explanauit, indicationem curatoriam posse fieri triplicem, à morbi contrarietate, ab ægrotantis temperatura, ab ipso ambiente deductam, & posse redigi ad vnam, ad morbi videlicet contrarietatem, & posse redigi ad duas, ad hanc nempe contrarietatem, & ægri temperaturam, & tunc contingere, vt ambiens ad causas vel morbificas, vel salubres referatur, quia tunc non concurrat seiunctim, ad morbum notificandum satis per temperaturam aeris etiam congressu constitutam notificatum, sed reuocatur in examen non amplius vt signum declaratiuum morbi, sed vt induens naturam causæ vel insalubris, vel salubris, vt euadat indicans non amplius curatorium, sed praeuatorium. Præcipuum ergo indicationem curatoriam vocat contrarietatem in morbo consideratâ, vnde contraria remedia insinuantur, veluti à laborantis temperie contrarietatis vsurpandæ mensura definitur. nam cum morbus sit contrarius sanitati, & sanitas sit quoddam symmetria, & moderatio, necessario morbus est affectus quidam immoderatus, qui si redigi debet ad mediocritatem, & moderationem, vbi residet sanitas, per applicationem contrarij immoderati adigi ad eam debet, vt Galenus in arte Medica, & Vndecimo Methodi considerat, veluti cum ligna obliqua, & in torta veniunt dirigenda, & ad rectitudinem inducenda, nullo pacto melius hoc perficitur, quam per inflexionem in partem contrariam, quia tunc, & pristinam obliquitatem deponunt, & nuper accedentem non seruant, sed ad propositam rectitudinem adducuntur, quæ pulchra fuit in primo athicorum Aristotelis animaduersione. Sic ergo, &

febres, & omnes aggritudines, cum sint immoderantiæ præternaturales, vsu contrariarum immoderationum ad naturalem moderationem sanitatis auctricæ perueniunt. Quod à Galeno locis commemoratis luculenter legimus explicatum.

De Indicatione curatoria, quæ à febris putrida desumitur, qualis, & quotuplex sit.

CAPVT III.



Consideremus nunc quæ ratione eliciatur hæc indicatio curatoria, ab ipsa febris putrida, quam diximus habere præcipuam, & potiore vim indicandæ curationis, ad quam insinuandam febricitantis temperatura, & aeris dispositio signorum potius vim subire sunt dicta, & additamenta quædam ad perficiendam febris indicationem iudicata. Dicamus ergo cum Galeno in Vndecimo Methodi non posse curari putridam febrem, nisi curetur adiuncta putredo, quia hæc est causa febris, & sublata causa euentus eius remanere non potest, ut dicebat Plato in Lyside, qui manente causa non potest tolli. Hinc duæ primo se se offerunt indicationes, quarum altera oritur à febris, altera à putredine; Et quia in febris considerari potest tum id quod iam genitum est ipsius, tum id quod generari potest, ideo duæ rursus à febris indicationes oriuntur, prima tollendæ portionis febrilis iam accensæ, secunda verò inhibendæ portionis in posterum accendendæ. A putredine pariter duæ manant indicationes, ut facta sanetur, immi-

nens, & in generatione existens sistatur. Et quia putredo in generatione existens pendet à prohibita transpiratione, huius quoque duæ sunt indicationes, prima ut materia retenta euacuetur, secunda ut retinenda inhibeat. Quod sit vsu remedium obstructioni medentium; Quæ rursus obstructio duo exposcit, ut facta sanetur, ut futura summoveatur. Tollitur præsens obstructio vsu deobstruentium, summo-uetur imminens per ea, quæ habent vim sistendi, & compescendi confluxum obstruentium humorum. Et licet hoc sit vltimum in inuentione præsidiorum, id tamen primum sibi locum vendicat in curatione inchoanda. nam in hoc etiam illud euenit, quod Aristoteles in tertio ethicorum, affirmat consultantibus euenire, ut in consultando perseuerent dum ad primam causam peruenierint, quæ inuentione est vltima, quippe quod est resoluenti postremum, id est agenti primum. consultat enim, & resoluit Medicus colligendis indicationibus addictus, idque facit si non cum alijs externo, secum saltem interno illo sermone, qui apud Platonem apparet in sophista expressus. nam, ut ait Aristoteles in primo posteriorum, ratiocinatio non ad externum sermonem pertinet, sed ad interiorem animi sensum. Hæc igitur, quam diximus, est præclara series, & elegans æconomia indicationum omnium, quæ se se offerunt cogitanti, & ratiocinanti Medico, eique cadunt in mentem ad curandam recta methodo febrem putridam accessuro. In qua quidem serie, & æconomia clare innotescit iungi simul indicationes, & curatorias, & præseruatorias, quatenus, & à febris, & à causis febris deducuntur, cum

cum enim febris putrida talem habeat curationem, ut huic præservatio etiam sit adiuncta, mirandum non est fieri indicationum syndromen quandam, & qualemcumque congressum tum curatrices, tum præservatrices complectentem. nam illa sunt Galeni verba in Undecimo Methodi admodum consentanea, his, quæ superius ex aphorismorum commentarijs adduximus, Diariorum quidem febrium, & hæticarum vera, & propria curatio est. Eorum verò, quæ ex putrescentibus excitantur humoribus, vocata curatione *πρόφυλακὴν*, quoque sibi adiunxit, cuius officium est causam, quæ morbum creat, adimere. sanè nominatur hæc ipsa quoque artis pars curatrix, quæ utique ab ea, quæ purè, sincereque prophylactice dicitur, in eo distincta est, quòd sub hac iam sensibiliter ex ipsa causa morbus est genitus, in prophylactice verò est futurus. Hæc Galenus, qui quattuor, ut apparet ex dictis superius, quasi Fontes proponebat, unde derivantur indicationes octo in febribus putridis, binæ à singulo Fonte, & sunt hi quattuor Fontes, febris, putredo, prohibita transpiratio, obstructio, ut hæc omnia geminam depromant indicationem, partim sanandæ portionis factæ, partim inhibendæ quæ fieri potest. Sed licet hæc vera sint, nos tamen primo examinabimus eas præcipuè indicationes, quæ magis sunt curatoria, vel si vim prophylacticam retinent, pendunt à causa, magis coniuncta febris, reliquas indicationes examinaturi quando verba faciemus de indicatione præservatoria à causis febrilibus deducta. Quoniam ergo in febre tum portionem factam sanare, tum in generatione existentem inhibere debemus,

gratia primi oritur indicatio refrigerandi, cum portio febris accensa sit intemperies feruidior, & quasi ignea, gratia secundi oritur indicatio euacuandi, refrigerandi, ventilandi, concoquendi. nam futuram febris portionem generatura est humorum putredo, qui humores ut putridi sunt euacuandi, ut iusto calidiores sunt refrigerandi, ut congrua transpiratione destituti sunt ventilandi, ut semiputridi sunt concoquendi. hoc enim modo desinent ulterius febrem accendere, & novum calorem febrilem iam prius facto adiungere. Sic habebitur ratio febris putridæ, & quatenus febris est, & quatenus putrida, quia prima ratione usurpantur refrigerantia, quæ febrilem calorem extinguunt, secunda ratione inducuntur euacuantia, refrigerantia, euentantia, concoquentia, quæ putredinem, & factam aboleant, & futuram compescant. Hinc Galenus in Arte Medicinali dicebat febrem in humoribus putrescentibus accensam, indicare euacuationem, & alterationem, ita ut alteratio putredinem finiat manente adhuc causa, euacuatio verò totam ex corpore substantiam educat. Quæ quidem indicationes curatoria vocari possunt, quatenus morbum materiale abolendum suscipiunt, & non ad solum calorem febrilem, sed ad ipsam etiam causam proximam, quæ putredo est, summouendam, conuertuntur, quia, ut diximus, in febre putrida non solum portio iam accensa est extinguenda, sed quæ etiam in generatione existit accensa, ideoque causæ salubres in hac febre curanda adhibendæ non sunt ex censu earum, quæ sint curatrices tantummodo, quales conveniunt morbo immateriali iam facto, nec

ex censu earū, quæ sint tantūmodo præseruatorie; quales conueniunt morbo imminēti futuro, sed ex numero earū, quæ sint mixtæ ex curatione, & præseruatione, quales conueniunt morbo materiali partim facto, partim in generatione existenti, vt est putrida febris, in qua non solum adest iam accensa immoderata caliditas, sed subest etiam perennis focus nouæ vltius generandæ in putredine succorum constitutus, vt ideo non solum de calore præter naturali extinguendo, sed de putredine etiam compescenda, ad impediendam noui caloris vigentem generationem debeamus esse solliciti. Quare indicationes omnes febris putridæ ad has duas redigere possumus, alterationem, & euacuationem, his namque duabus, & febri vt febris est, & eidem vt putrida est, satis possumus facere quia alteratio complectitur refrigerationem, & febri, & putredini debitam, complectitur ventilationem, & concoctionem putrescentium humorum propriam, & euacuatio eorundem cōtinetur corpore eductionem pro putredine compescenda. Vera quidem curatio respicit præcipuè essentiam ipsam morbi sanandi, veluti in hoc casu essentiam ipsius febris, quæ consistit in calore immodico in cordis humoribus constituto, vt humores cordis immodicè calefacti sint causa cōtinens febris putridæ, ideoque vera indicatio curatoria est insinuatō alterationis refrigeratoriæ, quam innuit ipsa febris, sed nihilominus indicationes etiam quæ diriguntur ad ipsam putredinem compescendam, sapiunt vim quandam curatricem mixtam, quia licet non respiciant morbum ipsum, respiciunt saltem causam immediatam morbi, & pu-

tredo ipsa, vt supra ostendimus, non solum causa morbifica à Galeno vocata est, sed etiam affectus, quo nomine curationem exposcit, & putrida tandē febris eam habet ideā, vt non simplicem curationem, sed præseruationi implicitam requirat, vt indicationes putredinem respicientes ratione febris sint præseruatoriæ, ratione putredinis curatoriæ, & febris putrida cum reduplicacione, hoc est quatenus putrida, remedia non modo refrigerantia exigat, verum ipsi etiam putredini repugnantia. Ex his, quæ diximus, colligere possumus multa esse in putridis febribus præter naturam, quæ contrariorum indicant vsum, & hæc omnia Galenus in Vndecimo Methodi ad numerum septenarium redigit, ad humorum scilicet multitudinem, crassitudinem, lentorem, obstructionem, transpirationis retentionem, putredinem, & febrem. Quibus etiam adiungenda statuit quæ sunt secundum naturam non nulla, à quibus non contrariorum, sed similium oriuntur indicationes, quæ sint præcipuè temperamentum partis laborantis, & viscerum præcipuorum constitutio cognita, quàm notionem tūm ætas præbeat non parum, tūm consuetudo, tūm externæ morbificæ causæ, vt hæc omnia Medico sint cōsideranda ad rectè colligendas indicationes, & opportunè vsurpandas medelas. Sed tamen ex enumeratis septem præternaturalibus rebus in curanda febri putrida duas potissimum respicimus, vt diximus, ad eliciendas indicationes quocumque modo curatorias, putredinem, & febrem, quia hæc habet semper illam adiunctam, & ab illa suam nanciscitur naturam, quippe quæ non foret putrida, si putredinis comitatu

foret destituta. Duplex ergo fuerit hæc indicatio curatoria, refrigerandi altera, altera putredinem sanandi. nam, vt ex Galeno ostendimus, putredinem duplici nomine consideramus, & quatenus facta est, & quatenus fieri potest, factam tollimus per curatoriam indicationem, futuram compescimus per præseruatoriam. Nec dicere oportet remanere adhuc duas alias indicationes curatorias, alterā sanandæ obstructionis factæ, alteram remouendæ transpirationis actu prohibitz, quia obstructionis indicatio non est ex vsu, sed talis est materiæ obstructis indicatio, at hæc non est curatoria, prohibita verò transpiratio habet rationem partim causæ, partim symptomatis, sed neutra rationem habet indicationem curatoriam.

De Triplici febrium putridarum diuisione in colligendis indicationibus obseruanda.

C A P V T I V.



Quæ sint indicationes curatoriæ in febris putrida deducendæ, in vsumque reuocandæ, satis, ni fallor, declarauimus. Quas vt melius obire, & adimplere possimus, non mittendam illam febrium putridarum diuisionem censemus, quam Galenus in Vndecimo Methodi statuit ante oculos esse habendā. nam primo obseruandas ait vniuersales differentias istarum febrium, deinde generales earum indicationes, mox singulatim cuiusque proprias, vt à communissima essentia ad propriissimam fiat progressus, & ab amplissimo genere ad vltimam speciem accessus. Natarum igitur ex humoris putredine febrium triplicem facit potissimum differentiā,

vnā ex eo, quòd causæ ipsius putredinis adsint, vel non adsint, secundam ex eo, quòd per totum animal, aut per eius partem aliquam diffusa putredo sit, tertiam ex eo, quod vel cum phlegmone est, vel citra hanc. Prima differentia habet locum in hoc febrium genere, quia potest adhuc remanere putredo, cū eius causæ, prohibita nempe transpiratio, & obstructio sublata fuerint, nec amplius subsistant, excitata namque putredo pendet quidem in sui generatione ab illis causis, sed non pendet in sui conseruatione, humoribus putrescentibus inhærere per se apta, ad faciliorem tamen sanationem recipiendam parata. Secunda differentia habet locum, quia febres vel sunt continentes, & vnica ferè accessione continentur, quas vocant synochas, vel sunt pluribus accessionibus distinctæ, siue continuitatem habeant, siue intermissionem, quas proportionales nominant, & in primis putredo est per totum animal diffusa, in secundis particularem aliquam occupat partem, vt ex Galeno constat in secundo de differentijs febrium. quam quam possumus etiam dicere in primo quoque genere locum habere posse febres ne dum cōtinuas, verum etiam intermittentes, si putredo fuerit per totum quidem animal diffusa, sed extra venas in ambitu vniuersi corporis coercita, & in secundo etiam genere constitui posse vel ipsas continentes, si putredo occupauerit venas maiores, & proximiores cordi. Verum vt plurimum contingit ad primum genus pertinere continentes, ad secundum reliquas febres. Vltima demum differentia memoriam reficit illius Galenicæ diuisionis, quam legimus in primo ad Glauconem, statuentis

alias febres veluti symptomata, alias vero non symptomata, sed morbos, ut primi generis sint quæ ex phlegmones ortum habent, partiū phlegmone affectarum veluti symptomata quædam, quod instar symptomatum phlegmonas consequantur, vnde nomen morbi magna ex parte ab affecta particula sumitur, phrenitis, pleuritis, peripneumonia, ob quam causam in primo de victus ratione dixit Hippocrates acutos morbos esse illos, quorum febres sunt continuæ, non quod omnes morbi acuti febres habeant continuas comites, sed quod acuti cum inflammatione habeant, at secundi generis febres sint quæ ex succis putrescentibus accenduntur, nec ad sui ortum inflammatorijs partium affectionibus opus habent. Distinguenda ergo fuerint febrium putridarum differentia, ut non solum communis indicatio ipsius generis pateat, sed propria etiam cuiusque differentia innotescat, quia si febris causas putredinis habeat iunctas, non curatorijs solum, sed præseruatorijs etiam indicationibus utendū, at si non habeat, sufficient curatoria, à febre ipsa, & putredine deducta, & si putredo per vniuersum animal fuerit diffusa, vel æqualiter in omnibus subsistet vasis, vel in maximis, maximeque, principalibus, qualia sunt inter alas, & inguina, magnis opus erit remedijs vniuerso corpori, & euacuando, & alterando addictis, at si putredo quampiam particulam occupauerit, in qua veluti in foco quodam principium febris exciter, huius præcipue corrigenda particula erit cogitatio inuenda, ut putredinis mineram eximamus, vnde putridi emergunt vapores cordis humoribus febrilem caliditatem impertientes. Quod si

pars corporis fuerit inflammationis labe infecta, cuius soboles sit consequens febris, quis non videt in huius curatione à parte affecta præcipuam esse indicationem sumendam, & inchoatæ inflammationis progressum impediendum? Ita Medicis comparanda venit suppellex indicationum, quia nosse debet quid commune habeat indicatio, quæ à causa sumitur adhuc manente, & quid indicatio putredinis, & quid indicatio putredinis vniuersalis, & quid indicatio putredinis partialis, cum inflammatione coniuncta, & quid ab inflammatione seiuncta, & rursum in his ipsis quid præsentis effectrice causa, & quid absente, & nosse præterea debet cuiusque adhuc manentis causæ proprias, germanasque differentias, vnde specierum constitutarum manat diuisio, & ex diuisione notionum inuentio, quia hic desinunt indicationes à curandis affectibus depromptæ, ad quas accedunt curandarum particularum indicationes, ab habita viri ratione colophonem Methodi sanandarum febrium putridarum suscipientes. In quibus apparuit maximum esse causarum momentū, quia cum sanari febris nequeat, nisi tollatur putredo, hæc tolli non potest manente causa, ut ideo hæc, & cognoscenda diligenter, & eximenda etiā sit. Quod præceptum sæpe tradit, repetitque Galenus in Vndecimo Methodi, sed in principio decimi totam hanc de causa deliberationem in tria capita diuidit, ut æstimare debeat Medicus febris ne sola curanda ei sit non sollicito de causa, an causa oppugnanda minimè curanti de febre, an plurimum remediorum ad alteram earum sit adhibendum, non tamen altera neglecta. Ex quibus tribus capitibus primum refel-

lit.

lit, quia si febre[m] factam sanantia effectricem eius causam adauxerint, nulla spes superest vel generationis prohibendae, vel magnitudinis, secundum distinctione[m] illustrat, & hac adhibita iudicat non incommodum, quia in casu febris intolerabilis, non est sublationi causae nauanda opera, ne cum febre tollamus etiam febricitantem; sed in casu febris mediocris, virtutis validae, amplexanda, haec medendi ratio. Nec negligendam tertiam statuit, ut magis virgati rei intentus sit animus, altera non neglecta. Ac vim quidem causae plerumque esse maiorem affirmat, posse tamen interdum fieri non negat, ut febris sua vehementia magis urgeat, & ad sui curationem medentis animum prius trahat ad tollendam causam mox conuertendum. In quo comparandarum indicationum aduersantium negotio vires etiam naturales consulendas, in examenque reuocandas decernit, ut hinc triplex ille indicationum in curandis febribus putridis funiculus oriatur, à causa, à febre, à viribus, quem cumulatè superius considerauimus. Et cum de indicatione virium multa in primo libro dixerimus, suscepimus nunc indicationes à febre, & à causa manantes accuratè considerandas, & quia Medicum non operantem, sed ratiocinantem, non ordini executionis, sed cogitationis intentum respicimus, indicationes prius à febre desumptas examinamus, ac tanto quidem magis, quòd continentis etiam causae, quae putredo est, indicationes adiungemus.

De Indicatione curatoria febris putridae, ut febris est.

CAPVT V.



Indicatio febris putridae, ut febris est, est insinuatio eorum contrariorum, quae febrilem intemperie[m] valeat demoliri. Haec intemperies est ignea quaedam dispositio iuxta Galeni animaduersionem in commentario sextidecimi Aphorismi primae particulae, in quo asserit febre[m] esse passionem calidam, & siccam, quia sit conuersio naturae caliditatis in igneam, ut supra etiam, considerauimus. Oritur ergo indicatio refrigerandi, & humectandi, ut contrariorum usu caliditas, & siccitas praeternaturalis de medio tollantur. Hinc Galenus nono Methodi dixit omnis febris, quae febris est, humectationem, & refrigerationem esse remedia, & si sola haec sit, ad humectandum, & refrigerandum omne medentis consilium dirigi tamquam ad vnicum scopum, ita ut nihil sit quod praeterea ad curationem desideretur, nisi ut materiae inueniantur huic proposito accommodatae. Quae quidem refrigerandi, & humectandi indicationem à febre manantem considerauit etiam Galenus, in mediumque adduxit in octauo etiam Methodi, & pluribus alijs in locis, quinimo in nuper commemorato Aphorismo explicans Hippocratis sententiam dicentis victum humidum febricitantibus omnibus conferre, ostendit in affectibus naturalibus quidem oriri similia[m] indicationes, in praeternaturalibus autem contrariorum, ideoque in febre pro-
dire.

dire indicationem refrigerandi, & humectandi, nec valere obiectionem ex febris cum aqua intercutem, quæ exiccantia quærat, deductam, quia tunc non est simplex morbus, sed compositus, ideoq; non simplicem, sed compositam promens indicationem, ut ex febris, & hydrope complicatæ oriantur, & inter se contrariæ indicationes, quibus satis oportet facere eam adhibentes cautelam, ut id quod magis vrget præcipuè respiciamus, altero non neglecto. Per hoc ergo non stat quin febris ratione sui indicet humectantia cum refrigerantibus, quia in hydropico etiam ratione febris est hæc indicatio, sed hanc obscurat, & quasi obruit superueniens ex hydrope indicatio exiccandi, ut habenda sit vtriusq; ratio, maior tamen magis vrgentis, & maius negotium facessentis. Sed hic dubitare contrario modo libet, cur scilicet Hippocrates in illo Aphorismo solius humectationis meminerit, & refrigerationem silentio obuoluerit, quasi sola humectandi indicatio febrim respiciat, & cur Galenus ex altera parte solius refrigerationis in febricitantibus sæpe faciat mentionem, & in Vndecimo præcipuè Methodi nullam ferè aliam à febris deducat indicationem, quàm refrigerandi, quasi solum huc scopum in curanda febris debeamus habere propositum. Ad primam dubitationem dicamus primo omissam ab Hippocrate ibi fuisse refrigerationem tamquam notissimam, & suapte nutu mentibus omnium occurrentem, secundo hanc eandem fuisse in humectatione insinuatam, non solum quia humiditas est qualiscumque caliditatis refractio, atque retusio, veluti siccitas est eiusdem caliditatis excitatio, & lima, verum etiam quia victus humidus, de quo ibi sic

sermo, refrigerandi facultatem habet adiunctam, cum illum insinuet auctor cibum humidum, quem in primo de victus ratione expressit pristinæ inducto exemplo, ut quatuor ferè habeat conditiones, imbecillitatem, sitis carentiam, concoctionis facilitatem, & qualemcumque liquiditatem vel actualementem, vel actui proximam. At imbecillitas in cibis est illa, quæ ipsos arguit omni forti qualitate destitutos, ideoq; non calefaciendi, sed refrigerandi potius vi præditos, vnde dixit in sexto Epidemiorum Hippocrates, cibi imbecilles frigidi. Ita fit, ut victus verè humidus non modo humectet, verum etiam quoquo pacto refrigeret. nam quod victus humidus propositas habere condiciones debeat hæc etiam insinuant Celsi verba in tertio libro Hippocraticam sententiam sic exprimentis. Cibus febricitantibus humidus est aptissimus, aut humori certè quam proximus, utiq; ex materia quàm leuissima, maximeq; sorbitio, eaque si magnæ febres fuerint, quàm tenuissima esse debet, nam dum vocat vel humidum, vel humori valdè propinquum, eius qualemcumque liquiditatem innuit, dum ex materia leuissima, concoctionis facilitatem, dum sorbitionem præponit, vim compescendæ sitis attingit, dum tenuitatem nominat, imbecillitatem declarat. quippe Hippocratis sollicitudinem de refrigerandis febricitantibus in dubium reuocauerit nemo vel parum in eius doctrina versatus, vnde in sexto Epidemiorum carpit Prodicum febricantes necantem cursibus, luctatione, fomentis, inedia, asserens quod febrile est, esse ciborum parsimoniam inimicum, periodis multis, cursibus, refrigerationi, labori, nec aliam ob causam asseruit, nisi quia febris, indiget refri-

refrigerio; & hæc augment incendium, & paullo post subiunxit illa verba, sitim arcet os continere, tacere, spiritum cum potu frigidum introducere. Sed in illo aphorismo maluit humectationem exprimere, partim quia hæc refrigerationem habet comitem, partim quia humectatio à rebus tum præternaturalibus, tum naturalibus indicari potest, à primis quidem repellendis, & hanc voluit indicationem eiusdem rei contrario modo factam proponere, indicari humectationem ostendens à febre, tamquam à morbo per contrarium expellendo, indicari ab ætate puerili, & à consuetudine tamquam rebus naturalibus per similia humectantia conservandis. Quod in refrigeratione usu venire nū potest, cum frigiditas non sit ætati puerili familiaris, nec humanæ vitæ, viventiumque naturæ amica. Ad secundam ex Galeno dubitationem respondemus ipsum ex altera parte præcipuam nominasse in Undecimo Methodi indicationem, quam constat ad refrigerandum pertinere, minus præcipuam ad humectandum attinentem superius sæpiusculè commemoratam subinuisse, aliquoties tetigisse, & subintelligendam semper reliquisse, ut hic habeat locum monitum ipsius Galeni in præfato Aphorismorum loco his verbis expressum. Si quid expressis verbis Hippocrates in aphorismis non dixit, quod tamen idem habeat iudicium cum his, quæ ab ipso dicuntur hoc quoque fuisse dictum potentia existimare debemus. nam hoc idem nobis de Galeno statuendum est, quem cum videamus indicationi refrigerandi in febribus eam, quæ humectantia porrigit, interdum non adiungere, potentia adiunxisse debemus asserere, cum frequentius v-

triusque indicationis fecerit in superioribus libris mentionem. nominat enim potiore indicationem refrigerandi, quam maxime præstat immodicus febrilis calor, quem dum retundimus, & compescendo corrigimus, consequenti simul siccitati obuiam imus, ut refrigerantia præstidia, per se quidem refrigerent, per accidens autem humectent febricitantis corpus, quatenus sublato calore immodico demitur ansa consequentis eum siccitatis, & aperitur aditus humectationi ab alimentis proficiscenti. Non debebat autem Galenus semper indicationem humectandi adiungere, partim quia subintelligitur indicationi refrigeratoriæ annexa, partim quia in putridis febribus humiditas viget superuacanea præter humiditatem putredinis perpetuam pedissequam, unde Aristoteles in primo problematum particula vocavit febrem passionem calidam, & humidam, partim quia siccitas non ita facile inualecit in febricitantibus, euaditque morbosa operationes euidenter ledens, ut caliditas, quæ cum citam suscipiat auctionem, fiatque morbosa diathesis, vrget magis, ad seque trahit medentis cogitationem, non tam valide pulsata à languidiore adiuncta siccitate, cuius nondum ad effatu dignum gradum deductæ non magne sunt vires, non magni ad contraria adhibenda stimuli, ut indicatio humectandi non modo præsentis affectionis curationem, verum imminentis etiam inhibitionem videatur insinuare, ideoque & curatoriam, & prophylacticam vicem subire. Qua in re illud venit animaduertendum propositam ab Hippocrate febricitantium humectationem per alimenta potissimum fuisse, ut ipsa humectando vim subi-

rent

rent medicamentosa in libro de alimento ab eodem expressam, ut cum cibis sui natura calidum, & siccum quærat, potus frigidum, & humidum, ut docuit Plato in Hipparcho, & Aristoteles in secundo de anima, cibis etiam febricitantium, nedum potus, non exiccandi, sed humectandi vim obtineat. Non inficias tamen eundem per medicamenta etiam hanc humectationem qualemcumque, quærendam, nec umquam in febribus, quæ febres sunt, hanc indicationem negligendam, unde idem Galenus in Vndecimo Methodi euacuationes per urinam, per aluum, per sudorem in propositis febribus moliendas proponens illud monuit obseruandum, ut materiæ deligantur, quæ citra magnam, vel caliditatem, vel siccitatem valeant id præstare, quia nempe propositus est non calefaciendi, sed refrigerandi, non exiccandi, sed humectandi scopus. Cum ergo refrigerandi, & humectandi in febribus excitetur consilium iure illo contrarietatis, quod in omnibus morbis indicationes præbere cum Hippocrate in Vndecimo Methodi locupleti oratione patefacit Galenus, multa quidem sunt præsidia quæ hanc operam possint nauare, & propositum institutum explere, & multiplex eorundem præsidiorum forma operandique ratio. nam ut idem in eodem Vndecimo notat Galenus, alia sunt quæ per se, alia quæ per accidens, seu aliena vi id faciant, alia etiam quæ actu, alia quæ potestate dicere namque exempli gratia possumus aquam frigidam esse remedium, quod tum propria vi, tum actu refrigeret, & humectet, venæ autem sectionem, & lenem alui subductionem accidentaria ratione refrigerare, puissam, & olerum vi frigidiuscula præ-

ditorum decoctum potestate idem efficere, nec desunt aliqua quæ & per se, & per accidens refrigeranda, humectandaque corpora suscipiant, quo in censu Balneum præcipue posuerimus, quod remedij genus ut antiquis erat temporibus vsitatissimum, sic nostris etiam interdum ad has profligandas febres vsurpandum, ut cum Galeno in Vndecimo Methodi inferius ostendemus. Hæc omnia, aliaque id genus præsidia, possunt esse infestantis febris, quatenus febris, remedia satis indicationibus ortis factura, venæ, inquam sectio, alui subductio, potio frigida, puissana, herbarum frigidarum decoctio, & Balneum, quæ singula in examen reuocabimus à venæ sectione auspicati, tamquam à remedio frequentiori, & magis, ut solet vocare Galenus, præsentaneo.

De sanguinis euacuatione per Phlebotomiam, ut remedio refrigeratorio, & prius unde indicetur absolutè phlebotomia.

CAPVT VI.

QUÆ à febris, ut febris est, indicatio sumitur, est partim vltima, partim prima, ut docet Galenus in Vndecimo Methodi. nam ratione auxiliorum parandarum vltimum habet locum, ratione methodi in inueniendis auxilijs à febris statim incipientis, vendicat sibi primum. Et veluti prima indicatio est refrigerandi, ita primum refrigeratorium auxilium est sanguinis imminutio, quæ cum multas ferri possit, ut idem Galenus ostendit in Quarto Methodi, & in libello de phlebotomia, per inediam scili-

scilicet, per exercitationem per alui subductionem, per balneum, aliaque id genus, ac demum per venæ sectionem, eam nos hoc loco hac vltima factam ratione considerabimus. Vocat hoc remedium, vt diximus, magnum, & præsentaneum in arte Galenus, quia magnas habet in corpore tum vacuando, tum alterando vires, & quam pollicetur operam, præstat non longo temporis interiecto intervallo, sed breuissima quadam mora, vt eius administrationem statim ferè expectata excipiat vtilitas, vnde prodijt argutum illius dictorium, qui repentinam febrilentis curationem à Galeno hoc remedij genere factam admiratus, iugulatam ab eo fuisse febrem est confessus. Ad hoc remedium statim esse in putridis febribus confugiendum hæc Galenica verba in Vndecimo Methodi declarant. Si vires eius, qui ex putredine humorum febricitat, valentes sint, mittendus statim sanguis est, si cruditas ventris non sit, statim morbo incipiente, sin vires infirmæ sint, aut ætas dissuadeat, incidenda vena non est. Nec admirari hoc Galenicum debemus consilium, quia propositum remedium duplicem præcipuè habet rationem quippe quod non solum vt euacuatorium, sed vt refrigeratorium confert, & sanguinem vt opus est minuens, & corpus febricitantis valdè refrigerans. Ac veluti prima ratione naturam obtinet remedij præsertim præseruatorij, ita secunda euadit propriè curatorium, quo pacto nunc in examen reuocatur, altero mox inferius, cum de præseruatione indicata erit sermo, reuocandum. Verum hæc venæ sectio numquam adhibetur, nisi vrgeat indicans, & adsint permittentia, quod indicans, & quæ permitten-

tia qualia sint, celebre Hippocratis oraculum insinuauit in quarto acutorum his verbis expressum. τὰ ἀξία πάθεα φλεβοτομήσεις, ἢν ἰσχυρὸν φαίνεται τὸ νόσημα, καὶ οἱ ἔχοντες αἷμα ξωστὶ τὴν ἰλικιὴν καὶ ἰσὺν παρὰ αὐτοῖσιν. hoc est in acutis morbis sanguinem detrahes, si vehemens appareat morbus, & laborantes vigeant ætate, & robur adsit ipsis. Quæ verba sic explanat Galenus in commentario, vt ad hæc tria redactam asserat mittendi sanguinis indicationem, morbi magnitudinem, virium validitatem, ætatis vigorem, quia licet sufficere videatur morbi magnitudo cum virium robore, adiungenda tamen fuit etiam ætatis vigentis consideratio non tam propter senes, quam propter pueros, vitalis facultatis robore pollentes, perenni tamen euacuationi sponte naturæ factæ obnoxios, vt ille virium tonus facili negotio fatiscat, quippe qui ætatis destitutus vigore ad quemlibet extrinsecus accedentis euacuationis accessum euanescat. Exceptis ergo pueris, & senibus reliqui omnes magno morbo laborantes, & virium firmitatem nacti sanguinis exigunt detractionem, vt morbi magnitudo, seu vehementia sit indicans principale, virium constantia cū ætatis vigore sit coindicans, & ortam à morbo indicationem suo quasi nutu confirmans. Sed dubitauerit hic aliquis, cur Hippocrates loquens de morbis acutis dixerit, si vehemens appareat morbus, quasi dentur morbi acuti non vehementes, sed leues, & non hæc sit acutorum omnium indoles, vt duarum conditionum quasi caracterismo sint insigniti, vehementiæ in gradu, celeritatis in motu, vt in commentario decimi noni aphorismi secundæ particulæ docet Galenus. At re-

sponsio est in promptu, non dixisse Hippocratem absolute, si morbus fuerit vehemens, sed adiunxisse ulterius, si adsit vigor ætatis, & virium firmitas, ut trium rerum funiculum connectere voluerit, Magni morbi, vigentis ætatis, virtutis validæ, quasi voluerit dicere, in omnibus morbis acutis, in quibus ad morbi magnitudinem accedit etiam ætatis vigor, & virium robur, facienda sanguinis detractio est; ut nobis ob oculos ponat scopos omnes, & principales, & principalium consecrarios in sanguine educendo conspiciendos, ut principalis sit scopus morbi vehementia, & magnitudo, huius quasi pedisequi sint ætatis flos, & virium constantia quod hæc duo remediū confirmant coindicando primitus à magno morbo indicatum. Quam sententiam adeo sustinet Galenus euidenter, adeo retinet mordicus, ut præter hosce tres scopos nil ulterius obseruandum autumet, nihil addi eis posse, nihil detrahi existimet, & in Menodotum insurgat plenitudinis signa pro sanguine detrahendo expectantem, quibus etiam deficientibus ad hoc remediū accedimus, dum morbi vrgeat magnitudo, & præsentibus non accedimus dum ea non vrgeat, ut non possit indicatio pendere à plenitudine sanguinis, cum hæc posita non ponat, nec remota remoueat remediū, veluti facit magnitudo morbi, cuius præsentia illud accersit, absentia summonet, & si quid facit plenitudo, non facit sua vi, sed morbi magni à se constituti interuentu. Cuius doctrinæ clara semina fecit Galenus non in memorato solum commentatio, sed vberiora in Quarto Methodi, & in libro de sanguinis detractioe, ubique Hip-

ocratica sententia, & explicatio nem meditantis, & confirmationem molitus, solam morbi Magnitudinem cum ætatis vigore, & virium robore concurrere ad sanguinis indicandam detractioem, est enim verissimum artis fundamentum, morbis æqualia esse debere auxilia, quod iactum videmus in celebri illo aphorismo primi libri, Extremis morbis extrema exquisitè remedia conueniunt, & explicatum legimus in libro de locis in homine, alioquin semper inualecerent morbi, & victoria potiti triumphum de natura succumbente ducerent, nisi ab arte petita præsidia, non minorem morbis vim habentia, compescendum eorum, ac retundendum impetum susciperent. Morbi ergo magni qualia fuerint remedia, vel sola victus ratio, vel alia addentur præsidia. Primam partem amplexatus est Plato in Timæo, nil aliud morbis opponens, nisi diligentiam victus, quia ipsi instar animalium sua habeant fatalem constitutionem, & principio augmento, statuque transacto ad suam sponte sua properet declinationem, quam non oporteat medelis, alijsque id genus præsidijs moliri eorum sæpe vim exacerbantibus, impetumque irritantibus, sed huius opinionis fallaciam illud ostendit, quod in libro de totius morbi temporibus animaduertendum proponit Galenus, non omnes morbos omnia habere tempora, & inclinationis etiam fieri compotes, sed huius solos salubres euadere participes, letales autem apparere expertes, & de salubribus etiam illud verum est, quod vsti remediorum opportune adhibitorum citius longè, & commodius terminantur, ac desinant in salutem. In his ergo morbis magnis cum necessaria sint

remedia, hæc vel exigua fuerint, & leuia, vel magna, & vehementia, non debent esse leuia, quia non habebunt proportionem cum morbis, nec à leuioribus est inchoandum, nisi in leuitate ægritudinis inducias dantis, quæ si virget, & sua grauitate premit, magna remedia illico exposcit, quorum omissio est certæ pernitiei admissio, vt ex Galeno cognoscimus in Quinto Methodi aduersus Aerasitrateos hoc demonstrante. Iure ergo Hippocrates ex morbo magno remedium magnum deducit, & quia hoc apud eum duplex est, purgatio, & sanguinis detractio, sed illa non semper habet locum, quippe quæ in materia cruda, & non turgente minus conueniat, hæc autem semper habet, modo ætatis vigor, & virium firmitas accedat, ideo non purgationem, sed plebotomiam decreuit in morbis magnis enarratarum conditionum comitatum habentibus esse usurpandam, vt malum graue æqualem excipiat artis opem, quæ, sanguinis detrahendi omnia cura, vel nulla sæpe foret, vel saltem contemnenda. Nec placet virorum alioquin clarissimorum, & doctrina insignium sententia, qui pro hoc remedio colligendo sanguinis plenitudinem magnitudini morbi adiungendam censent, & hæc quattuor seriatim disponunt, sanguinis plenitudinem, morbi magnitudinem, ætatis florem, & virium constantiam, vt duo prima indicent, secunda coindicent non prohibentia, & ex duobus indicantibus sanguinis plenitudo indicet quid agendum, nempe euacuandum, non purgandum, morbus magnus indicet quod agendum, nempe venæ sectione, non inedia, vel frictionibus, vel balneo, vel alijs id genus euacuan-

dum, ex duobus coindicantibus virtus primario coindicet non prohibendo hanc euacuationem, ætas verò coindicet secundo ad virtutem ipsam referenda. Hæc subtiliter quidem dicuntur, & ingeniosè admodum, sed non verè mihi, vt liberè loquar, videntur dicta, nec apparent Galenicæ doctrinæ consentanea, hanc sanguinis affluentiam tamquam minus ad indicandum necessariam clarissimis verbis ubique excludenti, & contra Menodotum, vt diximus, contendenti non hanc semper exigi ad sanguinem detrahendum, in eius etiam defectu optima sæpe methodo detractum, exigi semper magnitudinem morbi, quæ si fuerit viribus, & ætatis vigore comitata, huius usurpandi auxilij necessariam inuehat curam. Morbi magnitudo (inquit ille in libello de phlebotomia) vnà cum robore virtutis primi mittendi sanguinis scopi fuerunt, ille quidem quæ facere oportet indicans, hic verò tamquam illum haud impediens quod simul indicare nonnulli recentiorum medicorum vocant. interdum enim affectus ipse sanguinem mittendum esse iubet, virium verò imbecillitas prohibet, amobus autem hisce scopis præsentibus, constat quidem, vt dictum est antea, nullam plenitudinem crudorum humorum tantam, talemque esse, vt hoc remedium impedire queat. Quibus verbis ratum facit, ac dubitationis expers decretum à magnitudine morbi robore virium comitata sumi sanguinis mittendi indicationem, hisque urgentibus scopis, à nulla crudorum humorum plenitudine induci posse huius remedij omissionem, vt hinc etiam euidenter innotescat non exigere Galenum ad phlebotomiam pleni-

itudinem sanguinis, sed contentum esse magnitudine morbi cū robore virium, quandoquidem his præsensibus aperit venam in quacumque humorum crudorum plenitudine, in quacumque cacochimia, quia si in pituitosa, multo magis in alijs, in quibus vigent humores vel biliosi, vel melancholici crudi, & ipsi vocandi iuxta Hippocraticam doctrinam in secundo acutorum à Galeno explanatam, plus quidem sanguinis mittit in plethora vera, quia hæc præfatos scopos adauget, & vberiores vacuationem indicat, minus mittit in plethora norha, & in cacochimia parcius sanguinem educit, sed mittit tamen, & educit aliquid urgente morbo magno, & robore virium, ideoque superioribus verbis alia subiungit, quibus in hominum temperamento, & habitu, siue cum plethora coniuncto, siue ab ea seiuncto, mittendum sanguinem statuit, in primo quidem vberius, in secundo parcius, ut materia sanguinea secundum eum non indicet missionem sanguinis, sed copiosam missionem, Quam parcè factam in illis etiam admittit, qui parum sanguinis habent, ac faciliè transpirabilem carnem obtinent. In contrarijs planè corporum naturis remedium idem usurpandum suadet, & licet magis in plenitudine sanguinis, tamen aliquatenus etià in eiusdem inopia, ergo non potest esse indicatum ab altero solo contrarietatis extremo, quia tunc non haberet locum in altero, si à copia insinuaretur, non admitteretur ab inopia, seu paucitate, cum ergo admittatur ab utroque contrario, à neutro quidem propriè indicatur, sed à tertio quodam, cui vtrumque contrarium potest accedere, nempe à morbo magno, cui modo sangui-

nis copia, modo paucitas apparet comes, & prima quidem auget, secunda verò minuit indicationem mittendi sanguinis ab eo factam, ut in altera vberius, in altera mittatur parcius. Magnitudinem ergo morbi facit Galenus ex mente Hippocratis præcipuum scopum indicantem, ut indicet quid agendum, dum ait morbum magnum indicare quæ facienda sint, robur virium non impedire, non dicit morbum indicare quo modo faciendum, sed quid faciendum sit, quamquam in modo euacuandi continetur etiam euacuatio, & indicans modum rei, indicat etiam rem, quia morbus magnus indicat sanguinis euacuationem arte efficaciter moliendam, & hæc efficax euacuatio fructus est sectæ veng. quæ venæ sectio est porius materia indicati diuturno vsu collecta, quam indicatum verum, hoc enim est sanguinis cooferta euacuatio, quæ mox per venam sectam obeunda colligitur. Ex quo fit, ut iuxta propositam à doctissimis illis viris explicationem à morbo magno deducatur materia potius indicati, verum autem indicatum pendeat à copia sanguinis, in quo reclamantem absque dubio habent Galenū, qui clarè profatur hanc copiam non facere scopum mittendi sanguinis, sed eum augere, velut paucitas non tollit eundem, sed diminuit. At quæ faciunt magis, & minus, non immutant speciem, ut aiunt philosophi. Et quia Galenus hanc apud multos inualuisse opinionem optimè nouerat, multitudinem sanguinis concurrere ad indicandum, ideo eam refellere tamquam à veritate alienam uoluit, & non semel, sed multoties, sine ulla etiam huiusmodi multitudine sanguinem detrahi, si & ægrotudo, & virtus sit

magna, astruxit. Quamobrem mihi illud semper argumentum validissimum est visum, ac tanta demonstrandi vi præditum, vt instar Achillis cenferi debeat. Datur morbus magnus cum magnis viribus, ergo indicatur remedium magnū, quod cum esse possit vel purgatio, vel sanguinis missio, & purgatio in cruda materia non habeat locum, sanguinis missio materiae coctionem non poscat, in morbo magno non semper purgatio adhibenda, nunquam sanguinis missio repudianda. Alioquin morbus progredietur sine remedio sibi debito, si omittitur purgatio tamquam incongrua, sanguinis detractio tamquam superuacanea. nam si morbus indicat, cur non satis indicationi sit? cur non habetur Hippocratici dicti in sexto Epidemiorum necessaria ratio, sanationem esse obluquantem non consentire morbo non enim admitti debet responsio, quam asserunt huic argumento dicentes, in tali morbo virgente, & acutissimo, si habeat adiunctam exquisitam cacochimiā, nec purgatione, nec venæ sectione à principio vtendum, non hac tamquam non indicata, non illa tamquam verita à cruditate materiae in principio vigente, quia, cum tempus agendi sumatur à motu morbi, & à qualitate materie, plus hæc cruda valeat ad inducendam dilationem, quàm ille velocissimus possit ad suadendam accelerationem. Cum ergo tria in proposito casu possint præstari vel purgatio, vel sanguinis missio, vel ad materiam concoquendam conuersio, duo prima dimittenda statuunt, & postremo manum dandam, crudorumque humorum concoctionem molientdam. At hoc consilium quomodo potest placere? quomodo in morbo

non dante inducias medendi ratione ineunda, quæ paulatim fit, & longo temporis curriculo indiget? quis polliceri sibi naturæ resistantiam possit vehementi morbo, & in suo cursu properanti factam? quis non videat imminens discrimen, non pertimescat mortem minitantem, & iam proximam? non ne Hippocrates in Epistolis testatum reliquit in omnibus artibus, sed in Medicina præcipuè cunctationem esse detestandam? quod in acutis morbis verissimum præsertim est, in quibus cunctari est non rem restituere, vt de Fabio Maximo in rebus bellicis asseruit Ennius, sed eam funditus perdere. Vnde celsus in Proemio tertij libri dixit magis ignoscendum Medico esse parum proficienti in acutis morbis, quàm in longis, hic enim breue spatium est, intra quod si quod auxilium non profuit, æger extinguitur, ibi & deliberationi, & mutationi remediorum tempus patet. Quæ scribens celsus allusit ad Hippocratis dictum in Quarto Aphorismorum in valde acutis quam primum remedia magna adhibenda, quia in his cunctari sit malum. Non debet ergo placere proposita concoquendæ materiae deliberatio ansam morbo relinquens pessumdandæ naturæ. Aliter deliberandum esse docuit celsus idem, qui libro secundo de sanguinis detractioe per venas accuratissima verba faciens eundem casum proposuit, aliter tamen determinauit. Fieri potest (inquit ipse) vt morbus quidem hoc remedium desideret, corpus autem vix pati posse videatur. sed si nullum tamen appareat aliud auxilium, periturusque sit qui laborat, nisi temeraria quoque via fuerit adiutus, in hoc statu boni Medici est ostendere, quàm nulla spes sine sangui-

guinis detractio fit, faceretque
quantus in hac ipsa re sit metus, &
tum demum, si exigatur, sangui-
nem mittere. De quo dubitare in-
eiusmodi re non oportet, satius est
enim anceps auxiliū experiri, quā
nullum. En quomodo celsus in ve-
hementissimo morbo, ne victoriam
illi permittat, venam secat etiam
quando corpus aegrotantis vix pati
posse videtur, hoc est quando nul-
lam præfert sanguinis copiam, quæ
detractionem commodè permittat.
Dices forsan, quod per hæc verba
innuit virium imbecillitatem, si hoc
damus, augetur vis argumenti, quia
si non detestetur vel ipsa virium in-
firmitate, cuius oppositum robur vi-
nus est ex præcipuis phlebotomiæ
scopis, quin aliquid saltem sangui-
nis in acutissima ægritudine edu-
cat, cum nulla sit tanta virtutis in-
firmitas, vt prælatè considerauit et-
iam Fernelius, quæ puillam saltè
eius euacuationem non perferat,
multo minus deterrebitur quali-
cumque dominante cacochimia, in
cuius dominio, si morbus vigeat,
non pertimescit sanguinis missio-
nem, vt apparet ex præcedentibus
eiusdem capituli verbis, in quibus
asserit attendendam vim aegrotan-
tis, quæ melius ex venis, quā
ipsa corporis specie æstimetur, &
considerandum morbi genus, quod
sit, num superans, an deficiens ma-
teria læserit, corruptum corpus sit,
an integrum, quia in defectu, vel
integritate materiæ aliena sit phle-
botomia, in eiusdem uel copia, uel
corruptela nullo modo melius suc-
curratur. Et mox recensens morbos
hoc remedio indigentes enumerat
etiam malum corporis habitum,
omnesque acutos morbos, qui mo-
do non infirmitate, sed onere no-
cent. Qui scribendi modus accura-

te uenit obseruandus, quia corpus
etiam exprimit cacochimia onustū,
tantum tamen uirtutis adhuc reti-
nens, ut non languescat, nec pro-
positæ euacuationi repugnet. nam
in tali corpore si vires langueant
omnino, sublata est omnis difficul-
tas, & constat non esse venam tun-
dendam, at si vires suppetunt, vt in
casu supponitur, nulla est ad omit-
tendum remedium impellens ratio.
nam in illa prauorum humorum af-
fluentia per aliqualem sanguinis
missionem calor innatus excitatur,
qui quasi oppressus torpebat, & quo-
dam quasi onere subleuatur, cum
hoc præsidium omnium æqualiter
humorum in venis contentorum e-
uacuationem inuehat, vt in com-
mentario decimi septimi aphorismi
secundæ particule est auctor Gale-
nus, qui hanc etiam absolute eua-
cuationem dici affirmat ad purga-
tionis pharmaco factæ distinctionē,
eamque non solum plenitudini ple-
thoricæ, sed alteri etiam cum corru-
ptela coniunctæ adhibendam ibi
statuit, dummodo talis sit humo-
rum corruptela, vt ad bonam rur-
sus frugem redigi possit, quia si om-
nimoda sit corruptio ad recipiendā
naturæ gratiam inepta, non possunt
amplius vires suppetere ad sustinen-
dam euacuationem necessariā. Quæ
tamen euacuatio in corruptis hu-
moribus debet esse iuxta Galeni-
cam admonitionem parca, non li-
beralis, quia hæc corruptela tantum
minuit phlebotomiæ indicationem,
quantum bona plenitudo eandem
auget, vt in hac Galenus san-
guinem audacter educat ad he-
minas, in illa verò cautè ad uncias.
Nec vllā apparet tanta, talisq; hu-
morum cruditas, vt constet ex su-
prioribus eius verbis, quæ illum ab a-
liqua sanguinis portione educenda
auocet

auocet, dum modo morbum magnū, & vires constantes videat, quia hæc eductio venarum impuritatem minuit, omnes æqualiter humores euacuans, non sanguinem solum ab alijs humoribus seiunctum, sed omnium pariter humorum aggregatum, quippe, non serum primo egreditur, quam pituita, vel bilis, vel melancholia, nec qualiscumque humor corruptus integrum, & bonum exeundo anteuertit, sed simplex, & vniusi modi succorum miscella elabitur, vt doctè in secundo libro Methodi medendi considerauit Fernellius, Auicennæ suspicionem de biliosis feruorem, & ebullitionem subituri infringens. Qui etiam Auicennas vtilitatem corruptæ huius materie per venam sectam minuendam, & agnouit, & prædicanit in quarta Fen primi libri de phlebotomia sermonem habens, dum dixit, Multoties, phlebotomia in febribus, licet necessaria non sit, efficit vt natura fortis fiat supra materiam, propterea quoddam eam efficit paucam, & hoc quidem cum fuerit figura, & ætas, & virtus, & reliqua talia vt permittant. Hæc cum dixisset Auicennas, vt pateret se non pertimescere remedium neque in copia humorum à natra sanguinis recedentium subiunxit hæc verba, in corporibus, quæ diuturnas perpeffa sunt ægritudines, caue tibi à phlebotomia, nisi sanguinis affuerit corruptio, quæ te ad hoc producat, quoniam tunc phlebotomabis eam. Reprehendis ipse phlebotomiam in diuturnis morbis transactis, quia timet virium imbecillitatem ex longa perpeffione obrepentem, sed hoc sublato impedimento, consulit eam in apparente sanguinis corruptione, quam fieri constat cum generatione humorum biliosorum, & melan-

cholicorum cacochimiam constitutum, vt in secundo de differentijs febrium declarat Galenus, & in cacochimia melancholica audacter mittit aliquid sanguinis Auicennas, in qua sanguis conspigitur niger, & spissus, at in pituitosa, in qua apparet albus, ac tenuis, timorem incutit, quia spirituum inopiam, & virtutis infirmitatem yeretur. Quæ nisi impediatur, magna semper ex hoc remedio vtilitas expectatur, quia, vt ait Soranus in fine sui libelli, phlebotomia proprium sanguinem nutrit, & extraneum eijcit, & omnes mali succi collectiones pestíferas valetudines, & rheumata profligat, ac deponit. Non in omni quidem humorum corruptela, nec in omni cacochimia mittendus sanguis, licet morbus sua magnitudine vigeat, nec id Galenus suadet, sed in ea solum, quæ vires adeo retinet incolulumes, vt appareant ferendæ euacuationi aptæ, vt contingit in moderata cacochimia, quæ mox cum adeo inualuit, vt ad summum peruenisse videatur, bonum virium tonum labefacit, nec robur amplius resistens retinet adiunctum, & omnem adimit mittendi sanguinis cogitatum, & ideo dixit Galenus, morbo magno existente, & virium robore comitante nullam esse pertimescendam humorum cruditatem, quia hæc non potest esse immodica, omnis quippe talis est à virtutis robore aliena, quod robur dum supponitur, cruditatis, & corruptelæ immoderatio excluditur. Et ob hanc nimirum causam Galenus in suo illo de phlebotomia libello modo vetat missionem sanguinis in humorum corruptela, modo permittit, vetat in effatu digna corruptela, quæ vires pessumdederit, permittit inmoderatiore, quæ adhuc habeat sufficientem

ficientia pristinae virtutis vestigia, & in hac etiam non confertim sanguinem eximit, sed paullatine, & per vices repetitas, ut sint potius iuxta Auicennicum dictum multae vices, quam multa quantitaseducti sanguinis, & partim euacuat leniter, partim renutrit provide, & illam, quam vocant epicrasim, medendi rationem exercet. Nec aliter in quarto de sanitate tuenda statuit, ubi considerandum proponit num. quid agrotantium corpora paullulum citra sanguinem restiterint, vel ultra processerint, aut multum, aut plurimum, & in primo casu vberem sanguinis detractionem, & audacter factam iniungit, in secundo moderatius agendum praecipit, in tertio vero omnem venarum apertionem prohibet, quia in primo sanguinis suppetit copia insignis, quae detractionis indicationem adauget, in secundo est quidem cacochimia, sed quae vires non prostermit, in tertio illa impurissima plenitudo adeo inualuit, ut omnem viscerum aconomiam peruerterit, omnem virium vigorem dissoluerit, quo dissoluto qui sanguinem audet educere, in fausto euentu comprehendit se mortem inducere, at qui eodem consistente, & morbum magnum comitante parcit venae, intus hostilem materiam conseruat, & inde prodeunti parcit penae, cum ex Galeno omnis vasorum plenitudo sit sanguinis eductione demenda, pura quidem, plethorae nomine insignita, hoc solo remedio adimenda, impura vero, multae cacochimiae nomen nata, quae pharmaco saepe tolli non potest, vel non tuto tolli, venae sectione & ipsa abolenda ad periculum ex illa plenitudine impendens extra virium offensionem vitandum. Iure clamat ergo Gale-

nus nullam esse tantam humorum cruditatem, quae venae sectionem in morbo magno cum bonis viribus coniuncto inhibeat, quia si foret omnimoda cruditas, & immodica cacochimia, non constarent vires, quae dum constant, moderatiorem cacochimiam insinuant, quae propositam indicationem possit quidem minuere, non possit delere, quia si quis omisso remedio concoquendae materiae crudae operam det, virium acquirendarum ansam ad destruendam vitam morbo relinquat. In quo etiam mire consentientem Celsum habemus, cuius libros legisse Galenum, sed tamquam Graecum silentio inuoluuisse à latino scriptos, credere probabiliter possumus. nam & Celsus haec duo iacit mittendi sanguinis fundamenta, magnitudinem morbi, & virtutis constantiam, quibus apparentibus fundamentis in omni plethora, in omni cacochimia, in omni acuta aegritudine, in omni morbosa dispositione materiae potius onus, quam defectum insinuante, in omni etiam aetate, in omni hominum conditione venam tundendam proponit. Ac denominata cruditate ita decernit, cum sit minime crudo sanguis mittendus, tamen ne id quidem perpetuum est, neque enim semper concoctionem res expectat. Quod etiam Galenus in commemorato huius argumenti libello constituit, & si hac primarum viarum cruditatem, quae per venam sectam potest ad partes penitiores trahi, non pertimescunt, minus adhuc verentur eam, quae residet in ipsis vasibus, quam posse per phlebotomiam minui, & labefactari constat. nam in prima periculum est trahendi intra venas succi crudi, in secundo certitudo educendi. Nec lapsus virium pertimescendus

dus ex educatione alimentalis materia, quia educitur simul excrementitia, & vires supponuntur validæ, ad perferendam educationem accommodatæ, alioquin non esset de sanguine educendo cogitatio suscipienda, qui etiam educendus venit non copiosè, & confertim, sed parcè, & per vices repetitas, non audacius, sed iuxta verbum Fernelij reuerentius, vt sublata plenitudine cum præcipitio periculosa, reliqua impuritas, & cacochymia pharmaco opportune eximatur. Sic igitur apparet adesse indicationem in morbo magno cum viribus validis mittendi sanguinis etiam si non sit sanguinis plenitudo, etiam si sit multa cacochymia, quia morbus magnus est qui indicat, & vires quæ coindicant, non est copia sanguinis, non est multitudo pravorum succorum, sed illa auget indicationem, & facit ad opus alacriorem Medicum, hæc minuit, & facit cautiorem, huc addo plenitudinem sanguinis concurrere ad indicandum non per se, sed interuentu morbi magni à se vel constituti, vel constituendi, quod apertissime constituit Galenus insapius memorato libello his verbis. Primi, & maximè proprii sanguinis mittendi scopi sunt, morbi magnitudo, & robur laborantis. Et hanc primam esse syndromem dicere oportet, non plethoricam, in qua sanguinis missio obseruata sit, quippe in illa, & hæc comprehenditur, vt quæ morbi magnitudinem adaugeat non solum enim vbi iam adfit morbus magnus sanguinis mittendi occasio est, sed & vbi futurum esse suspicio est. Non poterat Galenus rem explicare lucidius. Vocat primos, & valdè proprios scopos magnitudinem morbi, & robur ægroti, plethoram non vocat

nisi quatenus continetur in magnitudine morbi, quam adauget, indicationem simul augendo, quæ magnitudo morbi non pendet semper à plethora, sed quando pendet magis indicat vt maior facta magnitudo. Quod quidem adeo verum est, vt copia sanguinis, si non faciat magnitudinem morbi, nil possit indicando, vt patet in leui pleuritide, in qua adfit cruenta expuitio morbi à sanguine facti significatiua iuxta Galeni animaduersionem in quarto de locis affectis, & in commentario duodecimo primi Aphorismorum, quia in hac non mittitur sanguis ob leuitatem pleuritidis, & quia morbus non est ita magnus, Vnde Hippocrates in sexto Epidemiorum dixit, inhibito his, qui sanguinolenta expuunt, anni tempus, pleuritis, bilis. In Quorum verborum explicatione decernit Galenus, licet, pleuritidis proprium remedium sit venæ sectio, hanc tamen non esse necessariam cum adest cruenta expuitio, quia tunc pleuritis quæta est, & moderatissima, vt non sit tanta magnitudo morbi, quantam requirit natura remedij. Plenitudo ergo sanguinis non potest indicare sine magnitudine morbi, at potest magnitudo morbi sine plenitudine, vt sapius affirmat Galenus hanc non esse necessariam ad sanguinem mittendum testatus, vt non à plenitudine, sed à morbi magnitudine sumatur vera indicatio. Nec obstat, quod vnum non possit indicare nisi vnum, vt multoties in libris Merhodi confirmat Galenus, & morbus magnus, qui vnus est, indicaret hoc pacto, & euacuationem sanguinis, & purgationem, quæ duo sunt, non obstat hæc, inquam, animaduersio, quia morbus magnus indicat proximè remedium magnū,

R vnus

vnus vnum; sed hoc remedium magnum analogum est in duplici materia elucescens, in venæ sectione, & in pharmaco, cum & in illa, & in hoc vigeat magna vis, & vtrumque remedium magnitudinem sibi vendicet, & in huius communione alterum cum altero cōueniat, & quandam vnitatem asciscat. Et hūc possumus ad maiorem claritudinem afferre præclaram, & valde proposito accommodatam Aristotelis animaduersionem in fine Quarti phisicorum, vbi ait triangulum isopleurum, siue trilaterum, æqualibus lateribus præditum, & scalenū, qui latera habet inæqualia, differre quidem inter se ratione æqualitatis, & inæqualitatis laterum, sed inter se conuenire, & vnum esse ratione figuræ, quia vtrique trianguli sunt. & in figura triangulari conueniunt, sic venæ sectio, & pharmacum differunt inter se per suas proprietates, conueniunt in hac communitate, quod sunt remedium magnum, & sub hac communitate vnionem faciente à magnitudine morbi indicantur, sic vt altera, nempe venæ sectio, semper habeat locum, dummodo robur ægri adsit, pharmacum non semper habeat, & alterius delectum grauitas, & prudentia Medici difficili directā iudicio faciat. Verum non agam pluribus, nec ero longior in re controuersa examinanda, quæ multorum omni tempore torfit ingenia, & de qua multis ab hinc annis inter clarissimos viros huius Patruini Gymnasij professores celeberrimos magna audiui diffidia, quæ litterarum mandata monumentis passim leguntur, mihi non fuit animus controuersiam deterere, & obortam litem, quæ adhuc sub iudice esse videtur, dissoluere, illud habui propositum, vt quam censeo

potiorem sententiam, & Galenicæ, Hippocraticæque menti accommodatorem in medium adducerem, & præcipuos, & maximè proprios mittendi sanguinis scopos afferrem, & quibusdam allatis rationibus declaratos confirmarem. Concludamus ergo à morbo magno cum viribus validis iuncto indicari hoc remedium, quæ vires non pistoris, vt ita dicam, sed aurificis trutina veniunt exactè ponderandæ, nec pro præsentis solum, sed pro futuro etiam tempore in examen reuocandæ, quia debent impræsentiarum esse validæ, & cum congrua validitate in posterum etiam consistere, quo nomine inter scopos Hippocrates recensuit etiam floridam ætatem, quia pueri vires habent præsentis, sed non futuras consistentes ob perennem, quam perpetiuntur, propriæ substantiæ dissipationem, vt ideo non possint vsurpatam phlebotomiam commodè sustinere. Ex dictis colligere possumus in febribus putridis hoc remedium indicari primo vt refrigeratorium, cum magnus fuerit februm calor, insignisque feruor, accedente virium necessario robore, vt morbus hic magnus tamquam calidus, & hanc intemperiem effatu dignam nactus, indicet sanguinis missionem, & virium accedens constantia confirmet, & sustinendam suscipiat indicationem. nam cum magnus calor magnum exposcat refrigerans pro ea, quæ inter morbos, & remedia intercedere debet, proportionē, hoc magnum refrigerium impertiri corpori potest ipsa venæ sectio, non quidem per se, quia non habet qualitates actiuas, sed per accedens, quia minuit copiam sanguinis confertam, vnde caloris innati inhibetur necessaria euentatio, quæ sanguinis facta imminutio inuehit,

eius.

eiusdem humoris vigentem feruorem compescit externo etiam aere per venam sectam ingrediente. Vnde Galenus in nono Methodi dixit continentiam febrium, quæ sui natura insignem habent calorem comitem, nec semper tamen putredinem adiunctam, cum citra hanc in sola etiam humorum effervescentia possint consistere, harum, inquam, febrium duo dixit esse maxima remedia, detractionem sanguinis, & potionem frigidæ, & illam quidem nullo non tempore, modo vires sustineant, quia magnum habent ad inducendam refrigerationem, quam maximè febrès illæ indigent, momentum. Quamobrem idem Galenus doctrinam nono Methodi hac de re traditam in decimo repetens hæc effatu digna protulit verba. Sanguinis missio, veluti prius indicauimus in febribus continentibus, quas synochos vocant, non primum, sed ex accidenti calidam aliquando intemperiem sanat. Quam etiam vim refrigeratorem ab hoc remedio profectam idem explicuit in Commentario vigesimi tertij aphorismi primæ particulæ. Nec turbari aliquis debet ex eo, quod Galenus in proximis Methodi verbis dixerit sectionem venæ aliquando sanari calidam, intemperiem, quasi non sit proprium remedium, & efficaciarum compos, nec enim hoc significare voluit illa vox aliquando, sed potius innuere non semper venæ sectionem sufficientem esse morborum medelam, non semper febris in salutem terminari, cum aliquæ interdum excipiantur interitu, quod in operis Proemio ex Hippocrate annotauimus. Ad hanc Phlebotomiæ refrigerationem in febribus alludens Soranus in fine sui libelli, ubi usum multiplicem huiusce remedij considerauit, lepidum attu-

lit dictum hoc verborum insignium ambitu contentum. *φλεβοτομία* mentem sincerat, memoriam præbet, vesicam purgat, cerebrum exiccat, medullam calefacit, auditum aperit, lacrymas stringit, fastidium discutit, stomacho proficit, digestionem inuitat, leuiorem vocem producit, sensum coercet venire, somnum fugat, anxietatem tollit, proprium sanguinem nutrit, & extraneum eiicit, longiorem quoque vitam ministrat, omnes mali succi collectiones, pestiferas valetudines, & *πνύματα* profligat, deponit dolores, febris sagittas, & varios morbos prohibet, venerem excitat, & caligines tollit & C. Quibus nimirum verbis præclaro articulo, ut vocant Rhetores, multas phlebotomiæ utilitates exprimentibus redarguit politissimus auctor erroneam Erasistrateorum opinionem Romæ inualescentium de non tundenda in morbis vena, vnde etiam dicti sunt *αιμοφδοί*, hoc est sanguinis mittendi timidi, quam opinionem duobus pulcherrimis libellis confutandam Galenus, & funditus suscepit euertendam. In his ergo verbis explicaturus vim refrigeratorem à misso sanguine pendentem Soranus dixit argutè venæ sectionem prohibere sagittas febris, hoc est effervescentem calorem compescere, & febrilis ignis aculeos retundere, qui suo acumine instar sagittarum febrientium corpora pungunt, & vellicant. In quo Platonis in Timæo doctrinam redolere videtur discretionem, & diuisionem à calore in nostris corporibus fieri iure cuiusdam acuminis in hunc modum dicentis. Discretionem, diuisionemque ab igne in nostro corpore factam consideremus, quod enim acumen quoddam ea passio sit ferme est omnibus manifestum. Tenui-

tatem verò angulorum, laterumque subtilitatem, paruitatem particularum, motus velocitatem, quibus omnibus vehemens, ac penetrans est, velociterque quod occurrit diuidit semper, & dissipat, considerare debemus, figuræ ipsius generationem memoria repetentes, ea quippe non alia natura corpora nostra diuidens, & in partes exiguas partiens meritò passionem illam, quæ legitimè calor nominatur, inducit. Ex qua Platonis oratione innotescit ignem vim habere & penetrandi, & ferendi diuisa à se, discretæque corpora, ideoque febres ignis nomine ab Hippocrate nuncupatas ex se promere quasdam, ut ipse in sexto Epidemiorum vocat, eclampsias, siue emicationes caloris, quas etiam Galenus solitus est vocare phlegmasias, unde feruidi aculei prodeant sagittarum quasi naturam æmulantes. Quibus retundendis non paruum habet sanguinis euacuatio momentum, quod diligentius adhuc in proximo capite, ne in nimiam hoc excrescat molem, ostendemus multa ad remedij administrationem attingentia adiungentes.

Huiusdem remedij diligentior discussio cum quarundam obseruationum additione.

CAPVT VII.



VAM habent proportionem ad ignem ligna, eandem habere ad calorem animalis sanguinem sæpe decernit Galenus, & hoc præcipue in libello de phlebotomia cumulatè declarat, ubi partes animan-

tis non solum ex sanguine ali, sed ex eodem sui caloris mansionem obtinere statuit, non aliter, ac ignis in foco situs à lignis ardere idoneis pendet, à quo totas ædes calefactas conspiciamus. Et velut ignis hic offenditur vel ob immodicam lignorum copiam, vel ob inopiam, vel ob humidiorē qualitatem, ita calor in corde existens vel ob sanguinis vbertatem nimiam, vel ob indigentiam magnam, vel ob qualitatem frigidam seipso minor efficitur. Mirandum ergo non fuerit, si sanguinis detractio refrigerandi cordis vim habet, cum & calidæ materiæ copiam imminuat, & frigidam qualitatem inducat, illud faciat euacuando, hoc ventilando, & frigido aeris ingressum aperiendo. Rhabarbarum dicimus, quod per se tamen calidum est, refrigerare per accidens, quatenus euacuando educit calidam materiam biliosam. At multo magis dicere possumus accidentaria ratione refrigerare venæ sectionem, quæ nullam in se vel caliditatem, vel qualitatem alteratoriam inditam habet, & sanguinem educit caliditate repletum, & calorem innatum ventilat, & frigidam extrinsecus materiam prolecat, ideoque veram sibi refrigerandi corporis prærogatiuam vendicat, id tamen semper per accidens facit. Quo etiam pacto inedia ipsam corpora euacuare sæpe testatur Galenus, quæ tamen cum priuatio quædam sit, & nutritionis defectus nil aliud præstat, nisi quod ansum calori insito præbet diffationem efficiendi vberiorē per patulos meatus, ut dissipata substantia, nec altera in eius locum suffecta, & assiduo facto effluxu, nulloque accedente influxu iuxta Platonis dictum, necessariam animal experiatur imminutionem, non inedia.

inediæ acceptam referendam, sed insensibili transpirationi partim ab internis, partim ab externis causis per meatus raros excitatæ. Hinc Galenus in libello aduersus Erasistratum acutè admodum hac de re scripsit. Inedia inter res existentes nullum obtinet locum, nihilque magis subsistit, quàm vel cæcitas, vel surditas, quæ sunt rerum existentium priuationes ipsa enim ciborum adiectio ex rebus consistentibus est, unde & hanc opusque eius corporis nutritionem esse inuenies. Rursum subtractio eorundem non eadem cum rebus existentibus est, neque etiam proferte poterit aliquod opus illius, qualis scilicet illa est, quæ in sudoribus, venæque sectione, ac clysteribus contingit euacuatio, nec nõ in edulij nutritio. Ita Galenus longè maiorem attribuit sectioni venæ, quàm inediæ efficientiam, quia hæc nullum habet opus per se, illa habet, imo inedia non est è rebus consistentibus, venæ sectio est, illa nec educit aliquid è corpore nec inducit, hæc vtramque operam nauat, illa nil faciendo dicitur facere, hæc faciendo facit, vt valdè accidentaria sit euacuatio ab inedia prodiens, valdè essentialis à sectione venæ veniens, & minus accidentaria refrigeratio eandem consequens. Quare optimo iure Galenus suam inediam in curandis morbis Erasistrato magni eā facienti relinquit, sibi, suæq; & Hippocraticæ Methodi sectatoribus phlebotomiam vt potioem, ac tutiorem medelam proponit. Cui quidem tantum tribuit, vt continentium febrium, in quibus maximus viget præter naturam calor, modo cum putredine iunctus, modo ab ea seiunctus, singulare remedium, vt supra ex nono Methodi diximus, venæ sectionem constituat, quippe quæ ma-

ximam vniuersi corporis refrigerandi vim obtineat, quo nomine eam vsque ad animi deliquium non insensuum, siue functionum priuatione, quæ ad syncopem spectat, sed in sola imbecillitate ab Aristotele etiam in libello de somno expressa, constitutum, vsurpare non pertimescit, vt maior consequatur, & efficacior refrigeratio, ac totius corporis in contrarium statum mutatio. Quibus rebus & alui deiectionem, & bilis vomitionem solere succedere affirmat, hæcque à totius corporis sudoribus, madoribusque excipi, hisq; contingentibus protinus febris extinctionem fieri. Verum non in continentibus solum febribus, sed in putridis omnibus collaudauit hoc remedium Galenus, & saluberimum omnibus dicere non est veritus. nam in Vndecimo Methodi de putridis febribus instituto sermone, cum pluribus vicibus phlebotomiam nominasset tamquam ad eam curationem vtilissimam, quasi vniuersalem regulam traditurus hæc in decimo Quinto capite verbis exarauit per omnium ora Medicorum nunc volitantia. *χάλλισον μὲν ἐν ὧς εἴρεται, φλεβὰ τέμνειν οὐ μόνον ἐν τοῖς συνόχοις πυρετοῖς, ἀλλὰ καὶ τοῖς ἄλλοις ἀπ᾽ αὐτῶν τοῖς ἐπὶ σφίσι χυμοῖς, ὅταν γὰρ ἦτοί τε τῆς ἡλικίας, ἢ τὰ τῆς διαμέως μὴ καλύει.* hoc est, optimum igitur, vt dictum est, venam incidere non modo in continentibus febribus, sed in alijs omnibus ex humorum putredine, quando siue attinentia ad ætatem, siue ad virtutem non prohibeant. Vniuersale dat documentum, & communissimum febres omnes putridas complexum tradit præceptum, vt constante virium tono, & ætatis vigore ad secandam venam accedamus. Cuius quidem præcepti pulcherrimam

mam affert in consequentibus verbis rationem, quia natura corporis rectrix leuata, & quodam quasi pondere, vnde prius opprimebatur, exonerata facilius quod reliquum est vincit, quippe sui mueris memor & coquit quod potest concoqui, & excernit quod potest excerni. Quæ quidem ratio, licet præcipue respiciat euacuationem venæ incisione factam, quæ tollit plenitudinem instar oneris naturæ molestam, & iure quasi cuiusdam oppressionis eam à consuetis elaborandæ materiæ muneribus deterrentem, alludit tamen etiam ad inductam refrigerationem, & immodici caloris qualemcumq; remissionem, quia ille etiam febrilis feruor, & immodica calidior intemperies est ipsi naturæ non leuiter onerosa, quam naturam quælibet insignior intemperies lædit, ac labefactat, & facit in proprijs obeundis muneribus vel torpidam, vel ineptam, vt intemperiem tollere sit etiam onus, & sarcinam demere, sit ad pristinum munus virtutes reuocare. Quoniam ergo in putridis febribus non solum materiæ excrementitiæ quantitas faceffit negotium, sed etiam eiusdem mala qualitas, & visceribus communicata caliditas, ideo non solum primo, sed secundo etiam nomine cõuenit febribus phlebotomia, ac tanto magis id asserere possumus, quod non in omnibus ita molesta est copia, velut immoderata caliditas, quinimo hæc ipsa facit etiam materiam esse exuberantem, & naturæ onerosam, quia vt peccans qualitate, & calidior effecta, calore præsertim putredinoso, vires ipsas grauat, & naturæ administrationi quasi rebellis reluctatur. nam dominante putredine inualefcere calorem, incrementumq; morbosum accipere testis est Galenus non mo-

do in libris de diff. febrium, & in Vndecimo Methodi, sed in libello quoque de curandi ratione per sanguinis missionem, Quod annotatum prius fuerat ab Aristotele in quarto Meteorologico, & in Problematicis. Qui calor permanens, moramque trahens in corpore vltiori putredini ansam præbet, & alicuius inflammationis in aliquo viscere excitandæ periculum creat, vt ideo de compescendo, ad bonamq; mediocritatis frugem adigendo hoc calore cita sit cogitatio ineunda. Galenus ergo in capite illo Vndecimi Methodi ante vsum cataplasmatum circa viscera adhibendorum in febribus proponit venæ sectionem, sine qua maxime pertimescit imminentem visceribus phlogosim ob febrilis coloris energiam, quam retundens, valdeque remittens sanguinis detractio per descriptam refrigerandi vim accidentariam arcet, ac tutior rem facit reliquorum præsidiorum vsum. Quæ condicio cum omnibus sit putridis febribus communis, communem etiam facit ipsis omnibus à phlebotomia petitam opem, dummodo vires, & ætas non reclament, nam si quæ sunt putridæ id remedij genus respuentes, vt sunt complicatæ cum insigni crudorum, prauorumque humorum affluentia, his non adest necessarius virium tonus, vt in libello de phlebotomia toties memorato affirmat Galenus. Quod idem etiam de tertianis exquisitis possumus asserere, in quibus propter insignem substantiæ insensibilem dissipationem ab humorum præcipue tenuitate, pororumque raritate pendente non benè consistunt vires, aut saltem *διαμουνν* superius cum Galeno propositam polliceri nõ possunt, vnde in earum curatione nulla sit in libro de arte ad Glauconem venæ

venæ aperiendæ mentio, & in duodecimo Methodi aperte inducitur huius remedij inhibitiō in his etiam febribus, in quibus magna est biliosorum, tenuissimorumque humorum copia cum magno substantiæ dispendio coniuncta, ut ideo mirasit in agris ad syncopem propensio. nam Hippocrates etiam ex insignibilis affluentia deduxerat mittendi sanguinis inhibitionem, ut apparet ex allata superius sexti Epidemiorum sententia, in qua inhiberi ab anni tempore, à pleuritide, à bile in sanguinolenta expuentibus dixerat, & Galenus in commentario affirmarat in valde calido anni tempore, quale est sub canem, venæ sectionem esse suspectam, pari modo si homo valde biliosus fuerit. Quo scribendi modo insinuauit illam insignem sanguinis in alium humorem conuersionem, quam paullo supra tetigerat tamquam prohibeandæ phlebotomiæ vim habentem, & vocauerat non quamcumque conuersionem, sed insignem, & effatu dignam, in qua maximus est à natura sanguinis recessus, & nimius vel ultra, vel citra processus, ut emergat cacoehymia pessima, quæ non potest vires probas habere adiunctas. Nec solum in hac biliosorum humorum in febricitantibus apparente copia dimittendam venæ apertiolem censet Galenus, sed in maxima etiam crudorum humorum affluentia, ut diximus nuper, quæ illam eandem ingeneret syncopi obnoxiam propensionem, quia tales febricitantes maxime quidem indigent euacuatione, sed eam minimè possunt perferre, nec phlebotomiam, nec purgationem sustinere parati, sine his etiam ad syncopem subeundam propensi, ut incertum habeant, & apertè lubricum virium statum ma-

le impræsentiarum consistentium, sed longè peius in futurum infringendarum, ut in his febribus non cacoehymia arceat mittendi sanguinis curam, sed cacoehymia soboles imbecillitas suis viribus priuans naturam. Quod peregre à Galeno in duodecimo Methodi fuit explicatum. Nec mirum videri debet in his febricitantium constitutionibus languere vires, quia ex prauo sanguine non possunt boni prodire spiritus, non potest bonus emergere nutritus, non potest bonus viscerum consistere status. Reliquis omnibus putridis conuenientem facit Galenus Phlebotomiam tum ob alias causas postèrius considerandas, tum vel maxime ad inducendam refrigerationem ab immodico calore indicatam, ac tanto quidem magis, quod non solum coercendus venit calor in corde, & vniuerso corpore accensus, sed habenda etiam est ratio caloris, illius putredinalis, quem habent febres quædam in partibus corporis determinatis, ubi est focus, & minera putredinis, quod humores excrementitij confluunt, & extra neo illo partis calore immodico affecti computrescunt, ut docet Galenus in fine secundi de differentiis februm. Qui quidem immodicus partis calor insensus est & quia humores peccantes attrahit, & quia attractos putrefacit, & quia partem imbecilliolem effectam ad eos excipiendos disponit. Iuuat ergo hoc etiam nomine phlebotomia, quoniam hunc etiam mitigans, corrigensque calorem, & humorum confluxum coerces, & attractionem facit minorem, & partis infirmitatem emendat, & vim putrefactoriam compescit, & ipsius putredinis labem aliquatenus eximit. Vnde fit, ut non solum ratione febris, sed ratione quo-

quoque putredinis detractio sanguinis indicatum sit curatorium. nam morbis debetur curatio, & præter febrem putredo etiam morbi suscipit nomen, ut in primo libro cum Galeno considerauimus vocatæ putredinem & causam, & affectum, causam, quatenus producit febrem, affectum quatenus habet non modo rationem symptomatis, sed etiam quodam modo morbi, quippe quæ considerata cum sua causa contentiua, uel quasi contentiua putrefactionem insinuet, adiunctamque habeat partis caliditatem, morbosæ intemperiei adscribendam, quam intemperiem cum tollant refrigerantia remedia, & inter hæc locum habeat magnum uenæ sectio, huius etiam ad curandam putredinem non leuis apparet utilitas. De putredine loquimur modo non absoluta, & completa nullius naturalis gratiæ amplius compos, & solius ideo euacuationis corruptam materiam educentis indiga, sed de putredine imperfecta locum correctioni relinquente, ut Galenum similissimo corruptorum vinorum exemplo docuimus diximus, quia hanc inualescen-tem partim excernendo, partim refrigerando, & ventilando, partim concoquendo coercere possumus, eiusque progressui obuiam ire, ut ex his Galeni verbis in Vndecimo Methodi clare colligitur. In humorum putredine & excretio, & refrigeratio, & ventilatio, & semiputridorum concoctio ex aduerso respondent, ipsius verò febris refrigeratio oppositio est. Ita Galenus omnia putredinis remedia induxit, & perfecte, cui conuenit sola excretio, & imperfectæ, cui non solum aliqua excretio, sed reliquorum quoque administratio est consentanea. Sed aliquis forsitan hic insurgens adducet

aliam Galeni doctrinam in sequenti capite Vndecimi Methodi petitam, ubi legimus nec obstructionem, nec putredinem curari per sanguinis missionem posse, sed alia remedii prius monstrata desiderare, at responsio facilis est, quia obstructio pendens à crassis, & viscidis humoribus non ita corrigitur à venæ sectione, veluti pendens à multis, & putredo non recipit omnis curationem ab hoc remedio, quia non perfecta putredo purgationis potius indiga, & quæ recipit, non recipit hinc omnem curationem, cum ventilatione præterea, & semiputridorum concoctione indigeat. Ex dictis apparet cur Galenus dixerit optimum esse in omnibus febribus à putri materia accensis sanguinem mittere, cum propositis cautelis à virtute, atque deductis, ut præceptum sit communissimum tum generi, tum speciebus istarum febrium omnibus, quia si quæ sunt hoc remedium auersantes, non sunt ut tales putridæ febres, sed ut congruo virium tono uel præsentis, uel futuro destituta. Omnibus, quæ febres sunt, & quæ putredinem habent adiunctam, conducit à phlebotomia ueniens refrigeratio, ueniens quidem per accidens, sed tamen à causa positiua, non à priuatiua, ut ab inedia uenit euacuatio interuentu insensibilis transpirationis iuxta allatam Galeni animaduersionem in libello aduersus Erasistratum. Quod si uel ætas, uel uires obicem ponant, & morbi indicationem coerceant, tunc loco sectionis uenæ sit materia euacuandi sanguinis modo cucurbitula scarificata, modo hircus hæmorrhoidalibus uenis applicita, de quibus dabitur inferius commodior loquendi locus, quia tunc non tantum indicatur, nec tam confertim facienda

cienda euacuatio; in qua semper est præcipua virium habenda ratio indicationem vitalem præbentium reliquis omnibus præferendam.

De recta phlebotomia administratione.

CAPVT VIII.



VIA pertinet ad methodum remediorum & qualitatem, & quantitatem, & modum eorum vsus, & occasionem inspicere, vt est auctor Galenus in Proemio librorum de arte Curatiua ad Glauconem, ideo hæc nobis circa sanguinis de tractionem veniunt expendenda ab occasione inchoaturis, tamquam re omnium & difficillima, & vtilissima: Cuius naturâ nobis expressit Hippocrates nō minus acutē, quā breuiter in libro Præceptionum dicens, Tempus est in quo occasio est, occasio verò, in qua tempus paucū. Medicatio tempore, interdum etiam occasione perficitur. Hæc est illa occasio, quā in Proemio Aphorismorum vocauit præcipientem ob sui lubricissimam naturam, quæ vix apparens elabatur, & non aduertentis hominis caprum mira pernicitate subterfugit. Hæc interdum perfici curationem affirmat, quæ sui natura tempore obitur, quod apparet præcipuè in morbis longis, quos ideo Celsus in Proemio libri tertij vt fieri, sic etiam solui à tempore assueuerat, ideoque in eis non statim condemnandum remedium quod non statim profuit, minusque remouendum si quid paulum saltem iuuat, quia profectus tempore expleatur. At in acutis breue spatium est, intra quod si quod auxilium non

profuit, æger extinguitur, vt ideo magis ignoscendum sit Medico parum proficienti in acutis morbis, quā in longis, his namque tempus inseruit, illis occasio. Quam qui prætermittit, nec oblatam arripit, sera pœnitentia ductus sapit phrygum prouerbio obnoxius. Hoc ne contingat in sanguine mittendo diligenter est prouidendum, ideoque ineunte putrida febris hoc præsidium dum indicatur, & permittitur, ineundum, antequam vires concidant, & morbi indicationem irritam faciant. Vnde prodijt diuini senis consilium in secundo aphorismorum iubentis, vt inchoantibus morbis si quid videtur mouendum, moueamus, eisdem vigentibus, acquiescamus, quia circa principia, & fines omnia symptomata sunt imbecilliora, vt vires non collabantur ita facile, in vigore autem omnia fortiora, vt fortior sit, acerbiorque naturæ diuexatio, cui afflictæ non est afflictio addenda, & remedia in arte motiua non tunc temporis adhibenda, sed in morborum primordijs, quæ remedia motiua, vt in commentario illius aphorismi notat Galenus, hæc duo præcipuè sunt, venæ sectio, & nonnunquam purgatio, & venæ nimirum sectio est motuum præsidium non solum quatenus humores æqualiter educit, & delatoriā motionem facit, sed etiam quatenus refrigerando alterat, quæ alteratio non solum ab Aristotele in libris de physico auditu, & à Galeno in libris de naturalibus facultatibus in censu motionum est recensita, sed à Platone in Parmenide sic inter eas enumerata, vt hanc dixerit, & lationem esse solos motus, & nos diximus in consideranda venæ sectione nunc versari secundum hanc motionis speciem alterando

factam. Tempus ergo huius remedij usurpandi colligitur ab vrgentia indicantis, & hoc vrget sua presentia requisitis conditionibus comitata, quia veluti simplicia corpora extra proprium locum constituta, remoto impedimento proprium ex se motum depromunt, eoque intercedente proprias sedes repetunt: ita animalium corpora morbo affecta, vnde à naturali statu recedunt, indicationes remediorum præbent, & nisi indicata prohibeantur, eorum interuentu in naturales constitutiones redeunt, & veluti simplicia corpora, sublato impedimento, mouentur statim, nec vllam interponunt moram, ita morbida animalium corpora, citam remediorum indicatorum quærunt administrationem, si absint ea quæ prohibendi vim habent. Præfens ergo putrida febris aliquam caloris magnitudinem nacta cum congruo virium robore indicat sanguinis missionem illico faciendam, ideoque Galenus in Vndecimo Methodi ab hoc remedio statuit putridarum febrium curationem inchoandam, & in libello de phlebotomia maturationem festinam præcipit, omnemque temporis interpositi morā damnat, quod virium afferat labefactionem, vt aliquando in secundo etiam die sine adeo infirmæ, vt nos auocent ab omni mittendi sanguinis proposito. Quod ne contingat vena ab initio venit aperienda, quia posito indicante, remotis impedimentis, nulla suppetit ratio, cur indicatum non obeatur. Dilationem interdum inducunt vel materiæ crudioris presentia in primoribus vijs existens, vel febris accessio vrgens, vel symptoma esset dignum phlebotomiæ non concessurum, vt hic triplex casus, remedium hoc im-

pediat in aliud tempus differendum. Vnde Galenus tum in nono, tum in Vndecimo Methodi magnam cruditatem vel in ventriculo, vel in alijs primoribus vijs extantium habendam rationem proponit, quia si contemnantur, trahitur succus crudus intra venas augentur obstructions, febrisque inualefcit, & virium fit iactura. Quibus tamen constantibus, & futuram constantiam præferentibus, si morbi vrgeat magnitudo, materiæ cruditate detineri à mittendo sanguine non debemus iuxta superius allatam Galeni doctrinam ex libro de venæ sectione asserentis nullam esse tantam, vel talem crudorum humorum plenitudinem, quæ in morbo magno cum virium robore possit hoc præsidium impedire, quia insignis humorum cruditas non admittit vinum validitatem, & cruditas lenior non debet remedium impedire ab vrgentia morbi indicatum, & à viribus permissum, quia potest sanguis tuto detrahi non in magna copia, & relinqui naturæ ad coctionem elaborandam commoditas, mox per epaphoresin, siue per repetitam detrahi rursus, vt habeatur præcipua ratio satisfaciendi indicationi à morbo magno cum virium robore excitatæ, non contemnat tamen crudioris materiæ animaduersio. In quo conferenda erit vis indicantis, & prohibentis, & pro maiori vel illius, vel istius momento consilium capiendum. Vrgens etiam febris accessio, quæ præcipue in intermittentibus locum habet, non permittit sanguinis missionem, quia prohibet omnem motum ab arte factum iuxta Hippocratis documentum in primo aphorismorum, in accessionibus abstinere oportet, per quam accessionem explicante Galeno in commentario duodecimo illius libri deteriorem par-

tem intelligere debemus totius paroxismi, in qua natura afflictionem sustinet in certamen cum morbo deducta, ideo externis artis motibus non diuexanda, internis morbi ictibus satis, superque perculsa, nec tunc temporis sua spirituum suppellectile priuanda, quæ in sanguine etiam continetur, cuius ope & certamen sustinere, & inuadentem morbosam materiam sperat euincere. Quam facit animaduersionem Galenus tum in Vndecimo Methodi, tum in primo de arte curatoria libro, & Celsus in secundo suæ Medicinæ eam considerans præclare, & argutè, vt solet ferè omnia, dixit, si vehemens febris vrget, in ipso impetu eius sanguinem mittere, hominem iugulare est. Expectanda ergo remissio est, si non decrescit, sed crescere desijt, neque speratur remissio, tunc quoque quamuis peior, sola tamen occasio omit-tenda non est. Ex quibus Celsi verbis innotescit in febribus non continentibus expectandam esse remissionem, ad quam non pertingit accessio, in continentibus incrementi cessationem, quæ remissionis cuiusdam videtur habere specimen, quod vltimum sic venit accipiendum, vt non longa sit futura incrementi accipiendi progressio, alioquin periculum foret in mora, quam Galeus in Vndecimo Methodi abscindendam proponit, vt in nono se fecisse testatur in febricitante ex synocha non putrida, cui venam tertia die secuit ad magnam sanguinis effusionem circa mediæ noctis tempus omni sublata mora, quam reliqui Medici huic remedio censuerunt interponendam, & alteri iuueni synocham putridam sustinenti sanguinem copiosum illico eduxit atque ipse accersitus fuit post secundam secundæ noctis horam,

& veluti hæc febris erat synocha decrescens, quam græci παρακμαστική vocant, ita primi iuuenis febris erat increscens, & maiorem semper auctiōnem accipiens, quam appellant επακμαστική, in illa statim secuit venam quia apparebat statim putrida, nec vllum aderat impedimentum, in hac distulit in tertiam diem & quia febris idea ab initio erat ignota, & quia aderat impedimentum à tarda ciborum assumptorum concoctione allatum. hæc enim cruditas, vt diximus, vim habet differendæ phlebotomiæ, nisi vehementior sit indicantis vis, hæc, inquam, cruditas cibalis in prima corporis regione subsistens, magis etiam impedit, quam humoralis secundam eiusdem regionem occupans, quarum primæ opponitur propriè dicta pepsis, secundæ vocatus pepasimus ex opposita parte respondet. hæc enim iuxta Galeni dictum numquam est tanta, vt venæ sectionem impediat, si morbus sit magnus, & vires validæ, at illa differendam suadet, nisi morbi vehementia vehementer vrgeat, quia periculum secum adducit transitus crudarum materierum intra venarum ambitum. Ex quibus Galeni exemplis colligimus, quod licet cruditas ventriculi impedire remedium differendo possit, non tamen febris idea increscens potest, in qua sanguis missus incrementum tollit, & omnem mali progressum abolet, vt Galeno contigit, qui febrem illam argutè dictus est iugulasse. Sic patet non semper expectandam cessationem incrementi in febribus ad sanguinem detrahendum, sed in ipso etiam incremento eius detractionem conuenire ad illud subtrahendum. Quod vel ipse Celsus noluit inficiari licet opportunius remedium in cessatione

ratus. Illud tamen eiusdem Celsi placitum videtur suspectum, quo ut aliquando prima die sanguinem mittere necessarium censet, sic nunquam utile post diem quartum existimat eo nixus fundamento, quod iam spatio ipsa materia & exhausta sit, & corpus corrumpt, ut detractio imbecillum id facere possit, non possit integrum. Ruit hoc fundamentum, quia non solum quarto die, sed nec etiam decimo quarto satis est interdiu materia exhausta, & hoc etiam, & ampliori temporis curriculo manet incorrupta corporis constitutio, ut non sit dare certos dierum terminos, intra quos fiat illa vel materiae exhaustio, vel corporis corruptio, ideoque post quartum etiam diem sanguis possit detrahi sine villo metu iusurmandae, cum spe magna subleuandae naturae. Alioquin male fecisset Hippocrates, qui, ut apparet in tertio Epidemiorum, Anaxioni adderitano pleuritide laboranti venam secuit octauo dumtaxat die, quod ut optime factum, & interdum, cum occasio fert, optime faciendum voluit ipse commemorare ad infringendam Medicorum aliter sentientium opinionem. Vnde haec Galenus in commentario. In solo hoc aegrorum & in primo, & in tertio libro scriptorum sectionis venae meminit Hippocrates, non quod soli secta fuit vena, sed quod octauo die, Medicis etiam ut lege aliqua non amplius post quartum diem venam secantibus. Quam quidem consuetudinem tamquam inanem, & ab omni ratione alienam exagitat, deridendamque suscipit Galenus in suo de phlebotomia libro, non dierum numero, sed virium robori intendendum in febrientibus decernens, quia aliquando ne secundo quidem die possumus venam secare ob insignem virium ab-

initio collapsarum languorem, quem tam repente obrepentem vel in agro tantis malum corporis habitum, vel in senium refert Galenus in decimo Methodi, aliquando etiam post vigesimum diem id remedium debemus usurpare ob urgentem febris indicationem, & satis adhuc constantem virium tonum. Non igitur quot euaserint dies febris est attendendum, sed quod ipsa febris euaserit, & quem statum virtus inuaserit. nam interdum morbi adest magnitudo, & virtutis tenuitas, ut opus sit euacuatione, sed non liceat eam obire, quo casu habenda prima ratio virtutis congruo modo reparandae, quae reparata, & ad meliorem frugem adacta moliri euacuationem in parte possumus, & rursus ad virtutem restaurandam accedere, ut inceptam euacuationem blandè possimus repetere per vocatam à Galeno in Methodi nono Epicrasim, Quam etiam in Quinto prius hisce verbis delineauerat. Quicumque parum habere sanguinis videbuntur, his ad quendam succum probiorem, sicuti praedixi, reductis, detrahare sanguinem poteris, tum rursus reficere, eosdem etiam rursus purgare, ac rursus reficere, denuoque si res suadet, sanguinem mittere, potissimum quibus veluti limas quidam vitiosus, & crassus totus est sanguis. At qui validi sunt, multique sanguinis, his statim à principio est detrahendus. Haec dicens Galenus multa nos docet, dum in proponenda curatione vorum, qui ob cathartici ad pectus fluxionem eiecerunt ex ore sanguinem, versaretur, primum docet modum seruandae epicrasis partim reficiendo paullatim vires, partim leuiter sanguinem detrahendo, & alternatim modo vnum, modo alterum praestando, secundo docet deduci indicationem

mittendi sanguinis non solum ubi adest eius plenitudo, sed etiam ubi eiusdem suppetit inopia; & viget melancholica cacochymia; modo magnitudo morbi vel præsens, vel imminens urgeat; ultimo declarat his, qui validi sunt cum sanguinis copia, eum statim esse detrahendum. At si vera foret communis illa veterum Medicorum lex de non tangenda post quartum vena, periret funditus. inutilisq; appareret omnis ratio medelæ per tutissimam Epicrasini factæ. Hanc eandem legem subsanauit & Auicennas Galenica vestigia sectatus his quidem verbis in quarta Fen primi libri vsus. Cum in febre te oportebit phlebotomare, non attendas quod quidam dicunt scilicet quod non est bonum vt post quartum diem fiat, quoniam est vt fiat etiam post quadraginta dies, & hoc secundum sententiam Galeni; licet præmittere, & properare sit melius; cum significationes certæ fuerint. Quod si in hoc erratum fuerit, quacumque hora inueneris ægrum, & oportuerit, phlebotoma ipsum, postquam rerum necessariorum sollicitudinem habueris. Quibus quidem dictis dubitandum non est prædictum Celsi, & aliorum veterum placitum insinuari, ac tamquam friuolum despicatui duci. Verum admirabitur forsitan aliquis illud, quod in contrarium errorem videtur Auicenna collapsus, dum in factis inflammationibus iussit à sanguinis detractione in primordio cauere, nec in primis diebus, & ante quartam, & absolute ante apparentem coctionem huic præsidio manus dare: quasi id obseruandum sit in phlebotomia, quod in purgatione obseruare methodus recta iubet, vt caueatur hæc motio in materia cruda non turgente, cuius turgentia infrequen-

tissima datur occasio, & expectetur aduentans, & conspicua humorum coctio, quæ non in morborum principio, sed in progressu emergit, ac se promit. Non hæc seruanda veniunt in sanguine minuendo, qui ad sui detractionem nulla indiget coctione, & semper ad exitum est paratus, tanto maiorem usum exeundo collaturus, quanto citiorem sortitus fuerit exitum, & quia minus intercedit virium dispendium, & quia maius contingit in morbis, & præcipue in inflammationibus leuamentum. nam si inflammationes suam adhuc habent generationem, optimum est venam tundere non modo ad euacuandam multitudinem, sed ad molierendam etiam confluentium humorum reuulsionem, & si genitæ iam fuerint, & suum quasi colophonem adeptæ, saluberrimum etiam est sanguinem mittere, & quia corpus vniuersum exonerat, & quia à parte inflammata deriuat. non enim sanguis solus, qui per vniuersum permeat corpus, euacuatur, sed pars etiam illius sanguinis, qui partem affectam obfidet, & si non omnino impactus, impingendus tamen inhaeret, vt docet Galenus in commentario primi capituli secundi de victus ratione in acutis Hippocratis sententiam explicans iubentis in pleuritide dolorem circa clauiculam efficiente venam brachij aperire vsque ad sanguinis liuidi excretionem, quoniam cum iuberet Hippocrates in pleuritide circa hypocondrium dolorem excitante pharvacum potius exhibere, in vtroque casu & clauiculæ, & hypocondrij dolentis vsurpandam phlebotomiã, & cunctis præponendam remedijs proponit Galenus. Nec tueri Auicennam illa cõsideratio potest, quam neoterici alioquin doctissimi adducunt, Hippocratis in quarto de victus ratione

ratione esse consilium, inflammationes iam factas non esse attingendas, quod irritus euadat omnis attingentium conatus, non valet, inquam, hæc consideratio ad tuendum, quia sermo ipsi est de vsu purgantis pharmaci dimittendo, cuius vis nihil potest ex inflammata parte detrudere, & potest partes sanas absumere, & ad contabescendum adigere, vt expectanda inflammationis maturatio sit ad eximendum quod noxium est, & conseruandum quod sanum. Quæ cautio non habet in sanguine locum, cuius euacuatio partem inflammata subleuare vel maximè potest, nec potest alias partes obledere, nec metus consecuturi in viribus languoris debet incuti, quia non secamus venam nisi constante, & perseveraturo virium robore, vt sapius dictum est, imo Galenus in commemorato loci de victus ratione commentario scriptum reliquit, cum interdum virtus euacuatione prohibeat, non virtutem exoluere melius esse, quam sanguinem euacuare copiosum. Illud tamen liquet, quod positis scopis sanguinis mittendi, semper à principio, & orientium, & ortarum inflammationum hoc remedium potissimum facit Hippocrates, & purgantium medicaminum vsus tunc habet suspectum, vt horum consideratio nequeat ad phlebotomie operam vllò pacto transferri. Quamobrem Galenus in Tertiodecimo Methodi communem inflammationum genitarum indicatione inducit vacuationem sanguinis in particula inflammata redundantis, & inflammationum in generatione adhuc existentium duplicem facit indicationem, partim nempe eductionem sanguinis, qui confluit, partim inhibitionem eius, qui sit confluenturus, &

utrique indicationi per venam illico sectam satisfieri non solum in eo libro declarat, sed in secundo etiam de arte curatiua ad Glauconem. Hæcigitur Auicennæ in hunc modum suscepta defensio non satisfacit, melius eum tueantur alij præstantissimi viri, qui in Auicennicos interpretes culpam omnem rejciunt, factitantes ex bonis arabicis textibus non bonos latinos, & perperam explicantes Auicennæ sententiam non tempus status transacti in morbo, sed tempus inter principium, & statum aduenturum mittendo sanguini assignantis. Quod meliori Alpigi, & Gratioli versione confirmant. Quam iustam excusationem tanto accipere debemus alacrius, quanto mens Auicennæ innotescit euidentius, in sanguine febricitantibus mittendo properationem laudantis, vt apparuit ex eius verbis superius adductis, & illud præcipue in prima Fen Quarti libri in curatione febrium dicentis phlebotomiam eorum esse remediorum censu, quæ nullam coctionem expectent, & possint nulla ipsius habita ratione administrari, vt hoc pacto, & ipse accedat ad Hippocraticum, & Galenicum sensum de sanguine quàm fieri possit celerrimè in febricitantibus exhaustiendo. Sed hæc obiter parumper digressi dixerimus, nunc reuertamur ad pensum. Triplici de causa dicebatur sanguinis missio differenda vel ob infestam materie cruditatem, vel ob urgentem febris accessionem, vel ob prementem symptomatis molestiam, & duplicis hæcenus causæ ratio fuit explicata, vltima restat ad symptomata pertinentis explicanda. nam si fuerit febris Syncopi facilè accedenti iuncta, siue à tenuium humorum dissolutione profecta, siue à crassorum, &

cru-

crudorumq; oppressione producta, vel sola grauissimi symptomatis occasione dimittenda phlebotomia venit præter eam rationem, quæ pertinet ad naturam, dispositionemque illorum humorum peccantium, quæ pertinet ad constitutionem illorum febricitantium, vnde emergit mittendi sanguinis, imo cuiusque effatu dignæ euacuationis inhibitiō, vt in duodecimo Methodi ostendisse Galenum iam diximus. Verum hoc syncopis symptoma non tam differendum, quàm dimittendum remedium insinuat, dilationis autem exemplum præbet propositum ab eodem Galeno in primo de arte curatiua symptoma ori ventriculi insensum, vt ex recentibus cruditatibus, affluxuque prauorum humorum mordeatur, & comprimitur hæc exquisitissimo sensu donata pars, quæ lassio facit, vt nec sanguinis, nec aliorum succorum moliri euacuationem debeamus à febris alioquin indicatam, sed partis huius affectæ priorem curam suscipiamus, & affectionis compeſcendæ, & sedandæ consilium ineamus, & facti competes voti ad congruam efficiendam euacuationem accedamus. Symptoma etiam effatu dignum facit Galenus in eodem libro alui profluium febris iunctum, quod vocant diarheam, vimque ei tribuit omnis inhibendæ euacuationis siue per aluum, siue per venæ sectam factæ, idque non solum si copiosum fuerit profluium, verum etiam, quod admiratione dignum videtur, si fuerit exiguum, nec peccanti multitudini consentaneum, vt non liceat apparentem supplere defectum, quod facere conantem maximam præbere statuit acutioribus periculis ansam nam in qualicumq; alui fluxu incertus est, ac indefini-

tus naturæ motus, qui potest excitari confectus, & potest magnus effectus magnam inferre viribus laetaturam, & si accedat artificialis euacuatio, duplicatam inanitionem minus lauris, & factam à materia morbifica, & ab arte agitationem magno cum detrimento excepturis. Nec impediendus motus naturæ, qui potest accedere proficiuus, nec irritandus qui potest fieri onerosus. Et licet dixerit aliquando Hippocr. in libro de locis in homine, & Galenus in commentarijs in sextum Epidemiorum, fluxus esse fluxum medelam, & inchoatam à natura excretionem ab arte commodè perfici, tamen hoc intelligendum venit de fluxu à febris seiuncto, vel de illo fluxu, qui rationem habeat affectus principalis ad se curationem trahentis, non de illo, qui instar symptomatis accedat ad morbum principalem, qualem esse febrem constat. Quæ si diarrhæam habet adiunctâ, respuit venæ sectionem ante aluum confirmatam, quod litteris prius mandauerat Hippocrates in quarto de victus ratione dicens, si cuiuspiam sanguinem auferre confert, ventrem confirmare oportet, & ita auferre, & loquebatur de curandis febribus, vt patet ex proximè antecedentis verbis, & Galenus in commentario dixerat, Fluente aluo sanguinem non detrahes. nam si post detractionem perseverat fluor, virtutem proſternit. Quæ doctrina mirè est consentanea allatæ in primo ad Glauconem, imo rationem evidentem adducit traditi documenti ex imminente viribus discrimine deductam. Verum hic forsitan aliquis dixerit aliter docuisse eundem Galenum in nono Methodi asserentem, quod si tempore mittendi sanguinis menses moueri contigerit, siue e-

tiam hamorhois sit reclusa, si inspecto fluentis impetu ipse satis fore videbitur ad euacuandum quantum oportet, naturæ res omnis erit permittenda, sin minus, tantum detrahendum, quo ex coniunctis ambobus perficiatur quod satis est. Ecce quomodo hic apparens naturalis excretio sanguinis non impedit artificialem, nisi cum illa fuerit per se absoluta, & naturali indigentia satisfactura, alioquin, si manca fuerit, artificialis opem exposcit, & ad illam usurpandam Medicum excitat iuxta illud Hippocratis in libro de Arte, Natura irritata quid faciendum sit artis peritis ostendit. Sed operosum non fuerit dubitationem omnem eximere, si confideremus in nono Methodi sermonem esse de criticis euacuationibus ad subleuandam naturam factis, quas absolutas sinere oportet ut nullius opis indigas, mancas adiungere conuenit ut arte perficiendas, quod docuit Hippocrates celebri illo primi libri aphorismo; Quæ iudicantur, & iudicata sunt integrè, neque mouere, neque nouare aliquid siue medicamentis, siue aliter irritando, sed sinere oportet. nam dum integram indicationem, perfectèque factam non attingendam decernit, vniuersumque negotium naturæ integrè vel operatæ, vel operanti relinquendum, illud simul insinuat, si non integra fuerit vel facta, vel futura crisis, ex arte etiam petitam opem esse adiungendam. Quod in proximè sequenti Aphorismo expressè affirmavit. Non mirum ergo, si Galenus imperfectas euacuationes criticas proponit artis supplemento perficiendas in adducto Methodi loco; at in primo ad Glauconem considerat alui fluxum cum febre coniunctum, qui possit esse facili negotio

symptomaticus, & ad infringendas vires accomodatus, quo si quis contempto venam secet, & fluxus idem perseueret, & inualecat, qua data porta, ut ait ille, ruentes vires, & multiplici nomine, febris, phlebotomiæ, fluoris alui, prostratas videat. Huc adde, quod alui fluor magis repugnat phlebotomiæ, quàm inchoata naturaliter sanguinis qualiscumque excretio, & magis pertimescit Galenus alui fluxum, quàm sanguinis educationem; ut abunde demonstrat in commentario secundi de victus ratione in acutis sermone de pleuritide instituto. Spasmi etiam affectio febricitanti molesta vim apud Galenum habet si non omnino tollendæ, valdè saltem imminuendæ euacuationis sanguinæ, quod symptoma sit sudorificum, insomnietatis inductiuum, virtutis deiectionum, qui imo vel ipsam insomnietatem vehementè, vel ipsum intensum febricitantis dolorem non admittere statuit confertas vberesque vacuationes, cum idem tamen Galenus in commentario vigesimi tertij aphorismi primæ particula in maximis doloribus nullum se maius remedium inuenisse profiteatur, quàm vsque ad animi defectionem euacuare vel phlebotomia, vel purgatione ut opus videatur, quod alicui forsitan admirationem possit incutere quasi contraria ratione dictum. Sed admirari desinet quicumque considerauerit in primo ad Glauconem considerari dolorem ut casum febris non manentem ab inflammatione, nec à sanguinis plenitudine, sed ab alia causa pendentem, ideoque sectioni venæ non concessurum, at in commentario aphorismorum considerari ut sobolem plenitudinis vel plethoricæ, vel cocochymæ, ideoque su-

superandum vel sanguinis missione, vel purgatione vberissima, quam maximam vires possint perferre, vt dolor, qui non sit cessurus phlebotomiae, habeat vim contraindicandi, vel prohibendi, at ille, qui sit cessurus, magnum momentum habeat indicandi, quia tunc egreditur naturam symptomatis, & subit naturam causae ad securatiorem trahentis, vt praclare considerat Galenus in duodecimo Methodi. A quo etiam in primo ad Glauconem tamquam symptoma quoddam ipsam aeris temperaturam propositam conspicimus, siue exquiritate calida sit, & sicca, vt esse consuevit inter canis ortum, & Arcturi, siue vehementer frigida, & gelida, qualis apparet brumali tempore, quasi utraque periculosam habeat sanguinis effusionem, in calidissimis constitutionibus syncopis, ac diaphoreseos discrimen adducens, in frigidissimis autem tantum refrigerationis per accessionum initia febricitantibus inuehens, vt non amplius releuentur. Vnde in consensu regionis, & anni temporis omni moda imperatur sanguinis omisso, in diffensione autem longè minor euacuatio, quam si neutrum prohiberet. In quo quidem animaduertendum venit inhiberi in extremis vel caloris, vel frigoris constitutionibus eam sanguinis missionem, quae sit effatu digna, & iuxta consuetudini consentanea, iuxta quam nisi hemina saltem sanguinis fuisset detracta, nulla videbatur facta phlebotomia, vt patet per Galenum in libello huiusce argumenti, non inhiberi leuissimam, ac ieiunam detractionem, quae nostris usurpata temporibus scarificationis potius subit vicem, vt ait ille, quam phlebotomiae, non ad libræ pondus as-

cendens, sed velutrium vnciarum modulo contenta, quam quidem leuiusculam euacuationem, & ferè insensibilem non posse corporibus officere vel dissoluendo, vel refrigerando constat, & posse eisdem non exiguam inferre opem vel temperando, efferuescentemque febris calorem quacumque ratione ventilando, in qua nunc animaduersione versamur, dubitari non debet. Hanc explicationem agnoscit, & admittit ipsemet Galenus, cuius hæc sunt verba in nono Methodi. Fit profecto, & per calidam, siccamque regionem, & tempus æstiuum, & statum cæli impensè calidum, & siccum notabilis percutim euacuatio. Itaque etiam huius causa his, qui sanguinis detrahendi egent, aut prorsus venam non secabimus, aut parum detrahemus. Hoc eodem modo explicandum venit Galenicum præceptum de cauenda puerili, senilique ætate in sanguine mittendo, nam veluti etiam symptoma quoddam recenset ætatem in libro illo ad Glauconem, vnde conferta euacuatio inhibeat. Et in libris quoque Methodi statuit non ante decimum quartum annum æperiendam pueris esse venam, non quidem ob virium imbecillitatem, vt contingit in senibus, sed ob indefinentem substantiæ dissolutionem, quam pueri ob humidam, calidamque temperiem perpetiuntur. Verum hoc Galenicum etiam documentum respicit confertam, & effatu dignam euacuationem, quam puerilis ætas perenni dissolutioni obnoxia nequit sustinere ob recentem, & parum adhuc firmam triangulorum in corpore existentium constitutionem, vt dicebat Plato in Timæo, qui modus dicendi nil aliud insinuat nisi fluxilem, & lubricam

puerorum substantiam à vicinia
suae originis, & ab indole sua tem-
peraturae pendente. Hanc expli-
cationem dicant nobis ipsa Galeri-
ca verba superius adducta, quae af-
firmant pueros non esse ferendo
confertam euacuationem, quasi di-
cat Galenus posse quidem leuem, ac
tenuem, non posse magnam, & co-
piosam excretionem à pueris susti-
neri. Quare mos, qui nostra tem-
pestate in multis Italiae ciuitatibus
viger, aperiendi venam puerulis e-
tiam sextum, vel septimum annum
agentibus, non est à mente Galeni
dissentaneus, qui non prohibet om-
nem in pueris sanguinis missionem,
sed cumulatam, & exuberantem eis
nec necessariam, nec vtilem ob eam,
cui perpetuo succumbunt, propriae
substantiae distillationem. nam quod
aliquam leuiusculam vacuationem
concedat dubitauerit nemo, qui non
oscitanter caput quartum decimum
libri de phlebotomia toties commem-
morati perlegerit. Quod si confu-
giumus ad Methodum, facili nego-
tio idem patebit. nam in puero in-
fra quartum decimum annum po-
sito, & febricitante acriter, ideoque
habente ignem additum igni iuxta
Platonis dictum in libris de Legi-
bus, febris quidem indicat venae se-
ctionem pro refrigerando febrili æ-
stu, sed eiusdem temperies huius
comes ætatis non coindicat, sed po-
tius prohibet, quippe quae magnam
inuehat, & numquam cessantem
substantiae dissolutionem insensibili
transpiratione factam, quae nec ad-
mittit, nec sustinere posse videtur
nouam euacuationem venae sectio-
ne addendam, vt non ratione vir-
tutis, quae in puero validior est, sed
ratione praesentis, & perseverantis
dissolutionis, quae nouam euacua-
tionem facit superuacaneam, & gra-

uem, inhibeatur in puerili ætate
sanguinis missio, vt docet Galenus
in commentario Hippocraticam
huius argumenti sententiam supe-
rius adductam explicante. Vera
haec quidem sunt, sed illud non mi-
nus verum, prohiberi in puero con-
fertam sanguinis eductionem, quae
naturalis ignis fluori potest tene-
ram, & molliusculam corporis
substantiam pessumdare, non pro-
hiberi leuem, exiguamque detra-
ctionem, quae ventilandi potius,
quam euacuandi vim habeat. nam
plus febris potest indicando quam
naturalis temperies prohibendo, pre-
sertim cum febris intensior est, cum
puerulus validior, cum sanguinis
missio facienda leuior, quia maio-
rem usum pollicetur consequens id
remedium refrigeratio, quam iactu-
ram minetur addita euacuationi e-
uacuatio. Hoc autem sepe imperat
in libris Methodi, & praesertim in
Vndecimo Galenus, vt cum indican-
tia inuicem pugnare, dissentireque
videantur, accuratè attendamus in
quonam sit maior vis, maius mo-
mentum, eique faciamus satis alte-
ro non neglecto. Quamobrem ar-
gute quidem in hoc dixit Celsus, si
iuuenis imbecillus est, aut si mulier,
quae grauida non est, parum valere
male sanguis emittitur, emoritur e-
nim vis si quae his supererat, & hoc
modo erepta est. At firmus puer, &
robustus senex, & grauida mulier
valens tuto curantur. Quibus ver-
bis constat alias potiores adhiben-
das observationes esse, nec tam anno-
rum curriculum, aut vteri in mulie-
ribus statum, quam virum tonum
in sanguine mittendo attendendum,
vt puero, & seni firmo liceat venam
aperire, adolescenti autem infirmo
non liceat, liceat mulieri grauidae
robustae, non liceat non grauidae de-
bili.

billi. Et fuit tamen Hippocratis in aphorismis prædictio mulierem vterogentem vena secta abortire, sed cum singulis ferè diebus gravidis mulieribus educatur sanguis febre laborantibus, non ideo propositus succedit abortus, quia parca admodum sit educatio, & ab ingenti educatione, qualis vetustis usurpabatur temporibus, hippocratica abhorret opinio. In his ergo casibus parsimonie sanguinis, qui vitæ thesaurus est, indulgendum, veluti in ætate florentibus, & plethoricis, si febris magna, si magnæ vires, audax emissio facienda, quia nullum præstantius remedium ad refrigerandum, nullum magis præsentaneum venæ sectione, & frigida potione, sed huius remedij in frequenter conceditur vsus, ut mox ostendemus, illius infrequentius impeditur. Quinimo in continentibus febribus vsque ad animi deliquium hanc obit euacuationem Galenus, & obeundam in nono Methodi consultit, & in hoc etiam Hippocrates sui sectator apparet in prima aphorismorum particula ideimproponentis. Nec Auerrois in colliger aduersus hanc sententiam inuectiua vllius est momenti, quia Galenus non expectandam syncopem, sed solum animi defectum proponit, illa vires omnes exhaurit, & præcipiti lapsu abolet, iste ad magnum quidem deducit languorem, sed & sensum, & motum relinquit superstitem. Illud tamen libere confitendum tutiorem esse, laudabilioremque in hoc Celsi viam, omnem immoderatam euacuationem pertimescentis, & auream in hoc etiam mediocritatem, quam in secunda Aphorismorum particula miris laudibus Hippocrates extulit, amplexantis, & partitam potius, quam confertam educationem sanguinis in

hunc modum consulentis. Ferè etiam ista Medicina, vbi necessaria est, in biduum diuidenda est, satius enim est primum leuare ægrum, deinde perpurpare, quam simul omni vi effusa fortasse præcipitare. Hanc etiam viam arrisisse Galeno ipsi constat, quia licet in quibusdam fieri posse detractionem vsque ad lipothymiam asseueret, in plerisque tamen citra illam consistendum statuit, & minorem indicata quantitatem extrahendam concludit, ut patet in Vndecimo Methodi, in quo tamen continentium præcipuè febrium curationem reuocat in examen, has non sanari affirmans nisi multo sanguine misso. Cuius exigua interdum portio egressa nullum affert ægro iuuamentum, & vberior facta egressio affert salutem, ut nos docet in Epidemijs Hippocrates vel ipsius Metonis exemplo, cui levis hæmorrhagia in die quarto nil intulit iuuamenti, copiosior facta in Quinto perfectionem attulit iudicij.

Illud in hoc argumento restat adijciendum in omnibus febribus, vbi opus est sanguinis detractione, apertendas esse venas brachij dexteri, præterquam in melancholicis, & pendentibus à succo ad lienem attinente, ut docet Galenus in primo de arte curatiua, & in Vndecimo Methodi, quia cum in his febribus affectus præcipuè sit lien, ut in pituitosis ventriculus, in biliosis hepar, habenda est ratio processionis, quam vocat Hippocrates κατ' ἰκιν, cuius processionis magnam esse facultatem pluribus docet Galenus in libello de phlebotomia, nam licet venæ omnes ortum à iecore trahant, indeque radicaliter deductæ per vniuersum corpus instar acqueductuum, ut est in Timæo Platonis, sanguineum succum inuehant, ut lateris

etiam finistri venae sint germina ieco-
ris in dextra positi, tamen in affecti-
bus lienis refert vel maxime venam
potius finistri cubiti, quam dextri
tundere ob insignem vim in recta
progressione euacuationis constitu-
tam, quam in suis commentarijs in
primum Galeni ad Glauconem Ste-
phanus Atheniensis & examinat, &
explanat luculenter. Quod si febres
in mulieribus pendeant ab utero, &
praecipue à Mensium suppressione,
parcit venis Brachij Galenus palin-
dromem ad superiora extimescens,
& venas talorum tundit ad euacuan-
dam multitudinem simul, & cien-
dam suppressam excretionem acco-
modatas, nec praeter infernas venas
in affectu suppressorum Mensium
vllas alias vel attingit, vel attingen-
das proponit, quamuis Aetius, &
cum eo plures viri grauissimi, si ma-
gna sit plenitudo, aperiendas pri-
mo venas brachij censeant. Et cum
de virium constantia aliqua subest
haesitatio, in febricitantibus omni-
bus loco venarum brachij licet seli-
gere venulas manus inter minimam,
& annularem digitum, quas vulgus
vocat saluatellas, & in affectibus
hepatis, & lienis multum posse affir-
mat in sexto suae Medicinae Paulus,
manus quidem dexterae venam in af-
fectibus hepatis, & lienis venam
manus sinistrae, quam tenet etiam
Galenus in suo illo libello confide-
rans, & non flocci faciendam con-
stituit. Ex dictis liquet in putridis
febris mittendum esse sangui-
nem, & mittendum à principio pra-
missis Clystere, si opus fuerit, & qua
etiam copia, & quo loco mittendus
sit, satis id quoque liquet, sed multa
restant inferius de hoc remedio dis-
ferenda, cum illud considerabimus
ut remedium praeservatorium, nec
curatum si in hoc maximi momenti

argumento ita versatur oratio, ut vel
producta sibi non satisfaciat, & mul-
ta in opportunitatem locum adijcien-
da differat.

De usu Lenientis ut remediij

refrigeratorij.

CAPVT IX.



QVAMVIS medi-
camina vim eva-
cuandi habentia,
vel per solam alui
lenitionem videan-
tur aliquam febris
causam respicere,

ideoque ad indicationem praeserva-
toriam pertinere, tamen haec eadem
febrilis etiam intemperatura habet
aliquando rationem, & possunt satis
etiam indicationi curatoriae aliqua-
tenus facere, nam veluti euacuan-
do, & materiam adimendo subeunt
per se vicem remediij praeservatorii,
ita alterando, & refrigerando ge-
runt vicem remediij curatorij. Quam-
quam ut euacuatio etiam eandem
possunt operam curatoriam praesta-
re, non quidem per se, sed per acci-
dens, quippe quia calidos humores
educuntia corpori praestent refrige-
rium, per ablationem causae effe-
ctum inde pendentem auferentia,
quam effectus ablationem praeclearè
considerat in Lyfide Plato. Et quia
apud veteres non superebat copia
eorum medicaminum, quae placide
subducerent aluum, & vim habe-
rent refrigerantem, ideo Galenus
in putridis febris suspecta habe-
bat euacuatio per aluum, tamquam
calida, & sicca, ideoque febrilem
calorem exaggerantia, ut apparet in
vnde-

undecimo Methodi. Verum ad nos
 tex viliſſima Arabum intentione,
 mira peruenit medicaminum le-
 nientium ſuppelleſ, ad febrilem
 temperandam intemperiem acco-
 modatorum, in quo cenſu fuerit flos
 caſſie nuper è ſiſtulis extractæ, ſyru-
 pus roſaceus, ſyrupus violaceus ſolu-
 tiui, Tamarindi, diabeſſen, & alla
 id genus medicamenta leuiſa, quæ
 non ſolum alium ciere valeant, ſed
 qualecumque etiam refrigerium &
 humoribus, & partibus impertiri,
 quippe quæ non actu quidem, ſed
 poteſtate ſint refrigerantia, addo et-
 iam accidentariam rationem abe-
 ductione calidorum ſuccorum in-
 primoribus vijs extantium, & febrili
 incrementum afferentium penden-
 tem. Quæ quidem medicamina ta-
 li vi prædita indicantur ab ipſa febre,
 quatenus eſt morbus calidus, non
 quidem quatenus ſunt in tali mate-
 ria (hæc namque non pendet à me-
 thodo indicatoria) ſed quatenus ha-
 bent talem facultatem refrigerato-
 riam, præcipue ſi febris veniat ab
 humoribus ventriculum, & inteſti-
 na occupantibus, vt ſolet interdum
 contingere, cum putrida quædam à
 præcipua ventriculi labe concitan-
 tur, & ſouentur, vt docet Galenus
 in commentarijs ſexti Epidemio-
 rum. nam tunc nulla melior, nec op-
 portunior curationis via iniri, vel
 inſtitui poteſt, quàm hæc propinan-
 di medicamenti illius, quam dixi-
 mus, naturæ, quia cum focus, & mi-
 nera putredinis in primoribus exi-
 ſtat vijs, hæc medicamen attingit,
 deterget, & contemperat luculen-
 ter. Verum non omittendum cen-
 ſeo quod vetuſtiſſimum eſt, & vetu-
 ſtiſſimis melioribus familiariffimum
 medicamentum in hoc genere fa-
 miliam ducens, cuius quoniam apud
 quosdam Neotericos medicinam

facientes ſuſpectiorem video in fe-
 bribus eſſe uſum, ideo non abs re
 fuerit accuratiorem ipſius facere
 mentionem. Hoc quidem eſt ſerum
 ipſum e lacte caprillo confectum,
 quo frequentiffime vtuntur Hippo-
 crates, & Aetius, & cuius familia-
 rem veteribus fuiſſe propinationem
 ad aliū ſubducendam auctor eſt
 in libris de alimentorum, & medi-
 camentorum ſimplicium facultati-
 bus Galenus. Et quia in quarto de
 victus ratione in acutis Hippocrates
 ad curandam cauſonidem, ſive ar-
 dentem febrem inter cætera præſi-
 dia laudat lac aſinæ coctum tam-
 quam purgatorium, Galenus in com-
 mentario animaduertit, Hippocratis
 quidem eſſe præceptum, vt bilis
 in ventriculo reſidens euacuetur, ſed
 ob metum acredinis, & caliditatis in
 purgantibus medicamentis exiſten-
 tis de lacte Aſinæ dare conſilium,
 tamquam omnis acredinis experte,
 & incomparabili humiditate, vnde
 ſolum ventrem ſubeat, reſerto. Ad-
 dit Galenus ſolius ſerū uſum arde-
 re ſibi magis, cuius etiam conſcien-
 di ibidem edocet modum. Quod
 quidem Galeni monitum videtur
 prudentiſſimum. nam cum medica-
 mina in febre ardente adhibenda
 duas præcipue condiciones requi-
 rant, vt bilioſos nempe humores e-
 ducant euacuando, & febrilem ca-
 lorem contemperent refrigerando,
 vtramque operam commodè præ-
 ſtat ſerum lactis, & præponendum
 lacti in hoc munere venit. nam lac,
 vt docet Galenus in commentario
 ſexageſimi quarti aphoriſmi Quintæ
 particule, facile eſt alterabile, &
 duplicem ſuſcipit alterationem, à
 nimio calore in nidorem abiens, à
 pauco calore cito acceſcens, vnde
 Hippocrates in eo aphoriſmo lac
 noxiū vocabat & caput dolenti-
 bus.

bus, & multum febricitantibus, & hypochondria suspensa habentibus, & sticulis, & his acutè febricitantibus, qui biliosas habent deiectiones, & factam sanguinis multi excretionem, & solis tabidis concedebat non multum febricitantibus, & in febribus longis, & paruis, & præter rationem consumptis. Habet nimirum lac triplicem substantiam, ut considerat Galenus quarto de medicam. facult. unde habet suæ naturæ constitutionem, caseosam, butyrosam, & serosam, ut iccirco non facile permeet, & facile euaporet, & qualemcumq; corruptionem sustineat, quo fit ut non solum symptomata febrium possit augere, sed ipsas interdum febres exacerbare obstructionibus incrementum præbēs, & putrescentibus humoribus computrescens. Hinc etiam factum est, ut non quodlibet lac in cauponide proponeret Hippocratis, sed solum Asininum, idque etiam ad maiorem tutelam coctum, quod quidem Asininum cæteris omnibus est tenuius, & ob insignem aquosæ substantiæ affluentiam quā proximè accedit ad feri naturam, quod quidē ob sui tenuitatem, & qualemcumq; nitrositatem partes omnes cito perreptat, nec infestas euaporationes excitat, ut Galenus in his affectionibus, in quibus suspectum appareat lac, tutissimum censeat serum, & ob hanc eandem causam idem lacti vel asinino in febri ardente præponendum existimet, quia serum, & biliosos educere potest humores ut nitrosum, & & febrilem calorem compescere ut aquosum, & frigidiusculum, quam temperaturam ei desert in loco commemorato Galenus, vocans serum lactis frigidum, & humidum. Et licet Mesues illud esse statuerit calidum, & siccum à primo gradu vis-

que ad secundum, hoc tamen intelligendum venit non ratione totius substantiæ, sed ratione portionis nitrosæ, quæ in ipso non est exigua, & hoc nihilominus temperamento præditum ad humores calidissimos, & viscera æstuantia relatum vim obtinet refrigerandi, quandoquidem id, quod teporem quandam præfert, æstuantem calorem potest infringere, ac retundere, contrarij rationem non aliter, ac frigidum, habens, ut in Quinto Physicorum est auctor Aristoteles, & aliquando magis etiam refrigerat, quàm id, quod conspicuam obtinet frigiditatem vel eo etiam nomine, quod frigidiora sibi viam præcludunt interdum, & vi constipationis excitata aditum sibi demunt, quem res tepidiores ex aduerso aperiunt, & patefaciunt. Nec de sero veteri possumus quod in lacte suspicionem mouet, ne hærens hypochondrijs, diuque ibi consistens corrumpatur, quia serum non hæret, nec immoratur, sed præterlabitur, & permeat ob sui tenuitatem, & qualitatem nitrosam instar stimuli urgentem, & penetrandi vires præbentem. Est ergo præstantissimum remediū non modo in febribus ardentibus, sed in quibiscumque febribus ferè, quia ut missam faciamus vim euacuandi, & aperiendi tamquam præfenti huius capitis instituto parum accomodatam, incredibile est quantum valeat ad partes refrigerandas, ad succos contemperandos, ad febrilem intemperiem corrigendam. imo, quia aliquid habet alimentalis, naturæ euadit familiare, & amicum, hocque nomine libenter in partes attrahitur, & libenter excipitur, ut commodius possit promissam opem præstare. Ira fit ut inter omnia lenientia serum præcipuè refrige-

frigeratoriam vim sit nactum, & ad explendam curatoriam febris indicationem accomodatū. ipso namque vti possumus non solum cum rhabarbaro, & alijs purgatorijs phar macis, sed etiam cum sirupo rosa ceo solutiuo, & cum Tamarindis, & cum alijs id genus placidioribus me dicamentis lenitoriam facultatem non transcendentibus, & possumus non solum vti in magna dosi ad alu um subducendam, vt subeat vicem remedij deiectorij, cum alijs con iuncto, sed possumus etiam vti solo in parua dosi ad alterādum potius, quam ad euacuandum, vt fungatur munere refrigerandi, accensumque calorem compescendi, & si tunc etiam euacuet, non tam sit deiecto rium remedium, quā diureticum. Quo etiam tempore cum succo ci chorei, vel fenchī, vel alio huiusce modi succo poterit coniungi ad maiorem refrigerandi operam præstā dam. Quod si contigerit febrem ad curandum propositam ex biliosis, calidioribusque succis pendere in prima corporis regione quæ inde etiam morbosum calorem contraxe rit, quis non videt quantum emol umenti polliceatur, atque recipiat feri benè parati exhibitio, cum ma teriam morbificam possit blandè e ximere deiectoria vi, accensum ca lorem possit facile extinguere pare gorica facultate? nam non solum prima vice potest exhiberi vt eua cuet, sed pluribus etiam vicibus re peti vt alteret, hæcque omnia fient sine vlla naturæ molestia. vt tutum sit, atque adeo iucundum remediū. Nec ob aliam causam vsurpari hoc in febribus potest, nisi ob eam, quā continet, serosa, aquosaque sub stantiae portionem, cuius quidem si foret expers, non ita conueniret, qualitatem alioqui calidam sortitū,

quod vel ex eius dulcedine colligi potest, quæ certa est caliditatis do minantis nota, vt in secundo de sim pl. medic. affirmat Galenus. Quam obrem Aetius etiam secundo suæ Medicinæ libro multis ad cælum laudibus secundum Galenicam mē tem serum extollit, & vocat reme dium iucundissimum, ab omni ne periculo alienum, vel in magna ventriculi imbecillitate congruen tissimum, puero, mulieri, seni op portunissimum, vel in ipsa canis fu rentis constitutione, in qua iuxta Hippocratis monitum purgationes sunt suspectæ, absque vilo metu v surpandum. Quod quidem in fe bribus præsertim, quæ lōgiore habent, diuque pæseuerantes circui tus, & in his affectionibus, vnde im mineat aquæ inter cutem discrimē. Superius autem ostendimus serum à Gal. laudari ad curandas etiam fe bres ardentes, vt hinc possumus con cludere eius vsum tum in acutis, tū in longis, tum in vementioribus, tū in leuioribus febribus apprimè con uenire, vt admiranda veniat quo rundam vel imperitia, vel pertina cia ab hoc remedij genere in febricitantibus abhorrentium, quasi ab eo vel obstructionum incremen tum, vel putredinis amplificatio, vel ventriculi læsio sit expectanda, quod magis primarum apertionem, secundæ correctionem, tertij corro borationem pollicetur, ac præstat, idque præcipue si adhibeatur solum, vel coma absinthij, vel seminibus citri alteratum, & vim lenitoriam quoquo pacto retineat, & derer soriā exerceat, non iungatur validio ribus phar macis, vnde vim purgato riam nanciscitur. Verum de hoc for san nimis præsertim cum propo situm sit ostendere lenientia quoque conducere ad explendam indicatio-

nem febris curatorium, qua scilicet vim habent refrigerandi, non solum ut aluum subducentia, & per calidioris euacuationem matetiae contemperantia, verum etiam ut alterantia simpliciter, & facultatem refrigeratorium nata. Quod quidem munus obire etiam possunt quadam tenuis blandi quoque clysteres, & ex rebus refrigerantibus conflati, quos etiam sibi magis dilectos asseuerabat in curandis febribus Auicennas, qualemcumque medelarum ore assumptarum commotionem pertimescens, quasi Platonici in Timæo dicti memor, motum à pharmacis factum improbantis, & solo urgentis necessitatis casu concedentis. Sed cum usus lenientium quoque possit, ut ostendimus, ortam à febris indicationem adiunare, cui indicationi respondet missio etiam sanguinis, quid erit primo molendum? Sanguisne mittendus, an leniens propinandum? illa habenda veniet animaduersione, num febris sit continua, an intermittens, num pendeat à cruditatibus, & excrementis primas vias occupantibus, an aliunde. nam si fuerit intermittens, & soboles excrementorum in primoribus vijs stabulantium, rationabilius fuerit medicamentum leniens exhibere, si fuerit continua, & aliam habuerit originem, præmittenda sanguinis detractio, & maxime si calor febrilis feruidior fuerit, & maius habuerit momentum, ut colligitur ex Galeno in Undecimo Methodi. Pro varia itaque humorum peccantium subsistentia vel intra venas, vel extra, & pro maiori eorundem, vel minori effluuescentia varius suscipitur indicatorum remediorum in idem conspirantium ordo; quamuis Hippocrates in pluribus morbis utroque auxilio indigentibus, & qualem-

cumque phlegmasiam præferentibus venæ sectionem medicamento præmittendam censeat, ut apparet in primis sententijs quarti acutorum.

De usu alimentorum vim medicamentosam habentium in febre curanda, & præcipue de Prissana.
CAPVT X.



Nalimenti vim quādam medicamentoſam agnoſcit, & conſtituit Hippocrates in libellis de alimento, ac de Medicinis purgantibus, & eam quidem ne dū alteratorium, ſed etiam purgatorium, at purgatoria nunc dimiſſa, quæ propoſito non inferuit, alteratorium conſideremus, nam, ut recte ait Damascenus in ſuis aphoriſmīs, felix eſt illa curatio, quæ per ſolam victus rationem procedit, quā etiam præſtantiffimorum Medicorum facit propriam Hippocrates in libro de Arte. Quamobrem Galenus, qui vim hanc medicamentoſam alterando corpori appoſitam cumulate explicuit tum in libris de alimentorum facultatibus, tum in libello de bonis, malisque ſuccis, auctor eſt in octauo Methodi, refrigerationem, & ex alijs multis, & non minimum ex cibi exhibitione proficiſci. Sed inter omnes cibos ſummis ad hunc finem laudibus priſanam extollit, magna & refrigerandi, & humectandi vi præditam, multa que comoda ibidem enumerata febricitantibus importantem. Ac huius quidem priſante utilitates in libello huic materiæ dicato abundè examinat Galenus, quod bene cocta vim omnem flatuoſam deponat, ſi-

tim

tim compescat, detergat, abluat, facili coquat, & sine adstrictione aliqua humectet, gustui nescio quid suavis, & blandi afferat, praesertim in agrotis, ad deiectionem, & distributionem accommodata, ideoque ardentibus febribus opportuna, quippe quae eis undique resistat refrigerans, & humectans putridos humores, detergens, corpori non parvam alimoniam praestans, humores autem semiputridos concoquens, & ad bonam boni succi frugem redigens, nullam vel adstrictionem, vel ventriculi subuersionem retinens. Verum ex his, eius omnes si inquam mentis nunc solam refrigerandi, & humectandi facultatem in examen reuocamus tamquam indicationi febris cutatoriae respondentem. Hinc Galenus non solum in octauo Methodi, vel ad curandam febrem Ephemeram, sed in vndecimo quoque ad curandam putridam inter praecipua remedia ptisanam recenset, & in decimo Methodi affirmat febrientibus omnibus, calidoque temperamento praeditis ipsius usum vel maxime conuenire ad refrigerationem, humectationemque efficiendam, & discrimen imminentis haeciae febris summo uendum. Sed hic oritur dubitatio quaedam ex eo profecta, quod Galenus in commemorato de ptisana libello improbat usum ptisanae in morbis siccissimis, quos etiam enumerat, ut sibi contrariari videatur, dum in libris methodi, addo etiam in eodem libello pro curandis ardentibus febribus ptisanam commendat. At non oportuissimum fuerit hanc dubitationem eximere, quia Galenus ptisanam rejicit in morbis extremae siccitatis, in quibus nulla sit excretio, quae fieri tamen deberet, & non ob aliam causam rejicit, nisi

quod humectate satis siccissimas partes non potest, ut repudietur, tamquam remedium importunum, sed tamquam diminutum in extremis siccitatibus, ad quatum correctionem maiori, validiori que sit opus praesidio. At in putridis, ardentibusque febribus, & in primatum specierum haeciacis non dum tanta siccitas inualuit, ut excretionum omnium facta sit suppressio, & ptisanam facultas adeo hebescat, ut omnino appareat inutilis, quinimo vim habet efficacissimam ad calorem corrigendum, nondum squallidum effectum, & extremam siccitatem iunctum. Quod Hippocrates quidem ostendit in primo acutorum, ubi plene vires omnes, & opportunum, importunumque ptisanam usum explicauit. A quo omnia mutuo accepit Galenus de hoc argumento in suis libris, ut diximus, conscripserat, nam ipsius Hippocratis est expressa sententia in morbis siccioribus, in quibus nulla maneat excretio, non ita ptisanam conuenire, quae locum declarandum suscipit Galenus easdem adhibens morborum sicciorum diuisiones, quas in libello etiam de ptisana adhibet, non tamen vetat omnimodum in his morbis ptisanam usum, sed vetat tempestiuum nullo praemisso humeniori liquore factum. Illud tamen semper cum Hippocrate ubique tenet, accurateque obseruandum monet, ne ad propinandam ptisanam quolibet morbi tempore, quolibet agrotantis statu accedamus, quia nec quibus Clystele est opus, vel venae sectione, nec quibus dolor aliquis est molestus, vltimumve symptoma effatu dignum infestum, nec quibus vires vnde quaque languor sentit quasi effert, conuenit, sed his omnibus onerosa, non ita quae ducit

quippe quæ materias iactet, obstru-
ctiones adaugeat, dolores lancinan-
tes, & qualiacumque symptomata
irritet, & vires collapsas eneruet
magis, infirmioresque reddat. Pur-
gato igitur aliquatenus corpori, nec
doloribus confictato, nec imbecil-
litate fracto congruit, vt hinc pa-
teat non leue, nec excusandum co-
rum erratum, qui statim ad agro-
tum accedentes vel nulla præmissa
euacuatione prissanam imperant
non aliter ac si ferculum ex pane
contrito confectum instituerent, cui
nulla est necessaria corporis præpa-
ratio, nec animaduertunt se non so-
lum à solidissimis Hippocratis, &
Galenî præceptis in hoc recedere,
sed magnum etiam laborantibus,
nec facili negotio corrigendum de-
trimentum importare. Verum quia
vel tota prissana vti possumus, vel
solo eiusdem cremore, tutior qui-
dem existit cremoris vsus, minusq;
lubricus in propositis impedimentis
à corporum, vel impuritate, vel gra-
uiori afflictione profectis, vt ideo à
solo cremore capiendum sit exor-
dium, vel à maiori cremoris parte,
cui parum prissanæ sit adiunctum;
mox vtriusque æqualis portio pro-
pineretur, deinceps vel sola prissana,
quæ in corpore nutriendo, & con-
firmando tantum praualeat, quan-
tum in facili coctione, & distribu-
tione ipsius cremor. Hec igitur re-
frigerantis, & humectantis reme-
diæ materiæ adhibetur ratione calo-
ris febrilis, quam tamen dissuadet
& corporis impuritas, & sanguinis
plenitudo, & doloris lancinantis
molestia, & grauiorum symptoma-
tum inigne afferentium discrimen
contusum, vt solerti sit opus indicio
ad omnia ponderanda, & pro maio-
ri momento congruentiora seligen-
da. Ad hanc eandem refrigerandi,

& humectandi materiam pertinent
etiam olera multa, vt borago, cicho-
rium, atriplex, lactuca, & alia id ge-
nus olera, quia licet herbarum omnes
toto sui genere plus habeant excre-
mentitiæ substantiæ, quàm alimen-
talis, vt statuit Galenus in octauo
Methodi, plus tamen profunt con-
temperando, quàm noceant excre-
mentitiæ materiam adijciendo.
Vnde Galenus in tertianis, exquisi-
tis, in quibus magna est opus con-
temperatione, commendans ciba-
ria humectandi, & refrigerandi vim
habentia proponit ex oleribus atrip-
licem, bilitum, lapathum, maluam,
lactucam, & cucurbitam, & pisces
etiam saxatiles, qui præter lenita-
tem substantiæ vim obtinent refri-
geratoriam, & humectatoriam, &
hoc eodem nomine concedit ex po-
mis fugacibus (quæ ὀνόσπευ græce
dicuntur) illa potissimum, quæ non
omnino ad concoquendum diffici-
lia sint, non tam palato agrotan-
tium gratificatus, quam inde venien-
tem humectationem, & refrigerationem
meditatus. Quo minus mi-
rari debemus, si Trallianus quasi
Galenî, quem tamen oculis liuore
suffusus conspexit, perpetuus simio-
lus in febribus ardentibus largus est
pomorum dispensator, & medica-
mentose inde contemperationis au-
cupator, & exhibet exquisitam ter-
tiam sustinentibus viam dulcem,
persica cocta, & non cocta, pe-
ponumque medullam præsertim egri-
s, siticulosi, profiterurque se multo-
ties exhibitione peporum refri-
gatorum cum potu aquæ frigida ad-
dito reuersiones accessionum sustu-
lisse, eosque deridet qui ex Galeno
affirmant pepones esse biliosorum
humorum feraces, non coleram hu-
morem, sed coleram morbosam af-
fectionem à peponibus secundum

Gale-

Galenum produci ostendens. Viderit ergo Cardanus, qui tantopere carpit hunc fructum, quem vel peponem, vel melopeponem vocarunt veteres (sunt enim hi fructus inter se congeneres) ut in extremas, ut aiunt, insulas amandandum, iussuq; principum omnium prohibendum statuatur, tamquam maximum auctorem malorum, cui Cardani sententię non modo allatam Tralliani doctrinam opponimus, sed Galeni etiam in opere de alimentis aliter sentientis auctoritatem, atque adeo hanc præclaram Hippocratis ipsius in libro de affectionibus animaduersionem. Cucumis Pepo (ait ipse) & urinam, & aluum mouet, ac levis est. Alter autem Pepon refrigerationem quandam inducit, & sitim sedat. Ab horum neutro nutritio nisi admodum tenuis procedit, sed neque malum aliquod effatu dignum ab horum neutro. Quid ergo Cardanus tantum mali minuitur? Quid quod ipse fuit magnus Peponum heluo, ut audiui ex multis, qui eum Romę degentem nouerunt? ut dicere possimus ad risum excitandum ipsum detraxisse huic fructui, ut ab alijs onissus sibi remaneret comedendus, veluti Plutarcus narrat de quodam Gnathone, qui ut sibi superessent esitanda delicata edulia, in eorum patinis conspuebat, & ipsas interdum nates emungebat, ut reliqui conuiuę nauseam inde, experti ab eis abhorrerent edulijs, sibi soli in usum gratum reuocandis. Concludamus ergo recte Galenum in primo ad Glanconem concessisse febricitantibus pomaceos fructus ad contemperationem inducendam, inter quos fructus mirę excellunt mala punica ad ventriculum etiam confirmandum valde accommodata, ut ideo Galenus in libris

Methodi eorum grana in ferculis concoquenda proponat, concludamus recte Trallianum vel ipsos Pepones concedendos indicasse, quia cum grati sint gustui, sensumque apprimē alliciant, paratiores sunt ad subeundam, efficiendamq; commutationem, & facti naturę familiares hinc inde cito per omnes corporis partes perreptant, & suam in omnibus alterandi vim exerunt. Sed quamuis & olera, & pisces, & pomacei fructus non parum ad refrigeranda, humectandaque corpora valeant, & indicationi febris curatorię satisfacere aliquatenus possint, hæc tamen omnia edulia cum magna præmeditatione in usum veniunt reuocanda, habita temperamenti assumentium, consuetudinis, & facti experimenti congrua ratione. Et hæc dicta in vniuersum fuerint de refrigeratione ex alimentis comparanda, quæ non solum habent communem refrigerandi rationem alimentis omnibus à primordio competentem, de qua loquens Philosophus in libro de vita, & morte dixit, succus intromissus in animantis corpus refrigerat, quem admodum homines etiam, cum primum alimentum inferunt, refrigerantur, non hanc solam, inquam, habent refrigeratorem vim, sed propriam etiam depromunt cui-
dentiore à proprio ipsorum temperamento prodeuntem.



De usu frigida, ut remedio febris
curatio.

CAPVT XI.



Refrigerantium reme-
diorum alia diximus
esse actu talia, alia po-
testate, alia per se, a-
lia ex accidenti, vt in
vndecimo Methodi
repetens quod in decimo dixerat
auctor est Galenus. Verum inter
ea, quæ actu sunt talia, primas sibi
vendicat partes aqua frigida, quip-
pe, quæ innatam refrigerandi, &
magis propriam humectandi quali-
tatem retineat, vt ideo germanum
sit, valdeque proprium febris ipsius
remedium. est enim ipsa febrili in-
temperiei verè contraria, sua frigi-
ditate huius caliditatem, humidi-
tate corrigens siccitatem, ideoque
omnis febris, quatenus febris, me-
dela existens, vt rectè considerat
Galenus, in illo Methodi vndeci-
mo. Verum quia hæc refrigerantis
remedij materia, potio nempe fri-
gida, de qua sola nunc institutus est
sermo, non ludicrum est negotium,
sed magnum habet momentum,
magnasque vires, ideo non temere,
nec sine magna præmeditatione v-
surpari debet, quia, vt opportunus
usus valde conducere, ita importu-
nus valde valet offere. Duo qui-
dem sunt febrium vehementiam,
& maxime continentium maxima,
& præcipua remedia, venæ sectio,
& frigida potio, vt in nono Metho-
di constituit Galenus, at in his illud
intercedit discriminis, quod phle-
botomia omni tempore potest v-
surpari, dum modo vires consent, siue
cruditatem præferunt succi, siue co-

ctionem, sed frigida potio non po-
test, quippe, quæ præcedentem co-
ctionem exigat & in pulsa, & in
vrinis apparentem, & febris etiam
supponat insignem magnitudinem,
magnum enim validumque reme-
dium, magna alterandi facultate
præditum non venit leui calori fe-
brili, leuioribus etiam remedijs fa-
cile concessuro, ad aprandulum. Fe-
bris ergo fuerit effatu digna magni-
tudo comitata, magni refrigerij
indiga, quale nimirum potest frigi-
da potio suppeditare. Sed non sem-
per datur perficienda indicatio
locus, quia obstat contrariorum in-
dicantium, siue plurium contraria
dicantium concursus in accuratum
examen reuocandus, nam si mater-
ia cruditas vigeat, partim pulsus
partim vrinae notis insinuada, tan-
tum abest, vt frigida potio hoc no-
mine indicetur, vt vel maxime po-
tius hinc inhibeatur, quia cruditas
usu frigidorum nugetur, à calore
corrigenda, ad coctionis, & frugem
adigenda, vnde Aristoteles in quar-
to Meteorologico dixit omnia cocta
esse calidiora, cum coctio sit perfe-
ctio facta à calore naturali, & pro-
prio, & in secundo de generatione
animalium, vbi dicit coctionem ca-
lorem, non quidem formaliter, vt
aiunt, existentem calorem, sed effecti-
uè, seu originaliter, ut quæ valori-
s soboleme. Qui possit ergo potius
frigida conuenire in humore in cru-
dorum affluentiâ, vel a cæco, vel aliis
simi refrigerantis magis robore
secutium, maioremque crassitudinem,
& visciditatem sortientium, vt magna
detur exaggerandis obstructions-
bus ansa, vnde augetur putredo,
& à putredine incrementum acci-
piat calor febrilis. Nec verò so-
la excrementorum cruditas vim
habet inhibendæ frigida, sed eorum-
dem.

dem etiam copia, & abundantia idem præstat, quia, quæ refrigerant, licet naturæ in temperiem conciliant, abundantia tamen intra corpus detinens, ut non tam iucunde calefacta refrigerando, quam obfistit euacuanda cohibendo. Quam obrem cum abundantia emitti postulat, caliditas temperari, ut contingit in febribus cum magno humorum affluxu coniunctis, oritur dissidentium indicationum concursus, febre quidem refrigerium postulante quod præstant refrigerantia, multitudine excretionem exigente, quam molliuntur potius calefacientia, ut si abundantiam emittere velis, febrem augeas, si febre refrigerare, abundantiam compescas. In erudis ergo, copia, sique succis non est intus frigida potus, quia & augetur cruditas, & cohibetur copia, quæ tanto minus educi è corpore potest frigida opera, quanto magis iunctam habet cruditatem contumaciam, & perti- naciam mori allaticem, & identis crassique humores, siue hi quidam obstructions, siue putredinem, siue qualemcumque præternaturalis tumoris affectionem excitauerint, ab attenuacione, digestionemque deter- reantur, & magis quam antea cre- belles in corpore commorentur. Quam maximam esse noxam, ex im- portuna frigida assumptione fe- brientibus accedentem dubitauerit nemo. Ad quam alia accedit non minus tunc temporis contingens, cum his frigida propinatur, qui alio- qua insigni viscere, seu quarum- cumque partium infirmitate labo- rant, siue ventriculus fuerit, siue iecur, siue renes, siue vesica, siue qualiscumque alia particula, non solum si fuerit à natura primordijs debilior facta, sed si aduentitiam

etiam quaquamque de causa im- becillitatem contraxerit, nam his im- becillitibus particulis magnam imminet magnæ lusionis à frigida manantis discriminem. Vbi igitur ob- structiones vigent, & putridi hu- mores coctionis expertes, ubi cras- sorum abundantia succorum malè ad expulsionem paratorum infes- tat, ubi pars corporis præcipua, seu qualiscumque estimatione di- gna particula infirmitatem non co- tenendam præfert, suspectum fri- gida remedium esse debet, in alia auxilia, quibus obstructio adima- tur, abundantia euacuetur, febris seuor remittatur, & nulla corpo- ris pars detrimento afficiatur, con- mutandum. Exemplum aque in- oportunitis assumptionis habemus a- pud Hippocratem in primo Epide- miorum, quæ Metont grauiter fe- bricitanti contigerunt narrantem, nam cum hic secundo die aqua bi- bisset multam, nullam inde utilita- tem, sed magnam potius reporta- uit noxam, quarto die malorum omnium exacerbationem passus, quia plenitudo suberat, & cruditas in vrinis, vigeat, & ni quinto die hæmorrhagia, e naribus, & sudore fuisset, aditus, vim acerbissimi morbi non effugisset. Consideran- da etiam venit ægrotantis tempera- tura, & cæli status, nam sicciores iusto temperature, quæ insignem habent gracilitatem, adiunctam, non ferunt id remedij genus, à quo partes solidæ non mediocriter læ- duntur, sine vlla ferè carnis resisten- tia periculosa, quam resistentiam fa- cit habitudo plenior, carnum mu- nimento reddita tutior, ut ideo in febre synocha conueniat magis po- tio frigida, quam in caustionide, quia in hac corporis habitudo est gracilior, in illa vero plenior. Nec

qui-

quilibet cœli status est opportunus, quia frigidior aeris intemperies repugnat, ac reluctatur imminuens vim indicantis, hoc est febrilis caloris, qui ab ambiente calidiori augetur, & magis indicat refrigerantia, ab eodem ambiente frigidiori obtunditur, nec tam vehementer indicat, quippe qui vel ab externa aeris frigiditatem remissione qualescunque suscipiat, nec refrigerio à frigida potione promisso indigeat. nam aer calidior habet in febribus rationem causæ morbificæ, & morbum exaggerantis, frigidior causæ salubris, & morbum diminuentis, ut supra ex Galeni in vndecimo Methodi doctrina considerauimus. Ideo calidior fouens febrem fouet etiam indicationem eiusdem, quæ indicatio est contrarij refrigerantis, cuius materia potest esse frigida abundè pota, frigidior autem aer remittendæ febrei est opportunus, tamquam eius intemperaturæ oppositus, & non auget morbi indicationem, sed minuit, quia refrigerium hinc indicatum è suo quasi penu depromendum præbet, imo potius subit vicem prohibentis admissam à febre frigida potione, quia metum incutit, ne tantam refrigerationem, & interius, & exterius factam, ab aere scilicet, & aqua, nequeat natura sustinere, calorque innatus febricitantis succubatur, quippe qui soleat à causis valde refrigerantibus colligi aliquando, ac temperari, sed interdum etiam vinci, ut Galenus commentario decimo quinto primi Aphorismorum exemplo partim hominum aqua frigida lotorum, partim animalium hieme latitantium ostendit. Quare Hippocrates vel in ipsa frigida profusione, quæ sit exterius, & solum corporis ambitum extra

attingit, & calorem æstiuum, & ipsum iuuenem carnosum requirebat, ut pater in Quinto Aphorismorum, nec quemlibet cœli statum, nec quamlibet hominis temperaturam, siue etiam ætatem, & habitudinem vel externo frigida vsui, & multo minus interno esse accommodatam insinuans, magnum enim est frigida remedium, & magnam habet immutandi corporis vim, & nisi vires validæ suppetant, magnum imminet periculum, ne calor innatus, qui tamquam seuidior factus venit contemperandus, ab excellentis frigoris accessu pessumdetur, & extinguatur. Vnde nec in omni virium conditione conuenit hoc remedium, quia si calor febrilis non fuerit maximus, non exigat tanti momenti medelam, & si vires fuerint languidiusculæ non sustinent tanti oneris magnitudinem ut febris exigua non requirat, vis languida non permittat frigida potionem. hæc enim largius facienda præcipitur, ut quantum haurire possunt ægroti hauriant, quam largiorem portionem viribus imbecillioribus non esse consentaneam nullus dubitandi relinquitur locus. Cum magnum ergo ex ipsa timetur incommodum, eam constat esse prætermittendam, at cum vel exiguum, vel nullum, audacter fuerit, & ea quidem copiosior, & quoquo pacto gelidior offerenda. Huius autem audacem facit, omnisque timoris expertim oblationem si concursus appareat febris vehementis, virtutis omnis valida, coctionis in humoribus euidentis, quia tunc omnis adest frigida exhibendæ occasio, nulla prohibitio, ut statuit Galenus in vndecimo Methodi, præcipue si accedat bona corporis habitudo, cœli status calidus, & confir-

firmata huic potui assuetudo omnis incommodi nescia. hinc enim certa colligitur coniectatio, quam solet Hippocrates vocare tecmarism, tutaque suscipitur spes feliciore even- tus, quia magna est vis consuetudi- nis ad fouenda medelarum iuua- menta, & quasi altera natura insi- nuat quid nostris corporibus noxiū, quid salubre sit futurum. Hæc, quæ diximus, faciunt, vt non cuiusuis Medici sit ad frigida administra- tionem, accedere, quæ tempestiue facta maximam attulerit opem, in- tempestiue maximam noxam, & opportunitatem discernere opus est acris iudicii, quia difficile est fe- brem, putredinem, & effetricem causam, quando adest, inter se con- ferre, præcipue si virium etiam cum eis fiat collatio, quæ nullo pacto veni- ni prætermittenda. Quod nisi hæc omnia inter se conferantur, & cu- iusq; pondus expendatur, fieri nullo modo potest, vt recta fiat huius- sce remedij administratio, quia in- concursu pugnantium inter se indi- cationum, videndum vbi sit maior vis, quid magis urgeat, num sit maius commodum promissum, an detrimentum suspectum, vt expo- scente febre frigida: potionem, sed putredine, & causa morifica, & virium infirmitate reluctantibus, non sit remedio huic manus dāda, quia licet aqua sit vnum ex his, & illud quidem præcipuum, quæ actu refrigerant, & ipsa sit auferendo morbo admodum consentanea, ta- men cum plura sint alia partim po- testate, partim ex accidenti refrige- rantia, ob factam ab alijs reluctan- tiam indicationi morbi non consen- tientibus, dimittenda fuerit frigi- da, & aliud tutius præsidium com- parandum, vt Galenus in vndeci- mo Methodi decernit. Concluda-

mus ergo ex mente Galeni in nono, decimo, & vndecimo Methodi has esse condiciones ad frigidam pro- pinandam requisitas, vt febris sit maxima, magno comitata ardore, & continua potius quam intermit- tens, & continens potius quam proportionata, vt materia sit eru- ditatis experta, & si non absolutam, mediocrem saltem præferat coctio- nem, vt bonus sit viscerum, & reli- quarum partium tonus nullo inco- modo à potu frigida: afficiendarū, vt valida sit virium omnium con- stitutio, vt sit aeris calidioris con- spiratio, & inueterata in hoc potu consuetudinis confirmatio, quibus omnibus conspirantibus turissimus sit, & vtilissimus simul remedij v- sus, dissentientibus verò, & inter se pugnantibus ea venit adhibenda cautio, quam superius secundum Galenum adduximus, in cuius do- ctrina tamquam clarissimum inno- uit frigidam esse proprium febris omnis remedium, & illud quidem curatorium, quatenus febrilem ca- lorem compefcit, & extinguit quā- uis materiam educendo euadat et- iam præseruatorium, quo nomi- ne nunc non perpenditur, sed vt curatorium non aliter omitten- dum, quàm ob pugnantem contra- riarum indicationum concursum. In quo quidem concursu magni fa- ciendum proponit Galenus in de- cimo Methodi tum partis phlegmo- nem, tum putrescentem humorem, quasi vtraque occasio magnam ha- beat inhibende frigida: facultatem. nam frigida irritat inflammatio- nem, eique præbet incrementum, magisq; accendit comitem febre, & putridus humor frigida: sit deter- rior, & ad gignendam, fouendam- dāmq; febre accommodatior, quia non de quocumque humore putri- do

do hic sermo habetur: (quippe putridis febribus non esset hoc remedium congruum) sed de putrido crudo, & omnis propè coctionis expectes, qui propriè putridus est ob eam, quam putredo requirit, cum coctione contrarietatem, quam in Quinto de generatione animalium cumulatè expressit Philosophus. Putridus ergo humor, quatenus rectè, integreque putridus, hoc est, quatenus crudus, ideoque ad excretionem ineptus, & ad augendas obstructions paratus, vim habet inhibenda frigida, sic tamen, ut non omnis expectanda sit coctio, nec omnis pertimescenda, vel exigua condisas, veluti nec omnis phlegmonis animaduersio debet à proposito remedio detertere, nam cum medio cris affulserit in humoribus coctio, licebit aquam propinare yrgente multum febrili calore astuoso, ut in undecimo Methodi docet Galenus, à quo etiam in phlegmonis concursu legimus propinaciam, cum maior esset consecuturi, commodi spes, quam innocentis detrimenti metus, cui quidem animaduersioni appellendus quam maxime est animus: quia cum nihilum fore sit praesidium, ut saepe nos monet Galenus, & proxime sitis, exemplo, atque adeo multè in undecimo Methodi ostendit, quod promissio usui non habeat iunctam aliquam noxam, aliquam lationem naturae infestam, difficile est, inquit eo loci Galenus, eiusmodi aliquod auxilium inuenisse, quod citra ullam noxam magnificè proficit, examinandus accuratè venit, & quasi iusta ponderandus lance uterque euentus, ut appareat maius ne sit commodum, an incommodum euenturum, & usurpandum ne sit, an dimittendum praesidium, aperte liqueat, nam indicantium id quod

magis viget, magisque naturae inclinabilitatem fouet, amplexiandum magis, ceterisquè omnibus praeponendum existit, ut hinc statuerè debeamus tunc etiam exhiberi frigidam posse cum aliqua adest phlegmonis molestia, nec omnimoda subest humorum coctio, modo non magnū sit expectatum dampnum, magnū autem sit, effatuque dignum spe conceptum emolumentum. Quod quidem emolumentum vel in his potissimum febribus seprodit, quae praenimio astu, praenimio moderato caloris incensio, totiusdam quandam cordi exustionem, & ad hecitas temperies progressio nemini tantum, cui discrimini extrema adhibita refrigeratio vnicum est, & praesentaneum subsidium, ut in commemoratis Methodi libris plantum facit Galenus. Nec illud omiserim dicere, hanc frigidam positionem non solum alterando, sed euacuando etiam curatori remedium munere fungi, quia dum vel per sudores, vel per urinas, vel per excretiones materiam adu putrescentem detrudis, putredinem aliquatè nus sanas per ablationem subiecit, & hoc etiam nomine consequentem febrilem intemperiem emendat, sed id omne aliud id est, quod

De Balneo sub eadem ratione remediary.

CAP. V. T. XII.



Elebre aquae Encolmum, quod ei in olympicis tribuit Pindarus, optimam rem nuncupans, & inter elementa ralem, quae le est aurum inter metalla, inter optimo timo

rimo approbandum censuerunt Philosophi, inter quos Aristoteles in primo Rhetoricorum, Plato in Euthydemo illud commendat, & Plutarchus lepido commentariolo eius cum igne de utilitatis primatu contentionem absoluit. At si hoc faciunt Philosophi, multo facere magis Medici debent, quorum ars nullum habet presidium ipsa aqua praestantius. Cuius reliquas utilitates in sanandis morbis, tuendaque valetudine: ut missas hoc tempore faciamus, satis explicare non possumus quantum in profigandis propolis febribus putridis afferat adiumenti, quippe quæ non solum, interius assumpta per portionem, sed exterius etiam adhibita per balneum plurimum addat emolumenti. nam Galenus in decimo Methodi hoc dulcis aquæ lauacrum febrili tollendo affectui utilissimum esse pluribus rationibus ostendit, quibus omnibus adductis illam demum adiungit considerationem, maximo huius rei documento esse corporis constitutionem, quæ balneum excipit postquam in sole feruente iter fecerimus, quia ad illud accedimus ne loqui quidem ob nimiam ariditatem valentes, & corpus vniuersum instar stipulæ aridum habentes, sed aquam egressi, illico omnia naturæ consentanea recipimus, febrili nec calore, nec siccitate conflictati, promptè verba facientes, & omnem ferè sitis molestiam deponentes. Cui sententiæ similem planè scribit in commentario sexto sexti Epidemiorum his verbis. Idiotas quosdam audiui quod ipsis cõtigerat ex aquarum dulcium lauacris admirantes. Nempe antea ex sole calido, & itinere venientes, sese squalidum corpus, & os siccissimum habere dixerunt, atque siti, detineri inopinabili. Post

lauacrum verò sine siti redditos, atque os habere humidum, simili quoque modo & corpus totum molle, & humidum redditum reiecto antecedente squallore, alij verò & euidenter se sensisse corpus in solio ad se aquam trahere dixerunt. Hæc memorabat Galenus de insigni utilitate in calido, siccoque affectu profecta à balneo, quod erat sua tempestate vtilissimum, nec ullis diebus intermissum. Hinc factum est ut in omnibus febribus curandis hoc proposuerit remedium, nec in his solum, quas vocat immateriales, quales sunt præcipuè hecticæ, & quodammodo etiam Ephemeræ nil cum humoribus habentes commune, quibus omnibus applicat balneum in octauo, nono, & decimo Methodi, verum in ipsis etiam humoralibus, siue putridis, quibus minus videtur congruere, applicat tamen etiam his interdum tamquam remedium aptissimum, & si quædam seruentur cautiones, saluberrimum, ut legenti finem Vndecimi Methodi clarè innotescit. Et quamuis hoc remedij genus videatur iam in curatione putridarum febrium recessisse, ut aiunt, ob aulam, quia non familiarem habemus instar veterum vsum balnei: mihi tamen nullo pacto omittenda videtur hæc pertractatio, non modo ut Galenica de hoc præcepta, præclarissimaque documenta explicentur magis, clariorque notitiæ subijcianatur, sed etiam ut eorum temporum congrua habeatur ratio, in quæ solemus interdum incidere, ut quasi coacti ad lauacrum tamquam ad sacram ancoram confugiamus in profigandis etiam putridis febribus, quales sunt nonnullæ in temperamento calidiori, sicciorique accensæ, & contumaces adeo, ut nullis alijs concedant

remedijs, & progressum, expeditum
que ad heclicas adiutur minitetur.
In quibus mirum est quantum affe-
rant balnea adiumenti, si tres obser-
uatae condiciones fuerint, quarum
vna est, vt citra horrois sensum v-
surpentur, secunda, vt nullum pri-
mae notae viscus sit imbecillum, ter-
tia demum, vt crudorum humorum
in primoribus vijs copia non insit.
nam cum lauacrum horrois sen-
sum habet comitem, quae febris ad-
est incrementum accipit, quia vbe-
rior putrescentis materiae copia sup-
petit, quae non adest, aduenit, quia
putredinis ex commota materia an-
sa accedit, ac tanto quidem haec ma-
gis, quanto illa magis per sensiles
ambitus partes confertim, rapide-
que irrumpit. Quae ne contingant, hor-
rois discriminem est amouendum, &
opera simul danda, ne vllum prae-
cipue notae viscus sit infirmum, nam
cum proprium balnei sit fundere
humores, eosque ad confluxum pa-
ratos efficere, & cum ad viscera im-
becilliora paratus sit succorum, ex-
crementorumque confluxus, vt in
primo de symptomatum causis de-
clarat Galenus, nullus dubitandi
relinquitur locus, quod aeger infir-
mis praeditus visceribus, si balneum
vsurpat, ad ea pellicit, trahitque in-
signem superuacaneorum copiam,
vnde inflammationum, variorum-
que tumorum frequentem videat
ortum. Quod si via primores ad
ventriculum, ad intestina, ad menses
terium pertinentes cruditatibus sca-
teant, quis non videt quam anceps
sit, parumque tuta balnei admini-
stratio? quippe quae crudiusculas
materias diuturniori in partibus, v-
bi resident, indigentes ad sui elabo-
rationem mora agitanas suscipiat,
ad partes vteriores alliciat, ad ob-
structionesque promouendas etia-

ter, vt hinc longe maius febricitan-
tibus detrimentum, quam emolu-
mentum ex lauacro accedat. Siue
igitur discrimen imminet conse-
quentis horrois, siue infirmitas ap-
pareat nobilis visceris, siue in primis
ductibus affluentia consistat cru-
diusculi humoris, omnis deponen-
da venit in putridis febribus huius
remedij cogitatio. At si haec omnia
absint impedimenta, & haec omnes
econuerso adsint condiciones, vt
nullus imminet horrois metus, vt
bonus suppetat visceribus tonus, vt
primas vias non obsideat superfluo-
rum cumulus, vsurpandis balneis
opportunitissimus patitur aditus. ex
his namque duo haec praecipua fluunt
compendia, & quod humorum mul-
titudine minuitur, & febrilis caloris
intensio remittitur. nam quod maior
sit fuliginosorum, fumidorumque
excrementorum euaporatio per pa-
tefactos cutis meatus, eo maior ad-
ueniat accensio calori tempera-
tio, quam etiam exaggerat dulcis a-
qua gratissimus tepor ad magnum
inducendum refrigerium mira qua-
dam ratione accommodatus. Ad quod
excipiendum se totam quasi fundit,
& obuiam procedit natura illo qua-
litate moderamine immodice de-
lectata, quod quidem moderamen-
in illo constitutum repote ad v-
trumque contrarium, calidum nem-
pe, & frigidum, ita potest iuxta phi-
losophicam regulam referri, vt al-
terius contrarij & subeat vicem, &
amuletur operationem, frigida ca-
lesciens, refrigerans calida. nam,
quibus modo lotionem cum Gale-
no consulimus, his frigidi solij con-
fessus est euitandus, non solum cutis
constipationem effecturus, obstru-
ctionibusque incrementum prae-
stans, sed crudos etiam, putrescen-
tesque humores ad eum cruditate

gradum, vt ad recipiendam coctionis elaborationem euadant inepti, deducturus. Hinc frigida lotio non tam iuuat refrigerando, quam obest constipando, cruditatesque adaugendo, à quibus nimirum læsionibus abest aqua tepidiuscula, ad refrigerandum, temperandumque corporis habitum apprimè facta, vt missa fiant aperiendi, attenuandique humores, & meatus laxandi emolumenta. Nec tamen perpetuum est de vitanda frigida lotione in his febricitantibus præceptum, cum iuueni maxima febre laboranti, qualis est synocha, bona corporis habitudine prædita, vt *suppos* dici possit, in calida, & sicca constitutione cæli versanti, vel ipsam in frigida natationem in Vndecimo Methodi concedat Galenus, ad promouendos etiam sudores, & ciendas biliosas deiectiones in hac condicionum syndrome accommodatam. Sed quia diximus ex eodem Galeno in vltima parte Vndecimi Methodi magnam habendam esse in vsurpando pro febricitantibus balneo viscerum, partiumque præcipuarum rationem, ne qua labe infit, ne qua imbecillitas insignis, illud annotare lubet ex eius etiam doctrina, si partes inferioris notæ infirmæ sint, veluti podagricis pedes, & arthriticis vniuersi corporis articuli, non habere locum propositam cautionem, sed maximam potius ægrotanti promitti ex lauacro salutis spem, quatenus infirmæ articulorum partes excrementorum sarcinam, & qualemcumque colluuiem sint recepturæ, ad quam receptionem tum humorum liquatio, tum viarum apertio, duo balnei fructus, multum habeat momenti. nam ad seruandas, tuendasque partes nobiliores despiciatui ignobilio-

res ducuntur, cuius rei clara nobis indit natura documenta, quæ facit vt vel ipsi pueri rerum omnium ignari, si ruant, & quasi præcipites in terram collabamur, manus ipsas prompti supponant ad caput tuendum, faciemque seruandam incolumem. Hoc nimirum pacto eadem natura prauos succos à membris præcipuis ad artus propellit, idemque naturæ ars æmula efficit, ideoque interdum aliqua ope intercedente, qualis ex balneo fuerit, febrilem materiam ad artus trahit. Quod præstandum esse non modo in commentario secundi de natura humana est auctor Galenus, sed in Vndecimo etiam Methodi, vbi discimus partem esse multipliciter imbecillam, partim quia talis est nata, partim quia talis est facta. Natura talem intelligimus eam, quæ ab ipsis primordijs intemperiem effatu dignam sortita videtur, vt si quis cerebro ortus fuerit præhumido, ventriculo præfrigido, factam talem dicimus eam, quæ vel ex morbo præcedente, vel ex quacumque alia causa eandem est nata intemperiem, vt non originariam præferat, sed aduentitiam contraxerit imbecillitatem. Nec solum pars imbecilla, quæ ex confirmata intemperie euadit talis, excipiendis superuacaneis est valde obnoxia, sed quæ etiam quocumque modo est calefacta vehementer vel ratione putredinis, cuius quendam quasi focum contrahat, vel ratione obstructionis, quæ fuliginibus exitum præcludat. nam vt dolor, sic etiam calor miram habet vim attrahendi, vt in tertio decimo Methodi docet Galenus, idemque partibus æstuantibus balneum non ita videtur tutum. In febris ergo, cum sublata est superuacaneorum multitudo, cum putrescentium

humorum apparet concoctio, balneum vsurpare tuto possumus, seruatis tribus propositis condicionibus, precipue si febrilis appareat declinatio, quia hoc remedium non solum euacuandi, aperiendique facultatem habet, sed etiam contemperandi, vt diximus, & refrigerandi, quo nomine remedij curatorij condicionem subit. Quod quidem in his potissimum febribus vsu venit, quae longiuscule perdurarunt, & non ad caliditatem solum igneam, sed siccitatem quoque corpus induxerunt, vt & refrigerandi, & humectandi oriatur magna indicatio, & haec ad humectandum quoque directa sit verè curatoria ob siccitatem iam morbosam, & bene confirmatam praesentem, non tantum praeseruatoria porius ob imminentem, qualis habet in omnibus etiam leuioribus febribus locum. nam omnes habent intemperiem calidiorē & morbosam, & factam, quae refrigerantia indicat tamquam remedia curatoria, non omnes habent siccitatem iam morbosam redditam, sed ad morbosum genus tendentem, vt ideo indicet humectantia, quae praeseruatoriam potius vim, quam curatoriam praeserant, siccitatis progressum ad morbosam constitutionem impediunt. Iam quae diximus ex Galeno de potu frigida, & lotionē tepida in febribus valde sunt Hippocraticis decretis conformia, vt facile nouerit quicumque vel primoribus labris lectionem tertiij libri acutorum degustauerit. nam quantum attinet ad potionem, licet ibi Hippocrates instituto de aqua sermone non eam multum videatur laudare multas ex se noxas promentem, hippocondrijs inimicam, & biliosis conuersionibus obnoxiam, subiun-

git tamen esse interdum perutilem, & in valde magna copia, & valde gelidam adhibendam, quod in commentario etiam notat Galenus aduersus Erasistratum blaterantem, & Hippocrati tamquam parcissimo aquae exhibitori immedicè sine causa detrahentem. Ad lotionem verò quod attinet, licet balneorum vsus nondum bene suo tempore inoleuisset, vt ibi Galenus animaduertit, multa tamen ex hoc remedio adducit emergentia comoda, & in alijs, ibi enumeratis morbis, & in astutis etiam febribus expectanda, dum modo condiciones, quas cumulare recenset, & quae in Galenicis continentur, fuerint obseruatae. At hoc remedium consequentibus temporibus euasit familiarissimum, & frequentissimè vsurpatum, vnde Celsus in secundo libro de illo loquens, ait, Antiqui timidius balneo utebantur, Asclepiades audacius, de quo Asclepiade Plinius libro vigesimo sexto inter alia plura dixit, quod balneas audissima hominum cupidine instituit, quod Plinius dictum sic verum est, quod non primus instituit remedium iam vetustissimum, sed primus amplificauit, & fecit in febribus vsitatissimum, & cum frigida potione, vnde vel cognomen tum quasuit, velut Herophilus, a causarum indagine, cleophantus a vini ratione, curauit coniungendum. In quod propender admodum, eique calculum omnem deferret memorato loco Celsus audacterque adhibendum, proponit ad febres & terminatas, & terminandas, quia febrem ipsam tollat, condensatam quē relaxet, euocet corruptum humorem, muret corporis habitum. In ephemeris commendat post tempus accessionis, in putridis intermittentibus tempore in-

remissionis, in continuis tempore remissionis, modo præcordia nec dura sint, nec tumida, nec lingua sit aspera, nec vel in medio corpore, vel in capite dolor sit, nec horro-
ris periculum immineat, & in huius remedii administratione præcipua virium ratio habeatur. In quo magna apparet inter celsum, & Galenum consensus, ut illius regulæ illis plenè respondeant, quas hic tum in libris Methodi, tum in primo ad Glauconem scriptis mandauit. Hanc eandem obseruare consensionem possumus apud Auicennam in prima Fen Quarti canonis, ubi & aquæ frigida potionem, & eiusdem, & frigida, & calida lotionem in putridis febribus, habita prædictarum conditionum ratione, commendatam legimus, imo audacior in hoc est Auicenna Galeno, quia ille frigida lotionem præponit, quam infrequentissimè audet adhibere Galenus, qui in commentario tertij acutorum tepidam solam ægris attingendam proponit, & hanc etiam in febribus omnibus cauendam, quæ à pituitosa, & quacumque crassa materia pendeant, ad excretionem per cutaneos meatus inepta, ut biliosis tantum febribus, ac tenuium humorum suam radicem habentibus id remedij genus relinquat. Quod quidem ut apud veteres assidua lotioni assuetos adhibebatur sapissime, sic apud nos ob lauandi desuetudinem rarissimè, & quantum confirmata eorum consuetudo impellebat ad vsu, tantum nostra desuetudo ab eo debet auocare, quia Hippocrates in tertio illo Acutorum præcipuam consuetudinis, vel desuetudinis rationem habendam censebat; non fuit tamen hæc omittenda consideratio partim ut veterum doctrina melius

ignotesceret, partim ut capiendum in quibusdam casibus consilium pateret, quia aliquando, ut supra diximus, incidunt tempora, ut febri-
cantes aliquos curemus, quorum contumacissima febres sint, ad hecticarum suscipiendam naturam aptissima, calidis, & siccis immodicè temperamenti comitata, à biliosis tenuibusque humoribus, & excitata, & fota, nullum balnei impedimentum habentes, quibus propellendis ad hoc etiam remedium generosum accedere interdum possumus, præcipuè si hunc etiam impulsu habeamus, ut ægrotos tempore sanitatis lotionis amicos, & in eius administratione diu, multumque versatos sciamus. Quod quidem fuerit periti Medici solerti iudicio decernendum, nec omnem balneorum tantopere à veteribus commendatorum operam in curandis etiam putridis respuentis, nec sine magna causa ad remedium tantopere à neotericis omissum accedentis. Neque verò hic dicere prætermiserim, quod veluti hæc lauacra magnam habent refrigerandi, humectandique vim, quæ alteratio iuxta Galeni monitum in primo ad Glauconem sæpe quacumque euacuatione euadit utilior, ita ad eandem curatorem indicationem conducunt non leuiter exterius factæ præcordiorum perfusiones, fomenta, Epithemata, cataplasmata ex refrigerante, humectanteque materia, cuius magna est, & notissima sylua, visceribus adiuncta, in quibus vsurpandis remedijs fuerunt vetustiores Medici, & Galenus etiam contemporanei, accuratissimi, præcipuam in his, & in sanguinis missione curandarum febrium spem reponentes, ut patet in vdecimo Methodi, in quo Galenus in
de-

deprauatum istorum institutum in-
uehitur, calidas perfusiones, rela-
xantia, & calorifica cataplasmata
in morborum principijs, in corpo-
rum impuritatibus adhibentium;
& sic ad viscera prauorum succorū
vberem copiam futuræ inflamma-
tionis opificem trahentium, vt ideo
rationabile tradat præceptum de
his non administrandis nisi sangui-
ne prius detracto, & corpore ma-
gna ex parte expurgato. Quod ta-
men præceptum calida constat, &
relaxantia cataplasmata amplecti,
quia hæc ratione caloris impressi at-
trahunt, ratione imbecillitatis in-
ditæ excipiendis excrementis para-
tissimas partes faciunt, non ita re-
frigerantia, & humectantia cum
aliqua adstrictione ad tonum mem-
bris seruandum coniuncta ample-
xari, quia in his proposita ratio non
viget ob contrariam condicionem,
ideoque in his non tanta exigitur
præcedens corporis expiatio, & post
sanguinis detractionem, & leuem
aliquam expurgationem eorum co-
ceditur administratio, imo quia vim
reprimentem habent cum adstri-
ctione coniunctam, vel in princi-
pijs idonea ipsorum à Galeno Cen-
setur operatio, idque duplici ratio-
ne, & quod robur affectis particu-
lis inferunt, vnde minor sit affluen-
tium excrementorum receptio, &
quod succorum in eis contentorum
tenuissimas portiones extrorsum
exprimunt, crassioribus per tempe-
stiuam mox relaxationem educen-
dis. Quo fit, vt Galenica redargu-
tio cataplasmatum intempestiue cū
magno agri detrimento usurpato-
rum ad genus calorificum, & rela-
xatorium pertineat, non ad refrige-
ratorium, & corroborans, cuius et-
iam non leuis est, nec contemnen-
da in corrigendo febrili calore utili-

tas, & diligenter illum Galeni lo-
cum in 11. Methodi examinanti
clarissime patebit hæc veritas. Vn-
de æstu febris vrgente non erit à Me-
thodo alienum æstuantes partes hy-
drelæo perfundere congrua aceti
porzione adiecta, vel vice simplicis
olei rosatum, aut violatum, aut
nimphatum, aut aliud id genus
substituere ad iecur, ad renes refri-
gerandos, quibus etiam partibus,
atque adeo cordi varia Epithemata
erunt accomoda, quale foret ex a-
qua rosacea, violacea, & scabiosa,
endiuiæ, plantaginis, cum pauco
aceto, & sandalis dissolutis. Ex vn-
guento etiam sandalino cum succo
cichorei dissoluto hæc eadem refri-
geratio, & ex alijs similibus poterit
parari, vt non modo p interna adim-
pleatur curatoria febris indicatio,
sed etiam per externa, ad quæ etiā
pertinet ambientis ad frigidiores
constitutionem arte procurata im-
mutatio, humidioribus, frigidiori-
busque cubiculis tum delectis, tum
præparatis, quæ præparatio in eo
consistit, vt per æstatem subterra-
nea sint, & ad septentriones versa,
& pavimenta earum assiduo hu-
more aspersa, inspirantibus auris
gaudentia, & floribus, ac ger-
minibus frigida, humi-
daque facultatis re-
ferta, vt par-
tim in no-
no, partim in
decimo Me-
thodi docet Galenus,
& fuit à nobis in primo
quoque libro ani-
maduersum.

*De Decoctis, & destillatis refrige-
rantibus ad explendam cura-
toriam febris indicatio-
nem.*

CAPIT. XIII.



AD hanc curatorem fe-
bris indicationem absol-
uendam non parum e-
tiam conducunt (vario-
rum oslerum decocta ex pulli præ-
sertim iure confecta, unde nomen-
claturam iusculorum alteratorum
sunt nata, quatenus ex herbarum
inietarum elixatione maiorem
quandam qualitatem, alterandiq;
facultatem apparent adeptæ. Dixi
maiorem, quia ius pulli suo præ-
terea calidiores, siccioresque tempera-
turas emendat, & ad præbendam quan-
dam contemperatæ frugem suc-
cos omnes adigit, sed hanc etiam vim
adaugent, & locupletiores effi-
ciunt refrigerantes additæ herbæ,
& opportunam elixationem in eo-
dem iure expertæ, quales sunt En-
diuia, acetosa, soneus, buglossum,
cichorium, plantago, lactuca, &
aliæ id genus herbæ vel euidenter
refrigerantes, vel suo moderato
temperamento feruidiorem succo-
rum æstum compeſcentes. Quod
si addatur iusculis istis portio con-
grua syrupi acetosi simplicis, vel de
succo acetosæ, vel etiam conseruæ
ex acido citri, vel aliorum similium,
conduplicatur, & inualeſcit vis re-
medij, quia refrigerium maius ad-
iungitur, nec ullus siccitatis conse-
cuturæ metus incurritur, quia vbe-
rior facta dilutio omnem exiccatio-
nis suspicionem repellit. alternam
enim mutuamque sibi operam præ-
stant iusculum, & syrupus, quate-

nus hic quidem, instar vehiculi per
omnes partes iusculum deducit, &
instar calcaris ad refrigerandum
efficacius facit, iusculum autem
sicciorem syrupi vim diluit, humi-
damque reddit. Quod remedium
tanto videtur opportunius, quanto
maiorem habet ius pulli cum no-
stro corpore cognationem, & qua-
lemcumque familiaritatem, ut fa-
cile trahatur per venas, & in om-
nes partes perreptando excurrat, ut
euiadat medicamentum alimenta-
le, iucunditatisque plenum. Quod
affirmare non licet de syrupis sepla-
storum cum aquis stillatitijs, quo-
rum iniucundissimus est sapor, om-
ni ferè gustui repugnans, & asper-
nandus, ut illud silentio inuolu-
amus, magna alioquin animadu-
ersione dignissimum, quod huiusce-
modi syrupi ob nimiam dulcedinem
facile corrumpuntur, & in biliosos
succos vertuntur, ut sæpe plus no-
ceant corrupti, quam iuuent refri-
gerantes. Hinc magis hoc tempo-
re inualuit mos adhibendorum ole-
rum in iure vel per decoctionem,
vel per infusionem nec eorundem
etiam improbatum destillatio, mo-
do non in vate plumbeo, sed vel in
figulino, vel in vitreo sit celebrata,
quorum quidem vel iusculorum,
vel destillatorum vsus non medio-
crem affert refrigerandi opem, &
humectandi matutinis præcipuè
horis adhibitus. In quo tamen il-
la fuerit obseruanda cautio, ne ali-
quod adsit impedimentum, qualis
fuerit excrementitia, crudiorque
materia in primordiis vijs confi-
stens, quæ prius venit euacuanda,
quàm refrigerantes illi liquores pro-
pinentur, qui, si adhibeantur in-
tempestiuè, possunt materias mi-
ſceræ, & ab externis ad penitiores
partes deducere, & infestas obſtru-
ere.

Etiones vltius prouehere, aliaque multa incommoda importare. Sed inferius de opportuno huius remedij vsu verba fient vberiora, quò referendæ etiam sunt aquæ variæ refrigerantes, vt hordei, cucurbitæ, cucumeris, melonum, portulacæ lactucæ, succo vel mali punici, vel limonis, vel citrij, vel omphacij, vel aliorum similium comitata, quæ in maiori febrium feruore mirum præstant refrigerium exhibitæ. nunc satis fuerit explicasse quomodo hoc præsidiorum genus locum habeat in proposita febris indicatione curatoria. nam habet locum per indicantem febrilis caloris essentiam, vnde refrigerantia, & humectantia insinuantur, hoc autem remediorum genus vim retinet, ac potestatem has ambas inuehendi alterationes, & veluti per allatam indicationem insinuat, ita per occurrentia impedimenta inhibetur, qualia nempe sunt vel humor excrementitius in abdomine residens, vel plenitudo totius, vel alia quædam infra consideranda opportunius.

*De remedijs per similia adhibitis
ad curandam febrẽ.*

CAPVT XIII.



Ntequam huic parti finem imponam, quæ in considerandis remedijs ad explendam curatoriam febris indicationem accomodatis versatur, libet parumper ad consideranda ea remedia Stylum convertere, quibus interdum aliquos vti videmus, & fieri etiam quandoque voti compotes,

& sunt tamen remedia multum ab surditatis præferentia, tamquam non à morbi contrarietate, vt recta methodus iubet, sed à similitudine potius, vt temeritas suadet, deducta; non enim desunt modo, nec antiquis etiam temporibus defuerunt qui non refrigerantibus præsidijs, sed calefacientibus, & ignem igni addentibus febres curandas suscipiunt, nec febrilem calorem minue-
re, sed valdè exaggerare, ad magnūque incrementum adducere querunt. Hæc fuit antiqua Prodicti illius Methodus, ab Hippocrate in sexto Epidemiorum commemorati, qui febrientes necabat cursibus, luctatione, fomentis, laborem labore curaturus, vt iure reprehendatur ab Hippocrate, vt notat Galenus in commentario, quippe qui non solum rationali methodo, sed empiricæ etiam obseruationi repugnaret, non à contrarijs, sed à similibus curationem aspiciatus. Hanc tamen curandi viam in medium adduxit etiam Aristoteles in prima problematum particula, vbi querit cur morbi sæpe curari possint per largum excessum, & nonnullos Medicos affirmat eam artem exercere, vt non nisi per excessum agant vel vini, vel aquæ, vel saluginis, vel cibi, vel inedia. In qua quidem quæstione ad propositam curandi methodum alludit, licet Aponensis ita hunc locum explicet, vt de excessu, qui morbo curando sit contrarius, esse sermonem affirmet, sed non debet hæc explicatio admitti, quia progressus per contraria non sæpe adhibetur, nec a nonnullis Medicis, sed semper ferè, & quasi ab omnibus communem methodum seruantibus, vt clarè appareat philosophum loqui de peculiari quorundam Medicorum curatoria ratione,

tionem, qui à communi via deflētentes non ex contrarijs, sed ex similibus excessum obtinentibus curationem ineunt. Vnde soluens dubitationem respondet hoc ideo fieri, quia cum morbifica causæ aduersæ inter se sint, per contrarij excessum duci in medium possunt, vt si quis febricitet ex causa calida, per frigidi excessum sanari debeat, si ex causa frigida per excessum calidi, vt sic vnus, idemque morbus, qualis est febris, possit per contrarium excessum, modo refrigerando, modo calefaciendo factum, curationem subire. Quod vel ab ipso Hippocrate approbatum interdum legimus. nā licet Prodicum acriter carpat, & febrientium interfectorem nuncupet, non tamen progressum per similia semper abhorrendum statuit, carpit Prodicum quia semper à similibus petebat opem, & multorum similibus inducebat cōgeriem, quod nec vlla ratio permittit, & omnis experientia respuit. At licere interdum pro curandis febribus ad similia confugere idem Hippocrates ostendit longa oratione in libro de locis in homine, vbi ostensurus artis Medicæ difficultatem, eam ex eo præcipuè colligit, quod non habet certa, rataque decreta, quibus sit perpetuo standum, veluti habet exempli gratia Ars Pictoria, cuius sunt certa documenta omni pariter tempore obseruanda, At Medicina diuersis temporibus diuersa vsurpat remedia, & ea interdum inter se contraria, ac planè repugnantia, vt febrem modo curet refrigerantibus, modo calefacientibus, modo euacuantibus, modo replentibus pro varietate corporum, & occasionum; vt nullus relinquatur dubitandi locus, quin Hippocrates talem dederit contrarijs curandi locum,

vt aliquem etiam similibus reliquerit, contrariam curationis rationem aliquando à Medico adhibendam, confessus. Quod forsan ex hoc etiam Hippocratico loco sexti Epidemiorum colligere possumus, Humorem alium non prodeuntem educere conuenit, prodeuntem simul effundere, operari simile, vt dolor dolorem sedat, dissimilia sublimè lata deorsum soluere, ex quibus verbis multi collegerunt concedi curationem & per contraria, & per similia, quod in examen reuocat etiam Galenus in commentario, & forsan ad hunc etiam sensum trahi possunt illa celebria sexti Epidemiorum verba, contraria sensim adhibere oportet, atque interquiescere quasi Hippocrates non solum de contrarijs morbo repugnantibus loquatur, sed etiam de remedijs sibi inuicem contrariantibus, quorum prima non ita sensim sunt adhibenda, vt secunda, quia prima claram habent indicationem, & rectæ methodo innituntur, secunda illam habent obscuram, & ab hac videntur deuiare, vt ideo timidiusculè sint aggredienda, & paullatim vsurpanda, sic vt non sit continua eorum administratio, sed interpolata, & per intercedentem quietem distincta, vt euentus obseruatio plenior nobis tradat notitiam, num benè huic remedium generi manus dederimus, & num eorundem repetitionem capescere debeamus. Quam quidem rem apertè explanauit Paulus Ægineta hæc in tertio libro in casu Arthritidis dicens. In vniuersum, vbi abdita morbi causa est, varijs quoque remedijs pugnandum est, nunc quidem consimilibus, nunc verò planè contrarijs, neque iisdem tamen diutius insistendum, si nullo sunt præsidio. Quibus verbis si quis dicat

proponi à Paulo contrariorum vsum in causâ morbificâ ignoratione, in cuius notitiâ non ita illum concederet, is considerare debet absolute hanc contrariorum in curandis morbis adhibendorum rationem loco illo de locis in homine ita euidenter fuisse propositam, vt nulla supersit dubitandi occasio. Quam omnem etiam adimit accedens Celsi testimonium, perpetui Hippocraticæ doctrinæ sectatoris, qui libro tertio febres lentas ita curandas suscipit, vt morbi mutationem consulat, & in ipsa accessione vinum exhibeat, vt febris intendatur, & maior ortus calor simul & priora mala tollat, & spem remissionis in ea curatione ostendat. Neq; hercules (ait Celsus) ista curatio noua est, quâ nunc quidam traditos sibi ægros (qui sub cautionibus Medicis traherantur) interdum contrarijs remedijs sanant. Si quidem apud antiquos quoque ante Herophilum, & Erasistratum, maximeque post Hippocratem fuit Petron quidam, qui febricitantem hominem vbi acceperat, multis vestimentis operiebat, vt simul calorem ingentem, sitimque exciraret. His alia subiungit Celsus progressum illius Petronis declarantia per similia factum, & hanc medelam non minus gratam fuisse affirmat, quàm rationali Methodo incedentem, illam tamen temerariam vocat, quia plures à principijs exceptos interemerit, & verum esse nihilominus fatetur, vt quos ratio non restituit, temeritas adiunget, & circumspecti quoque hominis statuit, & nouare interdum, & augere morbum, & febres accendere, quia curationem vbi id quod est non recipit, potest recipere id quod futurum est. Hic Petron à Celso commemoratus erat Prodicus illius ab Hippocrate inducti verus

imitator, & æmulus, quatenus vterque non per contraria refrigerantia, sed per similia calefacientia febrem accipiebat sanandam, in eo tamen alter ab altero differebat, quod Prodicus inediam imperabat, & famem, Petron plenè nutrebat, vinum exhibens, & carnem suillam. Ex quo colligimus antiquissimam fuisse hanc medendi rationem, quæ tantum continere videtur absurditatis, vt minus admirati debeamus super esse nostris etiam temporibus antiquissimæ consuetudinis magna vestigia, à quorundam Medicorum incessu impressa, & in exteris præcipue regionibus conspicua. De qua consuetudine duo breuiter hic inquirenda veniunt, quorum alterum est, num ad Methodum redigi possit, alterum verò num à cordato Medico in vsum reuocari debeat. nam quantum ad primum, nil videtur excogitari posse absurdius, quàm per calorifica caloris extinctionem, moliri, cum similia similibus foueantur, contraria contrarijs aboleantur, imo concuti hinc videtur, & funditus illud euerti principium illud communissimum, omnium Medicorum firmatum consensu, in primo libro accuratè discussum, contraria esse contrariorum remedia, quod omni tempore verissimum esse multipliciter confirmat in Vndecimo Methodi Galenus, & locum habere nō solum in morbis, sed etiam in symptomatis, quamuis horum nec propriè curatio sit, nec propriè contrarietas, sed curatio quidem simul cum affectibus ex accidenti, contrarietas verò abusiue. At si hæc vera sunt, quomodo fieri curatio per similia potest, quæ tamen fieri interdum solet, vt præmissa veterum testimonia affirmant, & quædam agrorum experimenta, confirmant. Sed dubitationem sol-
uamus

namus dicentes, remedia, quæ videntur similia, fieri demum contraria, esse à primordio similia, euadere in fine contraria, esse secundum formam similia, secundum operationem contraria, esse per se calefactoria, per accidens refrigeratoria, & hoc nomine febris sanatiua, nam fomenta calidiora, operimenta, vina sunt quidem calefactoria, & ex se promunt essentialem calefactionem, sed quia simul caliditatem igneam discutiunt, & per euaporationem inductam dissoluunt, refrigerare demum dicuntur, & in principio, & per se calefaciunt, in fine, & per accidens refrigerant, calefaciunt immediatè, & hoc modo febrem augent, refrigerant intermedia apertione, & euaporatione materierum calidarum, & hoc modo febrem dissoluunt. nam refrigerantia quoque frigidorum morborum euadunt remedia, quatenus nempe per antiperistasis innatum calorem cogunt, & validiorem efficiunt ad frigidos superandos affectus, vt clarum exat exemplum de superiectione frigida mul tæ in distentione citra vlcerationem iuueni bene canoso, æstate media ad reuocandum calorem facta, qui calor morbosum affectum soluit, vt ait Hippocrates in celebri aphorismo. Frigidus est affectus teranus, & sanatur interdum à frigida adiectione vberi, si vsu venit vt calorem cogat, & intra reuocet cum magno sui incremento, alioquin non foret præsidium, sed excidium, iuuat ergo non vt frigida, quia vt talis obest, sed vt congregans calorem, & exaggerans, non iuuat per operationem essentialem, quæ est refrigeratio, iuuat per accidentalem, quæ est caloris conduplicatio. Pari pacto calida possunt tollere calidum morbum, non

quatenus calida, sed quatenus refrigerationis per discussionem, & euaporationem inductiua, vt per propriam operationem obsint, per accidentalem profint, tantum hæc accidentali modo refrigerantia, quantum frigida apparent eodem modo calefacientia. Et sic fieri potest vt frigida sanent affectus frigidos, calida calidos, & hæc tamen sanatio non fit iure similitudinis apparentis, sed contrarietatis delitescens, quia frigida vt calefacientia, calida vt refrigerantia sanant, & sic manet inconcussum Medicum principium perpetua veritate comitatum, contraria contrariorum esse remedia. Hæc igitur fuerit dubitationis solutio, eo libentius amplexanda, quo est euidentius à Galeno in medium allata, qui exponens in secundo commentario sexti Epidemiorum superius adductam Hippocratis sententiam de humoribus educendis, & de operatione per similia, hanc eandem dubitationem & proponit, & dissoluit hæc præter alia scribens. Vt auxilium aquæ, quod frigidum videtur, tetanum frigidum affectum calefaciendo interdum iuuat, sic calefacientia alia per accidens refrigerant, caliditatem igneam discutientia, & euaporantia. In quo sensu cum multa dixerit Galenus tandem concludens pollicetur librum rectæ in curando Methodi confirmatum hoc nomine inscribendum, Quod bene ab Hippocrate dictum sit, contraria contrariorum esse remedia. Verum cum apparuerit viam, quæ per similia videtur progredi, ad methodum facile redigi, restat vt breuiter consideremus num aliquando ineunda, an semper dimittenda. Quo in proposito memoria repetere debemus illud Hippocratis præ-

clarissimum monitum in Epidemio-
rum tertio, ut ad hoc exerceamur,
ut in morbis si non iuuenus, saltem
ne quid noceamus; quia turpissi-
mum fuerit inde augeri morbum,
unde debet tolli, & qui auctor esse
debet salutis, auctorem fieri perdi-
tionis. Et licet huius viæ remedia
sint aliquo pacto rationalia, ut o-
stendimus, hæc tamen ratio est te-
meraria vel ipso fatente cello, &
temeritas est inimica consilio, &
malæ fortunæ obnoxia, & cum ars
hæc paratissimos semper habeat ob-
trectatores, non debet bonus arti-
fex obtrectationes à longinquo ac-
cersere, sed imitari bonos Duces,
qui si possunt, cunctando restituunt
rem; nec illa in prugnis facta ag-
grediuntur, quæ tanti discriminis
plena videntur, ut iuxta dictum
Lyrici vel mors cita, vel victoria
lecta, Cautus sit dux, cautus sit
Medicus, qui cum experimentum
sciat periculosum, si in alterutro pec-
candum sit, malit videri nimis ti-
midus, ut ait ille, quàm parum pru-
dens, quippe ex tribus condicioni-
bus ab Asclepiade in medela requi-
sitis, ut tuta sit, ut cita, ut iucun-
da, prima primas obtinet, & dua-
bus reliquis existit potior. Sed quæ
securitas fuerit in ipso febris insul-
tu mulsi, & vini plures cyathos, &
carnem suillam exhibere? febrem
irrendere ut remittas, calorem auge-
re ut minuas, accendere ut extin-
guas? At exstinguetur forsitan non
febrilis, sed ipse calor innatus ex ni-
mio incendio marcorem perpeffus.
Nec fidendum consecuturæ potioni
frigida, quia interdum plus possunt
arguentia morbum, quam minuen-
tia, illorum exeruntur statim vires,
horum occultantur, & raro adsunt
necessariæ ad propinandam frigida
condiciones. Hæc medendi ratio

plures interficit, sanat pauciores,
ergo rarum habet quasitum effe-
ctum, sub vera via rationali plures
evadunt, quàm pereant, ergo op-
tatum euentum habet frequentio-
rem, & quia rarum est proprium
fortunæ, frequens artis, ut docet
Phylosophus in secundo Physicorū,
ideo opus primæ fuerit fortuitum,
secundæ artificiale, at Medicus non
fortunæ, sed artis debet esse secta-
tor, ut nos monet Hippocrates in
libro de Arte omnem à fortuna de-
pendentiam redarguens, quod fa-
cit etiam in libro de locis in Homi-
ne hæc memorabilia verba conscri-
bens. Firma est ars tota Medica,
eiusque præceptiones, ex quibus
constat, pulcherrimæ fortuna mi-
nime indigere videntur. sui enim iu-
ris est Fortuna, nullius imperio pa-
ret, neque ad cuiusquam votum se-
quitur. Scientia verò imperio pa-
tet, neque felicitis successu caret, si
quis ea instructus uti volet. His, a-
lijsque consequentibus dictis nos
reuocat Hippocrates à temeritate
fortunæ, cuius tamen fauorem bo-
no artifice, eiusque operibus prosi-
tetur non deesse. Concludamus ergo
vel numquam, vel raro proposi-
tam medelæ viam ineundam, in
magna videlicet perturbatione, ac
desperatione rerum, in validissimis
que corporibus, cum iuxta Paræ-
miam res redijt ad triarios, & o-
porteret, vel ipso monente Galeno
in decimo Methodi iuxta Thucidi-
dis dictum aliquid agentes vel pe-
riclitari. Quod si hanc ab Hippo-
crate; & à Cello, alijsque proposi-
tam legimus, non tamquam eam,
quæ expediat, sed tamquam eam,
quæ locum aliquando habeat, pro-
positam dicimus, & Celsum præ-
cipuè eius non tam laudatorem,
quàm moderatorem asserimus.

De Indicatione Præseruatoria
Februm Putridarum.

CAPVT XV.



Absolutis duabus putridarum indicationibus, vitali nempe, & curatoria, quarum non indiligens fortasse habuimus hæcenus examen, aggredienda postremo venit indicatio præseruatoria ad propositi muneris complementum. Illud ergo primo dicamus, quod veluti indicatio vitalis respicit vires, curatoria morbum, ita præseruatoria causam morbi. nam vt vitalis tueri vult vitam, quæ consistit in conseruatione virium, curatoria vult morbum depellere, qui actiones lædit, ita præseruatoria vult morbi generationem impedire, quæ pendet à causa. In febribus ergo putridis munus indicationis præseruatoriæ tendit ad inhibendam causam, vnde febris suum habet ortum. diximus enim supra cum Galeno in vndecimo Methodi in febribus considerari partim portionem genitam, partim generandam, ratione portionis genitæ locum habet indicatio curatoria, ratione verò generandæ præseruatoria. Generatio febris pendet à putredine, à qua manant putridi vapores febrilem intemperiem inuehentes, putredo pendet à transpiratione prohibita, quæ inhibet diffationem caloris, eumque efficit igneum, & ad humores dispositos putrefaciendos accommodatum, prohibita transpiratio pendet vel à condensatione, vel à constrictione corporum, vel ab obstructione, nam quæ vel densata sunt, vel constricta, vel obstructionibus im-

pedita liberum non habent, nec expeditum effluuium consuetum, & veluti condensatio, & Constrictio soboles sunt rerum refrigerantium, & adstringentium, ita obstructio fructus est humorum vel multitudinis, vel crassitie, vel lentore peccantium; vt humores multi, crassi, lenti obstructionem efficiant, obstructio transpirationis retentionem, transpirationis retentio putredinem, putredo demum febrē, vt septem sint præter naturam posita seriatim iuxta Galeni animaduersionem in illo Vndecimo Methodi, à quibus indicationes sumuntur in febribus continuis, humorum multitudo, crassitudo, lentor, obstructio, transpirationis retentio, putredo, & febris ipsa carens intermissione, quæ omnia contrariorum habent insinuationem. nam multitudo humorum indicat euacuationem, crassitudo attenuationem, lentitudo deterfionem, obstructio reclusionem, transpirationis retentio excretionem, putredo & excretionem, & ventilationem, & refrigerationem, & semiputridorum concoctionem, febris demum refrigerationem. Hoc eodem pacto densatio, vnde aliquando emergit transpirationis impedimentum, rarefactionem, ipsa verò constrictio fusionem tamquam contraria adhibenda suadent. Sed hic forsitan dubitauerit aliquis cur Galenus in Vndecimo Methodi recensens septem illa præternaturalia, vnde in febribus continentibus putridis eliciendæ sint indicationes, vt diximus, nullam fecerit condensationis, & constrictionis mentionem tamquam causarum, quæ possunt transpirationis retentionem efficere, vt in eodem libro paullo ante docuerat asserens, & putredinem

nem fieri à transpiratione prohibita; & transpirationem prohiberi partim condensatis, partim constrictis, partim obstructis meatibus, ut vnam fecerit putredinis immediatam causam, transpirationis nempe retentionem, huius autem retentionis triplicem causam adduxerit, condensationem, constrictionem, obstructionem. Cur ergo in recensendis rebus præter naturam, quæ veniunt remouendæ, non meminit etiam condensationis, & constrictionis, veluti meminit obstructionis ab humoribus multis, crassis lentis progenitæ? Huius rei illa reddenda fuerit causa, quod ubi enumerat septem illa præter naturam, verba facit de febribus putridis continentibus, quæ gignuntur à putredine, quæ pendet quidem à transpirationis retentione, sed non à qua libet, sed ab ea, cuius causa, & obstructio, multos, crassos, & lentos humores consecrata, non cuius causa est vel condensatio, vel constriction, quia meatibus solum vel condensatis, vel coniuëctibus, vel numquam ferè, vel in frequentissimè fit putrida febris, cuius obstructio dicitur comes inseparabilis, sed fit febris vel Ephemera, vel synocha non putrida, ut idem docet Galenus in nono Methodi. Qui in Undecimo ante illam septem rerum præternaturalium enumerationem considerans transpirationis retentionem, non eam solam considerauit, quæ locum habet in febre putrida, & pendet à causa obstruente, sed qualemcumque retentionem illius naturalis effluxus à qualicumque causa profectam, siue sit condensatio, siue constriction, siue obstructio, ideoque ibi cuilibet causæ suum opposebat contrarium, ut condensata rarefierent, constricta funderentur,

obstructis ex copia aptarentur euacuantia, ex crassitie attenuantia, ex lentore humorem detergentia. Non ergo proponebantur causæ prohibita transpirationis, quæ faceret putridam febrem, sed absolute cuiuscunque transpirationis impedita, qualemcumque febrem siue intercedente, siue deficiente putredine efficientis, nam cum putredo supponat, & arguat impeditam, transpirationem in febribus, ut sui causam immediatam, huius transpirationis impedite omnes fuerunt causæ & inuestigandæ, & recensendæ, ut ea causa innotesceret, quæ in excitanda putredine locum propriè haberet. Iam ex illis septem enumeratis rebus præternaturalibus, multitudine scilicet, crassitie, lentore, obstructione, transpirationis retentione, putredine, & febre, quæ indicationes eliciuntur partim curatoriæ sunt, partim præseruatoriæ, quia res illæ omnes sunt præternaturales ideoque remouendæ, & sunt vel affectus, & exigunt curationem, vel causæ, & pertinent ad præseruationem. nam euacuatio, attenuatio deterfio sequitur præseruatoriam indicationem, in obstructione quatenus est iam facta, & habet rationem morbi præsentis subest indicatio curatoria, quæ residet in reclusionem, quatenus est in generatione, & habet rationem morbi imminens subest indicatio præseruatoria ad inhibendum humorum obstruentium confluxum relata, ita etiam transpirationis retentio facta curationem insinuat per excretionis operam, futura, & imminens præseruationem per remedia obstructioni medentia. Putredo ratione portionis in generatione existentis præseruatoriæ indicat refrigerationem, & ventilationem. In febre demum pro parte

parte facta consideratur indicatio curatoria refrigerandi, & humectandi, pro parte generanda attenditur indicatio præseruatoria putredinem inhibendi. Ac febris quidem indicatio prima est quæ consideranti se offert, non prima tamen quæ operanti subest, nisi primum ei etiam concedamus, quatenus à febris incipit inueniendorum præsidiorum methodus. At quæ vltima apparent inuenienti, prima adfunt exequenti. nam cum ad tollendam febrem opus sit putredinem tollere, ad hanc remouendam remouere transpirationis retentionem, ad hanc depellendam depellere obstructionem, ad hanc sanandam impedire humorum confluxum, quod sit euacuatione potissimum, euacuatio quidem vltima inuenitur, sed prima perficitur, quia à prohibendo humorum confluxu debemus incipere, ideoque primo euacuantia præsidia usurpare qui enim tollendis obstructionibus operam nauat non euacuato prius corpore vniuerso, & deobstruentia auxilia adhibet non sublata prius multitudine, non modo nil proficit, nec voti fit compos, sed quas tollere obstructiones parat, conduplicat magis, & vterius promouet maiori excitato succorum abundantiam ad partes obstructas confluxu, vt abundè Galenus declarat in Vndecimo Methodi, illud inter cætera ostendens, ad remouendam in febribus putridis humorum multitudinem, incipiendum à sanguinis missione esse, quòd hæc ad faciendam omnium æqualiter humorum euacuationem miras habeat vires.

De sanguinis Missione vt remedio febris putridæ præseruatorio.

C A P V T XVI.

Phlebotomiam superius considerauimus vt remedium curatorium febrē ipsam respiciens, & refrigerandi vim habens non contemnendam accidentaria saltem ratione, vt declarauimus; nunc eadem consideranda venit vt remedium præseruatorium ad causam febris directum. nam cum ad tollendam hanc causam opus sit tollere multitudinem, & humorum ad partes obstructas tendentium prohibere confluxum, ad hunc finem valdè conducit sectio venæ, quippe quæ non vnicum tantum humorē, sed omnes æqualiter in venis existentes iuxta dictum Galeni in secundo aphorismorum euacuet. Indicatur ergo hæc euacuatio à causa morbum magnum excitante, & fouente, quæ est sanguinis inutilis multitudo. nam vtilem sanguinem euacuare qui decet? Conseruandus hic potius est, suisque in receptaculis retinendus tamquā vitæ fomes, verusque Thesaurus. Amouentur, & euacuantur quæ sunt præter naturam, & quæ naturæ molesta sunt, & inutilia. Sanguinis igitur quæ inutilis euacuandus. Verum duplici nomine potest esse inutilis, vel ratione qualitatis, vel ratione quantitatis, primo quidem nomine, cum propriam qualitatem exactè non retinet, nec bene nutriendis partibus, vt solebat, accomodatus est, secundo autem nomine cum ad tantā affluentiam peruenit, vt aut vires premendo labefactet, aut vasa replendo vel distendat, vel infrin-

gat,

gat, vel obstruat. Vtroque nimirum nomine inutilis est, & onerosus naturæ, quæ non alimentum accipit inde, vt expectat, sed vel putredinem sustinet, vel bonam partium conformationem perdit. Ad hanc igitur summouendam faciliorem, ad hoc eximendum onus apprimè phlebotomia conducit, & quantum sanguis ille est inutilis naturæ efflagitanti, tantum hæc est utilis laboranti, quia partim corrigit prauitatem, partim minuit multitudinem. Corrigit vbi sanguis qualitate peccat, quatenus innatum calorem euentat, & ad meliorem quandam simmetriam redigit, vt sanguinem melius regere, & meliorem gignere possit, minuit vbi sanguis peccat quantitate, & exuberantiam præfert, quatenus molestam plenitudinem euacuat. Ac veluti in hoc casu remedij euacuatorij munus explet, ita in altero reuulsorium præcipuè, ac deriuatorium præsidium se præstat, quia vehementiorem humorum impetum partim in diuersam partem reuellit, partim per propinquam deriuat. nam cum non adest sanguinis plethora, non indigemus vniuersali euacuatione, nec de vasis inaniendi suscipere cogitatione debemus, illud porius onus incumbit, vt prauum existentem sanguinem ab incæpto confluxu reuocemus, & eum, qui iam confluxit, per partes propinquiores educaamus. Quod si quis velit fructum agnoscere commemoratæ reuulsionis, ac deriuationis in putridis febribus, illud consideret, in partibus illis, vbi adest focus putredinis, subesse præternaturalem quandam calorem putredinis opificem, qui ad se pelliciat, auideque trahat peccantem sanguinem suo pte, etiã

nutu confluere paratum, suaque præsentia magnum putredini incrementum præbentem, & quia effetricem causam adauger, & quia materiale cumulationem suppetat. Prodest ergo reuellere in partes diuersas, ne confluat ad affectam, prodest deriuare per propinquas, ne permaneat in affecta. Vim autem caloris in parte residentis, quæ focus includit putredinis, explanat Galenus, & in Vndecimo Methodi, & in secundo de differentiis febrium. Erit ergo phlebotomia in febribus propositis modo euacuatorium, modò reuulsorium, modò deriuatorium, præsidium, nec locum solum habebit vrgente plenitudine, vnde inanitio insinuat, sed sanguine etiam ita alterato, vt prauæ qualitatis vitium subierit, vnde correctio, & ad meliorem quandam frugem reuocatio indicitur. Hæc est clarissima, obseruationeque dignissima Galeni doctrina in Nono Methodi, vt concludere possimus non solum in copia sanguinis, sed etiam in quadam corruptela adhibendam esse febricitantibus phlebotomiam, quia quod corruptum est, euacuandum venit, quatenus omne corruptum est naturæ infestum, & inimicum, & omne tale non retinendum, sed excernendum; sit autem euacuatio vitiosi sanguinis vel purgatione, vel vena incisa, quorum præsidiorum delectum facit prudens Medicus, alterum alteri præferendo, quippe qui in cacochymia insigni purgationem amplexabitur magis, in leuiori missionem sanguinis vsurpabit, quæ portionem vitiosi sanguinis euacuet, eiusdemque regenerationem meliorem præstet, innatum calorem contemperando, & inditam succis labem eximendo, quod in-

intelligendum præcipue venit de cacochymia biliosa, & atrabili non excedentibus, vbi calor effruescit, non de pituitosa, vbi idem languescit, vnde crudiorum succorum viget prouentus à phlebotomia potius dehortantium. Quinimo vel in primoribus vijs existente cruditate differendam censer Galenus venæ sectionem quousque elaborata concoctio fuerit, quo etiam factum est, vnde in illo nono Methodi libro narret in iuvene quem synocha febris corripuerat, & omnia ferè comitabantur insignis plenitudinis signa, distulisse se tamen venæ sectionem ob apparentem in eo coctionis tarditatem, vt interposita mora, & delitescentem adhuc febris naturam aperiret magis, & cunctantem alimonie coctionem perficeret satis. Sed quid in cruditate obseruandum sit ex Galeni mente plenius supra fuit explicatum. Et quia interdum, imo sæpenumero cum proposita sanguinis corruptela iunguntur vires non benè validæ, & veluti illa euacuationem insinuat, ita istæ custodiam sui requirunt, & quæ euacuatoria sunt præsidia non sunt custodiendis, subleuandisque viribus opportuna, insurgit tunc indicationum euidentis pugna, cum aliud affectus indicet, aliud virtus requirat. Quo in casu nobile dat Galenus documentum, vt in vtramque partem oculos dirigamus, & paulatim quod vitiosum est euacuemus, paulatim inuicem, quod salubre est, pro eo reponamus, partim euacuantes, partim roborantes, quam vitiosi succi curationem vocari communiter à Medicis Epicrasin est auctor, & habet locum non solum in purgatione phar macis molienda, sed etiam in phlebotomia administranda, quæ in

hunc finem directæ non semel adhibetur, nec euacuatione conferta absoluitur, quam vires non sunt ferendo, sed in plures vices distribuitur, & quod non vnicæ sectione venæ erat præstandum, id pluribus repetitis leuiusculis perficitur. Quæ ratio euacuandi seruat præcipue quando est in sanguine vitium qualitatis, cuius gratia non euacuanda plenitudo, sed prauitas venit emendanda, vt ideo non magna sit opus phlebotomia, viribus non benè constantibus, eamque sustinere nequeuntibus. Quod non modo in nono Methodi cumulatè docet Galenus, sed in quinto etiam prius docuerat, vt supra considerauimus ipsius, adductis in medium verbis. Quæ sunt de his, qui vlceri pulmonis ex vitioso confluente succo sunt obnoxij ad quos præseruandos cum triplex præsidium proponeret, purgationem, medicamentis, quod diaspermation dicitur, exhibitionem, capitis prouisionem, docebat etiam modum in sanguine illis detrahendo seruandum, ab Epicrasi videlicet deductum. At cum succorum vrget affluentia, claraque apparent plethoræ argumenta, audacter licet sanguinem detrahare, & copiosam excretionem moliri, quia tunc ferè semper virtus validior subest, & si aliquando apparet infirmior, id potius contingit ratione oppressionis, quam resolutionis, vt ideo hæc imbecillitas euacuando subleuetur, quasi onere, vnde prius premebatur, liberata. Hinc fit, vt in magna sanguinis plenitudine venæ sectionem celebrandam vel vsque ad animi aliqualem defectum, quæ Græci vocant *ἀποθνήσκω*, suadeat in nono Methodi Galenus, vt supra considerauimus, magna tamen cautione adhibita, ne tanta fiat dissolutio,


lutio, vt vires collapsæ non amplius valeant consurgere, quasi animi illum defectum exclusiue, vt aiunt, intelligat, non inclusiue, quem mittendi sanguinis modum vsurpandū consulit in febribus synochis, seu continentibus, his præcipue, quæ citra humorum putredinem accenduntur. nam licet duobus iuuenibus, quos febris synocha correptos legimus in nono Methodi, aperta, utriusque vena fuerit vsque ad animi deliquium, cum alterius febris continens esset sine putredine, alterius etiam cum putredine, tamen in hoc ultimo tum primum incipiebat putredo, nec multum inualuerat, vt remaneret adhuc satis integra sanguinis exuberantis constitutio, & firma vigeret virium dispositio. Quod non contingit in perseverante, diuturnioreque moram trahente putredine, quia tunc obrepit sanguinis effatu digna corruptela, sanguineusque succus partim in biliosum, partim in melancolicum facessit, & abit, nec seruetur amplius pristina continentis febris. Idea, sed sit continua vel biliosa, vel melancolica, nec in continuis id genus febribus tuta est hæc sanguinis mittendi largior manus, quâ in omnibus etiam suspectam supra ostendimus, sed in modo propositis est non leuibus discriminibus obnoxia, vt clarè docet Galenus in decimo capite illius noni. Qui etiam in quartodecimo capite Vndicimi affirmat in sola succorum redundantia, si nulla nec obstructio subsit, nec putredo, proinus à missione sanguinis consecuturam incolumitatem, quæ missio tanta sit, quantum supra naturalem statum excreuerat redundantia. At in putrida febris, in qua nec obstructio, nec putredo sanari phlebotomia possunt,

reponi aliquid sanguinis ad spatiū curationis debere statuit, quominus in tempestiue ad sustinendas vires nutrire cogamur, vt non ea copia sanguinis educatur, quæ plenitudini conueniat, sed pars aliqua, quæ fuerat alioquin euacuanda relinquitur ad membrorum alimoniam in diuturno curandæ febris spatio, vt leuibus vtentes cibarijs, medicamentosis potius, quam nutritorijs curandæ commodius febri nauare operam valeamus. Ex quo nimirum colligitur in putrida febris, vbi adest etiam sanguinis copia, si putredo inualuerit, non commendari pleniorē phlebotomiam pro multitudinis ratione, quia in synochis putredinis expertibus potest hæc sola salutem afferre, quippe quæ redundantiam succorum omnem, quæ sola facessit negotiū, possit adimere, sed in putridis non ita præstare hoc potest, quia nec putredinem, nec obstructionem tollit per se venæ sectio, & hæc tolli debent, suæque habent propria, & accomodata præsidia, quæ & superius inuimus, & inferius explicabimus. Potest quidem illa futuram, & generandam obstructionem à sanguinis multitudine pendentem impedire, & cohibere, sublato per euacuationem humorum confluxu, sed factam iam, & generatam non potest eximere alijs præsidijs deobstruendi vim habentibus eximendam, vt supra etiam diximus, quibus adhibendis quia tempus non exiguum requiritur, cauendum diligenter venit, ne ob largiorem sanguinis educationem vires languescant, & largiorem alimoniam exigant, vnde febris incrementum accedat, vt satius sit non omnem insinuatam sanguinis copiam exhaustire, sed portionem reponere nutritiendis.

riendis partibus accommodam, quo nobis detur commodior sine febris incremento à plenioribus cibis profecto auferendæ tum putredinis, tum obstructionis facultas.

*Dubitationis ex dictis emergentis
examinatio, & solutio.*

CAPVT XVII.



Dubitationem, quàm superius quasi per transennam attigimus, libet hic rursus ad incudem reuocare, vt acuratio-
ris indaginis ictibus agitata plenior-
rem veritatis depromat lucem. Dubitauimus supra quomodo venæ
sectio adhibeatur ad sanandam fe-
brem putridam, si hoc remedium
Galenī testimonio non sanat putre-
dinem, nec obstructionem, solui-
mus tunc etiam allatum dubium,
quod nunc accuratius soluendum,
pleniusque suscipimus dicentes,
quòd venæ sectio præter fructum
ventilationis, & refrigerationis pu-
tredini illatum, de quo superius
locuti sumus, explet præclarum
munus remedij præseruatorij, qua-
tenus minuit succorum abundan-
tiam, eorum confluxum compe-
scit, obstructionis pabulum, tran-
spirationis prohibet aufert occa-
sionem. Nec proprijs prædijs cu-
rari obstructio potest, vt sæpe in
Vndecimo Methodi testatur Gale-
nus, nisi prius vniuersi corporis fa-
cta fuerit euacuatio, sine qua ad
partem obstructam fit maior attra-
ctio, maior succorum ad augendam
obstructionem accommodatorum cō-

fluxio. Et quantum vniuersali eua-
cuationi conducit venæ sectio, tan-
tum ad sanandam obstructionem,
atque adeo putredinem confert,
quippe quæ reclusioni, putredinis-
que correctioni expeditam viam
aperiat. Nec iuuat solum mate-
riam confluxuram demendo, sed
eandem etiam in diuersas partes re-
uellendo, & eam, quæ iam conflu-
xit, per propinquas partes deriuan-
do. Quibus quidem modis fit, vt
& pabulum obstructioni, & conse-
quenti putredini dematur, & pu-
tredinali calori, ignis in foco resi-
dentis vicem subeunti, non leue
refrigerium importetur. Hinc ma-
nauit celebre illud Galeni docu-
mentum, cuius supra fecimus ani-
maduersionem, phlebotomiæ vt re-
medij curatorij rationem haben-
tes, saluberrimum esse in febribus
venam incidere non continentibus
modo, verum etiam alijs omnibus
à putrida materia accensis, vbi nec
ætas, nec vires prohibeant. Cuius
quidem rei præclaram affert ratio-
nem in hoc positam, quòd leuata
corporis administratrix natura, &
quodam quasi onere, vnde prius
premebatur, liberata facile quod
reliquum est vincit, quia proprii
non oblita muneris, & coquit quod
coqui est habile, & quod potest ex-
cerni, excernit. Ita fit, vt sangui-
nis missio non solum vtilissima sit
febribus continentibus, quæ multi-
tudinem demit, hancque demendo
omnem febrilem calorem sopit, sed
vtilissima etiam quibuscumq; febr-
bus putridis, quæ vim tum cōcoctri-
cētū expultricem ad sua munia ob-
eunda erigit. Quo quidē nomine, &
putredinem respicit, & obstructio-
nem, putredinem quidem, & con-
coquendo, & euacuando, obstru-
ctionem

ctionem verò euacuando, confluentemque materiam excernendo, ut saltem ratione accidentaria venæ sectio, & putredini, & obstructioni conducatur, quippe quæ naturam ad succos semiputridos, concoquendos, putridos, vel putredini obnoxios excernendos moueat. Vallet in febribus continentibus putredinis expertibus tamquam remediū euacuatium, quod præcipue respicit peccatum sanguinis in quanto, valet in quibuscūq; febribus putridis tamquam remediū nō modo euacuatium, sed etiam reuulsorium, & euentatoriū, quod respicit vitiū sanguinis non solū in quanto, sed etiam in quali. Ac veluti febris ob magnam calidiorem intemperiem conuenit ut remedium curatorium, ita causæ febris, quam fouet sanguis inutilis, congruit ut remedium præseruatorium. Vltimum erat hoc remedium in inuentione, sed primum fuerit in executione, quia progrediebamur a febre ad putredinem, a putredine ad prohibitam, transpirationem, a prohibita transpiratione ad obstructionem, ab obstructione ad succorum lentorem, crassiniem, multitudinem, quæ multitudo venit euacuanda, eiusq; confluxus ad partes obstructas inhibendus. Quam quidem euacuationem, & confluentis materiæ inhibitionem mirum in modum præstat sanguinis detractio, a qua sumendum exordium in curandis febribus putridis, in quibus non licet a primordio purgante pharmaco multitudinem minuire, ut ostendemus inferius, & inchoantibus morbis mouenda sunt quæ mouenda veniunt iuxta Hippocraticum in Aphorismis consilium, & motus hic duplex est, vel purgante medela, vel

phlebotomia factus, & cum primis rarissimè conueniat in principio, reliquus est vsus secundi, nullam præcedentem humorum coctionem, purganti pharmaco debitam, requirentis, & suo pte nutu primum sibi ordinem, dum refertur ad pharmacum, vindicantis. nam si fuerit in primoribus vijs crudorum prouentus extremetorum, vel clyster abunde sufficere, vel medicamentum leniens satis erit, superque, quod leniens medicamen locum habebit præcipue in febribus intermissione præditis, & a cruditarum congerie vel generatis, vel fortis; At si continua fuerit febris, venosi labem generis præseferens, non erit cunctandum, præmissa clystere (si fuerit opus) tundere venam, ut à magno remedio statim exordiamur, quod in magnis morbis faciendum esse locuples est auctor Galenus in Quinto Methodi, ut supra etiam considerauimus. Hinc Paulus Galeni vestigijs more suo inherens hæc ait libro secundo. Cum vires eius, qui ex putredine febricitat, validas exploraueris, incunctanter venam incidere conuenit, nisi ventriculum cruditas infestet. Nullam interponendam moram censet & Paulus in hoc remedio administrando, quod & tollendæ febris, & sanandæ putredini, & obstructioni maximam opem promittit, nam cum Galenus affirmavit hoc nec putredinem, nec obstructionem sanare, insinuare voluit quod non omnem, nec omnino, quia licet sit illarum quoque remedium, non est tamen solum, cum præter illud alijs etiam sit opus, ut præclare considerauit etiam Aetius libro secundo sui Tettabibli sermone primo hoc scribens de curatione febrium putridarum, verba faciens. Quando-

qui-

quidem verò neque obturatio, neque putrefactio curari potest per solam venæ sectionem, quàm alijs auxilijs opus habeant, referuare aliquid sanguinis oportet ad curationis tempus, vt ne necessitas aliqua ingruat ob inopiam intempestiuè nutriendi. Quæ ferè omnia ab Aetio adducta verba sunt ex Vndecimo Methodi Galenicæ desumpta, sed per additionem illius vocis (solam) quam cum venæ sectione coniunxit, clario ra effecta, Galeni sensu sic explicato, vt non remoueat à phlebotomia vim sanandæ obstructionis, & putredinis absolutè, sed remoueat integram, & absolutam.

An in febribus malignis, & pestilentibus secanda sit vena.

CAPVT XVIII.



EX his, quæ hæcenus diximus, emergit dubitatio non contemnenda, nec sicco, vt aiunt, pede pertransenda. nam si putridis febribus conuenit venæ sectio, vt ex Galeni clarissimo sensu, supra asseruimus, & magis conuenit eis, quo magis sunt putridæ, magis graues, magis continuitatis participes, cur ergo in malignis, & pestilentibus febribus, macularum quas vocant peticulas, aliorumque exanthematum, & bubonum, carbunculorumq; insultu comitatis, sæpe omititur hoc remedium, & si reuocetur in vsum, magnum, vt frequens docuit euentus, affert detrimentum. Vnde etiam factum est, vt in his malis doctissimi viri hoc remedium oderint canepius, & angue, vt ait Lyricus, imò non remedium cen-

seant, sed exitium, nec dubitauerint in suis alioquin præclarissimis de Febri pestilenti lucubrationibus scribere sententiam de vena in his febribus secanda in perniciem humani generis fuisse inuectam. Habuit hæc opinio plures auctores, pluribus rationibus innitentes, & habet hoc etiam tempore plures his rationibus partim conuictos, partim etiam persuasos sectatores. Quo magis hanc aggredi prouinciam toto corde debemus, vt rem hanc tantopere controuersam, tantum in humana salute momenti habentem pro virili discutiamus, & primo iactis fundamentis inherentes venæ sectionem his quoque febribus per se conuenire, sed accidentaria interdum ratione prætermitti ostendamus, secundo rationes præcipuas auctorum aliter sentientium in medium adductas, si fieri poterit, dissoluamus. Neque verò hic conteremus tempus in malignarum, pestilentiumque febrium natura vel indaganda, vel exponenda, sed illud, omisso multiloquio, ab omnibus concessum accipiemus, habere illas proprium quendam quasi caracteristimum, vnde insigniuntur, a proprio ipsarum more profectum. nam cum in febribus quattuor considerentur ex Galeni doctrina in 2. ac 3. de crisibus, idea, mos, Magnitudo, motus, ex ipso more propriam sortiuntur naturam, in quo more ferarum quarundam imitationem præferunt non obscuram, vt vel ipso Galeni testimonio in commentarijs Epidemiorum dicere solebar Sabinius, nam vt feræ quædam in abdito delitescences parare viatoribus insidias, occultamque moliri ignaris, & nil tale cogitantibus perniciem solent, ita malignæ, pestilentesque febres, suæ prauitatis documenta nondantes, suæque damna occultantes, dolose

*In quo conuenit
secta maligna*

dolose miseros egros circumueniunt, & pessumdant. Hic earum mos non aliunde pender, quam à virulenta quadam qualitate, vera veri veneni æmula, cuius vi cordis impetunt arcem, nec vñquam desistunt demoliri vitam, non flammeo calore infestantes, sed venefica aura negotium facessentes. Cuius originem auræ non abditam, occultamque proprietatem esse dixerimus, quæ fuit tamen grauissimorum opinio viro- rum, sed in excellentem putredinis gradum cum Galeno retulerimus, qui in suis commentarijs primi, & tertij Epidemiorum putredini insi- gni refert acceptam omnem mor- borum pestilentium constitutionem ab Hippocrate relata, & omnem apparentem malignitatem putredi- nis facit sobolem. Vnde in primo commentario in primum de ægris ibi ad considerandum propositis lo- quens ait, Plurimi ipsorum iace- bant, quia assidue, magisque pro- gressu temporis acervata superflua tum acriora, tum maligniora fie- rent. Austrini siquidem status, si diu- tius edurent, putredines pariunt, & præsertim cum humidi fuerint. Et in tertio commentario in tertium de alijs ægrotis loquens ait, Mali- gnitas redundantis humoris ex ma- gnitudine putredinis consistit, quasi dicat malignitatem esse fructum magnæ putredinis, quia non qualibet putredo facit malignitatem, sed exquisita, & ad magnum gradum euecta, vt sit putredo secundum to- tum, & non secundum partem dū- taxat, vt in primo libro cum Ari- stotele considerauimus. nam cum hæc ad eum gradum peruenit, vt fiat mixti in miscibilia dissolutio, & putrescentium humorum à propria forma separatio, contingit illud, quod in quarto Meteorologico de

putredine loquens philosophus ait, vt in hac substantiarum dissolutio- ne generetur noua aliqua substan- tia, cui calor ille putredinalis, pu- trescenti mixto dissidentaneus, exi- stat consonus, vt patet de vermibus ex quorundam putredine orienti- bus, propterea quod calor expres- sus, qui naturalis est, ea quæ secre- ta sunt, cogat, vt ait Philosophus, qui vocat calorem expressum in pu- tredine naturalem non ad mixtum corruptum referendo, quia huic est præternaturalis, & alienus factus, sed ad animal generatum, cuius na- turæ euadit conformis, ideoque ad illud generandum accomodatus. Hæc ergo noua genita substantia à calore præternaturali humoribus sortitur naturam humanæ planè contrariam, & alienam, tamquam contrarij, & alieni caloris fructum, & ratione induta contrarietatis su- bit veneficam vicem, venenique cuiusdam induit vim, cordi suo pre- nutu inimicam, vt iure in sexto de locis affectis ostenderit Galenus in humano corpore ex humoribus cor- ruptis gigni posse substantiam quā- dam non solum nostræ aduersam, & hostilem, sed ipsius etiam veneni imitatricem, & æmulam. Hinc er- go prodit illa aura virulenta, quæ continuo cor impetit, & ab omni- moda humorum corruptione, ab in- signi putredine profecta ad putredi- nem intercedente morte subeundā animal disponit. Quid ergo opus est ad occultam proprietatem confu- gere ad malignam, pestilentemque labem inuehendā, si sola putredo, supra vulgarem gradum euecta, hanc potest inueherem? Hinc Ga- lenus in primo de differentijs febriū malignam omnem, & pestilentem febrem in putredinem partim ex- ternam, partim intetnam, hoc est par-

partim ambientis, partim humorū adigit, & febrem pestilentem precipue fieri dicit ob humores in corpore aptos in putredinem, quoties animal breuem quandam occasionem ab aere circumfluente suscepit, sed magna ex parte incipere ex aeris circumfluentis respiratione, quem putrida exhalatio infecit. Nec mirum videri debet, quia magna putredo est magna corruptio, magna corruptio est cum dissolutione pristinae substantiae, & cum generatione recentis omnino aduersae, tantum videlicet, aduersae, quantum calor putredinalis est naturali contrarius. At naturae contrarietas fit virulenta, quia contrariorum proprietates est mutua contentio, ac destructio violenta. Hec est origo prauī moris febribus, quae ob huius praesentiam nuncupantur malignae, & pestilentes, haec est earum indoles non à Galeno solum declarata, sed ab eius etiam interprete Auicenna confirmata, qui licet in ortu pestilentis febris influxus quosdam caelestes ignota impressionis nominet, hanc tamen longinquam, remotam quae causam ad proximam, & immediatam putredinis redigit, ut aer putrescens ad cor pertingat, & complexionem spiritus in ipso existentis corrumpat, & humores inibi contentos putrefaciat. nam caelestem in nostra corpora efficientiam nec Hippocrates inficiatur, qui magnam eam in libro de aere, & aquis constituit, nec Galenus, qui in tertio de diebus decretorijs eidem plurimum detulit, non Hippocratem solum, sed Platonem quoque in Timaeo, & Aristotelem in Quarto de generatione animalium, quorum vterque magnam caelo tribuit in nostra corpora vim, volens, libensque confectatus. Verum haec est

causa remota, at artifex proximam, & immediatam quaerit, quae sola scientiam parit. Non aliud ergo inter simplices putridas, & malignas, pestilentesque febres inducendum discrimen venit, nisi hoc, quod primae pendent à vaporibus simpliciter putridis, vnde humores cordis igneam illam intemperiem contraxerunt, secundae autem pendent à vaporibus non solum putridis, verum etiam virulentis ob eximium putredinis gradum, & pendent à putredine non solum aliorum humorum, sed interdum humorum in corde residentium, qui in febribus verè pestilentibus putrescunt ex putrido aere attracto hanc nacti labem. In febribus ergo simpliciter putridis humores cordis sunt tantummodo calefacti ex putridarum fuliginum accessu, in malignis, & pestilentibus, & calefacti, & aura venefica, infestati, & putredine interdum imbuti ex deterrimi inquinamenti ad cordis arcem ingressu. nam malignam, pestilentemque febrem aliquando confundit Galenus, & vniico pestilentis nomine vtramque comprehendit, aliquando verò alteram ab altera seiungit, quia communi hoc vinculo deuinciuntur, ut sint germina excellentis putredinis, ut sociam habeant virulentam qualitatem, auramque veneficam inseparabilem, nec differant inter se nisi secundum maiorem, vel minorem putredinis excessum, in maligna minus, in pestilenti magis virulentem, in prima ab internis potius causis, & à magna humorum corruptione procedentem, in secunda extrinsecus potius, & ab inquinati aeris attractu manantem, in prima humores cordis quoad qualitatem, in secunda quoad substantiam quoque obludentem. Vnde prodit

prodit maius pestilentis, quam malignæ periculum, quia ex hac multi moriuntur ex illa paucissimi euadunt, vt non immeritò cecinerit chorus apud sophodem in Aiace flagellifero.

*Est fatius atris Ditis operiri vmbis,
Quam pestifero, ac immedicabili
Morbo agitari.*

Non tantum periculum insinuat nomen malignitatis, cuius proprium est metum incutere mortis, sed non adimere spem salutis. Quæ est Galeni doctrina in commentario primi Prothetorum, ita scribentis, *non hæc morbos, id est malignos appellamus, quicumque periculum minantes spem salutis non adimunt.* At verè pestilens febris omnes propemodum ægros interficit, & paucissimis parcit, vt ostendit constitutio in tertio Epidemiorum ab Hippocrate enarrata, & à Galeno explicata, quia verè pestilens febris est morbus semper Epidemicus perniciosus, vt duo includat, communionem multis gentibus factam, & perniciem simul inuectam, & pestem habeat comitem indiuiduam, at febris non tam pestilens, quam magis propriè malignam vocamus, licet possit esse morbus Epidemicus, id est vulgaris, est tamen magis Endemicus, hoc est vernaculus, & interdum potest etià esse sporadicus, hoc est dispersus, ex peculiari hominum singulorum diata, & humorum corruptela contractus, & pestis comitatu destitutus, vt dici possit febris pestilens sine peste. Possumus igitur cum Galeno hoc nomine febris pestilentis complecti omnes tum propriè dictas pestilentes, tum propriè vocatas malignas, quæ omnes in hac communitate conueniunt, vt à pu-

tredine non vulgari ortum suum traxerint, in quam putredinè adeo pestilentia omnia pathemata referunt Hippocrates, & Galenus, vt ille in tertio Epidemiorum pestilentem constitutionem exponens dixerit, carbunculi æstate multi, & alia quæ putredo vocatur, & hic in commentario illius libri multoties repetere voluerit ex aucto putredinis gradu pestilentem emeruisse malignitatem. Sunt ergo febres pestilentes ex putredinis excessu, siue hæc putredo exterius aduenerit, siue interius eruperit, siue coniunctam habeat pestem, siue seiunctam. His autem iactis fundamentis, & facta hac breui naturæ ipsarum declaratione, non erit difficile modo orientes hinc indicationes colligere, & num eis venam etiam secundo satisfacere liceat, inuenire. nam his febribus primo communes sunt indicationes illæ, quæ conueniunt febribus putridis, & quatenus febres sunt, & quatenus putridæ, secundo conueniunt propriæ ex propria earum natura deductæ, & quia comitem habent excedentem putredinem, & veneficam qualitatem, ideo indicantur magna putredinis remedia, & insinuantur alexipharmaca aduersus virulentam qualitatem præfidia. Ita fit, vt omnes indicationes superius enumeratæ locum habeant in pestilentibus febribus, quæ quia sibi duo quasi propria vendicant, excessum putredinis, & auram virulentam, duas etiam præcipuas excitant indicationes, eorum quæ tollant putredinem, eorum, quæ retundant vim veneficam. nam licet in alijs quoque magnâ sit habenda putredinis ratio, in his tamè tanto maior, quanto putredo subest vehementior. Vnde Galenus communi putredini hæc opponebat remedia,

*Quid si Mors
Vix Maligna.*

*Quid si
Vix Maligna.*

*Indicac.
febrilium
Malignarum
et Pestilentium.*

media, excretionem, ventilationem, refrigerationem, concoctionem, at in pestilenti putredine his adiungebat accuratam exicationem, quia quæ valide putrescunt, magnâ habent præternaturalis humiditatis vbertatem ob factam humidi à sicco secretionem, & ob redundantem in his corporibus humorum copiam, sine qua non fieret insignis putredo, caloris naturalis, & proprii in vnoquoque humido corruptiua iuxta Philosophi dictum.

Quod plenè Galenus declarat in primo illo de differentiis febrium, initium pestilentis febris faciens humores corporis in putrefactionem paratos, eaque corripit eos potissimū affirmans, qui iam prius pleni fuerint humiditate excrementosa, eos autem, qui hac humiditate caruerint, penitus ferè impatibiles ab hoc morbo manere. Ac eo quidem loco proponens Galenus præcipuos scopos in huius febris præseruatione, obseruandos illud summatim dicebat, quòd cum sit summa putredo, corpora sunt quouis modo exiccanda, veluti sicciora in pristina natura custodienda, excrementis plena expurganda, obstructa ab hac meatuum labe aperientibus liberanda, & medendi demum Methodo in libris explicata hoc nomine inscriptis ad sanitatem perducenda, vt hoc pacto & præseruatorias, & curatorias indicationes, quæ in idem coincidunt Galeno teste in libro de phlebotomia, ob oculos posuerit. Sunt ergo febres pestilentes eadem Methodo tractandæ, quam in suis libris docuit Galenus, maiori tamen compescendæ putredinis cura suscepta, & remediorum virulentæ qualitati aduersantium cogitatione adiecta. Ac veluti in reliquis febribus incipiendum est ab euacuantibus ad in-

hibendum humorum inchoatum confluxum ad partes obstructas, sic in his etiam faciendum, ac tanto quidem magis, quanto maior in his quæritur exiccatio nullo remedio melius, quàm euacuante perficienda, ac veluti in alijs febribus putridis à phlebotomia capiebatur exordium, sic in pestilentibus ab eadem est inchoandum, quia æqualis, imo maior hic adest huius remedij indicatio, est enim morbus non modo magnus, sed maximus, est febris non modo putrida, sed excellenti putredinis gradu comitata, ideoque ratione & genericæ, & specificæ naturæ huius remedij indiga, quatenus scilicet morbus maximus, & quatenus febris ad putredinis excessum deducta. Remedia morbis magnis applicita debent esse magna, alioquin euadunt irrita, & conceptam spem deludentia, non est magnum remedium, nisi duplex, purgatio, & sanguinis detractio, at illa non habet in principio locum, nisi rarissimè, vt inferius ostendimus, restat ergo sola sanguinis eductio, tanto minus omittenda, quanto magis vis ægritudinis est verenda, in qua magnus vrget feruor si non quoad partes externas, in quibus sæpenumero apparet remissus, & quasi placidus calor, saltem quoad internas, in quibus incendij plenius negocium facessit æstus, vt frigeant exteriora, interiora vrantur, ergo magno refrigerio est opus. Vnde Celsus proponebat vberem frigida potionem, quæ tamen in principio non potest adhiberi, & alijs etiâ temporibus infrequenter potest vsurpari, at hoc refrigerium venæ sectio ita solet præstare, vt potest polliceri. Nec valet solum ad refrigerandum, Sed ad corpus etiam exiccandum, quod in hac febre efficien-

dum præcipue proponebat Galenus, in qua potissimum id vñu venire videtur, quod Aristoteles dixit in prima Problematum particula febres fieri per duarum qualitatum, caliditatis nempe, & humiditatis, excessum. Indiget hæc febris euacuatione humorum, quorum sequitur multitudinem, quippe quæ non corripiat corpora exucca, vt testatur Galenus, quibus potius parcat, sed excrementosis humiditatibus referat, at hanc euacuationem, vel in ipso principio commodè præstat sectio venæ. Quæ ad cohibendum etiam maximum putredinis impetum, vnde vis pestifera manat, plurimū habebit momenti, quia licet ipsa non sufficiat ad abolendam, vel putredinem, vel obstructionem, patefacit tamen aditum, magnum impertit iuuamentum, & non vulgare habet in hac opera præstanda rationem. Non deest ergo quod indicet phlebotomiam, & quod ortam indicationem confirmet, siue morbi magnitudinem spectes, siue putredinis vehementiam, siue caloris feruorem, siue humidi multitudinem, quæ omnia simul iuncta magnam faciunt hanc indicationem, quam admittere etiam possunt, & congrua ætas, & virium, quæ sint ferendo, commoda dispositio. nam in homine nec in puerilibus, nec in senilibus annis constituto. si pestilens febris appareat, nil vetat bonum adhuc virium tonum superesse, præsertim circa morbi principia, in quibus vel Hippocratis testimonio leuiora solent esse omnia, & imbecilliora. Quod quidem vel ex eo confirmatur, quod in his etiam, qui pereunt, extenduntur interdum hæc febres ad vigesimum diem, ac trigessimū, & ulterius, quod sine virtutis robore nullo posset pacto contingere.

Non est sine virtutis consensu mittendus sanguis, qualiscumque sit morbi vox, quantumcunque clamet, nisi hanc vocem, hunc eius clamorem virtus excipiat, & consona respondeat, inepti, ac planè temerarii fuerit Medici cogitare, ne dum persicere sanguinis missionem. Si, vt sunt indicantia, affuerint quoque permissentia, non modo timidi fuerit, sed ordinem etiam ab arte institutum deferentis nobilissimum remedium detrectare. Sed ne videamur Solis rationibus niti, ad nostrorum Procerum accedamus auctoritatem. Primus prodeat Hippocrates, qui est instar omnium, à quo in suis Epidemicarum constitutionum pestilentium narrationibus accepimus nullam febricitantibus illis aduenisse vtiliorem euacuationem ipsa, sanguinis per nares eruptione, quæ vocant hæmorrhagiam, & ea quidè cumulat, & conferta, non exigua, ac diminuta, quia hæc erat mortis consequentis signum, illa futuræ mox salutis principium, si bona ergo hæc naturalis sanguinis euacuatione, bona & artificialis, quippe ars naturæ benè agentis est imitatrix, & æmula, vt in secundo primi libri aphorismo abundè docet Hippocrates. Accedat Galenus, qui in tertio commentario in primum Epidemiorum Critonis in secundo à morbi initio die ex acuta pestilenti febre pereuntis historiam considerans, quærit causam cur huic homini non statim fuerit secta vena, & sibi ipsi respondet Hippocratem ad plurimos, quos descripsit, agrotantes iam morbo progressu fuisse accitum, vt ideo non potuerit usurpare remedium, quod secundum Galeni sententiam erat illis febribus conuenientissimum. De quo dubitauerit nemo qui apud eundem Gale-

num legerit in quartodecimo Methodi febres cum carbunculis, ideoque pestilentes largissima sanguinis detractio curari, ad cuius rei clariorem explicationem non pigebit in referendis Galenicis verbis aliquantisper morari. nam cum de his loqueretur, qui carbunculis corripiuntur, hæc ait. Omnibus his circumposita caro in summam peruenit inflammationē, non tamen colore aspicitur Erysipelatim, imo q. ad huc phlegmones colore sit nigrior, veluti si plusculo rubro minus miscens nigri. Quod autem necessario febricitent qui ita sunt affecti, idq. non minus imo magis, quam illi, quibus Erysipelatosa est phlegmone, id utiq. latere neminem potest. Sed & incipiendum ab incisa vena curationem esse, id quoque neminē latere arbitror, qui præsertim meminerit, quæ in curatione februm de sanguinis missione diximus. Nec illud obscurum sanguinis vacuationem, quæ ad animi defectum vsque sit adhibita, magis etiam his collaturam, nisi tamen aliud quippiam obstat ex his, quæ venam incidi ventent. In his Galenicis verbis multa sunt annotanda, primum illud cum his Carbunculis iunctas esse febres non leues illas quidem, sed acutissimas, quæ non possint esse nisi pestilentes, & plenè malignitatis indicatæ vel à sola carbunculorum prauitate, e pessimo corruptorum excrementorum seminario erumpentium, quæ febres si fortè non orirentur pestilentes, euaderent illico tales ob morbosum corporis apparatus insignem, qui præcipuus est ad pestiferam vim deprømandam, vt declarat Galenus loco commemorato primi de differentijs februm, secundum annotandum est in his, curationem inchoandam esse à venæ in-

cissione iuxta Methodum traditam decurandis reliquis febribus, vt appareat documentum de phlebōtōmia in febribus putridis adhibenda esse pestilentibus etiam commune. Tertio obseruandum laudari non modo sanguinis eductionem, sed confertissimè factam ad animi vsq. deliquium, supposita magna humorum congerie, magna succorum plenitudine. Sed quia hæc larga euacuatio non debet fieri, nisi omni impedimento remoto, ideo quarto loco obseruandum proponit, ne quid obstat ex his, quæ venam incidi ventant. Quibus verbis innuit non modo virtutis congruæ, & ætatis præsentiam, sed eorum etiam symptomatum absentiam, quæ animum possint à sanguine detrahendo auocare, qualia nos superius cum Galeno considerauimus, & qualia ipse in malignis febribus in duodecimo Methodi considerat, illa nempe animi deliquia, & ad syncopem propensionem, quibus sunt interdum aliqui febricitantes vel tenuioribus, vel crassioribus succis referti tantopere obnoxij, vt licet multa egeant euacuatione, pullam ramen possint ipsi perferre, & nullam debeant Medici tentare. Quæ omnia impedimenta pertinent ad vires conuellendas, quibus constantibus, & constantiam conseruaturis nil est quod propositam mittendi sanguinis indicationē valeat remorari. Galenū sectati in hoc etiam sunt Aetius, Paulus, Orribalius, Aëturius, omnes in mittendo sanguine ad has febres curandas concordēs. Quam concordiam adeo amplexatus est, adeo retinuit mordicus Auicennas, vt in hoc remedio præcipuam salutis spem visus fuerit collocasse. Cuius hæc sunt verba in prima Fen Quarti Canonis, summa curationis pestilentium

febrim est exiccatio, & illud cum phlebotomia, & solutione ventris, & oportet incipere in ea ab euacuatione, si autem materia vincens fuerit sanguinea, fiat phlebotomia, & si fuerint humores alij, euacuentur. Proponit Auicennas scopum exiccandi à Galeno propositum, & sapius inculcatum in primo illo de differentijs febrim, & hanc exiccationem non per exiccantia qualitatibus manifestis molitur, quia hæc sunt imbecillia, sed per valida euacuantia, quorum validior est efficientia, & inter euacuantia primum locum tribuit phlebotomiae, præsertim in vera plethora, secundum purgationi, præsertim in cacochymia, sed prima longè tutior est secunda, quia illa habet semper locum, nec indiget apparatu humorum, secunda, nisi materia turgeat, non ita commodè adhibetur in cruditate humorum etiam pestilentem febrem efficientium. Quo factum est, ut celsus multis ante Galenum annis curationem pestilentis febris tractans ad sanguinem statim confugiat, purgationem respuat, ex primi detractio multum expectans opis, in secundæ administratione multum præferens timoris. Desiderat (inquit ipse libro tertio) propriam animaduersione in febris pestilentiae casus. In hanc minime utile est aut fame, aut medicamentis uti, aut ducere aluum. Si vires sinunt, sanguinem mittere optimum est, præcipuè sicum dolore febris est. Talem ergo facit propriam animaduersionem huius morbi celsus, ut in eo, & in ediam repudiet, & pharmaciam. In ediam quidem respuit, quia præternaturalis dispositio fit ex humorum corruptione, quæ non aliter exigit ciborum contemperamentum, ac de-

fectus exigit adiectionem iuxta Galeni documentum in commentario decimiseptimi Aphorismi primæ particulæ. Fames ergo peiorem facit materiam, & vires in his conscindit, in quibus quam fieri potest sunt integræ conseruandæ. Huc trahi potest quod scribit Galenus in commentario tertio libri tertij Epidem. omnes in peste illa magna, & ferè solos superstites fuisse, qui sibi in comedendo vim intulerunt respuit quoque pharmaciam Celsus quia veretur multam ventris commotionem, & factam à remotis partibus validioris pharmaci attractionem, memor fortasse eorum, quæ legimus in Epidemijs, multis fuisse perniciosam aluum fluentem, quo etiam nomine in secundo de victus ratione in acutis Galenus in pleuritide pharmacum extirpauit, & venæ sectioni postponendum censuit, in utroque casu adhibendæ, relicta purgatione, siue dolor ad clauiculam pertingat, siue ad Hippochondria; sed nos nil modo de vsu pharmaci dicimus nū rectè fuerit à Celso vetitus, illud solum ostendisse contenti, in pestilentibus cum febribus missam facere purgationem, at phlebotomiam adeo non missam facere, ut eam vocet remedium optimum, præsertim in doloris accessu, quia nempe est remedium magnum, & præsentaneum, magnam opem promittens, nullam noxam minitans, si vires consistent, & hanc excretionem perferant alioquin non usurpandam, quia non sufficiunt indicantia ad indicata complenda, nisi adsint quoque permittentia, inter quæ vires primatum obtinent, semper oculo, ut aiunt, dextero à Medicis respiciendæ tamquam vitæ, & mortis firmissimæ clauæ. Quod non minus in reliquis febribus.

bus obseruandum est, in quibus non debemus cum lāguōre virium effundere sanguinem, ne cum sanguine spiritus simul vitales effundamus. Quam cautelam quia nō desunt qui parum seruent, non deest etiam contingens calamitas, vt pestilenti laborantes febre post phlebotomiam illico in peius ruant, & ad citissimam mortem properent. Hunc infelicem euentum non vsui, sed abusui optimæ medelæ referre debemus acceptum, illud pro comperto habentes hanc huic febre per se conuenire, esseque opportunissimam, sed accidentaria interdum ratione parum congruere, & fieri incommodissimam. Quod vt innotescat euidentius, non fuerit graue rationes aliter sentientium breuiter colligere, & soluere accuratius.

Rationum ab auctoribus venæ sectionem in febre pestilenti improbantibus adductarum consideratio, & solutio.

CAPVT XIX.



ULTOS fuisse inter neotericos Medicinæ scriptores constat, qui hanc vniuersim tutati sunt sententiam, alienissimum esse remedium in febribus pestilentibus phlebotomiam, vt inter ceteros testatur Thomas Erastus in sua ad Gesnerum Epistola in qua omnes omnium in hoc argumento recenset, & ad breuem calculum redigit opiniones; sed quia post Erastum salius in aureo suo libro de febre pestilenti hanc rem tractauit luculentissimè, & omnia ferè congeffit argumenta, vel saltem præcipua ad refellendam in hoc

morbo sanguinis missionem accommodata, quibus multi si non persuasi, conuicti saltem manus dederunt, ideo operæ pretium facturum me reor, si rationes eius omnes reuocem in examen, earumque momentum, perpendam, quid veri includant, quid falsi aperiam, solutiones omnium in medium adducam, quia hac disputatione non ludicra, vt ait ille, petuntur præmia, nec leuem ex ea fructum hoc honestum pollicetur certamen. Summa res agitur, qua nulla apud Physicos maior, humana videlicet salus, in cuius perniciem existimat, clamatque salius inuectam esse in pestiferis febribus sanguinis eductionem, cum potius rectè adhibita & ratione monstrante, & confirmante experimento, summi habeat remedij rationem. Salius ergo duas proponit inter se contrarias, & ediametro se destruentes opiniones, quarum altera commendat, & necessariam censet venæ sectionem non aliter in pestifera, quam in reliquis putridis febribus, altera verò tantundem improbat eam, exitialemque vocat, vt nullam sanguinis mittendi cogitationem suscipiendam, omnem ad virus febris infringendum intentionem conuertendam proponat. Vtriusque rationes adducit, & fundamenta, sed neutrius sequitur placita, quippe secundam opinionem soli virulentæ qualitatæ addictam refellit ex eo, quod huic qualitatæ intendendum quidem, at non soli, sed putredinis etiam maximè vigentis habenda ratio, habenda plenitudinis obstructions vel efficientis, vel fouentis, ideoque euentatio molienda exonerando naturam, imminuendo materiam. At primam sententiam venæ sectioni deditam tantum abest vt amplectendam iudicet, vt in perniciem

niciem humani generis inuectam affirmare non dubitet. Quod suum maximi quidem momenti dictum multifariam nititur confirmare. Primo quidem celeberrimorum virorum testimonio, qui hoc remediū in hoc morbo nocuum se expertos esse monuerunt, secundo hac ratione, quod licet febris sit putrida, & morbus magnus, obstructionibus, & inflammationibus vel internis, vel externis comitatus, & frequentius sit febris ardens, tamen ex venenata qualitate ægri tãtam virium imbecillitatem contrahunt, vt euacuationem hanc sustinere nequeant semper magis lapsuri in vltiorem languorem. Et quia fundamentum secundæ venæ pendet ab Hippocratis auctoritate asserentis in quarto acutorum in omni vehementi morbo detrahendum sanguinem, admonet sub hac sententia non comprehendendi morbos pestilentes in principio tractationis ab acutis morbis, quorum victum docendum Hippocrates susceperat, secretos, planeque distinctos, à Galeno etiam in libello de phlebotomia prætermisissos, vt ex mente horum auctorum mittendus quidem sit sanguis in alijs morbis, qui sunt cacoethe, non tamen in pestilentibus ab hac regula subtractis, & ob hanc præcipuè causam subtractis, quod vitalem virtutem pessum dant, & robur virium mittendo sanguini necessarium abolent. Et quia respondere quis poterat, in principio ægritudinis, cum nondum inualuit, & venenata qualitas suas vires deprompsit, virtutem esse validam, & sustinendæ euacuationi aptam, ideoque tunc secandam venam iuxta monitum Hippocratis in principijs morborum mouere iubentis, ipse hoc reiecit responsum, quia in indicatione huius remedij non tan-

tum virium præsentium habenda est ratio, sed etiam futurarum, in quibus absque dubio expectanda in pestilentibus magna infirmitas venit. In cuius infirmitatis periculo semper Galenus abstinere à venæ sectione, etiam si morbus sit magnus, florens ætas, & virtus impræsentiarum constans. Qui ob hanc quoque causam in libro de cibis boni, & mali succi audaces eos vocat Medicos, qui audebant in pestiferis illis febribus venam secare, & in harum consideratione versans numquam huius remedij meminit, quia Methodum Hippocraticam sectabatur, & erat suorum memor fundamentorum, quæ verant in morbis cum virium imbecillitate copulatis venam secare. Hinc autem apparet Galenum hanc reprobare in curanda febre pestilenti, quod huius præseruationem docens, nullam facit mittendi sanguinis mentionem, cum docuisset tamen eadem esse remedia & præseruatoria, & curatoria, vt si excludatur ad præseruandum, non includatur ad curandum. Sic ad suum placitum, confirmandum trahit Salius Galenus. Cuius testimonio quoniam aduersarios vt sciebat in commentario Historiæ Critonis, in quo videtur innuere in pestilentibus morbis ab initio secandam esse venam, ideo ipse ad vim testimonij infirmendam duo euertit fundamenta, quibus illi videbantur inniti, quorum alterum erat Critonem, & ægros omnes cum eo in Catalogo descriptos sub pestilenti agrotasse constitutione, alterum verò Critonem ipsum pestilenti laborasse ægritudine. Horum vtrumque nititur ostendere factum, primum quidem ex eo, quod ægri illi omnes laborarunt sub tempestate tertia ab Hippocrate descripta, quæ fuit frigida, & sic.

& sicca, ideoque non potuit esse pestifera, licet vulgarium morborum feracissima, quod confirmat Hippocratis auctoritate affirmantis multos tunc euasisse, ac determinatam, quandam tum ætatem, tum naturam periculum maximum subiisse, cum nulli nec ætati, nec naturæ pestilentia parcat. Hac etiam probatione utitur in secundo, quia hinc patet non potuisse Critonem laborare pestifera febri ex causa externa, cum non fuerit pestilens aeris constitutio, nam quod ex interna causa talem non contraxerit febrem inde deducit, quod in Critone duo tantum inueniuntur, materiæ copia, & eiusdem prauitas, à copia non fit affectus pestilens, alioquin omnis morbus ex plenitudine esset pestilens, nec itidem à prauitate, alioquin omnes morbi à prauis succis profecti ad censum pestilentium forent referendi, quorum utrumque constat esse falsum, nam simplex succorum prauitas disponit quidem ad pestilentem morbum, sed non constituit corpora in eo, nisi ad prauitatem humorum accedat corruptio, quæ nulla potest in Critone consi-
*scru*ci. In quo fuit insignis quidem succorum & prauitas, & copias, partim bilis acris, & mordacis, partim atre bilis secundum vnam portionem ad crus transmissæ, secundum alteram ad caput ob nimiam copiam recurrentis, ut ratione primæ factæ fuerint pustulæ in talo nigræ, ratione secundæ deliramenta furiosa, veluti erat rationi consentaneum. Qui duplex materiæ pessimè motus male factus citam attulit Critoni mortem, quia decretoria non decernentia cum symptomatis, & signis latalibus, qualia erant pustulæ nigræ, & insania furiosa, iuxta Hippocraticum dogma mortem portendebant

instantem. Mortem ergo Critonis non in vim pestilentis febris refert, sed in violentiam prauorum succorum qualitate irritantium, copias, opprimentium, ideoque concludit Galeni sententiam de sectione venæ in eius exponenda historia non posse ad genus febrium trahi pestilentem ideam redolentium. Quod confirmat, quia etiam in Historia Mulieris, quæ ad Tisamenum decumbebat, & Calui Larissæ si facit Galenus mentionem phlebotomiæ, tamquam remedij illis morbis acomodati, nil inde colligi posse statuit, quia non constet mulieris ægritudinem fuisse pestilentem, illo morbo per se latalissimo affectæ, & Caluus etiam describatur eger post tempestatem pestilentem, ideoque non affectu pestifero correptus. Quo fit, ut si in his casibus dicat Galenus opportunam futuram fuisse sanguinis missionem, non propterea confirmet conuenire in pestilentibus febribus, quæ hic nullæ fuerunt. Ad quarum neque præseruationem, neque curationem huius remedij vmquam meminit. Ad Auicennæ auctoritatem remedium probantis pro curandis his febribus respondet non esse eam præferendam rationi, & veritati, præsertim cum ipse male sectatus in hoc sit Paulum, Aetium, Rufum, non tamquam curatorium, sed præseruatorium remedium proponentes. Et quoniam aliqui distinguunt has febres in pestilentes actu existentes, & in futuras tales, & in primis repudiant venæ sectionem, in secundis admittunt, veluti primum consilium laudat, ita de secundo determinat, quod si futura sit febris pestilens ratione causarum externalium, ratione scilicet contagij, & aeris corrupti, si possit tolli contagium, & corrigi mala qualitas aeris, curan-
 da

da erit more reliquarum putridarum sine gradu pestilenti, nec erit tractanda vt pestilens cum non sit, ideoque si venæ sectio conuenit, non conuenit vt pestilenti. At si contagium non inhibeat, nec mala aeris qualitas emendetur, in febris ratione superuenturi gradus pestilentis inhibet venæ sectionem ob imminuentem virium casum. Sed si suspicio pestiferæ conditionis pendeat à causis internis, humoribus nempe corruptis, & putrescentibus, hanc febrem vocat ab initio pestilentem occultam, & ab hac etiam remouet phlebotomiam ob futurum virtutis languorem, quam tamen febrem solertiori Medici iudicio indigere statuit non ob curationem solum, verum etiam ob cognitionem. Exclusa igitur venæ brachij a pertione in hoc februm genere, eius loco sufficit ad minorandam materiam hircines hémorrhoidibus adiungēdas, quæ & ad placidam, & sine virium dispendio factam euacuationem, & ad reuulsionem à partibus nobilioribus auertentem valde conducant, & tutissimæ, ac vtilissimæ vel in virium imbecillitate continuo experimento appareant. Partium quoque infernarum scarificationem commendat ob easdem causas non mediocriter, & si casu contingat, vt neutrum harum medelarum vsurpari queat, ad cucurbitulas in infernis partibus scarificatas confugiendum proponit, quas tamen inferiores hircinibus facit, quod vires magis infringant, violentius attrahant, & maiorem humorum agitationem celerius inducant. Sed nihilominus adiungit adhibendas interdum esse etiam post hircines cum per has non abunde facta est minoratio materię, & validior adhuc exigitur reuulsio, & ad cutem attractio, modo non sint

vires prostratæ. In mulieribus Mensium vel suppressionē vel imminuentiam habētibus proponit sectionem venæ in talo, tamquam minus infirmantē vires, & spiritus resoluentem, quam sectio venarum superiorum, & vrgēte virium debilitate consulit hircines eisdem venis validius applicitas, vel cucurbitulas coxis tantum, & partibus inferioribus apposititas, & si cerebrum appareret repletum, internis narium partibus hircines adiūctas, illa seruata cautione, vt opportune hæc omnia fiant. Hæc est eius sententia de remedijs eliciendis ex Fonte chirurgico in pestilenti febre, & hæc sunt rationes, quibus in ea sectionem venæ cōuellit, & reprobabat, & ita quidem reprobabat, vt eam pestilentis morbi pestilentem medellam decernat, sed hæc quoque quas nunc subiiciemus, erunt respōsiones infirmandis rationibus illis opportune, quæ rationes minus habent in recessu, quàm in fronte promittant, ac tantum abest vt rem propositam astruant, vt cōtrariam potius diligenter examinata confirmant. Non improbamus qualemcumque cautionē maiorem in sanguine detrahēdo præcipue in eo morbo, qui ad abolēdas vires videtur maximè factus, sine quibus qui vult sanguinem mittere, vult sine fundamētis ædificare, vult morbum quidem demoliri, sed non aduertit vitæ se prius demolitionem moliri, sed importunum etiam timorem laudare non debemus, qui nos faciat *αἰμορόβους*, vt solet vocare Galenus vbi minus est opus. nam licet verum sit illud præclarum Thucydidis in secundo belli Peloponnesiaci documentum, *αἰσθητὰ μὲν θράσος, λογισμὸς δὲ ὁ κενὸν φέρει*, hoc est ignorantia quidem audaciam, discursus autem facit tarditatem, & cunctationem, tamen verum etiam est illud Hippocrati-

*Nec de
hircinibus
facit, quod
vires magis
infringant,
violentius
attrahant,
& maiorem
humorum
agitationem
celerius
inducant.*

craticum in Libello Legis ἀπειρήδην δει-
 λινς τῶ ἀγέρας ὑπὸ τῶς τιδυνῶν, hoc est
 imperitia est timiditatis, & audaciæ
 nutrit, vt timiditas impotentiam,
 audacia arguat inertiam. Non sit
 quidem audacia, quæ temeritatem
 in Medico inducat, & procliuem ad
 periclitandum faciat, sed non sit e-
 tiam inanis timor, qui à magnis re-
 medijs auocet, & hæsitantem in o-
 peribus magna pollicentibus effi-
 ciat. Hic inanis timor dedecet ma-
 ximè viros doctos, quo nomine &
 dignandum, si quis alius sit, & admi-
 randum fatemur salium, doctissimo
 rum scriptorum auctorem. Sed nol-
 lem tantam in eo cautionem appa-
 rere, vt ad minus necessariam timi-
 ditatem videatur accedere. Respon-
 deamus ergo rationibus eius supe-
 rius allatis in hunc modum. Ad pri-
 mam quidem ex testimonio docto-
 rum virorum deductam, qui nocuū
 se hoc remedium in febris pestilenti
 expertos confirment, dupliciter re-
 spondemus, primo quidem tunc ap-
 parere nocuum remedium, cum est
 importunum, quod contingit cum
 adeo progressa est putredo, vt vires
 non sint euacuationi sustinendæ am-
 plius aptæ, non futurum alioquin
 nocuum, sed vtilissimum, si oppor-
 tanè fuerit adhibitum, secundo re-
 spondemus aliud contra argumen-
 tum paris vigoris opposcentes, cla-
 rissimorum videlicet auctoritatem
 virorum, contrariam experientiam
 profitentium, & magnam à reme-
 dio consecutam vtilitatem affirman-
 tium. Ad secundam ex virium lan-
 guore venenatam qualitatem con-
 sectante sumptam dicimus ab initio
 morbi, in quo iuxta Hippocratis a-
 nimadversionem sunt omnia leuio-
 ra, non apparere istum languorem,
 quia nondum putredo inualuit, non
 dum tantas radices fixit, vt venena-

ta inde profecta qualitas cum vi-
 rium euersione excellat, & si fortè
 fortuna apparet vel ex magna vi æ-
 gritudinis, vel ex parua egroti (quod
 fieri interdum posse non diffitemur)
 tunc non datur venæ secandæ locus,
 non appellendus huic remedio ani-
 mus, aliò conuertendus curationis
 conatus, irritus plerumq; & frustra
 susceptus futurus, cum de natura
 tantam à primordio labem experta
 tam vehemens morbus videtur triū-
 phaturus. Sed hoc raro contingit,
 & in solis naturis ferè contingit, quæ
 à primordio vires sunt sortitæ lan-
 guidiore, in reliquis inchoante fe-
 bri virtus est adhuc ferendo propo-
 sitam sanguinis missionem, tanto fa-
 ciendam alacrius, quanto id commo-
 di pollicetur certius, fore vt eius be-
 neficio coerceatur putredo alioquin
 magis, magisque inualitura, com-
 pescatur cœpta phlegmasia febrilis,
 & propterea inhibeatur vltior im-
 minens virtutis casus. hæc namque
 cadit ob ingrauescentem vim mor-
 bi, ob incrementum putredinis, ob
 inualecentem ignei caloris impe-
 tum. At venæ sectio hæc omnia re-
 moratur, & impedit. Vnde non va-
 let instantia de consecuturo virium
 languore in febre pestilenti, in qua
 si non ratione præsentis imbecillita-
 tis, ratione saltem futuræ inuitabi-
 lis omitti debeat phlebotomia, non
 valet, inquam, hæc instantia, quia
 concedentes imminere hanc imbe-
 cillitatem, si morbus suos progres-
 sus efficiat, dicimus eandem impe-
 diri sanguine misso ob allatas ratio-
 nes, vt hæc missio non debeat omit-
 ti, quia futurus sit languor virium,
 sed debeat vsurpari, quia cessurum
 ei sit, vel saltem remissionem subitu-
 rum omne viciens in ægritudine yi-
 tium. Non ergo deterreri debemus
 ab eo, quod sit futurum, sed statim

occurrere debemus, ne sit futurum, nec melius id præstare possumus, quam huius remedij ope, magni in arte, & præsentanei à Galeno iure optimo nominati, cuius præsidio ardentissimas & extinxisse se febres, & quasi repente iugulasse gloriatur. Nec dicere oportet ab hoc censu subtractas esse pestilentes febres, quia, Hippocrates documentum tradiderit de vena in morbis acutis aperienda, indicationes omnes ad hoc peragendum necessarias proponens, ab acutis autem morbis separauerit ab initio pestilentes, de quibus non veniunt intelligenda quæ de acutis sunt tradita, hæc mihi videtur inanis fuga, ac rationi adeo dissentanea, ut contrarium potius sit asseuerandum, tanto magis pestilentibus morbis congruere sanguinis detractionem, quanto ipsi acuminis vim præseferunt maiorem. nam, ut docet Galenus in tertij Epidemiorum commentario tertio, nomen morbi vel Epidemici, vel pestilentis non denotat particularem aliquem, ac determinatum morbum, sed qualemcumque, aut communitate, aut perniciæ insignitum, ut communitas faciat Epidemicum, perniciæ verò pestilentem, ut acutis, & quibuscumque alijs accedens gradus perniciosus, ac læthifer eos efficiat pestilentes. Quæ veritas etiam innotescit apud eundem Galenum in commentario Proemij primi acutorum, ubi recenset quattuor genera morborum, Epidemicos, pestilentes, Endemicos, sporadicos, & vocat cum Hippocrate Epidemicos eos, qui vno tempore multos inuadunt, pestilentes eos, qui multis præterea sunt perniciosi, Endemicos eos, qui particularis regionis sunt vernaculi, sporadicos demum, qui dispersi sunt, & priuatim homines ex peculiari eorum diætâ

prehendunt. De quibus sporadicis affirmat institutum esse Hippocratis verba in illis acutorum libris facere, cum de Endemijs in libro de aere, & locis fecisset, de Epidemicis in libris Epidemiorum, ad quos etiâ referebat pestilentes, de quibus ideo nullum peculiarem censuit librum conscribendum. Non separat ergo Hippocrates pestilentes ab acutis, nisi quatenus hos ibi considerat secundum simplex acumen, quod possunt habere etiam si fuerint sporadici, & considerat sine adiectione vel communitatis, vel perniciæ, secundum quam adiectionem euadunt Epidemici, & pestilentes. Et regulæ de acutis traditæ conueniunt etiam pestilentibus, qui ferè semper acuti sunt, vel saltem quando sunt acuti, quod est quasi semper, quia pestilentia non minuit, sed auget magnitudinem morbosam, & non solum adiungit necessitatem antidotorum adhibendorum pro compescenda virulenta qualitate, sed etiam remedium magnorum pro infruigenda morborum magnitudine. Inter quæ remedia magna cum præcipuum habeat locum venæ sectio, quomodo debuit eam Hippocrates à pestilentibus affectibus arcere? Quod qui affirmat, non animaduertit se contradicere Galeno, qui testatur pestilentes ab Hippocrate connumeratos fuisse inter Epidemicos, & in eisdem libris consideratos, & constat in Epidemicis laudatam ab eo fuisse sanguinis euacuationem super omnia auxilia non solum sponte naturæ factam, sed arte etiam paratam. Et quia asseritur præceptum de indicantibus phlebotomiam respicere dumtaxat morbos acutos, à quibus fuerant prius secreti pestilentes sub hoc ideo præcepto non comprehensi, ideo optimū fuerit Hippocrate

pocraticam dictionem accuratius de
nuo cōsiderare, quę talis est. In acutis
morbis sanguinem detrahes, si vehe-
mens morbus videatur, florueritque
ęgrotanti ætas, & virium adfuerit
robur. His verbis colligens Hippo-
crates ea omnia, quę vel indicant,
vel coindicant phlebotomiam, pro-
ponit magnitudinem morbi, florem
ætatis, & constantiam virium, &
applicat hæc morbis acutis, non vt
propria ipsorum, sed vt communia
omnium morborum, applicabilia,
tamen præcipue acutis, vt præcep-
tum Hippocratis sit communissi-
mum quasi dicentis, vbi cumque af-
fuerint tres istę condiciones propo-
sitę, continet mittere sanguinem,
& ideo in acutis, de quibus erat in-
stitutus sermo, hoc expediet facere;
& aduertendum quod dicens Hippo-
crates, in acutis si fuerit morbus ve-
hemens cū reliquis, videtur quodam
modo nugari, vt in i. lib. cōsideraui-
mus. quia non est dare morbum acutum
sine vehementia vel ipsius Galeni te-
stimonio sapius affirmantis, & præser-
tim in cōmentarijs secundi Aphorismorum
acutum morbum duas habere
Veni condiciones, vehementiam, & celerita-
tem, quarum altera si desit, desinit esse
acutus, & ideo per primę condicio-
nis defectum diaria licet celeritatis
plena non est ægritudo acuta, & per
defectum secundę non est acuta ta-
bes licet vehementiæ referta. Ex
quo patet Hippocraticum sensum,
fuisse ad communia indicantia dire-
ctum, non ad propria acutorum, de
quibus cum loqueretur voluit dice-
re tunc esse in eis aperiendam ve-
nam, cum affuerint tres positę
condiciones, morbi vehementis, æ-
tatis floridę, virtutis constantis, qua-
si dicat, in acutis si præter magnitu-
dinem morbi, quę est ab eis insepa-
rabilis, locum habuerint alię duę

condiciones, mittendus erit sanguis,
vt hæc condiciones non educantur è
natura acutorum, sed ex communi
ęgritudinum cōsideratione edu-
ctę proponantur; & sic explicat lo-
cum Galenus in commentario, in
quo testatur in hoc quasi oraculo
Hippocratico contineri ea omnia,
quę faciunt ad insinuandam sangui-
nis missionem, & hæc affirmat habe-
re locum non modo in acutis mor-
bis, qui ibi nominantur quia ibi con-
siderantur, sed etiam in longis, &
cronicis, in quibus possunt pariter
adesse relatę condiciones ad phle-
botomiam impellentes. Hęc sunt
Galenī verba. Quod porro in fron-
te dictionis dictum est, In acutis
morbis sanguinem detrahes, vt cō-
sideretur est dignum. Sed quomodo
longorum morborum non memi-
nit? Quoniam sanē de acutis nunc
docet, atque ob id solos eos memo-
rauit. Nempe & ex longis multi
sunt qui sanguinis egent detractio-
ne, cum & hi dictis tribus subiaceāt
scopis. Quę si ponderasset verba sa-
lius, non ita arguisset, Hippocrates
dat præceptum mittendi sanguinis in
acutis si cōcurrant tres scopi, sed ab
acutis sunt distinctis pestilētes, ergo
nō dat præceptum de pestilentibus.
Inanis omnino argumentatio, nec
rationi consentanea. nam possemus
hoc etiam pacto nos arguere. Morbi
longi sunt distincti ab acutis, ergo
præceptum non complectitur lon-
gos. Probabilior foret hæc argu-
mentatio, quia longi distinguuntur
ab acutis natura, & indole, pestilen-
tes distincti fuerant cōsideratione
sola, eandem cum acutis naturam
subire nati. At hanc argumentatio-
nem falsam esse decernit Galenus
præcepti communitatem ostendens
omnia morborum genera comple-
ctentis, in quibus ille scoporum ter-

narius appareat, quia non quatenus talis, vel talis morbus indicat hoc remedium, sed quatenus his tribus scopis comitatus. Qui cum apparere etiam possint in febribus pestilentibus, cur non facient inditam sibi, propriamque indicationem? quæ magnitudo ægritudinis potest hic desiderari? quæ potest ætas excludi? quæ virtus non potest hic inueniri? non est eundem inficias, hanc non semper subesse, sed non est tamen concedendum hanc semper languere, quia nil verat hominem corripere febre pestifera, qui tamen ob propriam naturam robor, & ob ægritudinis nondum confirmatæ inchoamentum bonum refineat virium tonum, facili negotio, si omittantur magna remedia, dissoluendum facili, etiam negotio, si adhibeantur, conseruandum. Cur ergo non debent adhiberi, si adsunt propositi scopi, & quædo adsunt? Cur ab euentu nec perpetuo, nec necessario deducitur argumentum? Cur id, quod est accidentarium trahitur in examē quasi fuerit essentialē? quasi consequatur naturam mali quatenus ipsum? Quod fieri sæpe debet, ut omittatur sanguinis euacuatio ob apparentem virtutis infirmitatem, cur semper fieri iubetur, cum non semper hæc metuenda infirmitas habeat in egro veritatem? Nec semper est præfens hæc tanta imbecillitas, nec semper est pertimescenda in futurum, quin imò expectanda fuerit eius aduenturæ inhibito, si congrua statim adhibeatur curatio à magnis præfidijs petita, & præcipuè à venæ sectione, quæ calorem igneum remittendo, serpentem putredinem compescendo, & vltioris obstructionis ansam adimendo impedire potest futuram alloquin imbecillitatem. Quæ quia non censuit Galenus necessarium in

his febribus habere locum, ideo non possumus dicere eum abhorruisse ab hoc remedio, cuius omissionem si laudat in febribus illis pestiferis in libro de cibis boni, & mali succi nominatis factam, summa cum ratione id facit, quia corpora erant corruptis humoribus refertissima ob assumptorum in annonæ caritate ciborum prauitatem contractis, vigebat extrema in eis cacochymia, quæ vigente in nullo morbo sanguis detrahi debet, ut supra considerauimus, quia secum trahit virium nedum infirmitatem, sed prostrationem, Vnde Galenus addit rationabiliter abstinuisse Medicos ab hoc remedio in illis febribus, quia vires erant iam resolute. In quarum tanta resolutione quis audeat venam tondere, & si tundat cur doleat mortem obrepere? Nec in pestilentisolum, sed in qualicumque affectu hac mole comitato corruptorum humorum, hac resolutione languentium virium incongrua foret, & omnino importuna hac medela, alioquin vtilissima futura, si licuisset per vires. Quod videtur eo loci innuere Galenus consilium Medicorum laudantis qui in febribus illis remedium omiserunt magnum, & magnis morbis conueniens ob additam completæ cacochymie vires destruentis conditionem, quæ si abfuisset, nulla fuisset prætermittendi remedij occasio, ut hic Galenus appareat potius venæ sectionis laudator, quam redargutor, quod etiam animaduertit, & affirmant Erasmi. Nec verum est Galenum in consideratione harum febrium non meminisse huius præfidijs, quia aperte meminit in quarto decimo Methodi, & in commentarijs tertij Epidemiorum, ut supra diximus, & has ad methodum illam communem redigendas censuit, quæ

traditam legimus in vndecimo Methodi de vena aperienda in febribus omnibus, quas putris humor accendit, dum modo necesse sit superari scopi, quod innotescit ex Galenicis verbis in tertio de præfag. ex pulsib. quibus affirmat se in febriū curationibus de omnibus etiam pestilentibus disputasse, siue separatim visum fuerit, siue in Methodo medendi tractare; vt hinc pateat non esse illas à communi illa Methodo seuocandas, quia possunt & ipsæ habere congruentes, & simul concurrentes tres illos mittendi sanguinis scopos, nec illa insignis viriū imbecillitas est necessaria soboles febris pestilentis, quæ pestilens est, quippe confectaretur omnem pestilentem, quod claro euentu refellitur, & consequitur interdum ex peculiari causa accidentaria, vt contigit in illa febre pestifera ex anno næ caritate, in qua vires erant infirmæ, & quasi prostratæ non ob pestilentem constitutionem, sed ob insignem cacochymiam nihil ferè bonæ alimoniz in visceribus relinquentē. Nec valet argumentum deductum ex eo, quod Galenus docens huius præseruationem febris missam faciat, tacitamque prætereat phlebotomiam, quia in primo illo de differentiis febrium casu inciderat in examen febris pestilentis, cuius originem edocens, & causam à magna putredine profecta proponens satis habuit theoreticam doctrinam tradere, nec debebat ad praxim accedere, nisi quædā summa tim attingens ad exactiorem notionem conducens, vt fecit humorum expiationem, & vniuersi corporis accuratam excitationem commendans, & ad alia alibi tradita febrium præsidia reuocans, quibus verbis libros Methodi insinuat, & præsertim vndecimū

communis putridarum febrium curandarum dogmata continentem. Satis habuit communes pestilentis scopos memorare, nec materias eorum absoluendorum debuit adiungere parum proposito sermoni accommodatas, multum omnibus in arte vel mediocriter versatis notas, & facili negotio inueniendas. nam si expedit corpora valde exiccare, nulla opportunior, nec tutior exiccandi via, quàm à sanguine detractio petita. Ad considerationem illam de febre Critonis, & aliorum, ibi enumeratorum agrorum, non fuisse pestilentem, quia fuerit sub tempestate frigida, & sicca, respondemus nil modo nos dicere nū sub hac tempestate gigni potuerint pestilentes morbi verè dicti, illud addidisse contentos, quod satis, superque est nostro proposito, fuisse illas febres pestilentes priuā tim dictas, quas vocare solet Galenus pestilentes sine peste, vt patet in tertio de præfag. ex pulsibus, & in tertio commentario tertij Epidemiorum, quæ febres non proueniunt ex causa communi, qualis est ambientis aeris natura, sed ex peculiari cuiusque diæta, cuius vitio fit, vt insignem subeant corruptionem humores, & pestilentem ægritudinem inferant, vt in appendice libri de natura humana consideratum legimus. Talis ergo fuit febris Critonis, qui ob hanc etiam causam tam satis confusctatus est morbis, & tam repentinam obiit mortem, obrepere nequeantem nisi ex deterrima, & omnium pessima febre, vt constat vel ipsius Hippocratis testimonio in libro Prognosticorum ita clamantis. Febres simplicissimæ, & signis securissimis comitatæ quarto die, vel etiam ante desinunt. Malignissimæ verò, & signa habentes grauissima quar-

quarto die, vel ante quartam occidunt. Vocat Hippocrates simplicissimas, & securissimas signis comitatas febres, quæ desinunt ante quartam, malignissimas, & gravissimis præditas signis eas, quæ ante hanc diem occidunt, quia uterque euentus provenit à more ipsarum febrium, cuius moris habenda maior est ratio, quàm vel speciei, vel magnitudinis, vel motus febrilis, ut abundè docet Galenus in 2. de crisi- bus, at in primis bonus est mos, in secundis deterrimus, ut ideo primæ sint benè moratæ, & benigniores, & salubres, secundæ autem malè moratæ, & malignissimæ, & læthales, nam symptomata indicant naturam moris, & veluti si ab initio appareant levia, arguunt bonum morem, ita si ab initio gravissima, indicant morem pessimum, quia vis quædam infertur cõmuni morborum naturæ, & quasi indoli, cuius proprium est habere circa principium omnia levia. At Critonis febris tanto fuit malignior, quanto fuit ad occidendum celerior, vel ipso secundo die mortem inferens, Quā vnde deducere possumus nisi ex pessimo morbi more in pustulis circa talum nigris, in ferina infania ex confluyente ad cerebrum materia, in puris, & sinceris excrementis multis biliosis per aluum reluctantē? Quæ considerans Galenus ita decernit in commentario illius Historiæ. Ager hic dignus est ut memoria teneatur ob mortis celeritatem. Copia multa fuisse videtur, quam natura à principibus partibus ad crura reycere cupiuit, cum autem pars ea superfluum omne excipere nequireret, quod reliquum erat in caput ascendit, quodque malignum hoc esset, vehementem desipientiā procreavit. Argumentum maligni-

tatis superflui erat, quòd pustulæ nigræ super talum fierent. Quid dici potest clarius? non semel, sed bis vocat affectum malignum Galenus, primo in malignitatem refert vehemens illud, & effatu dignum delirium in ipso morbi insultu molestum, quod esse non poterat, nisi materia in cerebrum progressa multæ fuisset compos malignitatis, mox huius vim confirmat vterius ex pustularum nigrarum super talum eruptione, quæ pustulæ erant soboles sanguinis faculentioris, & apprimè corrupti, & erant cancroræ affectionis æmulæ, & virulenta illa tubercula imitantes, quæ cum feruida febris coniuncta diximus à Galeno in decimoquarto Methodi considerata. Quis ergo non agnoscit malignitatem evidentem, & summam, si non ex communi causa, ex propria saltem Critonis dispositione prodeuntem? Quomodo hanc negare salius audeat? non potest ad solam copiam, & prauitatem simplicem recurrere, quia non fuissent symptomata tam seua, non irruisset mors tam festina, copia, & prauitas habuerunt comitem magnam corruptionem, eximiam putredinem, & fuit peccatum in quanto, & quali, & maius in secundo, quàm in primo, quia symptomata non fuerunt propria multitudinis, sed memorabilis prauitatis, & corruptionis, à qua præcipuè manat ipsa malignitas, & vnde etiam fit ut decretoria appareant non decernentia, quippe decretoria apparent ob naturæ irritationem, à materia venefica factam, euadunt non decernentia ob eiusdem naturæ succumbentiam, ac triumphantis morbi victoriam. Iure ergo admiratur Galenus, eum Critoni non fuerit sanguis detractus sic dicens. Admiratione dignum quidnam

nam causæ fuerit; cui Homini huic non statim incipiente morbo secta fuerit vena, sed non ignoramus Hippocratem ad plurimos, quos scripsit, ægrotantes iam morbo progresso accitum fuisse. Conueniebat hic secundum Galenum sectio venæ, quam non adhibuit Hippocrates, quia non fuit opportunè accersitus. Non abhorret Galenus ab hoc remedio in malignissima febre, imò in hoc solo ostendit potuisse locari aliquam spem salutis, nec deterretur à malignitate urgente, nec à futura virium imbecillitate, quia sperabat hanc usu remedij potuisse impediri. Quis non videt quantasit consecuta infirmitas, cum secundo die mors obrepserit, & non ex oppressione materiæ, sed ex malignitate? Et Galenus tamen censet potuisse, ac debuisse adhiberi phlebotomiam, quia hæc inhibuisset consecuturam infirmitatem ab initio ahibita priusquam morbus inuoluisset naturam oppressurus. Ac propterea ait, quod statim ab initio morbi oportebat sanguinem mittere, ut in primo insultu magnum remedium retunderet magnum morbi impetum, nec aduentare sineret consecuturum virium casum. Non ergo pertimescenda in morbis illa virium venit infirmitas, quam impedire possit expectanda remedij utilitas. Hoc est artis munus, oblati morbo iuxta Hippocr. dictum, & præsidiorum ope eius cohibere progressum. nam, ut inquit ille, & Medicus de Vlcerebus iudicans futurum prædicet, quæ serpent, quæ putrefactionem facient, & de Metallis dici potest, Magnes ferrum trahet. utrumque enim si suæ naturæ relinquatur, & ignorentur impediencia, vim exercebit suæ naturæ propriæ, & primam. Sed ulcera nec serpent,

nec putrefactionem facient, si contraria curatio accesserit, nec Magnes trahet ferrum, si Magneti alium fuerit illitum. hæc quippe est indoles, & auxiliorum proprietates malos auertere morborum euentus, in illorum defectu consecuturos. Hoc igitur statuendum etiam de febre pestilenti, quod, nisi obuiam sit magnis remedijs itum, suas exeret proprietates, vires labefaciet, ac pessumdabit, hanc verò noxam arcebit forsan ab initio usurpata sectio venæ, Quæ si in Critone fuisset hoc pacto adhibita, mortis loco contigisset forsan victoria optata. Quod fuisse videtur Galeni placitum, aliter non facturi phlebotomiæ mentionem, quam numquam adhibet deploratis morbis soli prognostico relinquendis. In casu etiam Calui in commentario tertio tertij Epidemiorum descripto affirmat Galenus se non posse conijcere nummissus ei fuerit sanguis, cum ex vna parte credi possit, quatenus Hippocrates testatur nil eum ex oblatis adiutum fuisse, & inter oblata possit etiam venæ sectio recenseri, ex altera non possit, quatenus delirauerit, ac tribus diebus obierit, ut prætermissa auxilia videantur. Ex quo Galeni scribendi modo colligimus, quod supra tactum fuit, ex remediiorum omissione sæpe mala inualescere, & obitum asserre, & in hoc etiam casu congruam fuisse sanguinis missionem, cuius administratio poterat salutis spem impertiri, & fuit tamen febris etiam illa malignissima, & leuissimis symptomatis comitata, ut nullus superfit dubitandi locus, quin Galenus in hoc febrium genere phlebotomiam apprimè laudauerit, & vnicum ferè auxilium, in prima tamen morbi inuasionem adhibendum, existimauerit. nam sunt hæc febres e-

numero pestilentium ex priuata agrorum constitutione subeuntium non vulgarem humorum, sed excellentem, & immodicam putredinem, quæ licet non communicetur semper humoribus cordis, quos non est semper necessarium in pestilenti putrescere, impertitur eis tamen virulentum quendam omni tempore carecterem, vitalis auræ præcipuum hostem. Talem fuisse etiam Mulieris apud Tisamenum decumbentis febrem concludere debemus, cum id non solum ex aliorum acerbitate symptomatum, & mortis celeritate, sed præcipue ex refrigeratione extremorum adiunctam vinarum prauitatem habente videatur innotescere, nec oportet confugere ad acumen morbi illius, quem vocant Ileum, quia clara est Galeni auctoritas hunc in commentario sensum repudiantis, & horum prauitatem symptomatam ad veram malignitatem referentis. Sic enim ait. Ileus vocatur affectus, cuius symptomata mulieri fuisse scribit, multos vomitus, & potus continere non posse, & dolores circa hypochondria esse, & tormina cum doloribus in ventre, quæ omnia cum Heosis simul sunt. Quod autem deinceps scripsit, non est eorum, quæ simul cum ipsis existunt, sed eorum, quæ in malignum tendenti superueniunt affectui, & maxime summas partes esse frigidas perpetuo. Præterea est & anxium esse. Præterea, & vrinas adscripsit, quamquam affectus in visis, & humoribus non esset, sed in intestinis. Quæ vltima Galeni verba non insinuant venas, & humores fuisse communes (quomodo enim fuissent vrinæ illæ, illa anxietudo, illa extremorum refrigeratio?) sed primum, & originarium affectum pertinuisse ad intestina inflammationem

affecta, vt consecuta febris haberet rationem quasi symptomatis affectui intestinalem consecantis, sic tamen vt vtroque magna se proderet malignitas. In hac igitur muliere considerat Galenus non fuisse factam venæ sectæ mentionem, illam conuenisse sic insinuans, & hoc remedium numquam ab Hippocrate memorari memorans, nec aliud vllum, nisi cum raritatem quandam, & inconsumptam rationem contineat, vt contigit in Anaxione, cui octaua die fuit sanguis detractus, raro in tam magno morbi progressu detrahi solitus; quasi velit dicere Galenus in reliquis omnibus magnis affectibus vel sectam fuisse ab initio, vel secari debuisse venam suppositis supponendis. Quam sectionem non possumus dicere omissam ab eo fuisse vel in præseruatione, vel in curatione febrium pestilentium, quia in vtroque casu inclusit non solum ob generalem regulam de putridis traditam in Vndecimo Methodi, ad quam redigendas censuit etiam pestilentes, sed etiam quod præseruationem docens, implicite saltem sanguinis de tractionem insinuauit, & docens curationem explicite proposuit, vt patet in commentarijs Epidemiorum, in quibus fatetur considerari pestilentes febres, & in Quartodecimo Methodi. Nec Auicennæ bene infirmatur auctoritas ex eo, quod non debeat præponderare rationi, & veritati, quia ostendimus iam nec rationem, nec veritatem contrarium suadere. imo Auicennæ decreto consonare, Auicennæ, inquam, non male Rufum, Aerium, Paulum consecantis, quasi ipsi de sola præseruatione locuti fuerint, non de curatione, quia non dixerim modo eadem esse remedia præseruatoria, & curatoria, vt ostendit Galenus in libello
de

de phlebotomia, sed illud potius non tacuerim, de ipsa curatione fieri ab illis auctoribus verba sanguinis missionem laudantibus, ut innotescit diligenter attendenti, quod obseruauit etiam Erasius. Vnde mirandum non est si Auerroes quoque in amplexando remedio concors fuit cum eo, quicum libentissimè quærit omne dissidium. Nec Græcos modo sectati in hoc sunt Arabes, sed Latinos etiam, inter quos Celsus, ut diximus, vnicum pestilentis febris remedium in phlebotomia ferè collocat, & soranus eam ad præligandas pestíferas valetudines optimam iudicat. Ad distinctionem inductam febris pestilentis in actualement, & potentialem dicimus in prima ostensâ esse conuenientem phlebotomiam, in secunda etiam eandem conuenire, nec esse impedimento respectum virium lapsurarum ob superuenturum gradum virulentum, quia sectio venæ potest cohibere huius gradus aduentum, inhibere hunc virium casum. Quem casum virium considerans Trallianus, in artis operibus versatissimus, & cautionis amicissimus, de curatione febrium continentium loquens, dicebat festinandum esse sanguinis missionem, ubi conuenit, quod in omnibus morbis, sed præcipuè in continentibus incômodissima sit dilatio, febribus vehementioribus redditis, dum putredo augetur, & vires imbecilliores sunt, ut quæ febrium magnitudinem non amplius ferre possint, nec amplius magnorum presidiorum aliquod ad curationem admittere queant. Præclara nimirum vox, & optimi consilij plena, festinationem remedij carpere suadens ad impediendam virium labem, quæ si ex magnitudine febris concidunt, ex eiusdem remissione resurgunt, & hanc remissio-

nem pollicetur præpropera remedij cura, ut consideratio imminentis virium casus non dehortandi, sed cohortandi ad phlebotomiam habeat magnum momentum, siue febris pestilens fuerit manifesta, siue occulta siue ex principio externo, siue ex interno orta. De remedijs loco phlebotomiæ suffectis, hirudinibus nempe circa venas hæmorrhoidales, & cucurbitulis circa partes infernas scatificatis, hoc non omiserim dicere, neminem esse sanæ compotem mentis, qui hæc debeat remedia arguere à veteribus omnibus commendata, ratione suffulta, experimento confirmata, qui non debeat his manū dare si non datur secunda venæ oportunitas, sed cōsiderandum venit hæc esse remedia vicariam operam præbentia, nec rationi consonum esse, dimisso remedio principali, accedere ad ea, quæ vicem principalis gerunt, quia tunc non seruatur inter magnitudinem morbi, & remedij proportio, quam esse accuratè seruandam auctor est nobis Hippocrates in libro de locis in Homine sic dicens, omnia medicamenta sunt quæ præsentem statum dimouent, valentiora autem omnia immutant. licet autem, si quidem velis medicamento transmutare, sin minus, cibo. ægrotanti verò omnia è præsentī statu dimouere opem fert. nisi enim quod morbum facit dimoueris, augetur. In morbis debilibus medicamēta natura valentia minime sunt exhibenda, neq; imbecillitas medicamenti paucitate metienda est, sed in valētibus natura valentibus medicamenti v-tendum, debilibus verò non valentia medicamenta danda, neque medicamentum transmutandum est, sed singulis secundum suam naturam exhibendum, ita ut debilibus quidem debilia natura medicamenta

exhibeantur, valentibus verò morbis valentia natura medicamenta. Magnum est, & diligenter attendendum hoc Hippocratis documētum, in quo sunt plura memorabilia, illud primum, quod omnia quæ vim habent præsentis status dimouendi, dicuntur medicamēta, quasi artis Medicæ præsidia, siue medellæ, non solum si ad pharmaciam pertineant, sed etiam si ad chirurgiam, atque adeo diætā, alterum memorabile est, quod omnia, quæ vim habeant immutandi, debent esse valentiora, alioquin non immutant, sed relinquunt statum præsentem in peius ruiturum, non enim immutant quem non vincunt, nec vincunt eum, quo non sunt valentiora. Tertium adiungit quod hæc immutatio potest fieri non solum medicamento, sed etiam cibo, quando scilicet morbus est levis, nec magna exigitur vis ad immutandum. Quartum est, expedire in agrotante omnia dimouere, quia agrotantis, vt agrotans est, omnia sunt præternaturalia, & hæc sunt immutanda, si enim persistant, & non remoueantur, morbi succedit incrementum, quod nos supra considerauimus tamquam rem maximi momenti, non debere omitti remedia vim immutandi morbi habentia, ne morbus inualescens vires acquirat eundo, Tandem proponit proportionem inter morbum, & remediū seruandam, vt debilibus morbis debilia medicamenta aptentur, valentibus valentia, nõ debilibus valentia, valentibus debilia, quia prima fuerint superuacanea, & maiorem in agrotante motum, quàm sit opus inferent, secunda verò fuerint irrita, & nullam præsentis status immutationem inuehent. nã qui possint immutare si non sint valentio-

ra, & qui possint esse valentiora, si sint debilia? Talia sunt remedia ad pestilentem febrem relata, hirudines in venis hæmorrhoidalibus, cucurbitulæ scarificatæ in partibus infernis, quia non confertā faciunt, nec vberem euacuationem, qualem morbi dictat magnitudo, sed diminutam satis, & tollendæ totius plenitudini parum aptam, & hæmorrhoidum apertio non multum arri-det Galeno vbi quis non fuerit illi euacuationi assuetus, & cucurbitulæ scarificatæ videntur ei non tam ad vniuersum corpus euacuadum, quàm ad partem subleuandam accommodatæ, & sine præcedenti euacuatione totius malè tutæ. Sed has missas rationes faciamus, quicquid illæ habeant momenti, in hac præcipuè vim constituamus, quod leuia, ac debilia sunt remedia, & à phlebotomia multum distantia. Neque verò hic aliquis debet Galeni verbis inniti in quarto de sanitæ tuenda, vbi dicere videtur, si vitiosus humor sit cum sanguinis copia, aut vena incidenda, aut aliquid, quod tantumdem valet, agendum. Sanè tantumdem possunt, hæc quibus hæmorrhoides sunt retentæ, si has emiseris, si mulieri menstrua, consuetudo cessauit, hanc prouoces, si quibus horum nihil est, si malleolos scapello incidas. His verbis, quasi hæc auxilia phlebotomiæ paria facientibus, non potest quis inniti, quia mala est latina versio, & à contextu græco admodum aliena, in quo legimus, *εἰ μετὰ πλῆθος αἱμάτων, ἢ τοις φλεβοτομήσειον, ἢ τῶν ἀλλοτρῶν τὰς πρακτικὰς ἀνάλογα εἴρητι τὰς*. Quæ verba sic veniunt vertenda. si cum copia sanguinis, vel secunda vena, vel quid eorum, quæ sunt huic analogæ, faciendum. Analogæ autem sunt hæc. Non dic-

cit ergo Galenus hæc tantundem valere, & equare vim phlebotomiæ, sed habere analogiam, & proportionem cum ea, at proportio admit tit inæqualitatem, vt solet dicere Aristoteles in libris de animalibus spinam in piscibus esse analogam ossibus in terrenis animantibus, quis audeat autem spinam facere ossi parem? sic idem Philosophus in æthicis affirmabat alias esse amicitias æqualitatis, alias proportionis, vt per primam amici sint pares, per secundam valdè dispares, vt patet in amicitia inter Dominum, & seruum intercedente. Habent ergo remedia hæc non vim parem, sed proportionatam con disparitate coniunctam, vt omnia euacuent quidem sanguinem, sed non omnia æqua ratione, sed phlebotomia valdè, reliqua auxilia enarrata debilitè. Quam debilitatem cum hæc retineant, non sunt magnitudini morbi accomodata, quia non vincunt, nec possunt statum immutare, vt dicebat Hippocrates, in cuius doctrina, vt vidimus, non possunt vocari vera medicamenta quæ non sunt valentiora, & vim retinent vincendi. Esto igitur vtrumque propositorum remediorum laudabile, ac tutum in pestilenti febre, negare hoc nemo poterit esse vtrumque inualidum, nec propositam in curatione metam attingere. Quod clarissimè explicuit Celsus hæc de cucurbitulis etiã scribens libro secundo. Conuenit cucurbitula in acutis quoq; morbis quibusdam, si & leuari corpus debet, & ex vena sanguinem mitti, vires non patiuntur. Idquæ auxilium vt minus vehemens, ita magis tutum. Nequæ vinqvam periculosum est, etiã si in medio febris impetu, etiã si in cruditate adhibetur. Ideoque

vbi sanguinè mitti opus est, si incisa vena præceps periculum est, aut si in parte corporis etiã vitium est, huc potius confugiendum est; cum eo tamen, vt sciamus, hic vt nullum periculum, ita leuius præsidium esse, nec posse vehementi malo nisi æque vehemens auxilium succurrere. Ex quibus celsi verbis multa colligimus, primo cucurbitulam conuenire quidem in quibusdam morbis acutis, sed conuenire, cum per vires non est licitum sanguinem mittere, 2. esse quidem remedium tutissimum, sed parum vehemens, & ad illud confugiendum duplici in casu, vel cum sectio venæ est plena periculi, vel cum est vitium in parte corporis, vt hoc pacto innuat hoc sibi remedium non arridere nec cum vt licet phlebotomia, nec cum vniuersi corporis est affectio, postremo suum de remedio promit iudicium, tantum ei demens efficaciam, quantum ad dir securitatis, & in vehementi morbo æque vehemens auxilium requirens. cuius vehementiæ cum sit cucurbitula expers, non multum potest in magno morbo præstare opis, eo solùm nomine non omittenda, quod melius est aliquod tentare præsidium, quàm nullum. Quod oribasius etiã expressit octauo. Medicinalium collectionum ex Apollonio in hunc modum de scarificatione loquente. optimum sanè præsidium est tum ad conseruationem sanitatis, tum ad eiusdem recuperationem, vbi ipsa deprauata fuerit. Nemo tamen phlebotomiam à me explodi suspicetur. ego enim illam in maximis, periculosissimisque affectibus non omitto, in quibus sanè abunde, affatimque sanguinem mittere est opus. nunc proinde vt affectus sunt vehemētes, ita

quoque affatim vacuationes facien-
da sunt. Plethoram autem com-
moderatam, quæ aliquid mali fa-
ctura sit, ac iam conuersionem in
morbosum statum attingat, tibia,
quæ sacificationibus vexata fue-
rit, innoxiamque totam, quam vo-
lumus, sanguinis illigationem red-
diderit, citra validam totius molis
commotionem, soluit. Sic Oriba-
sius cum Apollonio laudat scarifi-
cationes, vt longè præferendam
assumat Phlebotomiam, quam in
maximis, & periculosis morbis
sibi familiarem esse testatur, & ra-
tionem adiungit à proportionem re-
medij cum morbo deductam, quia
in morbo magno sanguis sit copio-
sus, & affatim effundendus, alio-
quin non immutat corpus, nec in-
nouat statum, quod in magnitudi-
ne morbi faciendum venit. At in
modica plenitudine, quæ vel mina-
tur morbum, vel vix inchoauit, sca-
rificatio potest supplere, soluens
plenitudinem, subleuans naturam,
& ita in curatione potius proponi-
tur phlebotomia, in præseruatione
scarificatio (contrarium autem asse-
rebat salius) & valdè rationabiliter
proponitur, quia veluti difficilius
est pellere hostes Urbem ingressos,
quàm arcere obsidentes, ita maio-
ris est molis morbum factum pro-
stigare, quàm imminuentem inhi-
bere, & maiori machina est opus
ad vincendum morbum inualecen-
tem, quam vix incipientem, quip-
pe in hoc omnia sunt leuiora, &
morbi ab initio suæ inuasionis sunt
veluti arbuta vix à terra erumpen-
tia, sed suæ confirmationis tempo-
re sunt instar arborum homines
operientium, & claras suæ naturæ
significationes dantium, vt elegan-
ter in tertio decimo Methodi consi-
derauit Galenus. Ex his apparet

adductas superius rationes solui fa-
cile posse, nec excludendam esse
in pestilentibus febribus phleboto-
miam, sed vsurpandam cum licet
per vires, quod licere interdum du-
bitauerit nemo vel mediocriter in-
artis versatus operibus, si nulla in-
terponatur mora, sed in prima fe-
bris inuasionem remedium obeatur
priusquam febris magnitudo virtu-
tis inuehat paruitatem, nam cum
virtus languet, stulti, fuerit venam
tundere, prudentis fuerit ad cucur-
bitulas scarificatas, ad hirudines
hæmorrhoidibus appositas, tutissi-
ma omnium remedia, confugere,
quæ nos remedia nec reprobamus,
nec reprobantes non reprobare pos-
sumus, imo volentes, ac lubentes
frequentissimè in vsum curandorū
agrorum reuocamus, illud tantum
astruere volumus, venæ sectionem,
si non est in morbis pestilentibus
semper facienda, non esse tamen
semper omittendam, imo dari non
infrequentem eius celebrandæ oc-
casionem, & hinc maiorem expe-
ctari, quàm vel ex cucurbitulis, vel
ex hirudinibus opem, quod & ra-
tionum ostendit claritas, & aucto-
rum docet auctoritas, & experi-
mentorū confirmat utilitas. Illa
tamen placere debet cautio, vt in-
dicationi sanguinis minuendi non
per solam venam sectam, quam vi-
res commodè permittant, satisfiat,
sed per adiectas etiam hirudines,
vel cucurbitulas, vt si euacuanda
veniat libra sanguinis, bipartita
fiat euacuatio partim per venam
sectam, partim per alterum reme-
diorum analogorum absoluenda,
ac tanto absoluenda tutius, quan-
to vel per hirudines, vel per cucur-
bitulas spirituum dissolutio sit ob-
securius, & post remedium vniuer-
sale, quod habet rationem potius
par-

partialis adhibetur conuenientius.

*De Vsu Medicamenti vt remediij
præseruatorij.*

CAPVT XX.



AD prohibendum cō-
fluxum humorum,
obstructiones effi-
cientium diximus
requiri euacuantia,
inter quæ principem
sibi locum vendicat venæ sectio,
quæ omnes æqualiter humores
venis educit, nec solum euacuando
iuuat, sed etiam reuellendo, & im-
petum confluentium humorum
retundendo. Hanc eandem va-
cuandi operam præstat etiam medi-
camentum, quod peccantes humo-
res per aluum potest, per urinam,
per sudorem, atque adeo per vo-
mitum, si ad illum sit propensio in-
nata, expellere, vt docet sæpius in
vndecimo Methodi Galenus. Ac
de medicamento quidem aluum
ducente illud primum consideran-
dum proponit, quòd cum plerum-
que acrimoniam habeat, vinique
retineat calefactoriam, & exiccanti-
am, hoc nomine euadit suspectum,
ne febrem augeat, eiusque calorem
conduplicet, quia Galeni tempe-
ratis non erant nota placidiora hæc
medicamenta leniendi vim haben-
tia, refrigeratoria potius, & hume-
ctantia, quàm calefactoria, & exic-
cantia, quæ ex felici Arabum in-
uentione in usum vtilissimum sunt
reuocata. Hinc in commentarijs
quarti acutorum idem Galenus
affirmat Hippocratem proposuisse
ad ardentes febres curandas lac as-
inithum coctum, quippe qui calidio-
rem, acrioremque pharmacorum

facultatem pertimesceret. Vnde
etiam factum est à Galeno, vt ad
moliendam etiam ventris euacua-
tionē cremori ptisanæ, aquæ mul-
sæ, oximeliti, alijsque id genus de-
derit manus, & aluo his non obtem-
perante, ad placidum clysterem ac-
cedendum proposuerit, validiorem
pharmacorum vim meritis. Qui
quidem si nostrorum lenientium
suppellectilem habuisset paratam,
non recusasset certè ea interdum vt
ad ciendam aluum, deturbandasq;
crudiufculas materias in primori-
bus vijs existentes, & huius placidæ
moliendæ euacuationis indicationē
præbentes. Ad implendam euacua-
tionis placidæ indicationem licet
præcipuè accedere in febribus in-
termittentibus, vel etiam his, quæ
in continuitate endosin habent ta-
lem, vt solet vocare Galenus, vt a-
gnoscant intermissione propemo-
dum parem, in quibus non ita vr-
get minuendi sanguinis indicatio,
quin liceat interdum præponere le-
nientis medicamenti exhibitionē.
nam licet Galenus afferat in com-
mentario primo in sextum Epide-
miorum, cum opus est utroque re-
medio, phlebotomiæ videlicet, &
pharmaciz, inchoandum esse à pri-
mo, id tamen intelligendum venit
in relatione ad medicamentum pur-
gans, cui præponenda est venæ se-
ctio, nullius indiga præparationis,
concoctionisue in humoribus eu-
acuandis, quæ præparatio, & coctio
necessaria est, vt ostendimus, phar-
maco purganti, & à remotis cor-
poris partibus trahenti, non neces-
saria, sed superuacanea lenienti so-
las primas vias ab infestis excremen-
tis expianti. Hoc ergo poterit ali-
quando præponi phlebotomiæ, cū
materia nempe excrementitia pri-
mores obsidens ductus virgendo in-
dica-

dicabit, nec temerè tamē ad hæc vel lenientia medicamēta accedendū, sed memoria semper retinendum Hippocratis documentum in libello de medelis purgantibus asserentis in febribus continuis vel expectanda parum manifestam remissionem, vel diei saltem quartæ decimæ egressionem antequam pharmacum propinetur. nam etsi de purgantibus ibi est sermo, tamen in usu etiam lenientium magnitudo febris magnam exigit cautionē ob actum febrilem negocium facessentem, & motum medicamenti labefactantem, & in contrarios interdum euentus deducentem, Vnde Auicennas in prima Fen Quarti Canonis ad dicendum fuit inductus, suspecta se in his febribus habere vel leuissima medicamenta, & magis amare clisteres, habereque magis amica enemata. Cuius dicti illud forsitan fuit occasio, quod Hippocrates considerat in libro de locis in Homine, incertos esse, planeque ancipites medicamentorum in humano corpore motus, ut sæpe irrita fiant quæ multū debent mouere, sæpe multū moueant quæ vires videntur imbecilles præferre, sæpe alimenta induant naturam medicamentorum, medicamenta vim alimentorum. Quod respiciens quoque Cornelius Celsus dixit in secundo libro, Quæ medendi causa reperta sunt, nonnunquam in peius aliquid conuertunt, neque id euitare humana imbecillitas in tanta varietate corporum potest. ut in varietatem corporum, difformemque semper dispositionem referat Celsus varietatem effectuum, difformemque euentum à medicamenti prodeuntem. Quæ quidem dicta non tardum, nec hæsitandum, sed cautum reddere debent Medicum in-

propinandis etiam lenientibus cumque febricitanti, præsertim si febris continua fuerit, quoniā iuxta Hippocraticum dictum nihil temerè, nihil negligere, & cautum reddere debent non tam in prima lenientis exhibitione, quæ in primo morborum insultu solet esse familiaris, quàm in illa eiusdem repetitione, quæ in eorundem morborum progressu, in ipso incremento, in ipso statu febrium solet à multis usurpari, singulis ferè tribus diebus aliquid vel cassia, vel lenitiui, vel alterius medicamenti similis exhibentibus, quam consuetudinem miris ad cælum extollit laudibus Argentarius in commentario vigesimi quarti Aphorismi primæ particule, & hoc quasi medendi arcano mirificas à se curationes gloriatur perfectas. Non mihi est animus consilium hoc suscipere consuetudum, est animus tamen fateri illud esse mihi valdè suspectum, quia videtur Hippocrati menti repugnare in secundo Aphorismorum iubentis mouere inchoantibus morbis, si quid videatur mouendum, quiescere in eorundem consistentia, & vigore, ne distrahatur natura, & auocetur ab ea, quam tunc temporis molitur, humorum concoctione, in qua præcipua residet salutis spes, nec mihi dicat aliquis mouere esse proprium eius, qui vel sanguinem detrahit, vel pharmacum purgans exhibet, quia ego etiam dicam quiescere esse proprium eius, qui nihil agit, sed feriatur ab omnibus, nec vel ipsis utitur lenientibus, quæ possunt interdum non leuem excitare, nec expectatam commotionem, ut sæpe docuit euentus, nec fidendum est exiguæ remediij quantitati nullam alterationem alaturæ, quia, ut ait Hippocrates loco illo de locis in homine, imbecillitas

litas medicamento paucitate metien-
da non est, pro varietate corporum,
magno interdum medicamento nul-
lum motum, paucis contra magnū
excitante, vt ob hanc causam præter
clysteres omnia etiam leuissima le-
nientia Auicennas habuerit suspe-
cta. Ac si vera fatenda sunt, vt ob-
seruari aliquando cum aliquo ægro-
rum emolumento hanc medelam
fuisse seruata, ita frequentius a-
nimaduerti non leuem hinc iactu-
ram esse profectam præcipue in vi-
gente febrium feruore, cum natura
summam aliunde requirit quietem,
vt suam perficere possit alterando-
rum humorum commotionem, &
quam sibi libuerit moliri, eam absol-
uere valeat morbosæ materiæ ad-
ministrationem. Cautionem igitur
lenientium quoq; consulimus, non
eorundem omissionem, & veluti eo-
rum vsum etiam repetitum inter-
dum laudandum censemus, ita ni-
mis familiarem, & sine præmedita-
tione factam exhibitionem suspe-
ctam habemus, vt vniuersum hoc
negocium prudenti medentis iudi-
cio sit relinquendum. Nunc à lenien-
te ad purgans medicamentum tran-
seamus. Hoc sectionem venæ con-
sequitur, vt diximus, quia præceden-
tem exigit præparationem, coctio-
nemq; humorum minus in mittendo
sanguine necessariam, hanc, in-
quam, exigit præcedentem, nisi vr-
geat materia turgens, irrequiereque
impetu hæc illac delata, iuxta moni-
tū Hippocratis affirmantis in ce-
lebris aphorismo primi libri conco-
cta medicari oportere, non cru-
da, neque in principijs, nisi materia
turgeat, quæ plerumque non turget,
vt ideo attendenda, expectandaque
sit coctio, vt parata, beneque di-
sposta ad excundum materia pur-
getur, adminiculum præbente natu-

ra morbificæ materiæ dominata,
eamque arbitrati suo dirigente,
nam crudior existens irritatur fru-
stra, magnoque ægrotum detrimen-
to commouetur, & conturbatur si-
ne villo quâsitæ expulsionis fructu.
At materia turgens, inordinatoque
motu varias corporis partes quasi
furibunda impetens quam celerri-
mam exposcit purgationem, vt ansa
dematur imminenti discrimini, ne
in aliquod nobile viscus impingat,
eique effatu dignam labem inferat.
nam furem quis possit coercere
hominem nullius regulæ capacem,
omne imperium detrectantem?
Hunc redolet materia turgens, &
vocatū à græcis orgasmum præse-
ferens, quia hunc etiam non licet
compescere, & a præcipiti, plenoque
minarum cursu reuocare. Verum
bono humanæ naturæ fato contin-
git, vt non frequens sit hic furor, &
quasi rabidus humorum impetus
impetum animalium æmuletur,
quæ Venæris æstro accensa in Vene-
rem effrenata ruunt, quorum fu-
rens incitamentum lepidè apud Pla-
tonem in conuiuio describit Dioti-
ma. Hinc factum est, vt Hippocra-
tes in Aphorismis dixerit in acutis
passionibus raro, & in principijs me-
dicamenta purgantia esse adhiben-
da, idque cum præmeditatione fa-
ciendum. nam cum in altero apho-
rismo dixisset cōcoctam solum ma-
teriam esse expurgandam, non cru-
dam, neque in principio, nisi tur-
geat, & addidisset plurimam non
turgere, huncque turgentia casum
esse infrequentissimum, voluit in
hoc quasi colligere in acutis passio-
nibus raram esse purgantis exhibi-
tionem in principijs factam, quo
tempore viger materiæ cruditas,
quia rara est eius turgentia, quæ fa-
cit vt non expectata coctione pur-
gemus.

gemus, quæ turgentia quoniam propria est acutorum morborum, & a longis aliena, ideo in acutis solis prope relinquit anſam purgandi in principio longis denegatam, ſed in acutis etiam prudenter, & cum præmeditatione pertractandam, quod in materia etiam furente attendendus ſit, & pro virili procurandus qualis- cumque apparatus, ut in illius aphorismi commentario plenè declarat Galenus. non enim admittenda Argenterij medicamentorum amiciffimi expoſitio exiſtantis morbos dumtaxat longos ſub regula concoctionis ad purgandum expectandæ fuiſſe ab Hippocrate comprehenſos, inde autem acutos exceptos, in quibus frequentem ſuadeat in principiis purgationem etiam non præſente humorum turgentia, non eſt, inquam, admittenda nõ ſolum quia Galeno contrariatur, quem abſque dubio veriſimilius eſt Hippocraticam oſceſſiſſe mentem, verum etiam quia ratio, quæ materiam crudam oſtendit purgationi ineptam, non minus in acutis, quàm in morbis viget longis, & nullam aliam dedit exceptionem Hippocrates, niſi a materiæ turgentia petitam, quæ turgentia cum non ſoleat in longis, ſed in acutis affectibus virgere, non facit in illis, ſed in iſtis exceptionem, & quia rara eſt hæc furentis materiæ occaſio, rara etiam eſt in acutis facta ab initio purgatio, cui etiam accedere debet accurata præmeditatio. nam tanti facit Hippocrates actiones exercere in ſubiectum benè diſpoſitum, & cauere a male parato, ut vel in ipſa humorum turgentia, cuius tamen eſt maximum momentum, prudentem præmeditationem requirat, quia philoſophicum eſt Theorema a Galeno in primo de ſymptomatum cauſis, & de differen-

tijs febrium confirmatum ad promendos effectus non tam vim principij efficientis, quàm patientis habilitatem valere. Maneat ergo inconcuſſa hæc Hippocratica, & Galenica ſimul doctrina pulcherrima non eſſe purgantibus attingendam materiam, quæ cruditatem includat, & turgentiam excludat, ut cruditas auocet à purgando, turgentia alliciat, quippe quæ non ſinat coctionis expectare opem, & feſtinare non lentè, ſed feſtinanter cogat ad cauendam nobilis membri ab irrupente materia noxam. Hanc eandem indicationem, quam præbet turgens, inſinuat etiam virulenta, & venefica materia, quia ſi turgens excitat ad purgandum quatenus lædere poteſt partes præcipuas, quanto magis excitare debet venefica, quæ actu lædit? In materia morbiſica vel conſideras cruditatem, vel furorem, & virulentiam. Cruditas retrahit à purgando, quia actus benè exercentur ſolum in ſubiecto benè diſpoſito, furor, & virulentia inuitant ad purgandum, ut imminens grauiſſimorum ſymptomatum arceatur periculum. Præclare Hippocrates in libro de Arte cum Nautis comparat Medicos, nam veluti illi in tranquillo maris ſtatu expeditam habent nauis gubernationem, oborta verò tempeſtate acutam adhibere coguntur ſolertiam, ita hi in morbis facilibus & in quieſcente materia coctionem expectante facilem habent medendi progreſſum, in morbis implicatis, & materia vel furente ob turgentiam, vel venefica ob prauitatem aliquid agentes vel periclitari inducuntur. Quoniam igitur humorum furor, & virulentia plus valent indicando, quàm cruditas prohibendo, purgationi in ſuccis

tur-

turgentibus, & veneficis opportunus conceditur locus. nam dum Hippocrates in turgentia clarè concedit, multo magis in venefica qualitate insinuat concedendum. Hinc Galenus in octauo Methodi fuit auctor in grassante pestilenti maximum attulisse commodum tum vomitionem, tum adhibitam purgationem. Non arrisit hæc sententia Celsus, qui pestilentis febris curationem explicans in hac minimè vtile dixit vel fame, vel medicamentis vti, vel dicere alium. Quasi monere voluerit magnam esse habendam rationem feruidi caloris in pestifera febri lancinantis, & partes saltem internas exurentis, magnam virium à magnitudine morbi aut deiectionum, aut facili negotio deijciendum, magnam cruditatis in quiescentibus humoribus vigentis. Quæ omnia à propinando pharmaco prudentem Medicum videntur auocare. Nec dubitandi relinquitur locus solerti hic opus esse iudicio. Comparanda vis indicantis cum vi prohibentium. materia venefica indicat, prohibet magnitudo febris, virtus interdum inualida, cruditas humorum: si plus habet momenti materia indicando, quam cetera prohibendo, purgatio obeunda, si e contra, dimittenda. Galenus quidem respexit magnam actiuitatem veneficæ materiæ, quam non vehementissima febris comitetur, non insignis virium languor, quippe urgente febre, & flammeam quãdam caliditatem præferente nec in ipsa turgente materia tutam autumat purgationem, vt patet secunda Aphorismorum particula, vbi turgentibus humoribus applicandam purgationem suadet vel prima die, vel saltem altera antequam febris magnam accipiat incrementum, quasi

innuere velit à magno febrili calore vsum purgantis prohiberi. Quo non extante impedimento cruda etiam materia in corpore ad suscipiendam purgationem accomodato, quod quale sit in prima aphorismorum particula explanat Galenus, si vel turgeat, vel venefica admodum sit, potest salua methodo purgari. Quibus Galenicis inhærens vestigijs fidelissimus eius interpretes, & confectator Auicennas quarta Fen primi Canonis in pestilentium febrium initijs, quando humores à sanguinis recedentes natura peccant, præcipit purgationem. Quàm si non velis nomine vaccinationis vndequaue laudare, non possis tamen reuulsionis nomine auersari, vt venefica, virulentaque qualitas à præcipuis auocetur visceribus, longiusque trahatur. Hoc quidem reuulsionis nomine in alijs etiam casibus licet interdum ab initio purgare, quia non solum in confluxu inordinato, & furente humorum varias partes peccantium, sed in ordinato etiam, ac definito vnicam dumtaxat partem occupantium, & ad vnicum membrum confluentium, qualis est casus excrementorum ad excitandam, augendamque pleuritidem repentinum, in quo quidem Hippocrates secundo acutorum libro vsum veratri à primordio proponit, si dolor non ad clauiculam tendat, sed hypochondria infestet, ad reuellendam materiam ab incepto in thoracem conflinxu, & per conuenientes vias à natura tentatas pharmaco deducendam. Galenus quidem parumper in hoc ab Hippocrate dissentiens in hoc etiam casu sanguinis missionem præposuit vt remedium ad faciendam quæsitam reuulsionem accomodatus, medicamenti incertitudinem, turbationemque veritus, & fe-

bris vehementiam pleuriticis consistantis, quæ non tam respexit in suo decreto Hippocrates, quam inclinationem, propensionemque, peccantium humorum, cui magis conuenire videatur purgatio, quàm sanguinis missio, quæ solam ferè fluentium humorum facit retractionem, purgatio verò non fluentes solum, sed ad fluendum etiam paratos euocans melius compefcit fluxionem humorum præcipuè suo pondere deorsum tendentium, suaque natura malè phlebotomiæ, per bellè pharmaciam motum consecrantium. Verum nec ipse Galenus respuit, nec damnat purgationis remedium in conferta concursione succorum ad inflammationem partem impetu quodam ruentium, non solum enim in pleuritica inflammatione id genus medelæ permittit, sed in ea etiam, quæ fauces occupat, & anginam constituit, vt patet in sexto de compositione medicamentorum secundum loca, & in ophthalmia, magnaue oculorum inflammatione idem se purgationis remedium adhibuisse magnocum agrotantium emolumento in decimo tertio Methodi fatetur, in quo etiam libro à nullis ferè inflammationibus etiam inchoantibus, dum corpus prauis sit humoribus plenum, & febris præsentia exercitationis, vel balnei administrationem inhibeat, aliquam saltè purgationem alienam existimat. Qui memor huius placiti in decimo quarto eiusdem Methodi vehementem quoque erysipelatofam inflammationem anterepellentium appulsum purgando curat, veritus in pleno corpore ipsam repulsionem, ne ad nobilissimum viscus repulsa materia imperum habeat, & veluti missionem sanguinis in phlegmone, ita purgationem in erysipelate magis

conuenire arbitratus. Hinc potest colligi fuisse Galeni mentem non modo in motu ordinis experte, furorisque pleno, quem feruent humores turgent in omnia membra propensi, & omnibus noxam minitantes, sed in motu etiam eorundem ordinato ad partem quampiam determinatam pro inflammatione adaugenda delatorum conuenire ab initio purgantis interdum operam. Verum hic insurgens aliquis dixerit Galenicam in hoc doctrinam Hippocraticæ repugnare, cum Hippocrates in Quarto acutorum aperte clamet ea, quæ inflammationem inter initia morborum non esse medicamento tentanda, quòd ab inflammata parte nil dematur non cedente, nec obsequente quæ adhuc cruda est, affectione. At nodum hunc non est difficile soluere. nam, vt docet Galenus in decimotertio Methodi, in his, quæ adhuc suam habent generationem, inflammationibus duo præstare tenemur, sanguinem scilicet, qui iam confluit, & parti est impactus, euacuare, & confluxurum, & ad partem inflammatam progredientem compefcere, & coercere. Primum ergo sanguinem, qui parti iam videtur impactus, non possumus medicamento eximere, sed aperientibus, ac digerentibus auxilijs hic venit educendus sed existentem in fluxu, & fluxioni paratum commodè possumus pharmaco euacuare, & sic inflammationis incrementum impedire. Apparet ergo medicamentum conuenire ex Hippocratis, & Galeni doctrina non solum cum materia est cocta in progressu morbi, quo tempore purgandum esse nemo diffitetur, ne humorum in morbis reliquæ faciant quas solent facere offensiones, sed etiam aliquando in cruditate materię, & in
prin-

principio morborum, cum ea scilicet habet insigne vitium vel in qualitate, vel in motu, in qualitate, si fuerit valde virulenta, & venefica, in motu, si turgeat, & in partes omnes rapido, inordinatoque motu feratur, vel etiam non turgens ad partem aliquam determinatam tendat, & effatu dignam inflammationem excitet. Ad quam præcauendam, adhibent hi Medicinæ Coriphæi aliquam saltem purgationem, si non omnibus numeris expleam. nam celebre Herophili dictum non est à ratione alienum, vt fatetur etiam Celsus in Epistola ad Callistum, medicamenta Deorum immortalium manus esse, quia quod diuinus tactus efficere potest, id quasi præstant medicamenta vsus experientia comprobata. Quem euentum in propositis præcipue casibus cum magno ægrorum periculo coniunctis solemus animaduertere. Verumtamen cum magna præmeditatione qualiscunque purgatio molienda, quia imparata, & adhuc rebellem materiam dum moues rem arduam tentas, & repugnanti naturæ molestam vim infers. Et quoniam infrequētes sunt propositæ occasiones, & raro contingunt, & cum contingunt, apud multos clarissimos viros remanent controuersæ si non omnes, aliquæ saltem, ideo infrequentius in morbis inchoantibus purgare debemus, vt monuit Hippocrates in Aphorismis, & annotat vrgens Galenus in commentarijs, cum sit Hippocraticum consilium inchoantibus quidem morbis mouere si quid videatur mouendum, sed cum duplex fieri possit motus, alter per venam sectam, alter per pharmacum, huius postremi adhibendi infrequentem, esse occasionem, vsuque rarissimum idem auctor decernit. Quod

quidem præcipue veritatem habet in curandis febribus, quarum vehementia, & magnitudo suspectam semper facit purgationis administrationem ob ipsius medicamenti acredinem, & caliditatem exaggerandæ febris opportunissimam, quæ ratione motus Galenus in principio pleuritidis non libenter accedit ad propinandum pharmacum etiam dolore ad Hypochondria vergente, sed sanguinis detractionem amplexatur libetius, vt superius diximus, & ob eandem causam affirmat in quarto de victus ratione auctorem lactis asinini vsu proposuisse, ne calido pharmaco vrgentem ardentis febris feruorem conduplicaret. In quo quidem vniuerso libro purgantium operam in febribus præcipue parum ab initio laudatam legimus, quasi vrinarum maturacionem, cui potissimum sit incumbendum, impedituram, ideoque post morbi vigorem, & post diem saltem quartumdecimum differendam. nam verissimum est illud, quod libro tertio ait Celsus, Antiqui medicamentis quibusdam datis concoctionem moliebantur, eo quod cruditatem maxime horrebant, deinde eam materiam, quæ lædere videbatur, ducendo sapius aluum subtrahabant. Ex quibus apparet verbis præcessisse secundum antiquos remedia concoctoria, & preparatoria, successisse euacuatoria, & hæc fuisse potius placidiora, & per vices ad aluum subducendam repetita, vt in cruditate materiæ non purgarent, eiusque maturitatem expectarent. In quem finem auctor quarti acutorum illud memorabile tradidit documentum. Quibus principio vrinæ & nebulosæ, & crassæ existunt, hos annuentibus cæteris purgare conuenit. Quod si vrinæ inter ini-

ria tenues fuerint, tales non purgabis, at si videatur, clysterem exhibebis. Tales autem ita curare confert. Corpus quieti permittere, vngere, & æqualiter tegere oportet, mulsamque aquosam bibendam, & pituitosam cremorem sorbendum dabis. Ventre ab initio clystere duces, sed medicamenta purgantia non admouebas. Nempe si ventrem moueris, vrina non maturabitur, febrisque citratum sudorem tum iudicationem in longum protrahetur tempus. In cuius dicti explicatione pulchre ostendit Galenus cur ad faciendam coctionem quiete sit opus, & commotio omnis, & agitatio contrariam vim exerat. Quam quidem doctrinam his esse admodum consentaneam, quæ ab Hippocrate tradi asseruimus in libello de purgantibus medicamentis, dubitauerit nemo in eius lectione versatus. nam ibi in febris continua, & magnitudinem aliquam habente detestatur purgantia, eorum caliditatem, agitationem que pertimescens, vel saltem non nisi post quartam, decimam diem, remisso iam febris impetu, adhibenda censet, intereaque blandis clysteribus aluum subducendam, illud adiungens, quod carnes febricitantium, & ventres ab initio medicamentum ad se trahunt, ut nulla consequatur purgatio, magna consequatur flammei caloris amplificatio. Trahunt carnes febricitantium medicamentum, quia feruent tunc temporis, & æstuant, & proprium est caloris attrahere, ut docet Galenus in decimo tertio Methodi, & veluti maior flamma trahit ad se minorem, ita carnes illæ calidiores ad se trahunt medicamentum non tanta caliditate præditum, hincque febrilis sit caloris exaggeratio, quia adiunctum est igni pabulum, & ignis

agitatione accipit incrementum. Quæ ne contingant suadet senex diuinus purgantium fugam, & clysterum administrationem tamquam tutissimam inculcat, unde etiam Galenus in vndecimo Methodi, ut supra annotauimus, in febris blandos clysteres pharmacis præponendos existimat, hisque inherens Aulicenna vestigijs non solum purgantibus, sed lenientibus etiam medicamentis, ut diximus, eos præponit. Quod verum putandum est de febris continuis, & non vulgari magnitudine præditis, in quibus omnis à medicamento excitata agitatio esse potest suspecta, & minus, quam clysteres, tuta; nam in his, quæ vel intermissionem, vel magnam remissionem habent, adhiberi etiam à primordio potest lenientium exhibitio, præcipue ubi in primoribus vijs magnus adest excrementorum proventus, qui cito veniat eximendus, ne ulterius permeans, per venosumque genus perreptans infestas iam obstructions augere possit, quod superius fuit à nobis animaduersum. In quo etiam conspicua apparet præseruatoria medicamenti facultas. In quo casu ante sanguinis etiam detractionem accedimus ad medicamentum exhibendum, quod in quarto acutorum post eam usurpandum monebat auctor, quia ipse de purgante loquebatur, nos modo loquimur de leniente temporibus priscis ignoto, quod præponi interdum potest phlebotomia, quando febris non vrget magnitudo, & magis vrget in primoribus vijs existens materia excrementitia, quæ per solum educi clysterem non potest, & maius aliquod præsidium exposcit. Verum quærere possit aliquis, si pro purgante propinando expectanda est humorum concoctio, & febris

appa-

apparens remissio, nec ante hoc tempus licet purgare, nisi aliquando in propositis casibus, idque cum magna præmeditatione, qui tamen casus sunt infrequentes: quid opus est tunc purgare, cum facta sunt omnia mitiora, cum febris vigor euauit, cum iam affulget dominantis naturæ victoria, quæ certam, & pollicetur, & præstat salutis spem, vt docet Galenus in libris de crisi- bus? ex dictis superius colligitur dubitationis solutio in eo posita, quod purgatio sit ad abolendas morbi reliquias, vnde perniciose consueuerunt excitari interdum recidiuæ, ad expellendam materiam concoctam, quæ non eam gratiam à natura suscepit, vt possit partes nutrire, & in alimoniam facessere, sed eam solam, vt sit ad expulsionem parata, expellentique naturæ à medicamento præsertim adiutæ obedire prompta, vt in commentarijs secundi acutorum ostendit Galenus, non tam ad tollendam febrem præsentem, quàm ad inhibendâ imminentem à noua putredine excitandam, quia, vt superius cum eodẽ Galeno explicauimus, qui febrem curat, non id modo, quod eius accensum est, respicere debet, sed id quoque, quod mox accendi potest, cuius qui magnam non habet rationem, inanem molitur, planeque voti expertem curationem. Quapropter sæpe docuit euentus ob ommissum in febricitantibus ad meliorem iam frugem redactis medicamentum, ob neglectam materiæ morbificæ suam coctionem adeptæ indicatam è corpore expulsionem, non solum noua morborum incrementa esse consecuta, sed celeres etiam miserorum agrotantium mortes, nam veluti in arte militari non satis est Imperatori, seu cui-

cumque Duci hostes compescuisse, sed ad omnimodam securitatemonus incumbit vt de medio tollat, quia hostes superstites licet infracti noua semper in hostium perniciem moliantur machinamenta: ita in arte Medica non sufficit Medico peccantes humores cohibuisse, & coctionis quodam quasi freno coercuisse, sed conuenit etiam vnde quæque è corpore deturbare, in quo nõ possunt quiescere sine magno nouæ putredinis periculo. Hinc factum est, vt in secundo Aphorismorum dixerit Hippocrates, quæ relinquuntur in morbis post iudicationem recidiuas facere consueuisse, vt non solum in remissione morborum, sed in facta etiam iudicatione, quæ tãquam imperfecta reliquias humorum adhuc reliquerit, purgandum hominem censeat. nam has necessarium est, vt declarat in commentario Galenus, tempore putrescentes febres accendere, quia omnis humor alienus, à natura Corporis, in quo continetur, aptus naturæ non est ad eius nutritionem, & in posterum necessario in putredinem vertitur, præcipuè si in loco calido contineatur, quia ab innato calore potuit quidem vinci, sed non potest ab eodem contineri, potuit, vinci ad expulsionem, non potest dirigi ad conuersionem, potuit subtrahi dominio caloris putredinosi, non potest ab eodem seruari tutus. Non omittenda ergo purgantium medicaminum suo tempore cura, in quibus tamen adhibendis placidiora sunt seligenda, & cum lenientibus coniungenda, vt magis caueatur omnis caloris febrilis exacerbatio, & cum minori succorum perturbatione necessaria obeatur expiatio, quæ præclarum est putridarum febrium præseruatorium præsidium.

pur-

Purgantia placida pro varietate humorum euariantia omitto tamquā notissima, ac tanto magis omitto, quod vniuersalia persequi, non multum particularibus addictus, cogito.

De Preparantibus, & concoquentibus purgatione efficienda.

C A P V T XXI.



EX supradictis constare potest materiam morbificam raro esse purgandam, nisi cocta sit, atque adeo preparata. nam, vt supra cum Galeno diximus, ad producendum effectum non tam valet efficacitas causæ efficientis, quam dispositio causæ materialis, vt non tam respicere debeamus vim medicamenti purgantis, cuius ope calor innatus insurgit ad expellendum, quam dispositionem humoris, corporisque purgandi, sine qua irritus plerumque euadit omnis conatus susceptus ad purgandum. Concoctionem insinuat Hippocrates, vt diximus, quando in celebri illo aphorismo decreuit concocta medicari oportere, non cruda, neque in principijs, nisi materia targeat, preparationem autem, quando in alio aphorismo dixit corpora ante purgationem fluxilia esse reddenda. non enim idem est preparatio, & concoctio, vt aliqui ad pauca respicientes facile enuntiarunt, Sed valde inter se differunt, magnoque distincta sunt intervallo. Quod luculentius monstrant hæc Galeni verba in libro de artis constitutione. Quod in naturalem statum redire potest, contrarijs alterare oportet; crassum, & viscosum attenuando;

tenuē incrassando, & communiter vtraque concoquendo. Ex quibus nimirum verbis elicitur aliud esse humorum preparationem, aliud concoctionem, & preparationem quidem in eo residere, vt quæ crassa sunt attenuentur, quæ tenuia incrassentur, quia hoc pacto tollitur immoderata illa secunda qualitas crassitiei, vel tenuitatis, quæ facit eos rebelles ad suscipiendam concoctionem, cuius ope facilem subeunt, expeditamque purgationem. Preparatio quidem est opus magis artis, quam naturæ, concoctio contra opus magis naturæ, quam artis, quia preparatio fit per incipientia, attenuantia, incrassantia, aperientia, concoctio autem fit per calorem innatum roborantia, qui calor innatus temperat, & moderatur, vt oportet, crudos existentes humores, & ad meliorem, quam fieri possit, magisque naturæ consentaneam redigit frugem. Preparatio quidem duo præstat, vt docet Galenus in explicatione commemorati aphorismi de corpore fluxili ante purgationem efficiendo, alterum pertinet ad humores euacuandos, alterum ad partes, per quas fieri debet euacuatio. Humores namque quatenus crassi veniunt attenuandi, quatenus viscosi incidendi, vt impertitam à medicamento commotionem suscipere commode possint, aliquando etiam tenues incrassandi, si præ tenuitate effugiant impulsus, vt contingit in catharris tenuissimis, qui præ nimia sui tenuitate tussientis conatum reddunt irritum; partes autem corporis, per quas facienda est euacuatio, disponendæ sunt meatum obstructione, & qualicumque occlusionē sublata, vijsque conuenientibus referratis, vt propellendis humori-

moribus expeditus pateat aditus. Hæc est si luxilitas corporis, per quam excrementa facile fluunt, & ratione sua substantiæ, & ratione spatij, per quod veniunt euacuanda, hæc est opportuna præparatio humorum euacuandorum, sine qua inanis est, planeque temeraria omnis de purgando suscepta cogitatio. Nec sufficit tamen hæc in humoribus induta dispositio, & in meatibus corporis patefacta progressio, quia adhuc humores licet attenuati, & incisi, & qualicumque ratione præparati, patentibus etiam vndique meatibus omnibus, possunt esse naturæ expulsionem tentanti rebelles, adhuc non parum contumaces, eiusque nutui repugnantes. Quæ contumacia, & repugnantia debet tolli, debet inferi obedientia, promptaque ad naturales motiones obsecundatio, quod quidem, & promittit, & præstat concoctio. hæc enim ut docet in tertio de crisi Galenus, in hoc consistit, ut natura vincat, ac dominetur humoribus, eorumque impetui retundens, & qualemcumque proteruiam compescens sibi faciat captiuos, & omnino obedientes, quippe non amplius alieno calore directos, & administratos, sed naturali triumphante, & arbitrato suo omnem succorum prauorum sarcinam deponente. Non facit quidem hæc coctio, de qua nobis est sermo institutus, ut cocti succi euadant ad nutriendum apti, quia hæc nutriendi facultas non competit, nec impertiri potest alijs, quam cibali substantiæ, non competit excrementitiæ seu biliosæ, seu melancolicæ, quæ tantam recipere naturæ gratiam non potest, ut alendis partibus euadat idonea, cum a cognatione partium sit aliena, illam tantum recipere valet, ut non

amplius naturæ dirigenti repugnet, non amplius contumaciam præferat, sed obediens, naturalique obtemperans nutui appareat, ut prima coctio alimentis debita moram in corpore inducat, & conuersionem in membra alenda, secunda verò coctio prauis humoribus aptata, egressionem potius è corpore faciat, membraque reddat ab onere molesto immunia, ut alimentorum coctio unionem quærat, excrementorum coctio ad separationem tendat. Hanc excrementorum coctionem perbellè expressit Galenus in secundi acutorum commentarijs asserens vtramque bilem cum suis ichoribus aliter dici solere coctam, quam pituitam. & crudum quemcumque succum, quoniam hi quidem humores alterari adeo possunt ut cocti dicantur ad alimoniam faciendam, quam commodè ab eis præstari posse declarant libri de naturalibus facultatibus, at biliosi, ichorosi que succi semper manent alimonie dissentanei, & nutritioni inepti, & hanc solam subeunt coctionem, quod à natura extant victi, & quasi domiti ad omnimodam obedientiam, non amplius repugnantes, nec refractarij, ut prius, innato calori, sed ei tamquam domino, omnemque victoriam adepto succumbentes, ut non propria, & vera, sed vniuersaliori, & quasi metaphorica quadam coctionis nomenclatura videantur donati. secundo quam metaphoricam appellationem aliquando Hippocrates vocauit etiam morbos coctos eos, qui in temperamento præter naturali consistentes processu temporis ad meliorem quandam temperiem rediguntur, & in hunc sensum in sexto Epidemiorum dixit, Morbos synthropsos id est conuictuos in senectate desine.

definere coctione, solutione, rarefactione, in cuius dicti commentario annotauit Galenus calidos morbos, vt cepheas calidas, tolli posse ex aduentante senectutis refrigerio contrarij rationem habente, & hunc solutionis modum ex senis temperatura factum partes subire *πεπασμῶν*, idest concoctionum, significante *πεπασμῶν* deductionem omnem, quæ in mediocrem fiat temperiem, vt de concoctis ostensum est fructibus. Quo fit, vt apud Hippocratem, & Galenum triplex extet coctionis ratio, prima quidem propriissime dicta, quæ nil aliud est nisi adeptio in materia alimentali formæ accommodatæ ad alendum, & hæc coctio propriè vocatur à Græcis *πέψις*, aliæ duæ. Metaphoricè dictæ, quarum altera est progressio ab intemperie ad meliorem quandam temperaturam, altera verò est in materia excrementitia qualitatis inductio ad obediendum dominanti naturæ disponentis, & hæ duæ pertinent ad pepasimum superius nominatum, inter quem, & coctionem propriam vocatam *πέψιν* hoc intercedit discriminis, vt ostendit Galenus in commentario secundo primi Epidemiorum, quod pepasimus respicit ea, quæ sunt præter naturam, vt sunt morbi, & morbificæ causæ, pepsis autem complectitur ea, quæ sunt secundum naturam, cum hæc coctio sit in coquentis substantiam deductio quædam eius, quod coquitur. At in reliquis duabus coctionibus Pepasmi nomine insignitis quæritur potius separatio à substantia coquentis, quia in vna quæritur separatio temperaturæ morbosæ, in altera dispositio ad expulsionem materiæ excrementosæ. Omnis coctio fit à dominio caloris innati, sed euariat pro varietate rei concoquendæ, quæ vel est a-

mica, & cognata naturæ concoquentis, & subit rationem veræ coctionis, vel inimica, & aliena, & solius metaphorica coctionis est compos. Sed quoniam hæc quoque dominium arguit, & victoriam caloris insiti, ideo hæc quoque & attendenda, & exoptanda. Vnde Hippocrates dixit in primo Epidemiorum concoctiones exeuntium omnes, omni ex parte tempestiuas, vel bonos, & iudicatorios abscessus considerare oportet, cuius præcepti rationem reddens subiungebat, concoctiones celeritatem iudicij, & securam sanitatem ostendunt. Quod ideo affirmare pro comperto potuit, quia dominantis naturæ victoriam cum futura semper salute coniunctam insinuant. Hæc excrementorum coctionem in libro de veteri Medicina ob oculos nobis posuit idem Hippocrates catharralem fluxionem appellans coctam ex eo, quod pristina tenuitate, & affluentia deposita, consistentiam quandam, ac moderationem acquisierit, & defluentes lachrimæ nec ita sunt vberes, nec ita permaneant tenues, quales erant prius, sed parciores, & crassiores appareant tamquam à natura victæ, ab innatoque calore directæ. Hanc eandem coctionis doctrinam explicatam apud Aristotelem habemus in quarto Meteorologico, vbi cum definiuisset coctionem perfectionem à naturali, proprioque calore ex oppositis passiuis factam, quæ sua cuique materies existunt, subiunxit coctionis finem alijs naturam existere, quam naturam veluti formam, essentiamque diximus, alijs ad quandam subiectam formam contendere, vbi scilicet humor, qui torrebatur, vel elixabatur, vel putrescebat, vel alio quouis modo incalefcebat, talis, tantusque euasit, tunc enim & uti-

utilis, & concoctus dicitur, vt mu-
 stum, & collectiones tuberculorum
 iam suppuratæ, & lachrimæ, cum
 sordes in oculis obortæ sunt, aliaque
 similiter. Quæ omnia dicuntur co-
 cta, cum materies, & humiditas vi-
 cta fuerit, regimenque acceperit à
 naturali caliditate impertitum. In
 quo regimine fit vt omnia euadant
 crassiora, & calidiora, crassiora qui-
 dem quia humidum ex multo fit
 paucum, ex tenui fit crassum, cali-
 diora autem, quia omnis hæc elabo-
 ratio soboles est vigentis, dominan-
 tisque caloris. Huius ergo dupli-
 cis finis in coquendo propofiti pri-
 mum quidem, qui ad consecutio-
 nem nouæ formæ pertinet, referre
 ad alimenta præcipuè debemus, se-
 cundum autem, qui ad subiectam
 quandam formam contendit, & so-
 lam humidi in quanto, & quali cor-
 rectionem, moderationemque in-
 uehit, ad excrementorum potissi-
 mum qualemcumq; perfectionem
 dirigere possumus, in quibus licet
 non fiat vera coctio, fit tamen quæ-
 dam rectificatio per humidi in cras-
 sationem, ac diminutionem à vigen-
 te, vincenteque calido innato pro-
 fectam, nā humores etiam, qui sui
 natura sunt sicciore, vt bilis, & me-
 lancholia, ratione adiunctæ putre-
 dinis, vnde pender eorum præcipua
 cruditas, immoderatiore scatent hu-
 miditate, coctionis beneficio corri-
 genda. Ex qua coctione ipsi quoq;
 dicuntur nancisci perfectionem, par-
 tim quia putredini subtrahuntur,
 partim quia legi naturæ subduntur,
 quippe meliori obedire est suam
 conditionem reddere meliorem.
 Quæ coctio quia semper non solum
 caliditatem vltiorem (naturalem
 intelligere debemus) sed crassitiem
 etiam maiorem comitem habet ad-
 iunctam, promit se vel in hoc à præ-

paratione humorum distinctam,
 quandoquidem per hanc non sem-
 per, imo raro inducitur crassities
 maior, imò sæpissimè tenuitas ma-
 ior procuratur, vt supra diximus, sed
 per coctionem omnia semper sunt
 crassiora, vt non solum Aristoteles
 commemorato libro ostendit, sed
 Galenus etiam in libris de crisibus,
 & in commentario secundi acuto-
 rum confirmat. Nec tamen in ipsa
 succorum crassitie consistit coctio-
 nis modo considerata essentia, sed
 est ipsa crassities qualitas coctione
 consecuta, coctio verò in ipsa victo-
 ria caloris innati refidet, in ipso do-
 minio, quod in succos à se deuictos
 natura exerit, & exercet, vt quia vi-
 cti, ideo cocti, & quia cocti, ideo cras-
 si, vt victoria sit causa coctionis, co-
 ctio verò crassitie. Preparatio pro-
 cedit plerumque attenuando, co-
 ctio semper in crassando, præpara-
 tio relationem maiorem habet ad
 medicamentum, coctio ad calorem
 innatum, præparatio facit vt humor
 sit dispositus sequi motum medica-
 menti, coctio vt sit paratus sequi
 nutum naturæ, præparatio facit hu-
 morem fluxilem, coctio obedi-
 entem. Posset esse fluxilis, & rebellis
 tamen, ideo subigendus, domandus
 que venit per coctionem, vt obtem-
 peret dirigenti, expellentique natu-
 ræ, sed cum fluxilis est, nec rebellio-
 nem, & contumaciam præfert, in eo
 expurgando non debemus coctio-
 nem expectare, vt de biliosis tenuis-
 simis succis, quales sunt potissimum
 ichores biliosi, decernit Galenus in
 libello Quos, quando, & quibus pur-
 gare oportet. Ex dictis patet mate-
 riam vt crassam indicare attenuan-
 tia, vt viscidam detergentia, vt iun-
 ctam cum occlusionem meatuum a-
 perientia, vt nimis tenuem inter-
 dum in crassantia, vt demum cry-

dant concoquentia, & sunt omnes indicationes præseruatoria potissimum, quia licet etiam curationem respiciant, ad præparandam pertinent, disponendamque materiam pro expulsionem, ad tollendum confluxum humorum obstruentium, ad demendam transpirationis prohibitionem, ad compescendam putredinem. Indicationibus attenuandi, detergendi, aperiendi, interdum etiam incrassandi satisfaciunt medicamenta peccantes humores hoc modo præparantia, quorum vberriam filuam habemus, & naturam in Quinto simplicium explicatam à Galeno legimus, & varietatem pro varietate parandorum humorum adhibemus. Indicationi concoquenti satisfacit maximè calor innatus his præsidij, quæ ipsius corroborandi vim habent, suffultus, qualia præsidia supra diximus ab Hippocrate in Quarto acutorum proponi ad corporis quietem pertinentia, ad vnctionem, ad fotum, ad æquale contegumentum, ad requietem in conclauis obscuro, & lecto molli sine proiectione, & iactatione, ad opportunam hypochondriorum illiionem, opportunumque mulsæ, & oximelitis usum. Valet ad concoquendum somnus, cuius propriam Galenus in duodecimo Methodi fecit coctionem, ut vigilæ digestionem, quia in somno calor centrum petit, in vigilia circumferentiam corporis obsidet iuxta monitum sexti Epidemiorum, valet ad idem etiam vinum opportunè exhibitum, quod, ut supra explicuimus, coctiones omnes promouet, ventriculum fouens, & concoctricem partium omnium facultatem roborans. Ex dictis patet coctionis, & præparationis discrimen, & simul innotescit primam esse potiore secundam, quia hæc so-

lam corporis fluxilitatem inuehit, corporis inquam, vel continentis, vel contenti, illa victoriam caloris insinuat, in qua vniuersa salutis spes firmiter residet.

De Vomitu promoucantibus.

CAPVT XXII.



Egimus in Quarto acutorum morbos omnes solui vel per os, vel per alium, vel per vesicam, vel per aliam, quæ talis sit, partem, sudorem autem morbis omnibus esse communem. In cuius sermonis commentario annotat Galenus nec vniuersalem esse, nec communiter inesse omnibus, quod non per hæc solum morbi soluantur, verum etiam, & per vterum, & per sanguinis è naribus eruptionem, ut hæc omnes viæ ad soluendos morbos omnes si non simul, seiunctim saltem conferant. Hinc Hippocrates duas habet præcipue familiares purgationes, quibus corpora à premēte prauorum succorum exoneret sarcina, deductionem nempe per alium, & eductionem per vomitum, vnde in Quarto Aphorismorum dixit, Medicari æstate superiores magis, hieme verò inferiores, & faciles, & facile vomentes purgandos superius affirmavit cauendo hyemem, vomentes verò difficulter, & mediocriter carnosos per inferiora cauendo æstatem. Ex quo colligimus non minus vomitum, quam alui defectionem ei arridere in purgando, sic tamen vitramque speciem purgationis laudare, ut habeat rationem, & anni temporis, & habitum.

bitudinis corporeæ, & proprietatis individualis (*ιδιοπαθειαν* vocant Græci) in cuius notione maximum esse positum artis momentum in tertio libro affirmavit Celsus, & in Quarto Methodi explicauit Galenus, vt in procuranda vel vomitione, vel alui deiectione aliud anni tempus, aliam corporis habitudinem, aliam hominis exposcat proprietatem. In prima quidem laudat anni tempus æstiuum, in quo magnus fit calidorum humorum prouentus ventres superiores petentium, habitudinem corporis gracilem biliosæ, tenuisque materiæ feracem, proprietatem hominis ad faciliè vomendum trahentem, in secunda verò probat anni tempus hyemale, in quo magna subest pituitæ ad inferiorem ventrem descendentis copia, habitudinem corporis, generandæ crassiori, grauiorque materiæ aptam, proprietatem hominis vomitui reluctantem. Sic per tempora, per habitudines, per proprietates sciungit mouendæ vel vomitionis, vel deiectionis occasiones, illud semper repetens, vt in vomitu excitando caueatur hiems, in aluo subducenda deuitetur æstas. Quod alicui forsan admirationem aliquam posset incutere, memoria repetenti in libro de salubri diætâ, siue ab eodem Hippocrate, siue à Polybio conscripto contrariam extare sententiam, si rem primâ fronte spectemus, de vomitu sex brumalibus mensibus mouendo quibus humor pituitosus genitus vberior in supernis partibus supra septum transuersum innatat, & deiectione sex mensibus æstiuis proritanda, quibus humores biliosi hypochondrijs faciunt, & intestinis varia tormina sustinentibus negocium, vt vomitus hyemi, deiectio adapte-

tur æstati, & hyeme per superiora loca, æstate per inferiora molienda sit purgatio vel ipsa bile superius ascensura inferius subtracta. Sed ex dictis Galeni in commentario huius loci de salubri diætâ omnis tollitur admiratio, omnis remouetur contradictionis suspicio; nam vel purgatio instituitur vniuersi corporis humorum iam genitorum affluentia scatentis, vel purgatio partis in corpore non dum repleto humoribus genitis, sed replendo generandis, in primo casu debemus moliri æstate purgationem per superna vomitum excitando, quia in totius plenitudine calidi, tenuisque humores repunt superius, & pro sua inclinatione sunt superius educendi, quippe humoris inclinatio ad locum conuenientem facit indicationem, at hyeme tentanda alui subductio, quia humores pituitosi suo pondere feruntur inferius, biliosis relinquentes locum superiorem. At in secundo casu, in quo non dum est facta plenitudo totius, sed ne fiat periculum imminet, & non expurgandum occurrit totum, sed sola pars, in qua incipit fieri prauis succi congeries, hyemali tempore vomitus mouendus, quia tunc temporis superna regio pituitosis succis repletur, qui ibidem innatantes inde in vomitione sunt educendi, sed æstiuo tempore clysmata ad aluum ciendâ sunt adhibenda, quia biliosi, calidique succi, & hypochondria, & lumbos, & intestina diuexant, & si superam etiam regionem peterent, forent inferius reuellendi, quoniam excernendis excrementis commodiores sunt inferiores, quam superiores viæ, præsertim si non sit vniuersalis, sed partialis plenitudo, & humores non tam congesti sint euacuandi, quam congerendi paul-

latine prohibendi. nam factos humores per loca congrua, ad quæ vergunt, purgare, futuros ad inhibendam eorum aucionem per loca contraria retrahere debemus. Sed ad vomitum prouocandum maxime, vt diximus, retulerit animaduertere hominis naturam, & consuetudinem, quia si gracilis sit, & in censu biliosorum constitutus, si facili negocio vomere assuetus, adduntur calcaria ad hanc moliendâ purgationem, quoniam maior subest tenuis, leuiorisque materiæ sursum repentis significatio, & expeditior patet, securitatisque plena per partem destinatam progressio, alioquin reclamante natura, nec propensionem vomendi monstrante, immutandum venit consilium, nullum bonum finem, quantum licet coniectari, habiturum, quia violenta per hanc partem commotio, & venas interdum thoracis aperuit, & alias effatur dignas iacturas intulit, vt fuit Galeni animaduersio, qui propterea in Vndecimo Methodi asseruit, si ad os ventriculi aliquando sua sponte impetum capiant humores, etiam per vomitum esse euacuandos. Quo dicto nobis imperat, vt motum naturæ obseruemus, & humorum propensionem conspectemus, nullam tamen vim inferamus, ne proposita, & imminencia detrimenta subeamus parum Hippocratici in Epidemijs moniti memores, quo iubemur hanc inire in morbis exercitationem, vt si non opem, saltem non inferamus noxam. Indicatur ergo vomitorium medicamentum à materia mobili, & fluxili non tã in ore quam in spatio ventriculi residente (nã quæ in ore sunt penitiora faciunt singulum testante Galeno in commentario sexti Aphorismorum) siue

hæc materia in ventriculo fuerit genita, siue aliunde transmissa, veluti solet frequentius contingere; vt à iecore; & venoso genere magnus fiat excrementorum ad ventriculū confusus, à Galeno in Arte medicinali consideratus, & in commentario quoque secundiacutorum, vbi Hippocrates proponit biliosos sursum, ac deorsum, discussus, quorum excrementorum facta per vomitum excretio magnum affert naturæ leuamentum, vnde Hippocrates in prognosticis dixit vomitionē vtilissimam esse, quæ pituita, ac bile permixta quã maxime est, & non crassa valdè, neque multa; qualis fuisse videtur vomitio filix Edilis apud Tecomeum, & vomitio mulieris, quæ in littorè decumbebat, vtraque in Epidemijs enarrata, & profligata febris præcipua causa monstrata. Hinc affirmauit Galenus in primo ad Glauconem ex solo vomitu multos fuisse à tertianis liberatos. Quod quidem potissimum veritatem habere potest in his febribus, quæ minorem habent putredinis in regionibus ad ventriculum attinentibus, & cum eo iure illius consortij, quod Hippocrates in libro de locis in homine proponit, coniunctis. Hinc Celsus quoque biliosis febribus nedum vtilem, sed necessarium etiam vomitum vocauit, & ne calor febrilis inualeseat, placidioribus medicamentis procurandum fuisse. Quæ fuit etiam Galeni in vndecimo Methodi animaduersio perincrementis caloricam, & exicatoriam vim ad præstandū febris incrementum accommodatâ. Itaque deligenda Medico proponebat quæ citra calefactionem, & exicationem valentem ad vomendum inducere possint, veluti sunt ptisana cremor, mulla, oximel, aliaque ha;

humus facit leuiora. Que quidem leuiora tanto magis conueniunt in febribus; & dissentanea sunt asperiora, quanto magis requiritur; & presens supponitur materię dispositio ad egrediendum per vomitionem, cum ad producendum effectum plus valeat, ut supra annotauimus; patientis aptitudo, quam agens vis. Hęc materię dispositio, hęc eius ad superiora inclinatio, hęc ad egressum per os vi expellentis ventriculi promptitudo facit, ut leui quocumque irritamento nõ leuis fiat expurgatio natura, ut dicebat Hippocrates, vtilissima, ad humores peccantes deducendos, forasque detrudendos naturaliter instituta. Quamobrem non admittenda Argenterij opinio in suo libro de febribus affirmantis obsoleuisse nostra tempestate euacuationem per vomitum ita opere ab Hippocrate commendatam, quia grauioris vomitorij vsus sit plenus periculi ob insignem agitationem necessario consequentem, ut ideo ad purgationem per inferiora omnis Medicorum sit conuersa intentio, non est, inquam, hęc admittenda opinio, quippe quę, & quotidiano experimento repugnet; & euidentem rationem habeat aduersam. nā singulis ferē diebus obseruamus febricitantibus multis nullo negocio excitari vomitus magnos magnū, & leuamentum, & salutis fructum afferentes; & in febribus nõn laudant Galenus, & Celsus vomitionem nisi insinuatam a motu, & inclinatione humorum ad supernam regionem repentinam, ad quos educendos nullo est opus validiori pharmaco, sufficiunt quę leuissima sunt, quia currentem facile est impellere, & nobis facile est descendere, quia motum descensionis ip-

sa inclinatio adiuvat corporis. Sic leuissima medicamenta ob humorum inclinante motum sua potius quantitate, quàm qualitate vomitum cient, ut magna vel aquę, vel insculi tepidioris copia cum oximele, vel sirupo acetoso, vel alio simili coniuncta ad vomendum facile inducat; dum corporis humectationem à Celso iure propositam exagerat, & maiorem confluentium humorum, & innatationem, & qualemcumque fluctuationem in ventriculo excitat, irritatamque facultatem expultricem ad onus molestum expellendum exuscitat. Iuuat autem remedium vomitorium non modo quia vitiosam materiam educit, sed etiam quia reuellit, & prohibet a confluxu ad partes obstructas, & obstruendas, habetque iccirco vim preseruatiuam.

De remedijs urinant promouentibus, quę vocantur diuretica.

CAP V T XXIII.



NATVRÆ amula est ars, licet eam non assequatur in omnibus. Natura per urinas excernendo sepe morbos decernit, & soluit, ut

abundē docet Galenus in libris de Crisibus. Quam quidem vrinarum in febribus copiosam excretionem tanti fecit Hippocrates, ut in enarrando secundo statu primi Epidemiorum, qui multis mortem attulit, eos omnes seruatos affirmarit, quibus copiosa hęc excretio aduenit. Vnum (ait ipse) & maximum ex factis signis, & quod plurimos in maximis positis periculis liberauit, his fuit, quibus ad stranguriosum facta

facta est conuersio, atque in id ab-
 scessus fierent. Vrinæ autem his e-
 rant multæ, crassæ, variæ, & ruben-
 tes, cum pure mixtæ, cum dolore,
 seruabantur autem hi omnes, nul-
 lumque ex his perire vidi. Conuer-
 sionem ad stranguriosum vocat Hip-
 pocrates abscessum, vt notandum
 proponit in commentario. Galenus
 duo abscessuum genera apud Hip-
 pocratem aduertens, quorum alij
 fiunt per repositionem, alij verò per
 emissionem toto corpore contristati
 res succos separantem, per quam
 emissionem fiunt interdum absces-
 sus per urinam, vt enim per vëtre
 sæpius totum corpus expurgatur, sic
 & per renes, & vesicam, per quas
 vias non modo sanguinis, & humo-
 rum serositates educuntur, sed cras-
 siores etiam materiæ, & purulentæ,
 quarum facit Hippocrates in com-
 memoratis verbis mentionem, & in
 tertio Epidemiorum narrat in Py-
 thione quadragesimo à morbi iudi-
 catione die suppurationem factam
 esse, & stranguriosum abscessum.
 Quod mirum nemini videri debet,
 siquidem non vnica, sed triplex est
 materia per vrinarias vias diffundi
 solita, potulenta nempe ex assump-
 ptis confecta, serosa ex humoribus
 venarum deducta, & colliguata ex
 quorumcunque humorum, vel et-
 iam corporum, vt carnis, & adipis
 dissolutione profecta, quam tripli-
 cem materiam breuissimo quasi o-
 raculo complexus est Hippocrates
 in sexto Epidemiorum dicens vrina
 concolor cibo, & potui, & qualis es-
 se solet, & cum humidi colligatio
 fit, Quæ præclara fuit Dureti in suis
 Coacatum doctissimis commenta-
 rijs animaduersion. Quoniam ergo
 tam expeditam hanc habet natura
 purgandi corporis viam, per quam
 omnimoda materiæ permeant fa-

ctione venarum emulgentium in re-
 nes desinentium, atque adeo arte-
 riarum, quibus omnia venæ caue,
 omnia arteriæ magnæ germina re-
 spondent, & quodam connexionis
 vinculo deuincta sunt, mirandum
 non est si frequenter his ductibus ad
 corpus exoperandum vitur, & si
 per eosdem ductus in eundem finem
 ars ipsa excretionem molitur. Hinc
 Galenus in illo Vndecimo Metho-
 di ad euacuandam excrementitiã
 febrium materiam inter cætera pur-
 gantia proponit etiam diuretica,
 quippe quæ sarcinam ægri possint
 commodè demere. In quorum vfu
 nimiam caliditatem, siccitatemque
 pertimescit, tamquam augendæ fe-
 brili intemperiei aptam, præcipue
 in his diureticis, quæ ob fusionem,
 attenuationemque humorum vi-
 nas prolestant, nam quæ ob humi-
 ditatis exuberantiam vt, serosam
 substantiam amplificatiã hoc idem
 præstant, frigefaciendi potius vim
 habent, vt semina maiora, & mino-
 ra, quæ quidem non solum profunt
 quatenus vrinariam excretionem
 promouentia, verum etiam quate-
 nus refrigerantia, & humectantia
 vim & præseruatoriam, & curato-
 riam nacta. Sed quia hæc materias
 potius incassant, quibus plerumq;
 attenuandis oportet abimum appel-
 lere, ideo Galenus calida magis pro-
 ponit diuretica, vt apium in aqua,
 tamen in coctum ad virtutis calori-
 ficæ, & exicatoriæ retensionem, imo
 non apium absolute, sed apij radi-
 cem, & aquam mullam, & oximeli,
 & apqmeli, & cremorem etiam pri-
 sanæ vi etiam refrigeratoria prædi-
 tum. His præsidijs hæc adhibitis
 cautione fudit, quia licet febrilem
 augere aliquatenus intemperie pos-
 sint, & hoc nomine aliqua hinc pro-
 ueniat noxa, ea tamen leuiuscula
 est,

est, & contemnenda si referatur ad
utilitatem ex apertione orientem,
& fusione, & humorum per vrinās
deductione, & iuxta Galenicū di-
ctum in illo Methodi libro difficile
est eiusmodi aliquod auxilium in-
uenisse, quod citra vllam noxam
magnifice prosit. Consulit tamen
Galēus vt febrium calorem, & ob-
structionum vim adinuicem com-
paremus, & cum ille magis vrget,
refrigerantia diuretica, qualis est
cremor ptisanæ adhibeamus, cum
hec magis premit, calidiora quoque
non dimittamus. At quæ tempera-
ta sunt, omne ferunt punctum, qua-
lia fuerint capillorum Veneris fo-
lia, aschechengi semina, graminis
radicalia germina. Sed non omne
tempus huic remediorum generi
est opportunum, quia in multa ma-
teria cruditate præferente parum
conueniunt diuretica, quippe quæ
humores illos magis exagitant, quā
excernunt, & crudam adhuc mate-
riam per venarum oscula deducūt,
vnde maior ansa putredini, & ob-
adiunctam crassitiem obstructioni
impertitur. Quamobrem licet mo-
tus naturæ per conuenientem regio-
nem, qualis est hæc, factus sit adi-
uandus, & licet Galēus asserat, in-
clinante humore ad vrinarios du-
ctus, diureticis esse vtendum, non
est tamen temerè adhibendus ho-
rum præsidiorum vsus, nec impuro
omnino corpore, crudisque succis
refecto applicandus, quia si materia
excrementitia per has tendens vias
indicat diuretica, eadem vt multa,
& cruda eorundem vsum vt intem-
pestiuum facit suspectum. nam, vt
docet Galēus in primo de crisis,
& in commentarijs Quarti aphorif-
morum, cruda existente materia,
probam non possumus expectare
euacuationem, quam præcedere de-

bet discretio, & discretionem con-
coctio. Quare Auicennas in prima
Fen Quarti Canonis inductus est
ad dicendum diuretica non esse v-
surpanda nisi post apparentem hu-
morum concoctionem. Postquam
credendum est factam fuisse illam
stranguriosam affectionem ab Hip-
pocrate memoratam, quam vocat
abscessum, vt cum Galeno confide-
rauimus, & abscessum salutarem
qualem constat non fieri nisi à na-
tura dominante materiæ, cui mate-
riæ non dominatur cum cruda exi-
sit, tunc dominatur cum concoxit,
& à contumacia in obedientiam re-
degit. Nec tamen omnis omnium
diureticorum administratio ab om-
ni morborum principio remouetur,
quia Galēus aliqua adhibet inter-
dum etiam in cruditate materiæ, vt
patet in Vndecimo Methodi, & in
primo ad Glauconem, quando vi-
delicet humores liberum habent,
& expeditum ad renes progressum,
vt natura per hos meatus quarat e-
xonerationem, quæ aliquando po-
test esse proficua quatenus tollit
multitudinem, veluti hoc nomine
apparent aliquæ symptomaticæ, e-
uacuationes proficua, sed tunc mo-
deratiora, & leuiora sunt adhiben-
da diuretica, acrioribus, & validio-
ribus post solam concoctionem ser-
uatis. Quo etiam tempore exami-
nanda erit febris vehementia, eius-
que intensior, vel remissior calor,
vt qualia sint vsurpanda magis diu-
retica, calidiora, an temperatiora,
commodè possit decerni, vt non so-
lum in Vndecimo Methodi, sed in
primo quoque de Arte curatiua do-
cet Galēus.

*De remedijs per ambitum corporis
euacuantibus.*

CAPVT XXIV.



Remenem habent nostra corpora ingressum tenuis substantiæ, & egressum, quippe quæ continuo externum excipiant aerem, & continuo internam vaporum emittant fuliginem, idque faciunt non solum per inspirationem, & expirationem, & per pulsuum diastolem, & systolem, verum etiam per insensilem, vocatam transpirationem per poros cutis meatus in usum perpetuum, reuocatam. nam iuxta Platonis dictum in Timæo vita animantium traducitur in spiritum, & igne, cuius est proprium substantias attenuare, & dissoluere, ad quam internam dissolutionis causam accedit etiam ambientis externa in calidis potissimum constitutionibus conspicua, quæ dissolutio per cutem facta est in pueris adeo insignis, ut vel hoc nomine sanguinis e vena detractio- nem eis non cōuenire statuerit Galenus duas vno tempore effatu dignas euacuationes nullo pacto sine læsione laturis. Est ergo in omnibus hæc naturalis euacuatio, sed in illis maior, qui tenuiorem cutis constitutionem, porisque apertioribus præditam sunt à primordio nati, vnde Hippocrates in libro de alimento dixit corpora densioris ambitus esse quidem ab externis iniurijs tutiora, sed internis obnoxiora, at quæ rariorem habent texturam uti sorte contraria, & internis quidem iniurijs parum succumbere, ab externis autem magnam labem perferre. hæc namque quia patulas habent vias

cutaneas paratum habent materie- rum & ingressum, & egressum, sed quantum prauarum prodest fuliginum egressus, tantum aeris inclementioris obesse potest ingressus. Et quoniam Hippocrates in sexto Epidemiorum protulit illa verba, cutis raritas, densitudo ventris, cutis contractio, carniū incrementum, duas rerum inter se copulatarum coniugationes fecisse videtur, ut in commentario animaduertit Galenus, quarum prima complectatur eos, qui per cuticulares meatus abunde vacuati paruam obtinent tum mictionem, tum deiectionem, secunda verò continet eos, qui ieiunam illam cuticularem excretionem habentes corporibus sunt habitiores, nam veluti in prima coniugatione cutaneæ euacuationis vbertas reliquarum ad ventrem attinentium inuehit paucitatem, ita in secunda per cutem pauca facta euaporatio magnam carnibus affert auctiōem. quippe non dissoluta, & foras non evanescens substantia facessit in carnes, at facta vberior per cutim euacuatio & deiectioni, & mictioni materiam adimit, & mictioni tanto magis, quod per cutim non modo insensilis, sed sensibilis quoque sit euacuatio sudore expleta, Cuius quidem sudoris eadem extat, quæ est vrinarum propria, serosa nempe humorum portio, ut in primo de sanitate tuenda explanat Galenus. Quod prius etiam explicauit Aristoteles partim in secundo Meteorologico, partim in secunda Problematum particula, ubi portionem in corpore excrementitiā ab alimentali separatam, a leuissima, & dulcissima alienissimā, & crudissimā, dum per vesicam prodit, vrinam, dum per extremas partes, effluit, sudorem esse affirmat, ideoque vtrique falsum

salsum inesse saporem. Vt in vrina igitur, sic in sudore etiam naturalis apparet excretio, vt contra Dioclem aliter sentientem in libro de differentijs symptomatum concludit Galenus, nullo materiae discrimine, sed solo viarum interstitio altera ab altera diffusa, & veluti locum habent in sanis ad valetudinem conseruandam, ita quoque in aegris ad eandem recuperandam, vnde Hippocrates in prognosticis dixit sudorem optimum esse per omnes acutos morbos, si per diem eueniat decretorium, & integre sedet febrem. Quod quidem contingit, cum attenuata materia ab innato calore fortas propellitur per corporis ambitum, ad quem videtur habere impulsus, vt in intermittentibus praecipue vsu venit febribus, & in his etiam continuis, quae a tenuibus prognatae humoribus ab eisdem fouentur. Tunc igitur hic sudoris motus venit adiuuandus a tenui materia sensili poros cutis impetente indicatus, & tum per externa, tum per interna excitandus, per externa quidem, vt per balneum dulcis aquae, de quo abunde superius sumus locuti, & per inunctiones ex oleis blandis aperientibus, quale fuerit camomellinum, anethinum, & similia, per interna autem, vt per decoctionem camomeli, liquiritiae, per aquam hordei, per iuscula saccharata, & passulis alterata, per puluerem lapidis hezoar hanc sibi proprietatem sponte naturae vendicantis. In hunc etiam finem conferre non leuiter solent frictiones, & sudori prouocando, & insensili transpirationi promouendae opportunissima. Quapropter Galenus in decimo tertio Methodi affirmat ad curandam etiam plethoram, & sanguinis missionem, & frequens bal-

neum, & frictionem, & digerentia medicamenta, & in ediam valere, quippe quae omnia vim habeant excrementitiae substantiae dissipatoriam. Frictionis quidem vires celebribus illis Hippocratis verbis innotescunt, quibus dixit frictione, si vehemens sit, durari corpus, si leuis molliri, si multa, minui, si modica impleri, quorum verborum vberem habemus explicationem apud Galenum in secundo de sanitate tuenda ostendentem paucissimis verbis ab antiquo Magistro ea omnia fuisse de frictionibus comprehensa, quae a neotericis auctoribus longo sermonum curriculo non fuerant expressa. Ad promouendam ergo cutaneam excretionem cum frictio valeat, commendatur in febribus praecipue cum humores ad illam regionem habuerint impetum, vnde in octauo Methodi proficitur Galenus multos ex cutis constipatione febricitantes vnico balneo, & moderata frictione (cum vehemens vim habeat densandi) ad sanitatem se perduxisse. Celsus quidem inter vnctionem, & frictionem hoc praecipue posuit discriminis, quod illa in acutis etiam, & recentibus morbis conuenit, in remissione tamen, & ante cibum, longa autem frictione vti nec in acutis morbis, nec in crescentibus conuenit, praeterquam cum phreniticis somnus ea quaritur. Vnde concludit amare hoc auxilium valetudinem longam, & iam a primo impetu inclinatam. At alius fuit Galeni sensus, & longe melior. Qui non minorem in vnctionibus, quam in frictionibus cautionem requirit, nec ad vngenda viscera, & cataplasmatibus oblinenda ita facile accedere Medicos sinit, & post sanguinis detractionem, & aliquam vni-

uerſi corporis expiationem has adhibendas percuſſiones proponit, alioquin maximo detrimento per ſuccorum ad percuſa viſcera attracti-
nem futuras, vt cumulatè oſtendit in Vndecimo. Methodi grauitè in malam quorundam Medicorum conſuetudinem inuectus. De fricti-
onibus verò ſic ſentit, vt non modo in chronicis, ſed in acutis etiã ægritudinibus, non modo ipsis de-
clinantibus, ſed inchoantibus etiã hanc medelam commendet, dum modo materia morbiſica venas oc-
cupet cuti propinquas, & habeat ad poros cutaneos, per quos valeat excerni, euidentem propenſionem. Quinimo in febribus illis, quæ ex
putredine multorum, craſſorumq; humorum calorem innatum oppri-
mentium ortæ ſyncopem qualem-
cumque habent adiunctam, nec purgationem vllam, nec ſanguinis miſ-
ſionem laudat, ſed loco purgatio-
nis, & phlebotomiæ frictiones ad-
hibendas à primordio proponit, vt
patet in duodecimo Methodi, quia
cũ hi febrientes tamquam prauorũ
ſuccorũ ſarcina onuſti euacuatione
indigeant, ſed eam conſertim factã
ferre non poſſint ob imminentem
lapſum præcipitem virium, amant,
opportuneque ſtatim excipiunt fri-
ctionum opem, quæ vim habent
quidem euacuandi, verum lento id
gradu perficiunt, ſine vlla iactatio-
ne materiæ, ſine vlla diſſolutione
ſpirituum, ſed cum illius diminutione, & cum iſtorum excitatione, &
leuamẽto. Non vult ergo Cæſus in
acutis morbis præſertim incipienti-
bus locum dare frictioni, ſed vult
Galenus in quibuſdã febribus ſyn-
copalibus, quas nemo in ſicias fuerit
acutitas eſſe licet ab humoribus fri-
gidi uſculis proſectas, vnicum eſſe
remedium frictionem non modo in

progreſſu morbi, ſed in ipſo etiã
principio adhibendam, vt quam
nec purgando, nec ſanguinem mit-
tendo vſurpare euacuationem ſine
magno diſcrimine poſſumus, frican-
do tutiſſimè vſurpemus. Continen-
tes etiã febres putredinis exper-
tes, & à conſtipatione oriundas cu-
rat idem interuentu etiã frictio-
num ab initio, vt apparet, & in pri-
mo de arte ad Glaucopem, & in
oſtauo etiã, ac nono. Methodi.
Huc accedunt, & hanc eandem o-
peram promittunt cucurbitulæ ſic-
cæ in pluribus, & præcipuè in infe-
rioribus corporis partibus adiun-
ctæ, quæ valida vi attractoria præ-
ditæ à centro ad circumferentiam
educunt, calorem euocant, diſſila-
tionem adiunant, & per patefactos
cutis meatus tenuiorem materiam
& ipſæ eximunt. Quos cucurbitu-
larum inſignes effectus in ſolam va-
cui fugam, & circumpuſſionem à
Platone in Timæo relatos admira-
tur Galenus in eius libri commen-
tarijs, in ipſam attractionem iuxta
vera Hippocratis dogmata referen-
dos. Quorum magnus eſt vſus in
his præſertim febribus, in quibus
iuxta Hippocraticum dictum in
Aphoriſm. interiora vruntur, ex-
teriora frigent. Sed quo tempore
id remedium conuenit? Prudens
eſt Galeni conſilium in Vndecimo
Methodi afferentis non expedire à
principio febrium cutem rareface-
re, cum corporis ſubeſt impuritas,
& nulla præceſſit eius euacuatio,
quo etiã nomine vel ipſas frictio-
nes habebat ſuſpectas poſt præce-
dentem euacuationem commodè
adhibendas, ſed quando vrget in-
dicatio materiæ concentratæ exte-
rius attrahendæ, licet omni tempo-
re cucurbitulis vti, veluti etiã fri-
ctionibus, quarum licet ſit opportu-
nitas.

nius tempus post factam euacuatio-
nem, possunt tamen etiam ante, vt
diximus, vsurpari cum humores
habent vel nimium influxum inte-
rius, & exteriora frigeant, vel con-
gruum effluxum exterius, vt inte-
riora se exonerent, Vnde Galenus
vel in Quartanarum principio ante
vigoris accessum, & frictionibus vi-
tetur, & ambulationibus, & lau-
eris sperans fore, vt per has motio-
nes, quæ cutim rarefaciunt, ac ma-
teriam attenuant, pars quædam
peccantis succi digeratur, vt appa-
ret in primo ad Glauconem. Iam
de Vesicantibus præsidij quid dice-
mus multo ab hinc tempore in mul-
tum usum reuocatis? Certè cum
humores, vaporesque maligni ar-
cte coercentur interius viscera im-
petentes nobiliora, quod in pesti-
lentiis potissimum febribus solet
esse frequentissimum, mirificè iuvat
valida eorum exterius facta reuo-
catio, qualis est vesicam excitantiũ
remediorum propria, quæ per vlce-
ra in extremis genita artubus ma-
gnam præstant materię morbificæ
attractionem, eiusdemque per am-
bitum corporis dissipationem, qui-
bus forsitan inueniendis, & confir-
mandis ansam dedit Galeni testi-
monium in Quarto Methodi affir-
mantis eos ferè omnes in romana
pestilentia euasisse, quibus erumpe-
bant in cruribus viscera, ad quod
mox testimonium accessit quodidia-
num experimentum ex nullo reme-
dio maiorem in his febribus opem
ostendens, quàm ex vesicantibus fie-
ri, vt mirandum planè sit clarissi-
mis etiam viris nonnullis ea non ar-
ridere aliquam vel ignei caloris ad-
iectionem, vel importunam mate-
riæ concoquendæ agitationem cau-
santibus, & non leuiter pertime-
scentibus. Sed si hæc, aliaque eo-

rum obiectamenta vera forent, de
quo nunc non disputo, considerare
debuerunt vt in bonis naturæ nul-
lum est absolutum omnis mali ex-
pers, vt in Phædone considerat so-
crates, vnde prodijt Lyrici dictum,
nihil est ab omni parte beatum: ita
in remedijs artis nullum esse tan-
tummodo proficuum omni læsione
vacuum, vt supra ex Galeno in Vn-
decimo Methodi diximus, sed cum
damnum est exiguum, magnum
verò emolumentum, tunc ad illud
remedium promptè esse accurren-
dum. Quod dictum etiam intelligi
volumus de illa celebri inunctione
Aetij ex aqua, oleo camomalino,
& nitro conflata; quæ quo validius
poros aperit, materiaque internas
attractit, eò verius per cutem eua-
cuet. Quam habent nonnulli sus-
pectam ob iusto validiorem vim ca-
lesfaciendi, & exiccandi à nitro im-
pertitam, sed satis est quòd hæc
plus prodest prauos vapores edu-
cendo, quàm obsit caliditatem, vel sic-
citatem communicando, quam nõ
ita parati sumus ad concedendum,
veluti parati ad datam, & non con-
cessam excusandum, quia calor, &
siccitas qualiscumque externis par-
tibus inderetur, internæ accidenta-
ria ratione frigidiores fierent, & hu-
mentiores, præterquam quod exi-
gua linimenti mora nullum relin-
queret calefactioni, vel exiccationi
locum. Laudanda ergo, & apertis
vlnis amplexanda hæc Aetij me-
dela in prauis febribus, quando
materia ad cutem videtur habere
imperum, & ab artis auxilio expe-
ctat impulsus, præcipuè cum spi-
ritus, & calor interius coercentur, &
partes extimas deferit, inrimas in-
star animalium in latibulis degen-
tium occupat, & sui ad exteriora
factam euacuationem indicat. De

*de Vesica
cum reher-
tis*

*Aetij Inun-
ctio, Quæda-
m præsi-
dij.*

*Nota sui
naturæ uer-
gationis.*

partialibus vnctionibus, quæ singulis visceribus adhibentur, vt cordi, iecori, Ventriculo, alijsque id genus membris, supra cum Galeno in Vndecimo Methodi considerantes diximus, quod nunc etiam ob magnum rei momentum summatim repetemus, culpandam, omninoque fugiendam eorum esse consuetudinem, qui temerè his vnctionibus vtuntur nullam expectantes corporis vniuersi expiationem, & ad hoc remedium statim confugientes tamquam non leuem laturum omnibus opem. Quod pariter asserendum de Cataplasmatibus non euacuato corpore circa viscera adhibitis. Quod Galenicum præceptum rursus hic libuit annotare, quia multos constat in hunc errorem hac tempestate labi, & ob maximū præcepti vel repetiti fructū, non timui Iouis corinthum Megarensibus repetitū, vt est apud Pindarum in Nemæis. At necessariam in administratione Cataplasmatum, & perfusionum distinctionem in superioribus capitulis explicui.

De remedijs roborantibus viscera.

CAPVT XXV.



Maximum habet in febribus putridis momentum viscerum ipsorum, quibus imbecillitas impertitur, roboratio. hinc enim pendet præcipua progredientis putredinis causa, quod innatus eorum calor languet, nec potis est humores tueri, & coercere ab inualescente calore putredinoso, qui extrarius est, & alienus. Hinc fit, vt consumptis putridis humoribus, qui febres

faciunt, noui denuo generentur, quia superest partium imbecillitas ad eos regenerandos, & putredini subiiciendos accomodata, vt docet Galenus in Vndecimo Methodi, in secundo de differentijs febrium, & in primo ad Glauconem. In quo quidem libro scriptum reliquit in tertianis febribus iecur potissimum affici, & languere, in Quartanis splenem, in Quotidianis ventriculum, quippe tertianæ biliosi sunt humoris soboles ab Hepate geniti, quartanæ melancolici non attracti à splene, quotidianæ pituitosi cumulati à ventriculo. Sed in omnibus febribus cor ipsum perpetitur, quod est præcipuum febris subiectum, & receptaculum, sed in his maiorem accipit labem, quæ virulentam contraxerunt naturam ad pessumdandas vires vitales præcipue directam. Horum igitur viscerum habendæ ratio fuerit, iecoris in Tertianis, splenis in Quartanis, Ventriculi in quotidianis, cordis in omnibus, sed præcipue in pestilentibus. Ad iecur confirmandum, meliorique tonomuniendum conferet serum capritum cum succo cichorei deputato, conferent troisci de rhabbaro, de Eupatorio cum succo vel cichorei, vel sonchi, repetita rhabbari infusio, mirabolani chebuli conditi, puluis hepatis lupi cum conserua florum cichorei, & exterius applicitum vnguentum sandalinum succo cichorei dissolutum. Ad lienem proderit idem serum chalibæatum, & cum succo fumarie commixtū, Troisci de caparibus cum eiusdem fumarie succo iuncti, repetitus Epithimi, & Polipodij vsus, puluis ceræ rach, pentaphili, scabiosæ cum conseruis boraginis, & buglossi, exterius applicitum hammoniæ cum oleis de caparibus, & de absinthio.

finthio dissolutum. Ad ventriculum idem serum absinthij pontici coma alteratum, vel seminibus citri, oximel in quo absinthium, vel menta maduerit, cydonites, hiera picra Galeni, extra oleum Magni Ducis huic visceri destinatum, emplastrum Masticinum, & alia id genus, quæ innumera sunt tum ad roborandū ventriculum factis tum ad fulciendū Iecur, & splenem, sed hanc immensam suppellectilem non libuit colligere, satis fuit paucula, quædam nominare exetapli potius grātia, quàm in alium finem. Nunc ad ea remedia propero, quæ cordis propria sunt, eiusque tuenda, & conservanda virtuti à maligna qualitate læsæ opportuna. In quorum etiam proponendo catalogo non immorabor, cum lippis ferè ac tonsoribus notissimum sit vberriam esse illorum sylum, quæ vel exterius applicata, vel interius assumpta magnum afferunt huic membro iuvamentum. Verum quoniam inter interna frequentem apud multos habent locum Theriaca, & mithridatica confectio, à quibus tamen aliorum maxime abhorret animus, non absre fuerit hanc rem maximi existentem momenti considerare parumper, ut quid recta ratio suadeat, quid vera methodus requirat, pro nostra virili innotescat. Quærimus ergo num in febribus malignis, ubi vis venefica magnum facessit cordi negotium, ad viscus roborandum, ad virulentam qualitatem retundendam liceat uti theriaca, & mithridato per os assumptis. nam exterius posse adhiberi inficias ierit nemo. At internam assumptionem improbant, improbandaque censent viri doctissimi, quorū iure optimo magna est in operibus artis auctoritas, & suæ sententiæ

hec habent fundamenta, quod theriaca formam obtinet magnæ acuitatis à viribus imbecillibus, quales sunt in febris pestilenti, non sustinenda, quod calefaciat vehementer, caloremque cordis fixum efficiat, ac tanto magis id contingat, quod necessarium sit eam in magna dosi exhibere, & bis in die ob veneni præsentiam, ut patet in primo de antidotis. Afferunt Avicennæ testimonium in præservatione probantis magnas antidotos, in curatione proponentis sola refrigerantia, & vel ipsum sacchari calorem pettimescantis, ideoque multo magis calorem theriaca suspectum habituri. Respondent loco ex libro de Theriaca ad Pisonem, ubi legimus Theriacam mederi etiam peste correptis, primum negando librum illum esse Galeni, secundo hanc illorum verborum explicationem afferendo, quod si theriaca afferatur ante febrem pestilentem, eam esse in causa, ut homo vel non corripitur febre, vel correptus non ita laedatur. Probant tamen Theriacam in peste actu existente, at sine febre, nec improbant in alijs febribus non pestilentibus, ut patet in libro de antidotis, unde probatur in Quartana intermittente. His rationibus alij viri doctissimi illud adiungunt, quod cum Theriaca, & mithridato dupliciter mos obtinerit uti, vel has antidotos miscendo cum lenientibus, & solventibus pharmacis ad vim eorum reddendam alexipharmacam, vel solas adhibendo ad febris virulentam qualitatem instingendam, neuter est modus laudandus, & excipiendus, non primus, quia proprium Theriacæ ex Galeno est cohibere, & impedire motum à medicamento factum, non sequendus, quia tanta est antidotorum tenui-

tenuitas, ut omnia penetrent, & aperiant, nullum habeant aditum præclusum, ut si ante coctionem vrsurpentur, non tollere obstructions, sed augere potius, & conduplicare possint noua materia ad partes obstructas deducta. Ex quo factum est, ut vel in Quartana intermittente interpestium Theriacæ usus, qui materiae morbificæ coctionem præcedit, reprehendat Galenus. Verum ex altera parte non desunt auctores celebres, qui contrariam asstruunt, defenduntque sententiam, ac tanto magis huic remedio fidunt, quanto maiorem veneficæ qualitatis, quam vel caloris, vel multitudinis in febribus pestilentibus rationem habendam prædicant: nam si retundendus veneni impetus, nil melius, quam ista antidoti, præstare id potest, nil melius cordis tonum excitare, nil melius excrementitiæ humiditatem corrigere, nil melius putredinem cohibere, nil melius obstructions adimere, nil melius vires omnes fulcire. Adiungant Galeni auctoritatem in libro de Theriaca ad Pisonem, & de antidotis tale remedium in his febribus comprobantis, in quibus audacter vtimur rebus longè calidioribus, quam sit Theriaca, vix secundum gradum attingens, & frigida conseruæ adiectione contemperamentum acceptura. Confirmant hæc omnia ipso experimento, quo rerum ad praxim attinentium veritas comprobatur, ut aurum Lapidis Lydij contactu. hoc enim auxilium profitentur sæpe plenum emolumenti compertum, numquam causam detrimenti, ut remedium à ratione insinuatum, ab experientia confirmatum deferere non cauti sit hominis, sed in opinando proterui. Quid in hac auctorum varietate, in

hac opinionum dissensione dicemus? non est meum tantas componere lites; nec eos animos ausim conciliare, quos video esse velle discordes. Dicam solum quoddam mihi in hoc negotio contigerit, & meum liberè depromam sensum, qui vtramque sectam sectari aliquantisper videtur, & à neutra totus remouetur. Ego diu priorem sententiam sustinui, exterius conuenire Theriacam laborantibus pestilenti febre, interius nil esse importunius, & sic opinatus exhibui numquam memorata detrimenta veritus. At cum Romæ obseruarem, ubi viginti quinque annorum spatio in Magnatibus præcipuè viris Medicinam factitauit, hæc antidotorum in his malis exhibitione esse familiarissimam, & plerumque securitatis plenam, re diligentius pensata cepi mutare consilium, & sic in proposito dubio decernendum putavi, febricitantium temperamenta ponderanda, & morbificæ materiae varietatem, & febrilis caloris diuersitatem. nam vel ægri frigido sunt temperamento, vel calido, & humores morbum facientes vel biliosi, vel pituitosi, & melancolici, & calor febrilis vel intensus, vel remissus, nam dantur quandoque pestilentes febres per exiguo calore comitate, pessimo tamen more præditæ, ut habemus apud Galenum in secundo de crilibus, & in nono de simplicium medicamentorum facultatibus. In ægris ergo frigida temperaturæ, in humoribus aut pituitosis, aut melancolicis, in calore febrili retuso, accedente præsertim calis constitutione frigida, & urgente maximo pere qualitate febris venefica, tutissimam censeo, & vilissimam simul Theriacæ, & mithridati administrationem, & talenti sum multoties

expertus, & aliorum potius, quam horum remediumum pollicitationibus frustratus. At in agrotis ad calidiorē temperaturam vergentibus, humores biliosos præferentibus, intensum febris fetorem sustinentibus, calido etiam celi statu, & iuuenilitate accedente, suspectam eandem exhibitionem habendam existimo, & sæpe res ipsa incommo- dam animaduersam fuisse non abnuo. nam ubi tantus calor, ubi tanta humorum rogitas, ibi magna sit substantiæ dissolutio, ibi magna spirituum dissipatio, ibi citæ virium labefactio, quod cumulatè ostendit Galenus in duodecimo Methodi eorum exemplor, qui tenuium affluentia humorum scitantes febri patiuntur frequenti syncope committatam, vt mirandū non sit, si in hac reum calidatum syndromē Theriaca nimiam exacerat acuitatem cum virium lapsu, nimiam calorem imprimat cum magno morbi incremento, ac tanto quidem magis, quanto maior eius exhibitio fuerit, quanto frequentior. Quod periculum non imminet his, qui frigidiores ipsi remissiores defuerunt febrem, & frigidiores habent humorum supplectilem. hinc enim retunditur medicaminis calor, eiusque vis in parte obruitur, vt non se explicet integram, sed activitate deprimat quasi retusam. Hoc placuisse video, vt allos multos missos faciant, vel ipsi Valsesio, magnoq; Galenicæ doctrinæ seeratori, qui in commentario septimi Epidemiorū enarrans Historiam ad Hippocratem propositam Nicoxeni in olintho laborantis febre maligna, adiunxit hunc fuisse adiutum potionibus refrigerantibus, & acidis ad mitigandum feruorem, in hibendamque putredinem appositis, & huic bolos

Theriacaes futuros fuisse potius exitiales ob calidiorē corporis temperiem, humorumque tenuiorum affluentiam, veluti ē contra in temperatura frigidiori, in pituitæ copia Theriaca fuisse opportuniissima, & poriones ille parum accomodatas, omnique fructu destitutas, vt propositam à nobis distinctionem insinuet, pro recto Theriacæ vsu in his febribus, in quibus nec semper venit vsurpanda, nec semper omittenda, sed pro varietate temperamenti, pro diuersa febrium intensione, pro vario humorum dominio modo in medelam assumenda, modo ab ore alienanda. Nec difficile fuerit satis rationibus eorum facere, qui excludendam omnino censent, nam quantum attinet ad magnam eius activitatem, hanc dicimus non esse immodicam in paucâ dosi, quæ debet exhiberi, cum satis sit semidrachma, & hanc eandem retundi à frigiditate temperamenti, & humorum, ex qua etiam sit vt non habeat tantam vim calefaciendi, vt possit facere fixum calorem, quia temperatur etiam à miscella conferuat violacæ, nec est necessarium in magna dosi exhibere, nec bis in die, quia, vt diximus, sufficit vel semidrachma, & alternis diebus exhibita, & in libro de antidotis proponitur exhibitio magis efficax, & urgenti vehemens reluctans. Nec danda est Theriaca ubi vires non sunt ferendæ, & calor innatus imbecillus potest dissolui, vt contingit in pueris ob nimiam distillationem, & pereannem substantiæ dissipationem. Ad Auicennæ auctoritatē dicimus ipsam de præseruatione loquentem proposuisse Theriacam, vt in curatione quoque adhiberetur, quoniam eadem sunt præseruatoria, & curatoria auxilia, ex Galeno in libro de Phle-

Phlebotomia, de curatione loquentem refrigerantia induxisse; quoniam rationem habendam censuit etiam caloris febrilis, ut ratione virulentæ qualitatis convenirent Antidoti, ratione vehementis caliditatis refrigerantia; & pro maiori alterutroque vrgentia fieret delectus. Responsionem ad librum de Theriaca ad Pisonem, ubi laudatur Theriaca in correptis pestifera febre, non accipimus, non primam, quæ negat librum esse Galeni, quia hæc est diuinatio, & res gratis dicta, gratis etiam neganda, non secundam, quæ verba illa exponit, quia dura nimis est expositio, & ab auctoris mente aliena absolute affirmantis Theriacam mederi correptis febre pestilenti, ut curationem innuat non præseruationem. Si concedunt in peste sine febre, debent concedere etiam cum febre, quia pestifera qualitas est quæ magis vrget, & indicat, & malus mos, non magnitudo febris, & si non in omni febre, saltem in remissa, & in humorum frigidorum copia, & si concedunt in simplici intermittente, multo magis in pestilente, ubi venefica qualitas maxime premit, unde Celsus dixit in hac maturius auxilia etiam cum quadam temeritate esse rapienda. Ad rationes eorum, qui contendunt non convenire Theriacam cum pharmacis mixtam, quia impedit vim alui subductoriæ, non solitariæ, quia materiam crudam agitat, & ad augendas obstructions deducit, respondemus non placere quidem mixtam cum pharmacis subductorijs, ob allatam causam, placere tamen solitariam, sed opportuno tempore exhibitam, hoc est non in principio februm, nec in cruditate materię in qua solet enarrata à Galeno non lesionem inuehere, sed in mor-

bi progressu apparentibus signis curationis, ut possit fructum afferre, non possit noxam. Cum ergo appareat allata argumenta facile dissolui, & contraria sententia valida rationi, & experimento videatur inniti, nescio videri, cur Theriacam vel mithridatum debeamus in descriptis casibus omittere. Et quando se offerent casus diuersi, loco istarum antidotorum vti poterimus confectioe hyacinthina, nulli obiecto obnoxia, uti gurgulis aliquot iulepige tinctura Mi Ducis, ad retundendam malignam vim præpolentis, uti pulueribus Lapidis bezoar, boli armenti, terræ lemnis, cum aquis rutæ Caprariæ, scorzonere, vel aquis cardiacis magistratibus, quarum est non exigua vbertas, veluti magna effectum suppelle pharmacorum alexipharmacam facultatem in forma solida habentium, quorum non est propositum facere censum partim ob communem eorum notitiam, partim quia in hoc capite illum habui primarium scopum, ut magnas antidotos à curatione februm pestilentium semouendas semper non esse ostenderem; ut ideo à me expectandum non sit, ut inunctiones quoque, & Epithemata ad robrandum conposita recenseam, cum potius tamquam omnibus nota, & ab omnibus suo tempore approbata silentio inuoluenda censeam, cum remedia in propatulo posita, & nil difficultatis ingrudentia leuiter attingisse, & in suo genere insinuassem satius autumem, quippe quia describendum accesserim non ad res minutiones in hoc februm putidarum argumentis persequendas, sed ad insigniores, maiorique dignas consideratione tractandas pro maiori indicationum orientium claritate. Veluti nunc

de remedijs roborantibus loquentes, quæ indicantur à visceribus imbecillitati subiectis, considerauimus alexipharmaca, quæ à praua febrili insinuantur qualitate, & inter hæc magnas etiam antidotos locum habere ostendimus.

De Indicatione à febrium symptomatibus sumpta.

CAPVT XXVI.



Indicationes in febribus putridis, vt patet ex superius dictis, sumuntur tum ex rebus secundum naturam, tum ex rebus præter naturam. nam aliæ conseruandæ veniunt, aliæ profligandæ. conseruantur naturales, profligantur contrariæ, quæ sunt præter naturam. Vires sunt naturales, imo constituunt ipsam naturam ideoque pro sui conseruatione faciunt indicationem vitalem, quam abundè in primo libro explicauimus. Morbus, & causa morbifica sunt res præter naturam, ideoque ad sui profligationem partim curatoriè indicant, partim præseruatoriè, curatoriè quidem morbus, quia lædit actum, præseruatoriè autem causa, quia lædit potentia, quæ non impedita redigitur ad actum. Verum inter res præternaturales locum etiam habent symptomata, quæ vt vmbre corpora, sic ipsa sequuntur morbos, vt docet Galenus in primo de morbis, & in secundo Methodi, quod intelligendum est de symptomatis propriè dictis, non communem appellationem habentibus, nam hæc communiter dicta complectuntur res omnes præter natu-

ram existentes, siue causa morbifica fuerit, siue morbus, siue accidens morbo succedens, quod græci vocant *ὑπὸ τῷ νοσῶντι*, vt declarat Galenus in libro de differentiis symptomatum. Accipimus nunc ergo symptoma propriè dictum, quod est è natura non constitutionis, vt morbus, & causa morbifica, sed passionis in morbum vel mediata, vel immediata referenda, quia eum dicitur symptoma symptomatis, illud tandem in morbum refertur. Nec tamen negandum est dari etiam symptoma sine morbo, quod vocat symptoma causæ, propositum à Galeno in tertio de symptomatum causis, affirmante actionem lædi vel læsa facultate, vel ob errorem externum, vt exemplum habemus de læsa chilificatione, seu coctione ventriculi modo ob partis intemperiem, modo ob alimonie immoderantiã. sed hæc symptomata ab externo errore pendentia non multum habent momenti cum remotione externi erroris facillè remouenda. At quæ morbosa sunt tantum aliquando urgent, vt totam ad se trahant curationem, omnem Medicorum ad se conuertant sollicitudinem, alioquin illud ridiculum usu venit, vt morbus curetur, ægri vita perdatur. Habent ne igitur symptomata vim indicandi, & si habent, quam, & qualem? Id, quod indicat, debet habere essentiam firmam, & permanentem, & symptoma fluxam habet, nec consistentem essentiam, ideo Galenus in secundo Methodi concludit nullam symptomati conuenire essentialem vim indicandi. nam, vt idem docet in Vndecimo, & duodecimo Methodi, affectus præternaturales sunt in duplici differentia, alij quidem in essentia completa, & vt vocant, in facto esse,

esse, quales sunt morbi, qui indicant sui remotionem contrarijs faciendam, alij verò in essentia incompleta, quam vocant in fieri, veluti symptomata, quæ numquam habent absolutam substantiam, sed semper fiunt, & continuam habent generationem aliunde pendentem, ideo per se non indicant, sed sequitur alienam indicationem ab affectibus completa essentia præditis ortam. Symptoma ergo quæ symptoma, & suo pte nutu non indicat, quia sequitur naturam, & euentum sui principalis, hoc est morbose affectus, quod pro maiori parte sit dictum. Verum incidit aliquando tempus, vt accidentaria quadam ratione symptoma indicet, quatenus scilicet induit alienam naturam, & subit vicem causæ, quo nimirum tempore non attenditur amplius vt symptoma est, sed vt potest grauior affectus inuehere, & veluti à morbo ortum traxit, sic quasi pari referens potest ortu nouo morbo impetire. Et cum tres sint symptomatum species, vel actionum, offensæ, vel excretorum; retentorumue immoderantiæ; vel corporum ipsorum affectiones, duæ primæ possunt curationem immutare, & indicandi facultatem suscipere, postrema non potest, quia cessante affectu, vnde nascitur, cessat & ipsa. Verum quæ symptomatis species immutat, & indicat, habere tunc dicitur causæ rationem, ac tamquam causa indicat, ideoque instar causæ indicationem facit præseruatoriam, quia dum cogitamus de sedando symptomate, quod potest nouam labem inferre, cogitamus de summuendo arcendoque malo, quod potest inde contingere. sic ergo symptomata curationem immutant quatenus causarum naturam

induunt, & hoc nomine ad vnum caput rediguntur, læsionem videlicet, siue virtutis fuerit læsio, siue affectionis, quippe, quæ vel virtutem minuere, vel affectionem augere valeant. nam si vel virtuti, vel affectioni non officiunt, immutata relinquunt, & integram curationem, nec nouam inducunt, quid enim opus immutare indicatam prius curationem, si symptoma non trahit ad se curantis sollicitudinem, & quomodo hanc potest trahere, si nec viribus decrementum, nec morbo affert incrementum, ideoque nullum insigne importat detrimentum. Vires nimirum lædunt infirmioresque reddunt vigilie, dolor, & euacuatio immoderata. Affectioni eadem non vitæ semper, sed maiori obsunt ex parte præcipue cum ad insignem peruenierint magnitudinem. Quo in casu incertam immutamus curationem, & ad eam transimus, quæ profligando symptomati inferuiat, nam cum vno, eodemque præsidio, & morbum tollimus, & symptoma summonemus, non extraordinariam molimur curationem, sed ordinariam, nec tollendo symptomati sumus intenti, sed morbo profligando, cuius depulsionem sequitur symptomatis depulsio. Veluti in pleuritide dum misso sanguine, aut purgato corpore dolorem ex lateris inflammatione ortum sedamus, quia affectum inflammatorium pariter curamus, non symptomatis, sed morbi per se curam exercemus, cumque ea symptomatis quoque cura incedit coniuncta. At cum in dysenterico affectu anodyna, ac doloris mitigatoria usurpamus, nullam sanandi in intestinis vlceris vim habentia, tunc non affectum respicimus, sed contra symptoma dolorificum

scum contendimus, morbo interim neglecto, ut vires tueamur, & a casu seruemus pro virili immunes, quo mox affectus curationem prosequi possimus: nihil enim est nostræ naturæ magis aduersum, & ad eam infringendam magis accommodatum quàm dolor, quem maximè omnium respuit, ac refugit, & indolentiam avidissimè quærit. Nec admittendum Epicuri documentum de negligendo dolore, quia si longus, sit levis, si acutus, brevis, quia doloris acumē facit interdum non dolorem solum, sed vitam etiā ipsam breuiorem. Quod ne contingat, mitigatorijs est vtendum, & omisso impræsentiarum morbo, aduersus symptoma pugnandum, vt cumulatè explanat Galenus in duodecimo Methodi, duplicem Medicorum contra dolorem instā-tium rationem instituens alteram, qua delicijs cubātium subscribunt, alteram ex artis ratione. Primam attribuit his, qui cum possent imperata doloris tolerantia vno die perfanare ægrotum, non id faciunt, sed neglecta curatione sedando dolori intendunt, dolenti blandientes, eiusque gratiam aucupantes. Secundam his desert, qui cum periculum imminere cernunt ob virium resolutionem à dolore profectā, mitigandi doloris, & roborandæ virtutis cogitationē suscipiunt, vt illius noxa tollatur, hæc ad resistendum morbo, & curationis spatium sustinendum pareatur. non enim laudandos censet Galenus eos vel Medicos, vel ægros, qui vt animosi appareant, fortiter, ac viriliter aduersus dolorem vrgentem renituntur, in asperis, & affectum destruentibus auxilijs perseuerantes, quia his accidit, vt cum longiore spatio curari deberent, breui

viriliter moriantur. Quare duplicem terminum Medicis constituit erga ægrotantes seruandum, alterum his, qui ex arte generosè morbum oppugnant, & hunc constituit tutam medelam, alterum his, qui mitigandi doloris rationem habet, & hunc facit virtutis custodiam. Hos terminos neutri præterire debent. nam quid ineptius illis, qui curantium remediorum perseuerantiam adeo mordicus retinent, vt quid natura possit perferre obliuiscantur, nec vtrum eorum administratio superet vim naturæ, secū raciocinantur? Rursus alteri indolentia studiosi cur debent in anodynis diutius persistere, si iam illud sunt consecuti, vt virtutem seruarint incolumem? cur sinunt morbum magis, magisque inualescere, curatoria omittentes præsidia? Primi si suum terminum securitatis transiliunt, crudelium faciunt hominum officium, vnà cum ægritudine vitā ægro adimentes, secundi si suum custoditæ virtutis excedunt, & voluptatem ægrotum, non sanitatem attendunt, adulātorum vicem subeunt omnibus cubantis delicijs subscribentes. Ab vtrisque recedendum est, mediumque iter capefcendum nimia vel seueritate, vel indulgentia deuitata, & celebris dicti, quod Apollinis oraculo attributum memorat in Protagora Plato, & in Menexeno summè commendat οὐδὲν ἄγαν, Nihil nimis, perpetuā memoria conseruata, & sola cubantis vtilitate gerendorum meta proposita, vt si liceat per vires morbum carare, nulla habeatur medicamentorum soporiferorum, quæ vocāt αὐτὸθῦνα, ratio, at si mortis periculū virium minuetur, resolutio, horum medicamentorum fiat administratio, quæ licet aliquam cor-

pori inferant læsionem, à morte tamen præseruant, quæ longè est læsione peior. Concludit ergo Galenus hæc anodyna nec nimis amplexanda, nec nimis pertimescenda, quia si non vrget necessitas, non est eorum læsio subeunda, at si vrget, vt in vehementissimis doloribus, non est imminenti morti ansa relinquenda, quia satius est affectum augere, & curationi contumacem reddere, quàm inualescenti symptomati virium, & vitæ dissolutionem permittere. Ex dictis apparet symptomata, si remanet in suo gradu, nec vltèrius progreditur, nil indicare, quia est morbi appendix, & morbi curationem eius confectatur curatio, sed cum suscipit naturam causæ, tunc nancisci vim indicationem, quæ præseruatoria est, vt non propterea multiplicentur indicationes, nec indicata, sed in proposito ternario numero consistant, vt sint hæc solæ indicationes, vitalis, quæ manat à viribus, curatoria, quæ à morbo, & præseruatoria, quæ à causa, ad quam redigitur symptomatis vicem causæ obeuntis indicatio.

*De tribus præcipuis symptomatibus
quæ in febribus putridis hæ-
bent vim indicandi.*

CAPVT XXVII.



Ixiimus cum Galeno in Vndecimo Methodi symptomata tunc suscipere vim indicandi, cum fiunt causa lædendi, quæ læsio vel virtutem respicit, vel affectum, virtutem diminuendam, affectum amplificandū. Talia etiam diximus tria ab eodem Galeno enumerari, vigiliā,

dolorem, euacuationem immodicā, quia horum singula, & enervare vires, & morbo possunt calcaria addere. In his ergo breuiter examinandis versabimur earum, quas præbent, indicationum adimplendarum viam monstrantes, & à vigilijs, quæ primum fuerunt nominatæ, primum incipientes. De quibus iure dixit Hippocrates in secundo Aphorismorum eas non aliter, ac somnum, si modum excesse- rint, esse malum, quia nullum est animal, quod perpetuam obiterationem possit, sed omne operando laborem sentit, & huius laboris quietem requirit, vt spiritibus in operando consumptis congrua restauratione resectis ad novam denuo operationem, ad quam est natum, valeat reuerti, vt docet Aristoteles in libro de somno, & vigilia. Nec iniuria veteres dixerunt vel ipsius Galeni testimonio vigiliā esse malum, & vt causam, & vt signum, quippe quæ vt causa vires prosteruat omni quiete destitutas, morbososque affectus adaugeat, vt signum autem, quia vel calidam intemperiem primæ partis sensitivæ, quæ cerebrum est, insinuat, vel biliosi in ea humoris abundantiam. Hinc Hippocrates in prognosticis dixit, pessimum esse, si neque interdium, neque noctu homo dormiat, aut enim ob dolorem, aut laborem vigilia adest, aut desipientiæ futura nota est. A dolore quidem excitatur vigilia, quia dolor ad se trahit vim animalem, nec unquam quiescere finit, & ad propriam originem reuocari, & siue dolor fuerit animi, siue corporis, idem præstat, vnde ob animi dolorem vigilem perpetuo effingit Elysam prudētissimus Maro.

*At non infelix animi Phænissa, nec
vnamquam*

*Soluitur in somnos, oculisque, aut
pectore noctem*

*Accipit, ingeminant cura, rursus-
que resurgens*

*Sauit amor, magnoque irarum flu-
ebat aestu.*

Sic Hippocrates in tertio Epidemiorum de muliere decumbente in Thaso post factam morbi enarrationem longam dixit, erat animo deiecto, vigil, iracunda, inquiet, & mente melancholica. Sed ob corporeum dolorem caput praefertim lancinantem facit idem in septimo Epidemiorum perpetua afflicta vigilia Ermoptolami vxore. Et apud sophoclem Philoctetes inducitur ob malignorum vlcerum cruciatum ab omni somno alienus, de quo dixisse Poetam inter Latinos priscum testatur Tullius in Tusculanis.

Qui iacet in lectulo humido,

Qui eiulatu, questu, gemitu, fremitibus

*Resonando, multum flebiles voces
refert.*

Lassitudo quoque seu labor facit vel comatosos homines, hoc est male vigilantes, nec bene dormientes, vnde Hippocrates in tertio Epidemiorum dixit, Grauitas corporis, comatosi, vel eosdem semper vigilantes, loco stare nescientes, nec vllum inuenientes situm, in quo requiescant, ideoque perpetua iactatione hinc inde facta agitato, & ab vna in aliam nouam figuram conuersos, quam iactationem, & figuræ immutationem à vigilia pendent præclare expressit in vltimo Iliadis Homerus hæc de Achille ob Patrocli mortem marcente, ideoque nul-

lū oculis somnum vidente scribens.

*Fundebat lachrymas, perque alti
stragula lecti*

*Nunc lateri incumbit, nunc in sua
terga supinus,*

*Nunc prono in faciem, nunc corpore
rectus ad auras*

*Surgit, & algosi maris errat litto-
ra circum.*

Tandem desipientia, & qualecumque delirium ob siccum cerebri temperamentum iuxta Galeni animaduersionem in commentario illius e Prognosticis loci vigilias solet excitare, quia contrariorum contrariæ causæ, & veluti humiditas est causa somni, ita siccitas vigiliæ, quo fit vt vinum moderatè sumptum humefaciendo somnum inducat, immoderatè adhibitum excitando vigilantes faciat, de quo pulchrum habemus exemplum in secundo de locis affectis apud Galenū in puero Grammatici, quicum magnam generosi vini copiam ingurgitasset incidit in vigiliam lathalē, ex qua obiit mortem. Hæc vigilia fuit soboles maximæ siccitatis cerebri, & hæc siccitas soboles generosi vini. Quæ siccitas quia viget in delirantibus ob copiam calidorum, siccorumque vel humorum, vel vaporum, ideo in eisdem viget vigilia quasi delirij indiuidua comes, Vnde Hippocrates in tertio Epidemiorum facit multos delirantes, & vigilantes, inter quos fuit adolescens qui in mendacium foro decumbebat, & charion iuxta Demeænum iacens. Quare apud Euripidem furij, agitato, & verè Phræneticus orestes valdè gaudet sibi aduenisse somnū, & vocat remedium morbi opportuno tempore accedens, & soror Electra dormientem conspicata exultat gaudio inquit.

*O' charissime quàm exhilarasti me
cum obdormyſſes.*

Gaudet Electra ob dormientem fratrem, quia ex ſomno argumentum colligit remiſſi delirij, cuius remiſſio remiſſionem arguit ſiccitatis in cerebro dominantis. Sic igitur innotefcit rectè ab Hippocrate dictum fuiſſe in Prognosticis peſſimam eſſe vigiliam interdiu, noctuque peractam, quia ſignum eſt vel doloris, vel laboris, vel delirij. Nec ſolum hæc ſignificat vt effectus, ſed hæc eadem producit vt cauſa, nam vigilia facit dolorem, facit laborē, facit delirium, vt de vigilia idem contingat, quod de virtute morali in ſecundo athicorum Ariſtoteles ſcribit, eam nempe fieri ab actionibus ſtudioſis, & factam efficere actiones ſtudioſas, quæ habent rationem, & cauſæ, & effectus, licet actiones, quæ præcedunt virtutem, & generant, ſint diminutæ, & imperfectæ, at quæ ſuccedunt, & generantur à virtute, abſolutæ, & perfectæ. Ita vigilia à dolore, à labore, à deſitio gignitur, ſed genita peiorem, & dolorem, & laborem, & deſipientiam gignit. Vnde Hippocrates in ſeptimo Aphoriſmorum ex vigilijs deducit vel conuulſionē, vel deſipientiam. Quoniam ergo hæc pendet à ſicciori, calidiorique intemperie cerebri, vel à copia bilioſi humoris, oritur indicatio refrigerandi, & humectandi viſceris illius, euacuandi, & reuellendi humoris iſtius. In hunc ergo finem conferet primo illud remedium, quod Galenus in ſecundo de alimentorum facultatibus valdè commendat hæc de lactuca ſcribens. Etate iuuenili, cum mihi ventriculus bili aſſiduè infeſtaretur, lactuca, quod ipſum refrigerarem, utebar, cum

vero ad ætatem decliningem perueni, hoc olus fuit mihi aduerſus inſomniam remedio. Tunc enim contra ac in iuuentute, ſomnum mihi dedita opera conciliabam. Graue enim mihi erat præter voluntatē vigilare, quod mihi accidebat partim quod in iuuentute meapte ſponte vigilijs aſſueueram, partim quod decliningium ætas ad inſomniam admodum eſt propenſa. Itaque lactuca vespere commanſa vnicum mihi inſomniæ erat alexipharmacum. Ex Galeni ergo admonitione adhiberi poterit lactuca cocta, quæ ſi condiatur vino granatorum, vel ipſiſmet granis aſpergatur, vim habebit conciliandi ſomni validiorem. Valebit etiam ſerculum ex amigdalidis dulcibus, & melonum ſeminibus in iure pulli conſectum, vel etiam piſſana cum portione emulſionis ſeminum papaveris. Aſſumi etiam poterunt conſectæ lactucæ, violarum, maluarum, horaginis, bulgoſſi, ſed præcipue conferet oſſa in vino, vnde nō iniuria fabulata eſt antiquitas ex huius oſſæ oblatione Cerberum in ſomnū eſſe delatum, & apud Homerum in odyſſea Cyclops vini hauſtu ab Ulyſſe exhibiti magno corripitur ſomno. Habenda tamen ratio fuerit febris, vt vinum ſoporem poſſit inducere, non multum febreſ poſſit augere, nam aliquod eius incrementum contemnendum, modo propoſitum ſomni beneficium compareretur. Conferet ſerum caprillum pluries uſurpatum, quia & refrigeratorium eſt, & vaporoſum. Externa remedia hæc erunt. frictiones partium infernarū cum oleo amigdalino, lotiones earundem ex decocto lactucæ, nimphææ, capitum papaveris, violarum, foliorum vitis, ſalicis, hyocyami, ſerpilli, anethi,

thi, florum camomali, quæ inunctiones adhiberi poterunt non modo cruribus infra genu, sed etiam brachijs infra cubitum, & adiungentur inunctiones circa nares, & tempora ex oleis violaceo, & nenufarino, & ex vnguento interdum populeo, præcipue si nec capitis grauitas fuerit, nec magna aut fluxio, aut tussis, & urgente necessitate dissolui etiam poterit scrupulus vnus opij in vncia vna olei vel amigdalini, vel anethini, vt inde nariibus, temporibus fronti fiat oblinatio. Quinimo in vigilia magnam contumaciam præferente licebit bolum instituere non modo ex nouella Theriaca cum portiuncula hyacinthinæ confectionis, alterius semidrachmam cum alterius scrupulo miscendo, verum etiam ex philonio romano cum hyacintho in eadem dosi, vt possit fieri ascensus vel ad scrupulum vnum, & amplius pillularum de cynoglossio, quando vrgens vigilia vltimum exitum minitatur. Nec omittendum est, quod cucurbitula etiam sicca conciliando somno sunt aptæ, & hyrudines hæmorrhoidibus applicitæ faculentiorē, & biliosum sanguinem educantes, & prauorum vaporum ascensum impediētes, & huic reuelenti euacuationi addi poterit alia deriuatoria per hirudines vel nariibus applicatas, vel angulis oculorum in extremo casu, ita vt vlcusculis ibidem relictis modicum opij illinatur. Sed hæc remedia non sunt inducenda nisi cum necessitas inducit summa, & in leuiori affectu leuioribus vtendum præsidij, qualia etiam fuerint artuum dolorifica ligamenta post frictiones adhibita, & olfactus oleorum soporē inducentium, qualia sunt oleum de cucurbita, & seminibus lactucæ, pa-

pauerinum, & nenufarinum, & capitis inclinatio ad excipiendos vapores humidos, ac refrigerantes, & luminum multiplicatio, & mox repentina extinctio, & Musicorum concentuum administratio, & excipientis hanc silentij successio, & ambientis aeris ex rebus refrigerantibus, & humectantibus alteratio, atq; adeo aquæ lactucæ vsq; ad tres vncias cū vna syrupi papauerini assumptio. Quod si hæc satis non videantur facere, ad validiora superius proposita, & exretna, & interna accedendum, quibus adiungi etiam poterit paruus bolus ex conserua boraginis cum duobus granis laudani in sua Pharmacopœa à Quercetano descripti. His, alijsq; id genus auxilijs remouenda erit, seu corrigenda calidior, & siccior cerebri intemperies insomnietatis parens, siue etiam euocanda, vel reuellenda biliosi humoris infestacopia. Et hæc de primo vigiliarum symptomate. Erat secundum symptoma in dolore constitutum, cuius tanto maior habenda ratio, quanto maior inde pendet naturæ dissolutio. nam naturæ incolumitas in vnione consistit, vt ostendit Platon in sophista, & præclaro Androgyni figmento in symposio, & Galenus in secundo de simplici Medicina, & in quarto de decretis, & hanc vnionem dolor oppugnat, & labefacit, & quia ad partem dolentem spirituum omnium fit confluxus, à Galeno in tertio decimo Methodi declaratus, qui spiritus dum expectatam inferre querant opem, non expectatam coguntur sustinere iacturam, ideo de tuendis hisce spiritibus per mitigationem doloris diligens capienda sollicitudo. Nec vt alacritas ostendatur, immodica tolerantia imperetur. Sed pugnandi

laudani.

contra dolorem triplex à Galeno in Quinto de simplicium medicamentum facultate proponitur ratio, quarum altera per ablationem causae dolorificae fit, & haec est sanatiua, nec tam symptoma respicit, quam affectionem symptomatis, quae aliae sedando dolori sunt intentae, & prima quidem magis proprie per lenitorem quendam, & paregoricam vocatam vim humanae naturae iure similitudinis amicam, à blando quodam, & suauitatis pleno temperato calore profectam, unde dolorificae acrimoniae materiae demulcet, & ad meliorem quendam aequabilitatis modum redigitur, & propria corporis substantia confouetur. Vltima ratio vocatur, & ipsa anodyna, sed minus proprie, quippe quae non adaequet obiectum potentiae motiuium, sed potentiam attingat obiecti iudicatiuiam, & hanc quoque non acuit, nec perficit, sed retundit, ac labefacit, & sensum doloris demit non rem sensibilem corrigendo, sed sensationem quodammodo stupore quodam indurto auferendo, ut iure dixerit Galenus facultatem anodynā aliam esse reuera, qualis est paregoricorum in primo gradu calefacientium descripta, aliam dumtaxat dici, qualis est obtupefacientium vltimo insinuatā, non aliter dicta anodyna, ac dicere possimus hominem mortuum anodynōn, quia dolore vacet. His ergo iactis fundamentis inherens Galentis in duodecimo Methodi dixit eum, qui causam dolorificam adimit, non contra symptoma pugnare, sed aegritudinem curare, sed cum aliqua occasione prohibitus affectui summouendo non potest intendere, vehementiam tunc doloris mitigare. In quem finem precognoscendas tum causas dolo-

rum statuit, tum ipsarum distinguentes notas, & causas quidem dolorum esse in partibus sentientibus vel diuisionem continuitatis, vel alterationem magnam, non sensum, sed confertim factam, & violentam siue cum recessu à naturali habitu, siue cum reditu ad eundem. Sunt ergo causae dolorem excitantes res omnes, quae vehementer, & violenter vel excalfaciunt, vel refrigerant, & quae substantiae continuitatem diuidunt siue confundentes, siue incidentes, siue distendentes; imo omnis continui solutio vel à rptione prouenit, vel à contusione, vel ab erosione, & rptione ex re distendente contusio ex grauante, erosio manat ex mordente. In vehementis ergo doloris impetu scrutandum est an succus in corpore plurimus, vel spiritus; cui non sit exitus, an grauis moles, an mordens humor, an siccus affectus subsit, an verò aliquid, quod valenter vel excalfactionis, vel refrigerationis violentiam imprimat. Quae omnia sunt diligenter distinguenda, & propria cuique remedia adiungenda, ut Galenus proposito exemplo partim hominis dolentis ex confluxu mordentium humorum in tunicas intestiuorum, partim periodico ventris cruciatu confictati cumulatè ostendit. Quam curandorum etiam dolorum methodum nobis monstrans, si sanguinis abundantia sit per distensionem dolorifica, ut contingit in inflammatione, consulit sanguinis missionem, quam in commentario vigesimi tertij aphorismi primae particulae proficitur se maximum remedium in maximis doloribus inuenisse, veluti etiam opportunitatem purgationem. At si aegri vel vis, vel voluntas sit huic remedio euacuanti dissentanea, reuelere

lere sanguinem præcipit, vel deriuare, & foret in capitis dolore reuulso, si dolente parte postrema; aperiretur vena frontis, deriuatio, si naribus adiungerentur hirudines quacumque parte capitis dolente. At si his peractis dolor duraret, ad medicamenta digerentia foret accedendum, quia humoris in ægra particula impacti clara suppetere signa. Dolores etiam ex flatuoso spiritu ortos hac digestoria ratione curabimus, & cibis extenuantibus, & potione, & clisteribus, & cataplasmatibus, & humidis, siccisque fomentis auxiliantes. Sed si moles aliqua vel grauando, vel contundendo dolorem faciat, moli ipsi est remedium præstandum. At si humor mordens diuexat, cauendum ab extenuantibus, & calfacientibus, & manus danda euacuantiibus vel confertim, vel per epicrasim, & si neuro remedio sit locus, torporem inferentia medicamenta exhibenda, qualia sunt Theriaca, mithridatus, Philonium, & alia huius farinae, quæ in humorum tenuitate, & caliditate magis cõueniunt, quia non solum profunt vt obstupescientia, sed etiam vt incrassantia materias iusto tenuiores, refrigerantia calidiores, quo nomine in crassis, glutinosisque humoribus sunt magis suspecta. Ad quos crassos, & glutinosos humores cum accedit vel obstructio, vel calor, excitatur spiritus flatuosus, qui coercitus, & erumpere non valens vehemens promouet dolores, in intestinis potissimum excitatos, ex appulsu medicaminum soporiferorum aliquod leuamentum nactos, sed pauco interiecto tempore inualescentes, & conduplicatos. In quorum curatione, & longius spatium putat Galenus necessarium,

& Medicum in arte egregie exercitatum, Qui non perfusionibus, & cataplasmatibus vtetur valde calfacientibus, vnde lenti, crassique humores liquantur potius, & in flatum vertuntur, sed ad eos incidendos, & concoquendos tenuantia medicamenta adhibebit modicè calida, flatum discurrentia, & exiccantia, ac recta potius, ac toleranti victus ratione discussoriam vim habente aduersus malum contendet, quàm perfusionibus oleorum, vel cataplasmatibus, vel clisteribus. Quod si citra febrem talis dolor exerceat, & allium comedendum, & theriacam potandam dabit, at si cum febre, primo fomentum siccum ex milio applicabit, mox semen aliquod flatum discussorium in oleo tenui incoquet, quod linteo colatum, & anserino sæuo commixtum per sedem infundendum curabit. Et si perueret dolor, rursus oleum iniiciendum cum castorei, & succi papaueris portiuncula, vt in olei hæmina sit horum quantitas fabæ magnitudini æqualis. Hoc eodem medicamento imbuta lanula, & forti filo appensa quàm penitissimè in rectum intestinum intrudetur, vt possit ad libitum educi. Hac via oculorum quoque, & aurium dolores ex tali humore, & flatu in febribus excitatos sedare oportebit; quibus maxime opere aprabitur ex milio fomentum, & auribus medicamentum ex castoreo, & papaueris succo in sapa dissolutis, vel etiam cataplasma ex papauerum capitibus in aqua coctis, ac fanigræci, vel hordei, vel lini seminis farina aquæ immixtum confectum. Oculorum verò vehementissimis doloribus colyria opiata apprimè conducunt, nec urgente necessitate sunt omittenda; licet hæc valida refrigeratio sit his parti-

culis noxam allatura, quia optanda partis labes, quæ totius labem auertit, ac toto seruato, partis mox noxa corrigitur temporis data comoditate, auribus oleum id, quod solum castoreum recipit instillando, oculis verò ex cinamomo collyrium. In doloribus à solo flatu genitis tantum habet cucurbita cum flamma copiosa subinde admota momenti, vt citum euentum attendentibus videatur rationem habere incantamenti. At si doloris causa non sit solus flatus, sed cum flatu humor coniunctus, cedit quidem admota statim cucurbita sed paulo post renouatus redit vel ob errorem in victu commissum, vel ab locum importunius calefactum. In quo casu post ablata cucurbita doloris accessionem euacuandus erit humor infuso per sedem medicamento aliquo, quale fuerit oleum tenuium partium cum ruta incocta. His humoribus contrariantur tenues, & acres, qui similem dolorem inferunt, & interdum conuulsionem adiungunt os præcipue ventriculi occupantes. Qui quidem erunt vomitu expellendi, vel potu aquæ tepidæ procurato, vel insculo cum portione olei amigdarum dulcium, si in ore ventriculi constiterint, sed si intestina obsederint, erunt clistere educendi, eoq; deterforio, ac mordicationis experte, qualis fuerit ex pitissanæ cremore, cibis adiectis euechymis, nec facilem corruptionem subeuntibus. Cæterum, quia apparet interdum ex nimia siccitate in febribus cruciatus, qui solet succedere maxime exitiali phrænitidi, hunc sciendum est esse incurabile, quia est cruciatus conuulsorius, & hæc conuulsio est ex neruofarum partium siccitate, quæ sola insana bilis est, cum solidorum corporum

siccitas medelam non admittat. Hæc omnia sunt Galeni in duodecimo Methodi communem quandam dolorum ferè omniū methodum tradentis, à nobis summatim collecta, sed quia dolor potissimum capitis solet febricitantibus esse molestus, non erit absre ex eiusdem Galeni in primo ad Glauconē documentis remedia adducere in medium magis selecta. Dolente igitur capite, si febricitans fastidium habeat adiunctum, & oris ventriculi, quod antiquitus vocabatur, cor sentiat morsum, debet euomere, vel bilem, vel pituitam, vel vtrumq; vomitu educiturus. At si nulla ventriculi appareat magna læsio, inquirendum num vel obstructio, vel plenitudo, vel inflammatio aliquarum partium capitis adsit. nam si dolor fuerit grauatiuus, plenitudinem insinuabit, si mordicatiuus, acrimoniam vel vaporum, vel succorū, si pulsatiuus, inflammationem, si tensiuus sine grauitate, & pulsu, spiritus crudi, & flatuosi copiam, si cum pulsu, membranosi corporis inflammationem, si cum grauitate, copiam intra membranas retentā. Quod si causa erit copia vaporum, vel succorum, distinguendum erit num ob febrium vehementiam succi fusi, & quasi æstuentes in caput impetum fecerint, an ob partium infirmitatem, an ob repletionem vniuersalem corporis totius. nam hanc facile tolles totius euacuationibus, si partium fuerit imbecillitas, partim reuellere oportebit clysteribus acribus, vinculis, infernarum partium frictionibus, & aliqua, si opus fuerit, sanguinis educatione, partim conueniet particulæ applicare perfusiones primo repellentes, mox vacuantes, demum roborantes. Repellentes fiunt ex oleo

oleo immaturo, ex rosaceo, oxirhodino, & alijs refrigerantibus in crudiori affectu temperatis, in calidiori frigidis. Vacuantes fiunt ex oleo calido tum per se, tum magis antiquo, vel anetho, alijsque id genus dissoluētibus rebus alterato, vt sunt spondylion, vel serpyllum, vel pullegij coma, vel calamenthi, vel mēta, vel sisymbrij, quæ non solum vim habent calefacientem, & attenuantem, verum etiam roborantem. Quibus, si opus videbitur, adiungenda erunt etiam errhina, & apophlegmatismata. Caput quoque siccis sintonibus perficandū, & sale, nitro, & sinapi aspergendum. Sic dolor capitis ex partium infirmitate curandus. At ei, qui februm vehementiam comitatur, frigida qualitates, & facultates, & ex hidrelæo, & oxirrhodino, & capitibus papaueris confectæ perfusiones cōgruunt; vt decernit Galenus in libro illo ad Glauconem, in quo adiungit cephalagiam, quæ criticam sanguinis eruptionem, vel vomitionem præsignificat, non esse remedijs curandam, quia hæc non est symptoma sed potius bonum decretorium signum, nam quod est symptomat indicandi vim habens, subit naturam, vt diximus, causæ, & lædit vires minuendo, morbum augendo, at signum decretorium vires confirmat, & morbo decrementum parat. Nec illud omitendum, quod proposita Galeni Methodus ad sedandum capitis dolorem præsidia omnia complectitur à Neotericis in hunc finem inuenta, vt quicumque illi Methodo appulerit animum, facili negotio sit inuenturus omne auxilium, quod huius symptomatis interdum sæuissimi possit retundere impetum. Restat postremo consideranda immodica euacuatio, quæ potest, &

ipsa maximam ægrotantibus noxā inferre. Circa quam immodica euacuationem illud primum dicere lubet non placere eam sententiam, quæ doctis tamen viris arrisit, distinguendum esse à primordio, num hæc euacuatio sit symptomatica, vel critica, quia nulla immodica euacuatio potest esse verè critica, secundum bonam Crisim, omnis, quæ talis est, inter symptomaticas est reponenda quodammodo, quippe si immodica, ergo viribus, & naturæ onerosa, at quæ critica sunt excretiones, erigunt potius vires, & naturam confirmant, ab eius dominio profectæ, vt docet Galenus in libris de crisibus. Quare explicaturus idem in commentario vigesimi aphorismi primæ particulæ condiciones euacuationis verè criticae sex enumerauit, primam, vt fiat per sedem inferiorem, non per abscissum, secundam, vt per eam noxius humor, & redundans excernatur, tertiam, vt recto fiat tramite, quartam vt faciliè toleretur, Quintam vt fiat cum coctione, sextam, vt in die decretorio. Sed immodica euacuatio non habet tolerantiam adiunctam, sed virum potius totum labefactat, & ideo corrigenda venit, & remedijs emendanda, quod de signis criticis, quæ bona sunt, & bonum afferunt fructum, non esse faciendum decernebat Galenus. Proponit ergo ipse immodicam euacuationem tamquam symptomaticam, & proponit tamquam symptoma, quod potest immutare curationem, & ad se trahere mentis sollicitudinem, vt imminenti ab eo læsioni procedat obuiam. Et licet plures esse possint immoderate euacuationes, quæ febricitantibus facessunt negotium, duas tamen præ alijs considerandas hic ac-

cipiemus, quarum altera est nimia sanguinis per nares excretio; altera immodica per ventrem, & intestina euacuatio, quarum utraque ut frequens esse solet, ita obesse plurimum valet. Cum sanguis ergo plus iusto fluit e naribus, multiplex oritur indicatio, nam consideratur & confluens sanguis, & diuisio facta in venis, per quas fluit, in prima consideratione oritur indicatio prohibendi confluxus, in secunda occludenda diuisionis. Confluxus prohibetur, & per animi defectum, & per reuulsionem in contraria, & per deriuationem ad vicina, & per refrigerationem tum corporis vniuersi, tum partis potissimum afflictae. Clauditur diuisio vel per contractionem diuisi, vel per obstructionem. Contractio fit adstrictione, refrigeratione, deligatura, vinculo. Obstruitur vel intrinsecus, vel extrinsecus, intrinsecus a sanguine concreto, extrinsecus & hoc ipso, & linamentis, & spongijs, & crustis, & medicamentis emplasticis, & corporibus his, quae circumiacent, propius admotis. Haec est vniuersalis Methodus compescendi fluxus sanguinis à Galeno in quinto Methodi accuratè proposita, qua in narium quoque haemorrhagia debemus uti, sic tamen ut documentum ab eo traditum obseruemus, ne statim fiat ad refrigerantia, & adstringentia profluente particulae admota accessus, ne sanguis in tro copellatur, & venae repleantur penitiores, sed prius fiat in alia membra auersio, & per sanguinis missionem, & per artuum frictionem, ac deuinctionem, & per cucurbitarum ad praecordia defixionem, & per cucurbitae etiam in summa ceruice appositionem, antequam fronti, vel capiti refrigerantia adhibeantur.

Quorum administrationem debet praecedere repetita, si opus fuerit, sanguinis vel è manu, vel è pede detractio, paulatim facta magis ad reuellendum, quam ad euacuandum, ut vna, vel gemina vncia pro vice detrahatur, & vices sint plures, per venas etiam haemorrhoidales contulerit eductio, & per cucurbitulas scarificatas in partibus infernis, & in dorso, & per easdem scarificatas reuulsio, quae poterit etiam fieri per extremorum lotiones & in frigida, & in calida, in illa ad constringendum, in hac ad attrahendum, & per dolorificas ligaturas, & per commemorata cucurbitae appositionem in hipposcondrijs supra hepar, si è nare dextera fluxerit sanguis, supra lienem, si è sinistra, ac tandem per eiusdem in occipitio adiectionem. Quibus peractis intercipientia collo, fronti, ac temporibus obduci poterunt frigida, & sicca, vim adstringentem, & emplasticam obtinentia, veluti foret succus lactucae, portulacae, plantaginis, solani, rosarum, oxalidis, vel etiam aquae cum portione trociscorum terrae lemniae sigillatae, & alia id genus remedia, quorum magna est, ac notissima sylua. Et circa nares apponere proderit celebre Galeni remedium, quod recipit aloem, ac thus cum oui albumine subactum, & pilis leporinis exceptum. Quod si haec omnia non fuerint satis, licebit accedere ad stupefacientia quoque, & vel duo grana laudani superius commemorati porrigere, vel semidrachmam thetriacae nouellae, aut Phylonij romani, quia cum omnis immoderata euacuatio naturam valde prosterнат, tum id praesertim facit quae sanguinis talis est, quippe sanguis vitae vinculum est, & spirituum seminarium,

rium, quibus euanescentibus omnis perit aura vitalis. Quo fit iuxta præclaram Hippocratis in libro de humana natura animaduersionem, vt in excedentibus purgationibus vltra omnem modum prouectis vltimus succus ex aluo egrediens fit sanguis, quia hunc natura tamquam proprium thesaurum cohibet quoad potest, & firmiter retinet. Verum tamen haud medicus debet magna quacumque sanguinis profusione apparente deterri, & eam quasi magnum allaturam detrimentum vereri, quoniam multa in humano corpore continetur sanguinis copia, & copiosa valdè eiusdem euacuatio commodè solet perferri, nec multitudine sunt excretiones dimetiendæ, vt docet Hippocrates in primo aphorismorum, sed duabus illis ab eo inductis notis, excretorum conuenientia, & ægri tolerantia. Quin imo hoc habet proprium hæc sanguinis per nares excretio, vt non debeat esse pauca, si debeat esse fructuosa. Quod his verbis declarauit Hippocrates in primo Epidemiorum, Erant febrium ardentium pathemata hæc, quibus & copiose per nares profusus est sanguis, hi ob id maximè seruati sunt, nullumque noui, si sanguis benè erupisset, hoc in statu mortuum. In Philisco si quidem, & Epaminonte, & Sileno tertio, & quarto die parum è naribus stillauit sanguis, & obierunt. Ex qua Hippocratis oratione apparet non modo largam sanguinis è naribus eruptionem esse poriore parca, sed esse etiam utilissimam ad sanandas febres arduas, quarum maximè proprium esse Galenus dixit in commentario, vt magna ex parte per hanc euacuationem iudicentur. Mirari ideo subit Fernelium in secundo Methodi af-

firmantem hanc sanguinis eruptionem in synochis febribus conferre plurimum, in ardentibus autem negantem, & ad negationem eo nomine inductum, quod non propriam morbi essentiam, & radicem euellat, in vitioso sanguine constitutam, qui non nisi postremus elabitur post utilioris effusionem; vt ad illius educationem necessaria sit magna profusio, & immoderatio, quæ summam virium dissolutionem habet adiunctam nusquam optandam. Non potest hoc Fernelij placitum placere, quia primo repugnat doctrinæ Hippocraticæ, & Galenicæ, secundum quam ostendimus hæmorrhagiam maximum esse, & frequentissimum ardentium febrium remedium, quod ex quarto etiam de victu acutorum colligitur, secundo quia videtur sibi met ipsi repugnare, dum facit prius utiliore sanguinem euacuari è venis, mox vitiosum, cum in tertio capite eiusdem libri Auicennam impugnans statuerit promiscuè quicquid in sanguine boni, malie continetur vacuari phlebotomia ob omnimodam miscellam humorum in venis contentorum, quam etiam raro in crisis fatetur dissolui, demum quia pertimescit largam sanguinis profusionem criticè factam, quasi necessarium virium dispendium graue inducturam, cum tamen Hippocrates docnerit non ad multitudinem excretionum esse respiciendum, sed ad excretorum congruentiam, & ægrotorum tolerantiam, sic innuens cum copiosa excretionem critica commodam tolerantiam esse iure suo coniunctam. Quæ immoderatio est sanguinis profusio, non est benè critica, quia hanc natura facta totius naturalis æconomix domina regit arbitratu suo, & ad

ad salutem ægrotantis dirigit, recte que disponit, cum est immodica, & cum tanto virium lapsu, vocari debet verius symptomatica, & proponitur à Galeno in illo 12. Methodi tamquam symptoma per accidens curationis immutatum consideranda, quia contingit aliquando fieri per nares tantam sanguinis profusionem, ut omnem modum excedat, non imperante, sed irritata natura, & loco emolumenti detrimentum afferat, ut solet etiam de sanguine per hæmorrhoidas fluente contingere, Vnde Hippocrates in primo Epidemiorum modum dignoscendi ægritudines docens, & casus ægris contingentes recensens hæc duo coniunxit, sanguinis eruptiones, hæmorrhoides, in cuius loci commentario hæc inquit Galenus. Quod autem in fine capitis dixit, patet omnibus, nempe sanguinis eruptiones, & hæmorrhoides quomodo auxiliari quidem nata sunt, ita & læsionem afferre ut didicimus. At de sanguinis profusione satis, nunc ad alui fluxum transeamus. Quem quidem negare non possumus sæpe salubrem esse, multorumque malorum depulsores dum prauorum humorum colluuiem moderatè deducit, ut docet Galenus in tertio de crisi, & apud Hippocratem legimus in Epidemijs multos à morbis alui deiectione liberatos, & extat præsertim in primo Epidemiorum eius testimonium, quo affirmat in pestilenti statu quattuor maximè signis fuisse ægros seruatos, vel per sanguinis e naribus eruptionem, vel per vrinæ concoctæ copiam, vel per ventris tempestiuam deiectionem, biliosam, vel per dysenteriam. In quo ultimo casu morbus fuit morbi medela iuxta sententiam in libro de

locis in homine. At non omnis alui deiectio salubris est, & exoptanda, quia multæ sunt nocentes, & auersandæ, ut legimus in Prognosticis, & in coacis prænotionibus, ubi frequentes, & multæ, frequentes, & paucae deiectiones vocantur maleficæ, quia primæ deliquium animi, & virium exolutionem inuehunt, secundæ vigiliarum molestiam inferunt. Quinimo cum illa fieri soleat deiectionis diuisio, ut aut pauca sit, & frequens, aut multa, & rara, aut pauca, & rara, aut multa, & frequens, secunda sola approbatur, in qua multum, sed raro excernitur, quia hæc ratione multitudinis corpus euacuat, ratione raritatis vires non debilitat, nec infortuniam facit, reliquæ omnes parè optandæ, quia malum saltem significant, & omnibus deterrior est vltima, quæ multam habet, & frequentem euacuationem adiunctam. nam cum nullam immoderatam, vel alterationem, vel repletionem, vel inanitionem, vel qualemcumque mutationem commodè perferrat natura omne semper nimium hostiliter auersata, & omnis moderationis amantissima ex Hippocratis decteto in secundo Aphorismorum: tum hoc facere minus commodè potest cum non solum magna sit excretio, sed per plures, & proximas vices repetita, ut nec mora sit ægrotanti, nec requies, sed perennis quædam molestia, dum noua semper deiectio excipit anteaactam. Quo in casu quis non videt immodicam vrgerè euacuationem, quæ tamquam symptoma habens rationem causæ lædentis habet facultatem indicandi? Fluxus igitur alui ut immodicus, & factus sine congruentia excreti, ac tolerantia, excernentis indicat sui cohibitionem,

ut

*euacuationes peccat
ne utiles in per
ilari affectu*

vt docuit Hippocrates in illo Aphorismo quarti, in Medicationibus talia educere è corpore, qualia sponte prodeunt, vtile, quæ verò contrario modo prodeunt, cohibere oportet. In quo aphorismo tres obferuare licet euacuationes insinuat, naturalem, artificialem, symptomaticam, vt prima sit optima, si sit critica, & sit talis, si educat humores peccantes, & habeat excernentis tolerantiam adiunctam, secunda sit pariter bona, si sit primæ æmula, tertia sit absolutè mala, quia sit duabus primis dissimilanea nec peccantium humorum excretiua, nec tolerantia compos, Vnde quantum primæ duæ fouendæ sunt, tantum vltima compescenda. Ac nonnumquam illud cōtingit, vt euacuatio incipiat naturalis, & euadat symptomatica, & hoc modo fit vt critica sit immodica, quatenus videlicet facta symptomatica. Quæ cum sit naturæ infesta debet arte cohiberi. In hunc finem conueniunt remedia paregorica, & contemperantia, conueniunt roborantia, conueniunt diuerterentia. Primi generis fuerint iuscula pulli alterata sonco, cichoreo, Acetosa, plantagine, seminibus melonum, & serum caprillū cum succo cichorei chalibeatum, Ad secundum genus pertinebunt inunctiones ventriculi ex oleo Mastichino, in quo absinthium sit incoctum, & fortis ex eodem absinthio, & rosis, & vnguenta confecta ex oleis stomachicis, & speciebus aromatici rosati, & diarrhodonis Abbatis, & modico vino maluatico, & ceratum dictum mastichinum, & si ventriculus æstum aliquem præsetulerit, adiungendæ inunctiones, & fomenta refrigeratoria, vt monet Galenus in octauo Methodi, vbi proponit ceratum

melinum, & ex ananthe, hypocistide, & balaustijs, & palmularum carne confectum. Huc pertinent linitiones circa iecur ex vnguento sandalino cum succo cichorei dissoluto, aut ex refrigerante Galeni ad mitigandum visceris ardorē si fuerit, & exiccantes sacculi ad fricandum caput pro auersione catharri, si fuerit cui capiti post capillorū de ratione poterit etiam applicari Emplastrum blandè attractorium. Roborabunt etiam intestina Clysteres detergentes, aliqua adstrictione præditi, & vim refrigeratorem nacti. Ad vltimum genus remediorum diuersionem respicientium pertinent frictiones artuum, & lotiones ex decocto adstringente, cucurbitulæ hypocondrijs affixæ, sed hæc duo potissimum remedia validam in hoc vim habentia, vomitio, & vrinæ irritatio. nam vomitus mixtæ affert vtilitatem in alui fluxu fluentes materias in partem contrariam deducendo, vt ideo dixerit celsus in primo libro, ventrem vomitus solutum comprimit, compressum soluit, comprimit is vomitus qui statim post cibum est, soluit is, qui tardè superuenit. Ex vrinis autem copiosis maximum percipi fructum est auctor Galenus in commentario vltimi aphorismi quartæ particulæ, vbi asserit inde colligi alui fluentis, & siccæ remedia. nam cum Hippocrates in aphorismo dixisset mictionem noctu plurimam contingentem significare paruam deiectionem, explicabat in commentario Galenus, ventris humore distributo minorem fieri alui deiectionem, & humidior aluo existente urinam fieri pauciorē, quia si per vnam viam humor excernitur, paucus remanet per alteram excernendus. Inde consulit vt in humidior aluo par-

pareus potus exhibeatur, & illi via ad vesicam paretur, veluti e contra in sicciore vt copiosior potus præbeatur, & distributio pro virili inhibeatur. Erit ergo optimum vrinam prouocare, & diureticis reddere vberiore. Quod si fluor non concedat, uon solum licebit vti medicamento ex succo, vel carne cotoneorum à Galeno in octauo Methodi proposito, sed etiam, si febrilis calor non impediatur, bolo ex semidrachma theriacæ recentis ad sistendas fluxiones aptæ cum conserua rosarum veteri. Et urgente necessitate quocumque modo alius firmanda, quia ex effrænata excretionem certa mors imminet, ex adaucta febre non incerta mali corrigendi spes superest, vt necessarium aliquando sit maiorem habere symptomatum, quàm febris rationem, licet hæc semper habeat essentialē, illa accidentariam tantum, & quasi muruò acceptam naniscantur indicationem.

Conclusio operis cum appendice de Præfagijs febrium putridarum.

CAPVT Vltimum.



VÆ hæcenus dicta sūt, possunt omnibus hanc veritatem patefacere, non multiplicari indicationum numerum ex hac, quam sibi interdum symptomata vendicant, indicandi ratione, quandoquidem hæc non indicant nisi sub forma causæ vel augmentis morbi, vel lædentis vires, vt cum Galeno in duodecimo Methodi ostendimus, & indicatio causalis præseruatoria est cauendæ læsioni futura

intenta. Remanent ergo tres illæ solæ in febribus putridis attendendæ indicationes, vitalis, curatoria, præseruatoria, vt hic habeat locū celebre Aristotelis dictum in primo celi, ipsa tria omnia sunt, & ipsum ter omniuaque. Quibus singulis explicandis indicationibus cū hucusque operam scribendo dedimus, propositæ institutioni, quantum virium tulit nostrarum tenuitas, satisfecisse videri possimus. non enim propositum nostrum fuit vniuersum febrium putridarum argumentum ad huius tractationis redigere curriculum, quod vel ex eo colligi potest, quod nihil de signis vel dignosticis, vel prognosticis locuti sumus, quia non viam docere volumus cognoscendarum febriū, vel præcognoscendorum euentuum febres consecrantium, sed, supposita febrium agnitione, Methodum Galenicam colligendarum indicationum, atque adeo, cum licet, adimplendarum efficere clariorem, vt hæc pars practicæ rationem, quàm Theoricæ videatur habere maiore, & si quæ ad hanc scriptimus attentionia, in solum finem practicum fuerunt conscripta. Qui finis practicus habet vltimum illum artis finem, de quo nulla consultatio est, & qui est omnium consultationum meta, vt docet Philosophus in tertio æthicorum, & Galenus in libro de constitutione Artis, nempe sanitatem, quem sanitatis finem an consecuturi simus nec ne, pertinet ad facultatem prognosticam determinare. De qua non erit inutile aliquid breuiter attingere, & aliqua putridarum febrium prognostica signa (quando quidem in ipsorum incidimus mentionem) ad absolutiorem operis formam explanare, quamquam prognos post collectionem

tionem indicationum suum habeat locum ante factum remediorum appulsum. nam animaduertendum prius est, num deductis indicationibus liceat satis, vel nō liceat facere. Verum nos insistentes Galenicis in Methodo vestigijs eodem nimirū tempore & indicationes elicuimus, & congruentia ipsis præsidia subiecinus, communiori quadam ratione communia etiam de prognostico dicta nunc subiecturi. Cuius prognostici vsum maximè ab Hippocrate legimus commendatum in opere huic materiae dicato; quia qui præcognoscit, & ægris prædicat præsentia, præterita, & futura, creditur res eorum optimè intelligere, & sibi maximam apud eos fidem potest conciliare, & ex præsentibus affectibus futuros præuidens effectus curationem optimè instituit, alijsq; prædicens immunem se ab omni culpa, ab omni calumnia facit. At vis tota prædicendi in quibuscumque morbis in eo residet, vt docet in libro de constitutione Artis Galenus, vt inter se conferat Medicus, accurateque exploret Morbum, & Naturam, quasi duos Athleras in Agonem deductos, mutuumq; certamen obeuntes, & si morbum validiorem iudicet, præfagiat mortem, si naturam; expectet vitam. Quam doctrinam in libris quoque de Crisibus abundè traditam in primo ad Glauconem repetens idem Galenus eam dicebat vno quidem verbo explicari, ad vsum verò esse maximā, & difficultate refertam, quippe morbi, & virtutis comparisonem requiri, cum morbi victoriam sequatur mors, virtutis victoriam comitetur vita; sed ad hanc victoriam collimandam, & prænoscentiam opus esse cuiusque quantitatem habere comper tam, scitu quidem difficillimam,

scripto non exarabilem. nam cum infinita sit hominum turba, & suacuiusque sit in morbo, sit in virtute proprietas, qui hanc speret oratione posse complecti? In hac tanta corporum varietate fluctuat, & quasi cæcutiens oberrat humana imbecillitas, illius iudicij, quod difficile iure optimo vocauit Hippocrates, lumine dirigenda. Ac veluti apud Iurisperitos non potest lex vniuersalibus addicta omnes occurrentium casuum modos comprehendere, suisque decretis determinare, sed multos relinquit æquo boni viri iudicio decernendos, vt legimus in quinto æthicorum, sic apud Medicos non potest Ars omnes ægrotorum proprietates colligere, sed eas cogitur Artificis solertiæ colligendas committere.

Pensandus ergo vigor morbi, vt diximus, pensandus vigor naturæ ad promendum futuri euentus iudicium, est naturæ quidem robur ex proprijs illius actionibus comprehendendum, à facultate vitali, naturali, animali prodeuntibus, & in primis ex pulsu, qui facultatis vitalis est opus, morbi magnitudo e suis symptomatibus colligenda, sed quatenus alterum altero præualeat, morbus nempe naturæ, vel natura morbo, ex coctione, cruditative innotescet, vtraque ex proprijs excrementis agnoscenda. Verum, vt à communissima morborum forma ad peculiarem febrium putridatum, de quibus est sermo institutus, accedamus, illud primo dicere lubet pulchram methodum Communis præfagij de his febribus faciendi reliquisse nobis in quarto Aphorismorum Hippocratem, dum febres non intermittentes, ac tertia quaq; die inualescentes vocauit magis periculosas, sed quocunq; modo intermittentes nominauit periculo vacuas

nam de primis loquens, quæ non intermittunt, ac tertio quoque die inualescunt, non vocauit absolutè periculosas, sed magis periculosas, quasi considerandum relinqueret omnes quidem continuas esse periculo obnoxias, tamquam pendentes à putredine humorum intra vasa, & nullum relinquentes capiendæ quævis tempus ob perseverantem in venis putredinosum calorem visceribus præcipuis molestum, sed inter continuas esse peiores, & ad inferendam perniciem aptiores illas, quæ tertia quaque die inualescunt, tamquam pendentes à bilioso humore, super alios humores ferociente, & grauiora symptomata inferente, ignis omnia deuastantis æmulo, pituitosos, ac frigidos humores magnis excessibus in lædenda humana natura vincente, quam rem perlepidè expressit Plato in nono de Republica biliosum humorem fucum aculeatum nuncupans, pituitosum vero fucum aculeo destitutum. Cuius quidem biliosi humoris vel intra corpus morantis, vel extra manantis effraznem impetum, & molestarum plenum insultum plenè idè rerum Medicarum vel ipso Galeni testimonio peritissimus auctor in Timæo descripsit, & Hipp. contemporaneus, & amicus Democritus, pari Medicinæ studio affectus, pulchro dicterio, quo noxiū humani corporis exitiosumq; incolam appellauit bilem, delineauit. Vnde etiam factum est, vt multi veterum crediderint febres omnes à bile sola gigni, & esse huius dumtaxat humoris germina, quorum opinionem in secundo de differentiis febrium Galenus redarguit. In censu quidem illo febrium memorabili, quem legimus apud Hippocratem in sexto Epidemiorum, memorantem alias manui

mordaces, alias mites, alias nō mordaces quidem, sed insurgentes, alias acutas quidem, sed ab ipsa manu deuictas, alias confestim perurentes, alias semper debiles, siccas, alias salvas, alias pemphidogeas, aspectu graues, alias ad manum humidas, alias impensè rubras, alias valdè pallidas, alias liuidas, & alias istiusmodi, quæ quidem peiores sunt, & lethaliiores febres, illæ omnes biliosi apparent humoris soboles, veluti ex Galeni constat commentario, vt verissimum quidem sit Hippocraticum in primo Epidemico dictum in febre continua morbos acutissimos esse, & maximos, & grauissimos, & maximè lætales, sed in ea potissimū febre continua, quæ à bilis putredine pendet, ideoque suas alternis diebus exacerbationes, successiuasque accretiones præfert. Continuarum ergo febrium magis periculosæ sunt istæ, quæ tertij cuiusque diei exacerbationem experiuntur, quales sunt non modo vocati hæmitritei, sed tertianæ etiam continuæ, & caufonides, siue ardentes, quæ igneum planè ardorem, & sitim omni opinione maiorem inuehentes præter alia sæuissima symptomata non tolerandum facessunt miseris agris negotium. Quale certè non afferunt vel ipsæ febres synochæ, siue continentes, quoniam hæ proueniunt, dum sunt putridæ, à putredine placidioris humoris, nempe sanguinis, qui tanto est bile in furendo, sæuiendoque inferior, quanto aer est igne imbecillior, cum quibus elementis hos duos humores Hippocrates, veluti cum aqua pituitam, cum terra melancolicam, censuit in libro de humana natura conferendos. Huc accedit quòd in febribus biliosis afficiuntur magis ea viscera, quæ biliosiorum continent sanguinem, qualia

præ

præ Cæteris sunt pulmo, atque cor, at in sanguineis afficiuntur illa magis, vbi magis sanguineus residet succus, quale constat esse iecur. Quæ omnia augent periculum, & magis ancipitem morbi reddunt euentum. Hæc igitur est febrium magis periculosarum indoles, vt sint continuæ, & à bile oriundæ, quod innotescit ex inualeſcentia alternis diebus facta, solius bilis propria. Sed transiens Hippocrætes ad exponendas febres magis securas proponit eas, quæ quocunque modo intermittunt, hanc intermiſſionis rationem securitatis cõstituens cardinem, nullam accessionis vel ſingulis, vel alternis, vel alijs diebus factæ faciens mentionem, quia ſola intermiſſio ſufficit ad præſtandam tutelam, qualiscunque fuerit accessionis ratio, & ideo dicit quocunque modo intermiſerit, hoc eſt ſiue per quotidianam, ſiue per tertianam, ſiue per quartanam, ſiue per aliam circuitionem (nouimus enim & quintanos, & ſeptimanos, & nonanos circuitus in primo Epidemico ab Hippocrate poſitos) nulla enim eſt circuitio tam valida ad lædendum, quin validior ſit intermiſſio ad reſiſtendum, dum natura conſeruando indiuiduo intenta vires tempore quietis recolligit ad nouam inuaſionem ſuſtinentiam, inſtar Ducis in Arce confidentis, qui ſi oppugnetur aſſiduè, tandem ſuccumbit, ſed ſi hoſtium impetum videat interdum ceſſantem, vim reſiſtendi denuo ſuſcitat, ſequè aptum oſtendit ad oppugnationem omnem irritam faciendam. Veluti ergo omnis continua febris, & præcipuè tertianis comitata exacerbationibus periculosa eſt, ita omnis intermiſſens nulla habita ratione dierum procul eſt à periculo, ſiue per plures dies, vt in Quintanis,

ſeptimanis, & nonanis, ſiue per duos, vt in Quartanis, ſiue per vñ, vt in tertianis, ſiue per partem dici, vt in quotidianis ſit facta intermiſſio. Quæ quidem cum poſſit eſſe duplex, vel inſignis febris diminutio, ſiue remiſſio, quam Galenus *ἰνδοσιν* vocat, vel eiufdem deſinentia in infebricitationem, quam *ἀνρυεξία* nominat, vt patet in commentario tertio primi Epidemici, hanc ſecundam corpus ægri tunc temporis immune reddentem ab Hippocrate in Aphoriſmo induci animaduertit exponens Galenus, hanc etiam rationem adducens, cur febres hæc præditæ intermiſſione vacent periculo, quia videlicet nec ex inflammatione aliqua ortum trahunt, nec ex maligna humorum putredine, quarum vtraque cauſa tollit quietem febre vacantem. nam ſi inflammatione febre excitauerit, hæc non poteſt durante inflammatione deſinere, quia manente cauſa non ceſſat effectus, vt patet in febribus à pleuritide, vel Angina, vel peripneumonia pendentibus, & idem contingit ſi maligna fuerit humorum putredo. hæc enim eſt ea quæ ſit in vaſis, & in eis habet ſuam mineram, & focum, vt calor præternaturalis humorum putrefactorius, qui dicitur calor ambientis, reſideat in tunicis vaſorum, vbi reſident humores, & ſpiritus, & faciat malignam putredinem tamquam in loco nobili, & pro animalis ſalute valdè momentaneo factam, imo factam in loco ad conſeruandos humores formato, nec ad externas partes tranſmitti aptam, quia putreſcens materia multa eſt, & craſſa, & naturæ rebellis, & intemperies putredinosa ſuam habet in vaſis impreſſionem. Malignus ergo ille calor venarum, qui vbi deberet conſeruare, ſuccos cor-

rumpit, malignus ille, qui ubi statim deberet decedere, moram trahit, malignus ille, qui ubi vitam deberet fouere, clam destruit. Hæc est communior quædam malignitas à Galeno in febribus continuis constituta, ab eo malignitatis genere dissita, quod supra considerauimus cum pestilenti aliquo gradu coniunctum, Quæ communius dicta malignitas cōtinuitatem febribus impertit à viscerum etiam inflammatione impertitam. Quibus malis condicionibus vel malignæ putredinis, vel inflammationis quia carent febres intermittentes à sola putredine extra venas, & in externis partibus facta prognatæ, ideo euaserunt à periculo immunes, cū singulis accessionibus absumantur particulares materiæ putrescentes, & locum capiendæ quietis viribus conflictatis relinquunt, eo melius restaurandis, quo diutius fuerint quiescentes. Ex illarum igitur conditionum absentia oritur in intermittentibus securitas, ex quarum præsentia oriebatur in continuis periculosa calamitas, nec illam securitatem infringit Hippocratis in primo Epidemiorum auctoritas, vocantis quintanam febrem omnium pessimam, ante tabem, & cū tabe ius perimendi habentem, quâ tamen constat longissimum habere interquiescendi interuallum: non officit hoc, inquam, insinuatæ intermittentium securitati, quia non loquitur ibi Hippocrates de simplici Quintanæ aduentu, sed de eius ad extenuatos homines, vel iàm tabe etiam infectos accessu, ut si ad quartanarium diu, multumque afflictū quintana accederet ex residuo melancholici humoris suborta, foret nimirum exitialis, quia naturam offenderet iàm prostratam, & noui

insultum morbi sustinere nequeunt, quem quidem interpretationis modum solertissimo etiam Vallesio video placuisse, ut febris huius discrimen nō ex propria ipsius Idea proueniat, sed ex modo potius inuadendi cum magna virium prostratione coniuncto. nam Quintana succedens morbis corporum maciem, & infirmitatem magnam inducentibus qui potest non esse pernicioſa? quia licet sit intermittens, & longum habeat quiescendi spatium non habet tamen nec tantam intermissionem, nec tantam requiem, ut vires iàm fractas non pergat magis infringere, & in extremū exitium adigere. At septimana, & nonana accessio ob diurnam quietis vsuram, & ob exiguam humoris actiuitatem tutior est, & ab inferenda naturæ violentia remotior. Tuta etiam foret Quintana, si sola esset, & homini sano accederet robur virium obtinenti, nam si quartana securissima existit, ut ait Hippocrates, & confirmat Galenus, cur non segura quintana, quæ longiorem habet infebrecitationis morâ, leuiorem putrescentis humoris actiuitatem? sed quia hæc interdum excipit præcedentem febrem vel Quartanam, vel tertianam, unde vires agri iàm collapsæ fatiscunt, in tanta virtutis imbecillitate non potest non esse periculosa, & discriminis plena, quia afficit quendâ quasi senem, si non annorum numero, saltem temperamēto ob insignem inductam in corpore siccitatem, & innati caloris inopiam, unde suam deducebat senectutis animaduersionem Philippus à Galeno pluries commemoratam, ut missum faciam lepidum Aristotelis dictū in Quinto de generatione Animalium, omnem senectutem esse morbum naturalem,

ralem, omnem morbum esse senectutem aduentitiam. At senibus nullus morbus est ob virium infirmitatem tutus, quantumcumque sit levis, sed omnis ferè languescen-tem calorem euertit, cuius ratio- nem rei affert in libro de vita, & morte Philosophus ab exemplo de- ductam exigui igniculi, quem levis quæcumque aura afflando extin- guit. Hic ergo euentus non ex par- te morbi læthalis contingit, sed ex parte subiecti imbecilli morbum, qui suapte nutu securus foret, susti- nere nequeuntis, quò respiciens Galenus in commentatio trigésimi Quarti aphorismi secundæ particu- læ, in quo decernit Hippocrates mi- nus in morbis periclitari, qui eos perpetiuntur suæ naturæ, aut æta- ti, aut consuetudini, aut anni tem- poris conformes, dubitabat de gra- nedinibus, & raucedinibus, quas idem auctor in valde senibus dixe- rat paullo prius non concoqui, cum sint morbi tamen senili ætati con- gruenter, & soluebat dubitationē dupliciter, primo quòd non idem est non concoqui, & periculosum esse, deinde quòd non simpliciter senes dixit, sed cum additione val- de. omnia enim esse in his periculo- sa ob virium imbecillitatem. Illud etiam adiiciendum, esse quasdam intermittentes, quæ iuuenilem e- tiam ætatem trahere possint ad mortem, quales sunt quæ viscerum tumoribus, & schirris, & cardial- gia, vel alijs id genus symptomati- bus solent esse perniciosæ, sed hæc pernicies non ex earum pendet in- dole, sed ex adiunctorum affectuū appendice. Verum ad confirman- dam Hippocratici dicti de intermit- tentium febrium securitate verita- tem satis, superque est eas vt pluri- mum, & ferè semper omni vacare

periculo, & raro admodum, ratio- neq; solum accidentaria euadere læthales, vel quatenus alios habent affectus adiunctos, vel quatenus æ- gros affligunt viribus destitutos, quarum condicionum prima ob pas- sionis validitatem interimit, secun- da ob patientis debilitatem. De continuis etiam illud non est omi- tendum, qualescumque illæ fue- rint, habere quidem omnes pericu- lum mortis annexū, sed nullam esse ferè tam grauem, vt certam mortē habeat consequentem, quia febres continuæ ad acutos morbos referun- tur, At de morbis Acutis celeberrimè habemus in secundo libro aphorismum, non omnino certas esse præ- dictiones vel salutis, vel mortis, cuius dicti rationem adducturus in commentario Galenus animaduer- tit primo vsurpatam fuisse vocem illam non omnino, quasi non in omnibus certitudo insit, & pauca ex multis prædictiones veniant ex- cipiendæ, cum aliquando, quam- uis raro, contingat Medicum etiam optimum aberrare, idque fieri ob duplicem causam partim ob subitā in crisi mutationem, quæ naturam humorum sequitur morbificorum, partim ob humoris noxiæ ex vno lo- co ad alterum factam interdum translationem inopinatam, quæ quia non contingunt in morbis lon- gis, qui crassos frigidosque sequun- tur humores, ideo ipsorum præno- tionibus fidere magis videtur Hip- pocrates, quod non solum affirma- uit Galenus, sed multo ante ipsum obseruauit Celsus, qui in secundo libro fallaces acutorum morborum aspiciens notas coniecturalem artē esse Medicinam decreuit, rationem- que coniecturæ talem esse, vt cum sæpius aliquando responderit, inter- dum tamen fallat nos, nec id cui- tare

tare humanam imbecillitatem in tanta varietate corporum potuisse. Quam materię varietatem confiderans Plato in Epinomide incertā vocauit Medicorum coniecturam, & vix rectę opinionis nomine dignandam, & hinc etiam prodijt pręsensionum distinctio, quā Aristoteles adhibet in libello de diuinatione per somnium, vt alijs quidem verbum, erit, respondeat, ideoque certam habeant veritatē, alijs autem verbum futurum est ideoque inopinatum etiam admittant euentum (hæc duo verba vsurpat Philosophus τὸ μέλλον, καὶ τὸ ἵσόμενον,) quę distinctio si vlla in arte locum, in Medica certē habet maximum, quę morbos iudicat in abdito, vt dixit Hippocrates in libro de arte, maiori ex parte delitescentes, & artificiosa quadam coniectura, quam in primo de locis affectis delineauit Galenus, ad qualemcumque notitiam redigendos. Quod præcipuē inter omnes morbos verum est de acutis, & inter acutos de febribus continuis, ad quæ tamen futurum euentum quantum fieri potest prænosceretur, cum apprimē cōtulerit præter earum Idęā, motum, & magnitudinem, præcipuē morem attendere, vt diximus præcepisse in libris de Crisibus Galenum, ad quem morem videtur redigi celebre Hippocratis in libro prognosticorum præceptum de observatione, num aliquid subsit diuini in morbis, faciendā, vt non solum cognoscamus qualis sit species febris, biliosa, an pituitosa, an melancolica, intermittens, an continua, qualis sit eius magnitudo, num sit intensus, an remissus calor febrilis, qualis motus, num celerem habeat, an tardum progressum, verū illud maximē habeamus

compertum, qualis sit eius mos in infinita proprietate situs, num benignus, an malignus, qui ex subsequentibus accidentibus noscitur, in quibus annumerare oportet coctionis, & cruditatis signa. Mos igitur febrium venit potissimum reuocandus in examen, quia plus hic valet, quā magnitudo, & motus earum, cū debiles, & paruę febres quandoque malignissimę sint, omninoque perniciosę, & alię calidissimę, & feruentēs nil habeant nonnumquam periculosi. Hūc ergo spectans Medicus veritatem in præfagiendo vt plurimum collimabit, & veluti ad prædicandam mortem non parum excitabitur ab apparente in febribus more, qui non vulgarem malignitatem præferat, ita ad salutem pollicendam verget ex contrario more, conspecto, si præsertim habuerit clara coctionis signa in vrinis apparentia, quę in febribus præcipuē sunt conspicienda ex Galeni documento in primo de Crisibus, quibus signis tantum ipse deferebat, vt dixerit in commentario primo sexti Epidemiorum, tantam virtutem signorum ex vrinis in acutis febribus existere, vt & soli ipsi fides sit adhibenda. Quod affirmauit Galenus Hippocratici in primo Epidemiorum dicti memor, coctiones celeritatem iudicij, & securam sanitatem ostendunt, cruda verō, & incocta, & in malos abscessus conuersa aut acris, aut dolore, sicut diurnitatem, aut mortē, aut recidinas significant. Nec mihi quis obiecerit cum signis coctionis, & cum vrinis bonis perire interdum homines in febribus malignis, quia cum Galeno in tertio de Crisibus responderim ex accidentibus consequētibz cognosci has mali moris febres, & inter accidentia præcipua referri coctionis, & cruditatis

tatis signa, nec posse in his febribus subesse vera, germanaque coctionis signa, quæ declarant dominantis naturæ vigorem, & si apparent, vel non sunt veræ coctionis indicia, sed fallacia præferunt specimina, malignitatis aliud extra promentis, aliud intra occultantis propria, vel non diu perseverant, sed cito evanescent, & sola perseverantia signa solidam coctionem ostendunt. nam vrinæ, quæ ad breue temporis intervallum apparent coctæ, tantum abest ut salutem arguant, ut perniciem potius insinuent, quod Hippocratis in Coacis hæc præclara expressit sententia, Quæ ex improviso sine ratione ad breue tempus vrinæ coquantur, prava, atque omnino quicquid præter rationem coctum est in acuto, malum. Quod dixit Hippocrates non quod vlla coctio, quatenus coctio possit esse mala, quæ semper suo pte nutu est bona, & bonum significat, sed quod coctio imperfecta, breuique durans tempore facultatis infirmitatem innuat, humorisque contumaciam. Debent esse coctionis in vrinis signa perfecta in se, perfecta in tempore, perfecta in se, quia alia est coctio inchoata, alia manifesta, alia absoluta, prima solet esse in fine principij moribifici, secunda in augmento, tertia in vigore, in quo morbi tempore solet dari certa salutis significatio, eoque transacto nullus superest amplius mortis metus, ut cumulatè ostendit Galenus in tertio de Crisibus, quia cum iam natura pugnavit, & expugnauit hostilem materiam moribificam, non potest amplius succumbere, dum apparuerunt coctionis completæ completa signa, quæ in tempore etiam debent esse perfecta, ut constantiam, & firmitatem contineant, & naturæ verè dominantis certam victoriam

ostendant, alioquin titubantis calor, repugnantis adhuc materię, seque naturæ dominio subtrahentis argumentum darent; sed si utramque habeant notam, ut perfecta sint in se, perfecta in tempore, perfectam afferunt consecuturæ salutis spem. nam ob nexum mutuum trium facultatum nostrum corpus regentium, cuius supra fecimus mentionem, tamquam nexus facultatum mutuo se labente temporis curriculo, & lædentium, & fouentium, ob hunc, inquam, nexum non potest vis vitalis tantum affici, ut ad mortem tendat, & immunem relinquare vim naturalem, ut integras coctiones obeat. Quamobrem rectè aduertenti nullus apud Hippocratem in libris Epidemiorum apparebit in quolibet pestilenti statu mortuus, qui optimas vrinas, quæ solæ sunt salutaria verè indicia, diu habuerit. Viderit ergo Fernellius, qui in putridis febribus, de quibus noster est sermo, nullo etiã malignitatis pestilentis vestigio comitatis, post vrinas diu cõcoctas vidisse se affirmat interitum consecutum, viderit ipse, & iudicandum Galenicis relinquat, num illa fuerint certa certæ coctionis signa, naturæ victoriam ostendentia, & morbi instantè declinationem vniuersalem, in qua nemo vel moritur, vel moriendi periculo amplius subiicitur, nisi offensionem faciat, & nouum in morbum incurrat, ut plenè docet Galenus in tertio illo de Crisibus. nam quid aliud monstrat vera, constansque coctio, quàm naturam fuisse in certamine cum morbo superiorem, eiusque vim omni morbi conatu euasisse potiorē? Sed superior, & potior pars quomodo potest succumbere, & ni succumbat, quomodo potest mors irreptere, quæ nil aliud est nisi omni-

omnimoda naturæ prostratio? nam facultate vitali fatifcente, & in exitum ruente qui potest naturalis ita vigere, vt absolutam diu perficiat coctionem, si facultas naturalis, licet habeat in partibus vim insitam, nec aliunde influentem, indiget tamen, ad sui conseruationem, vt docet Galenus in primo de locis affectis, alimonia à venis importata, contemperatione ab arterijs impertita? Sit ergo in coctione magnum ad salutem momentum, imo, si absoluta sit coctio, si vera, si constans, sit certum salutis nullis morbi insidijs irritum faciendum argumentum. Vnde iure clamat Hippocrates in fine prognosticorum, Nec verò latere quemquam debet, sed certo tenendum est, tecmiria, & alia signa quouis anno, & quouis tempore mala, malum, bona bonum denuntiare, in cuius sententiæ explanatione annotat Galenus in hoc symptomata à signis dissidere, quòd symptomata & ex malis quodammodo fiunt bona, & ex bonis mala, signa numquàm in contrariam naturam vertuntur, sed maioris, minorisve mali, aut boni testimonia sunt, vt vrinarum bona signa numquam mala euadant, nec mala bona, & ideo Græci signa simul, ac tecmiria vocant, ex quibus salus ægri, aut pernicies certa est, quæ vno nomine sint facultatum, corpus gubernantium testimonia, quam imbecillæ sint, aut robuste, inter quæ etiam cruditatis, coctionisque signa continentur. Si fuerint ergo certa in vrinis coctionis signa, certam expectabimus salutem, ac tunc adeo certiore, cum ab accedente pulsuum testimonio nacta fidem fuerit maiorem. nam Galenus non ex vrinis solum, sed ex pulsibus colligenda coctionis signa in nono, & vndecimo Methodi propo-

nit, quæ in pulsibus apparent, cum maior agnoscitur in diastole, quam sistole velocitas, non in sistole, quam in diastole vt in principio febrium, materia existente cruda, ideoque multas fumidas fuligines depromente exclusionis per sistolem indigas, at inualefcente calore, materiamque iam domitam accedente instat maior refrigerationis alliciendæ indigentia, vnde maior fit diastolis celeritas ex prælara Galeni animaduersione in tertio de præfagio ex pulsibus. Sic ex notis coctionis, & cruditatis salutem, vel mortem excerpere possumus, & ex eisdem etiam, febrium breuitatem, vel longitudinem colligere valemus. nam vigente coctione, breuiora fiunt omnia, mala, cruditate diuturniora. Vnde Galenus in commeterio tertio Prognosticorum tribus de causis febres omnes fieri longas asseruit, vel ob aliquam particulam male affectam, & difficulter curabilem, vel ob humores crudos, crassos, & incoctos, vel ob errorem aliquem commissum, vt ex tribus contrarijs causis deducere earum breuitatem possumus, ex bona viscerum dispositione, ex humorum tenuitate, & coctione, ex recta victus ratione seruata. Sed hanc vniuersam materiam longitudinis, & breuitatis in febribus, omnibusque morbis optimè complexus est Hippocrates illo primi libri aphorismo, Accessiones, & constitutiones morbi indicabunt, & anni tempora, & circuitum successiuæ incrementa, siue quotidie, siue alternis diebus, siue per maiora interualla fiant, & ex mox apparentibus sumuntur indicia, veluti in pleuritide si à principio statim sputum appareat, morbum breuiat, si mox appareat, producit. Et vrinæ, & alia excrementa, & sudores, & alia apparentia

diuina inter symptomata et signum est. malum semper malum significat, si bonum. Symptomatum autem potest bonum, aliquando fieri, si in, malum.

his signa exquiri. Aliqua sol.

rentia vel bonam morborum crissim, vel malam, vel breues, aut longos fore morbos ostendunt. Huius quidem Aphorismi ambitus, quod querimus cumulatè explanat. nam vniuersam morborum catastasim, per quam eorum vigorem formam que omnem nouimus ad cognoscenda eorundem vniuersalia tempora nos ducentem, ex his quattuor nobis rimandam penetrandamq; proponit, ex idea affligentis morbi, ex anni tempore, ex successiuis circuituum incrementis, ex mox apparentibus signis. Ex idea quidem morbi, quoniam auditò nomine Quartanæ, accessiones percipimus quarto quoq; die, tertianæ tertio quoq; quotidianæ singulo quoq; sibi mutuo responsuras, percipimus proprias cuiusque febris constitutiones ab inuicem distinctas, ex anni tempore, quoniam æstiuæ febres sunt, vt plurimum biliosæ, & breues, hiemales econtra pituitosæ, & longæ, & sub anni tempore intelligimus etiã temperamentum ægri, ætatem, vitæ formam, consuetudinem, incolarum, regionem, aeris dispositionem, quæ omnia cum anni tempore morbosas explanant constitutiones, accessiõnumque formas, ex successiuis circuituum incrementis, quoniam ex percepto accessiõnum incremento crescentis morbi, & aduentantis vigoris accessum percipimus, sed secundæ accessiõnis ad primam incrementum in his tribus conspicitur iuxta Galeni animaduersionem, in hora accessiõnis, in longitudine, in magnitudine, vt hora anticipet, longitudo extendatur, magnitudo duplicetur. quæ tres condiciones si coeant celerem morbi cursum ad culmen properantem omnibus animi appellentibus insinuent. Ex mox apparentibus signis, quoniam

cum hæc sint triplicia, vel signa salutis, aut mortis, vel coctionis, aut cruditatis, vel decretoria, ad quæ accedunt nuncupata affectiõnis significatiua, & assidentia, reliquorum omissa. impræsentiarum cura, ad signa coctionis mentem conuertendo constitutionem morbi animaduertimus, eiusq; longum, vel breuem progressum, nam cito accedentia coctionis signa breuem fore morbum denunciant, cunctantia, seroque venientia longitudinem ostendunt, siue ad sputa pertineant, vt in affectibus thoracis, siue ad vrinas, siue ad alui excrementa, siue ad sudores, siue ad alias quascumque excretiones. nam hæc omnia signa si coctionem prætulerint, citoque apparuerint, bonam morborum iudicationem, breuemque constitutionem promittunt, at contraria ratione & primam malam, & secundam longam designant. nam coctiones, vt supra cum Hippocrate diximus, duo præstant, morbi securitatem, & iudicii celeritatem. Hæc est ergo breuissima Methodus Hippocratica colligendæ in morbis vel longitudinis, vel breuitatis vnico aphorismo comprehensa, à Galeno non solum in Aphorismi commentario, sed in libro etiam de Crisibus abundè explanata, vt respiciamus ideam morbi, vt anni tempus, vt successiua circuituum incrementa, vt mox apparentia signa, & hac methodo ducti dicamus tertianam æstiuo tempore cum accessiõnibus assidue incrementibus, cum signis coctionis in vrinis cito apparentibus fore non solum alternis diebus diuexaturam, sed cito etiam desituram, at quartanam hiemali tempore cum accessiõnibus non incrementibus, cum coctionis signis non apparentibus fore non solum quarto quoq;


die afflicturam, sed in diuturnum etiam tempus sua mala protracturam. Remanet in præfagijs tertium problema examinandum, quod pertinet ad morbi terminandi modum, possumus enim ac debemus tria præscire, num salubris, vel lætalis, num brevis, vel longus, num crisi, vel alia ratione terminandus. non enim vnico modo terminantur morbi siue ad salutem, siue ad mortem, vt præclare docet Galenus in tertio de Crisibus, qui tres modos salutaris finis proponit, primum factum per crism perfectam magna aliqua euacuatione comitatam, secundum per crism imperfectam morbi potius diminuti, quam aboliti auctricem, tertium per solutionem lento gradu, paullatineque inductam sine euacuationis accessu, & his tres alios modos læthales adiungit, primum quidem cum agitatione, & cum infusta vel excretionem, vel decumbentia factum ad mortem per malam crism perfectam, secundum cum perturbatione per imperfectam crism in solum mali incrementum desinentem, tertium paullatine, & procul ab omni agitatione longo temporis progressu vitæ dissolutiuum, marasmi nomine insigniendum, quibus adijcit quartum modum repentinae mutationis ad deterius sine magis excretionem, aut decubitu nomine iudicii non appellandum. Num igitur morbus per crism siue perfectam, siue imperfectam, vel per solutionem paullatine temporis processu factam terminandus sit, conijcere licebit ex morbi specie, ex magnitudine, ex motu, ex coctione, ex cruditate, ex bono, vel malo virium tono; nam febres biliosæ, magnæ, celerem habentes progressum, signis coctionis comitatæ, cum virium ro-

bore iunctæ, criticis solent excretionibus desinere; at pituitosæ, modicæ, moram trahentes, cruditatem præferentes, virium languorem inducentes lentam solutionem subire. namque crisis est opus nature validæ, ab acutorum humorum quodam quasi morsu percitæ, & ad expulsionem irritatæ, ad expulsionem, inquam, materiæ domitæ, & sub eius integram ditionem intercedente coctione redactæ, at cum natura languet, cum torpidi humores nullum ei stimulum admovent, eum cruditatis indicia vigent, quæ fuerit agitatio expectanda, quæ magna excretio, quæ omnino attendenda iudicatio? Languidus fit morbi progressus, & paullatina vel mali præsentis solutio, vel boni remanentis dissolutio. Quam quidem rem adeo luculenter in tertio de crisibus Galenus exponit, vt non solum an futura sit in febribus iudicatio aperiat, sed determinatum etiam iudicationis modum edoceat, & diem ipsum, horam ipsam exponat, vel quancumque aliam soluendi morbi rationem ob oculos ponat, vt qui librum non oscitanter legerit, nihil ad hanc necessarium noticiam optare possit. Neque verò dicere omiserim ex his etiam, quæ in hoc capite diximus, magnam coctionis vim elucescere, & maxima dignam æstimatione apparere, nam in præcognoscenda febrium tum salubritate, vel insalubritate, tum breuitate, vel longitudine, tum terminandi vel per crism, vel aliter ratione præcipuum habet illa momentum, & certissimum præbet depromendi iudicii argumentum, vt vigente coctione & certum, & citum expectemus salutis aduentum. Verum hic forsitan insurrexerit aliquis obijciens superius dictum, nullam

Iam esse acutorum morborum certitudinem, solam remanere in præfagiendo febrium euentu rationabilem coniecturam, at nos responderimus hoc verum esse cum morbi sunt in suo vel principio, vel augmento, vel incipiente vigore, sed cum plenè vigent, & consistunt, & exacta adsunt vel coctionis, vel cruditatis indicia, omnem demi ambiguitatem ob apparentem naturæ vel absolutam victoriam, vel omnimodam oppressionem, quarum altera non potest non habere comitem vitam, altera mortem, sicut legimus in tertio de Crisibus. Quod si tunc etiam aliquid inopinatum contingere posse demus, satis est quodd ut plurimum, & ferè semper opinatus contingit euentus, & ars curat ea, quæ talia sunt, non quæ infrequentissimè accidunt, ut in A-

phorismorum commentarijs pluries testatur Galenus, quod illis etiam memorabilibus in secundo libro verbis exprimere voluit Celsus, si quid vix in millesimo corpore aliquando decipit, id notam non habet, cum per innumerabiles homines respondeat. Respondent sibi inuicem horum auctorum solidæ doctrinæ, & sunt in vtrisque Hippocraticorum oraculorum obseruatrices mentes, & æmula, sed in Galeno præcipuè, cuius præstantissimis inhæsisse vestigijs numquam nos penitebit, ad perfectam artis tum notionem, tum administrationem certum aperientibus, & compendiarium aditum, quo iustissimo nomine tanti viri apud viros verè doctos maxima gloria floruit, floret, semperque magis florebit.

F I N I S.





INDEX

Eorum, quæ in opere continen-
tur præcipua.

A



- A*bscessuum duo genera apud Hippocratem, per
repositionem, & per emissionem. car. 214
- A*ccessio febrium quomodo prohibeat alime-
niam, & quomodo admittat. 68
- A*cuti morbi incertum habent præsagium siue
salutis siue mortis. 245
- A*egri confidentia de morbo, & de Medico
quantum habeat momenti ad sanitatem re-
cuperandam. 89
- A*er modo solum aer est, modo suscipit naturam causæ salubris, aut
insalubris. 54
- A*er qualis esse debeat, & quibus condicionibus affectus sit in fe-
bricitantibus procurandus. 55
- A*er calidus, & frigidus quomodo maiorem, vel minorem febrem
indicet. 100
- A*er quomodo suscipiat vim indicandi in febribus putridis. 99
- A*etij dictum de phlebotomia, an tollat obstructionem. 172
- A*etij inunctio in malignis febribus optima est, ac tutissima contra
multorum sententiam. 219
- A*ffectus animæ cur tantam vim habeat in alterando corpore, & va-
rie immutando. 45

Affectus

I N D E X.

<i>Affectus præter naturales sunt in duplici differentia.</i>	253
<i>Alimentum solidarum partium, & carnosarum, & spirituum quale sit.</i>	225
<i>Alimentum omne quomodo possit nutrire & solida, & carnes, & spiritus.</i>	57
<i>Alimoniam solam vitæ consideratio requirit.</i>	58
<i>Alimentorum cum alitis corporibus cognatio quantam vim habeat.</i>	91
<i>Alimentum triplex, æreum, aqueum, terreum.</i>	58
<i>Alimentorum qualitas, quantitas, modus, & opportunitas unde veniat colligenda.</i>	52
<i>Alimentum triplex, partis solida, carnosæ, & spirituosæ.</i>	64
<i>Alimentum quomodo simile, & quomodo contrarium in agris indicetur.</i>	52
<i>Alimentum bonum miscendum cum prava interna materia quomodo.</i>	53
<i>Alteratio est motus, & qualis.</i>	80
<i>Alendi tempus quomodo à morbo sumatur.</i>	129
<i>Allium ad flatuosos dolores sumptum confert instar Theriacæ.</i>	66
<i>Aqua non nutrit, & inducit mororem, & morosum facit hominem.</i>	233
<i>Aqua per paucam vini adiectionem euadit nutritoria.</i>	79
<i>Aqua frigida potio maximum in febribus remedium, & in quibus.</i>	81
<i>Aqua frigida potio tuta quas condiciones requirat, quibus deficientibus exhiberi non debet.</i>	148
<i>Aqua frigida potio malè adhibita quas noxas afferat.</i>	151
<i>Aquæ commendatio, & Encomium.</i>	150
<i>Aquæ refrigerantes febricitantibus congruæ.</i>	152
<i>Analogismi vis, & natura, & ab indicatione, & experientia distinctio.</i>	160
<i>Anima dominium in corpus.</i>	12
<i>Anima, & corporis qualis debeat esse proportio.</i>	96
<i>Anodyna medicamenta quomodo adhibenda.</i>	92
<i>Argenterij opinio refellitur de lenientibus iterandis.</i>	237
<i>Argenterij opinio refellitur de purgatione.</i>	198
<i>Argenterij opinio refellitur de vomitu.</i>	200
<i>Artes effici per additamenta, nec inuenta obesse inueniendis.</i>	213
<i>Artis generatio quomodo fiat.</i>	7
<i>Ars non potest omnia complecti.</i>	14
<i>Ars Medica coniecturalis, & incerta.</i>	241
<i>Auribus dolentibus quæ remedia adhibenda.</i>	245
	234

B

B alneum dulcis aquæ miram habet refrigerandi, & humectandi vim.	153
Balnei vsus antiquis familiarissimus.	153
Balneum febribus omnibus conuenit.	153
Balnei vsus in febribus putridis tres condiciones præcedere debent.	154
Balnei vsus non solum Galenus, sed Hippocrates etiam, & Celsus, & A- uicennas commendant.	156
Biliosus humor inter omnes corporis humores actiuitatem insignem habet, & in corpore ferociam quandam exercet.	242
Biliosus humor à Platone vocatus fucus aculeatus, veluti pituitosus fucus sine aculeo.	242

C

C alidum innatum consistit in continentibus, contentis, impeten- tibus.	59
Caloris innati cum flamma similitudo.	51
Calida refrigerant, frigida calefaciunt, & quomodo.	163
Cacochimia non omnis vetat phlebotomiam.	119
Coctio molienda in principio febrium, & quomodo.	204
Coctio humorum differt à coctione ciborum.	207
Coctio in humoribus quem effectum producat.	207
Coctionem quomodo definiuerit Aristoteles, & diuiserit.	208
Coctio omnis fit à calore innato dominante.	208
Coctione omnia fiunt crassiora.	209
Coctio quibus remedijs procuretur.	210
Coctio triplex apud Hippocratem, & Galenum, & quæ sit cuiusque natura, & differentia.	208
Coctio numquam potest esse mala.	247
Coctionis præcipua vis in morbis.	250
Consuetudinis magna vis.	82
Curatio quid sit, & quomodo differat à præseruatione.	47
Cucurbita sicca in doloribus flatuosis videtur habere vim incanta- menti.	233
Cutanea excretio multiplex, & à multiplici causa facta.	216
Curatoria indicatio quam vim habeat, & quomodo possit & multi- plicari, & ad unitatem redigi.	98
Curatoria indicatio præcipua duplex.	107

Curato-

I N D E X.

<i>Curatoria indicatio quomodo desumatur à febris putrida.</i>	255
<i>Curatio est coniuncta præservationi.</i>	104
<i>Curatoria remedia debent esse maiora præservationis.</i>	105
<i>Cucurbitula scarificata remedium non semper tutum, & semper parum efficax.</i>	196
<i>Cucurbitula quam vim habeat, & quem usum in educenda percutem materia.</i>	195
<i>Cura animæ coniungenda cum cura corporis.</i>	218
	94

D

D efinitio rei debet omnem tractationem præcedere ex Platonis præcepto.	9.
Definitio rerum duplex nominalis explicans significatum vocis, & essentialis explicans naturam rei.	9.
Diffimilitudines etiam doctissimis imponunt.	10
Diuretica varia, & quæ validiora, quæ leuiora.	114
Diureticorum adhibendorum quale tempus sit opportunum.	215
Dolor nostræ naturæ magnus hostis.	227
Dolor ex flatuoso spiritu quomodo sanandus veniat.	233
Dolor capitis qua ratione curandus veniat.	234
Dolor est dissolutio continuitatis, & unionis.	231
Dolorum causæ quæ sint.	232
Doloris oppugnandi, & sedandi triplex ratio.	232

E

E picrasis quid sit.	132
Epicrasis locum habet non solum in purgatione, sed etiam in phlebotomia.	164
Epicuri dictum de dolore contemnendo.	227
Epithemata, & cataplasmata in principio febrium quæ reprobentur, & quæ admittantur.	157
Euacuatio immoderata quomodo curanda.	235
Euacuatio triplex, naturalis, artificialis, & symptomatice, & quomodo differenter tractanda.	239
Excretio per nares sanguinea immodica quomodo veniat curanda.	236
Excessus excessum tollit, & ad medium adigit.	103
Exercitationis utilitas magna, & in corpore, & in anima.	92
Experientia imbecillitas.	12

F

F <i>Acultatum in humano corpore consensus.</i>	91
<i>Febri aras erexerunt Romani.</i>	3
<i>Febres ternario numero contenta.</i>	3
<i>Febres putrida inter omnes maioris momenti, & frequentius Medicam opem desiderant.</i>	4
<i>Febrium tractationem exactam fecit Galenus.</i>	4
<i>Febrium tractandarum duplex via.</i>	4
<i>Febrium putridarum mira methodus à Galeno inducta.</i>	4
<i>Febrium species quot.</i>	19
<i>Febris putrida quid sit, & quomodo partes omnes definitionis ipsius intelligantur.</i>	19
<i>Febris putrida an possit fieri sine obstructione.</i>	41
<i>Febris putrida non dat indicationes ex causis externis.</i>	41
<i>Febres synocha an solae considerentur à Galeno in undecimo Methodi.</i>	44
<i>Febres deploratae quae relinquenda prognosticis.</i>	77
<i>Febrientes animum debent habere compositum, & ab omni cura alienum.</i>	89
<i>Febrientibus conuenit quies, quibusdam tamen conceditur motus, & quibus, & quando.</i>	88
<i>Febris hyemalis peior aestiua, quia provenit à maiori causa.</i>	101
<i>Febris aestiua maior hyemali, quia fouetur ab ambiente.</i>	101
<i>Febrium putridarum triplex differentia.</i>	107
<i>Febris, quae habet rationem symptomatis, qualis sit, & qualis ea, quae propriè morbus.</i>	108
<i>Febris quando sit sola curanda, & quando cum causa.</i>	108
<i>Febri pestilenti conuenire phlebotomiam multipliciter probatur.</i>	108
<i>Febrium quattuor condiciones consideranda, Idea, motus magnitudo, mos.</i>	173
<i>Febris malignitas pendet à putredine, non ab occulta qualitate.</i>	174
<i>Febris pestilens à putredine vel humorum, vel ambientis excitatur.</i>	175
<i>Febris maligna, & pestilentis discrimen quale sit.</i>	175
<i>Febrium pestilentium quae sint indicationes.</i>	176
<i>Febres continuæ omnes periculosa.</i>	241
<i>Febres biliosa cæteris peiores, & cum maiori periculo iuncta.</i>	242
<i>Febres intermittentes, licet in se securæ, tamen interdum interimunt agrum, & quomodo.</i>	143
<i>Febres longæ fiunt, vel breues tribus de causis.</i>	248
	Fluen-

I N D I E X.

Fluente aluo cur non mittendus sanguis .	257
Fluoris alui variae species .	238
Fluor alui in morbis utilissimus .	238
Fluoris alui quattuor species, & quae melior, quae peior .	238
Fluor alui immodicus quomodo curandus .	238
Frictiones in quo differant ab unctionibus .	217
Frictiones quando conueniant, & quando non in febris .	217
Frictionis vires omnes ab Hippocrate summatim collectae .	217
Frigida lotio quibus febricitantibus conueniat .	155

G

G alenus in Methodo februm, & morborum omnium perficienda exactissimus .	4
Galenus in arte Medica perficienda emulatus est Imperatorem Traianum, qui vias romanas perfecit .	6
Galenus conuiciatores deridendi tamquam lucem obscurare quærentes .	7
Galenus vigilijs obnoxius & ob studia, & ob ætatem quomodo somnum conciliaret .	230
Galenum verisimile est legisse libros Celsi, licet nullam eorum faciat mentionem .	120

H

H ippocrates Methodi Medicæ primus inuentor .	4
Hippocrates breuiloquentia, & obscuritatis amicus .	5
Hyrudines hæmorrhoidibus applicitæ, & cucurbitula scarificata habent vim proportionatam, non æqualem phlebotomiæ .	194
Humores putrescunt modo secundum totum, modo secundum partem .	26
Humidum quomodo sit alimenti vehiculum .	73
Humectatio quomodo vim habeat refrigerandi .	110

I

I ecoris Roborandi quæ sint tuta, & congrua præsidia .	220
Indicatio constituit Methodum Medicam .	16
Indicatio methodi distinguitur à curatoria .	9
Indicatio quid sit .	9
Indicatio curatoria in febris putridis triplex, à febre, à temperie, ab aere .	99
Indicatio quomodo distinguatur ab experientia, & analogismo .	19

<i>Indicatio an habeat discursum adiunctum, & quomodo.</i>	14
<i>Indicationis nomen unde deductum.</i>	15
<i>Indicatio consuetudinis est vitalis.</i>	82
<i>Indicatio triplex, curatoria, præservatoria, & vitalis, & quomodo inter se differant.</i>	17
<i>Indicatio febrium putridarum curatoria qualis sit.</i>	97
<i>Indicatio vitalis indicat solam alimoniam.</i>	49
<i>Indicatio vitalis quomodo conferat ad curationem.</i>	60
<i>Indicationum dignitas, & magnitudo unde pendeat.</i>	62
<i>Indicationum omnium in febrem putridam cadentium ordinata series.</i>	104
<i>Indicatio humectandi habet adiunctam etiam refrigerandi.</i>	110
<i>Indicatio temperatura, & aeris per modum signorum.</i>	103
<i>Indicationes in febribus putridis sumuntur partim à rebus secundum naturam partim à rebus præter naturam.</i>	225
<i>In febribus omnibus solida cordis afficiuntur, & quomodo.</i>	19
<i>Inedia temperamentis biliosis inimicissima.</i>	71
<i>In febribus cur indicationem humectandi præposuerit Hippocrates, & refrigerandi Galenus.</i>	110
<i>In quo distinguatur usus vomitus ab usu deiectionis alui.</i>	211
<i>Ira quas afferat utilitates.</i>	95
<i>Intermissio febrium duplex.</i>	243
<i>Intestinorum dolores quomodo curandi.</i>	23
<i>Ius pulli per se refrigerat, & humectat.</i>	159
<i>Iura alterata quæ vim habeant refrigerandi, & humectandi.</i>	169

L

L <i>Ac Asininum ad febres ardentes accommodatum.</i>	192
<i>Lac ex quibus substantiis constat.</i>	142
<i>Lac quibus incommodum, & quomodo.</i>	141
<i>Lactuca ad conciliandum somnum aptissima.</i>	230
<i>Laudani usus.</i>	231
<i>Lenientia vim habent refrigerandi.</i>	140
<i>Lenientia quæ sint refrigeratoria.</i>	141
<i>Lenientium Medicamentorum natura Galeno ignota.</i>	197
<i>Lenientia etiam medicamenta caute in febribus adhibenda.</i>	198
<i>Lenientia an sape in febribus iteranda.</i>	198
<i>Leniens medicamentum non indiget preparantibus, & concoquentibus.</i>	197
<i>Lienis roborandi quæ sint congrua præsidia.</i>	220

M

M ateria turgens qua.	199
Materia turgens statim purganda non expectata coctione.	199
Materia venefica statim purganda ut turgida.	200
Materia varia ratione peccantis variae indicationes.	209
Medicamenta purgantia quibus in casibus ab Hippocrate, & Galeno concedantur in principio morborum.	202
Medicamenta purgantia in febris suspecta.	197
Medicamenta cui praeponenda vena sectio.	197
Medicamentum potest per varias vias euacuare.	197
Medicamentum manus Deorum.	203
Medicina ars coniecturalis & diuinatoria.	77
Medicina an admittat Fortunam, & quomodo.	164
Medicina animi etiam curam suscipit non solum corporis.	90
Medicinam esse artem quibus rationibus probetur.	12
Medicinae, & oratoriae conformitas.	16
Medici experimentarii, & Methodici distincti.	13
Methodus quid sit secundum nomen.	10
Methodus duo insinuat, ordinem, & argumentationem.	10
Methodus quid sit secundum essentiam.	11
Methodus curandi per similia qualis.	160
Methodus apud Medicos curatiua, & salubris quomodo distinguitur.	13
Methodus pertinet partim ad Logicam partim ad scientiam, cuius est Methodus.	12
Methodus medica curatiua quid sit.	14
Mithridaticam confectionem an liceat assumere in febris malignis.	221
Missio sanguinis quando praeponenda, & quando postponenda medicamento.	144
Missio sanguinis usque ad lypothimiam quomodo intelligatur.	139
Morbi cur non sola victus ratione contenti.	114
Morbi inchoantibus tentanda praesidia.	129
Morbi magnitudo verum mittendi sanguinis indicatuum.	115
Morbi maligni qui sint ex Galeno.	176
Morbi longi, vel breues quomodo Hippocratica methodo colligendi.	249
Morbi usque ad vigorem incerti, in vigore certi.	251
Morbus ex sui natura prohibet alimoniam, & indicat medicamenta.	50

Morbi deplorati an exigant remedia .	77
Morbi similes minus periculosi, dissimiles magis .	102
Morbi Epidemici, Endemici pestilentes, & sporadici qui sint & quomodo differant .	186
Morbus est senectus aduentitia .	245
Morbos longos vel breues qua Methodo indagare possimus .	248
Morborum solutio per euacuationem quot modis fiat .	210
Morbus interdum morbi medela .	238
Morbi salutare quomodo terminentur ad vitam, & quomodo lethales ad mortem .	250
Motus in homine triplex, & qualis .	92
Mulieribus grauidis an aperienda vena .	138

N

Natura seu calor innatus morbis medetur .	72
Naturalis vis pendet à vitali .	248
Nullum bonum vel naturæ, vel artis omnino perfectum, & omnis mali expers .	219

O

Occasio quid sit, & quam vim habeat in morbis .	129
Oculorum dolores qua ratione sanandi veniant .	233
Oua tremula, & sordida optima .	87
Oua in quibus febribus non conueniant .	86
Oua conueniunt in febribus putridis .	83
Oua esse valida nutrire, & instare ex Hippocrate .	84
Oua quam vim habeant, & secundum vitellum, & secundum album .	84
Ohi vitellus refrigerat .	85
Onorum differentie .	83
Onum quid sit .	83
Oui ex qua parte nascatur animal, & ex qua nutriatur secundum Philosophos, & Medicos .	84

P

Particularia non possunt cognosci sine vniuersalibus .	9
Peponum laus .	147
Per similia facta curatio pertinet, & redigitur ad contrarietatem .	163
Pestilenti in affectu quattuor præcipue euacuationes utiles .	238
Pleni-	

INDEX.

261

Plenitudo sanguinis non est necessaria ad phlebotomiam.	115
Plenitudo sanguinis concurrat ad indicandam phlebotomiam per accidens.	121
Pleuritidis in curatione Galenus ab Hippocrate panem dissentit.	201
Poma febricitantibus concedenda; & quæ.	146
Potio frigida quibus non conveniat.	148
Præparatio, & Concoctio differunt.	206
Præparatio duo præstat alterum in humoribus euacuandis, alterum in partibus corporis.	20
Præsagia Medica tria quærent, num morbis salubris, an lathalis, num brevis, an longus, num Crisi an aliter terminandus.	250
Præsagendi ars in quo consistat.	241
Præsagiorum Medicorum incertitudo unde proveniat.	245
Præsagiorum distinctio ex Aristotile.	246
Præsagium fit ex collatione morbi, & natura.	241
Prognostici usus magnus.	241
Prißana optimus febricitantibus cibus.	145
Prißana quibus non conveniat.	148
Prißane utilitates variae.	145
Pulsus habet vim significandi coctionem.	248
Pulsus solius contactus præbet agnitionem animi affecti.	95
Pueris an sit mittendus sanguis, & quibus.	137
Purgantia medicamenta præcedentem coctionem requirunt.	199
Purgatio an facienda à principio in febre pestilenti.	201
Purgationis cautela in febribus.	203
Purgatio importuna quæ damna inferat febricitantibus.	204
Purgatio cur adhibeatur declinantibus morbis.	204
Putredo quid sit.	21
Putredinis natura declaratur exemplo navis rectore destituta.	22
Putredinis causa calor ambientis non propria putrescentis corporis frigiditas.	23
Putredo duplex vel secundum totum, vel secundum partem.	25
Putredo Medicorum an distinguatur à putredine Philosophorum.	27
Putredo cur dicatur interitus naturalis.	28
Putredo quam similitudinem habeat cum combustione.	31
Putredo quid sit secundum Galenum.	32
Putredinis definitio à Galeno allata quomodo distinguatur ab Aristotelica.	33
Putredo quomodo inducat febrem.	34
Putredo potest esse sine obstructione, at non putrida febris.	34
Putredo in pestilenti potest fieri sine obstructione.	36

Putrida

Putrida febris quae sint causa.	39
Putredo quomodo habeat rationem morbi, symptomatis, & causa.	39
Putredinis remedia quae, & quot sint.	126
Putredo Medicorum, & Philosophorum quibus differentiis videantur distingui, & harum differentiarum explosio.	30
Putredo maligna quae apud Galenum.	243
Putridus humor qui proprie dicatur.	152
Putridi humores cur nouam subeant generationem.	220

Q

Quam causam habeat aer salubris, & insalubris.	99
Quantitas difficillima cognitu.	241
Quintana febris quomodo pessima omnium.	244

R

Ratio significat tria, & quae.	14
Refrigeratio quomodo habeat vim humectandi.	110
Refrigeratoria remedia quae sint, & qualia.	112
Remedia vim habere debent proportionatam morbis.	193
Remedia non sunt quae non immutant statum Aegroti.	144
Remedia magna duo purgatio, & phlebotomia.	115
Remedium quod sine aliqua noxa generose proficit, difficile inuenitur.	215

S

Sanguis an putrescat in febribus sine obstructione.	45
Sanguis peccat, vel quantitate, vel qualitate, & utroque nomine venit euacuandus.	167
Sanguinis missio quomodo remedium euacuatorium, & quomodo repulsorium, & deriuatorium.	164
Sanguinis excretio per nares an ardentibus conueniat.	233
Sanguinis non qualibet sponte facta excretio pertimescenda.	237
Sanguinis imminutio quot modis fieri possit.	112
Sanguinis mittendi tres praecipui scopi.	113
Sanguinis missio an conueniat in calidis regionibus, & anni temporibus.	137
Sanguinis missio quae nec obstructionem, nec putredinem curet.	128
Sanguinis missio putridis omnibus conueniens quomodo.	125
Sanguinis missio cur dicta insufficiens ad tollendam febrilem interperiem.	

I N D E X.

<i>periem.</i>	263
<i>Sanguinis missio quomodo refrigeret.</i>	123
<i>Sanguinis mittendi tempus.</i>	122
<i>Sanguinis differendi triplex occasio.</i>	130
<i>Sanguis mitti potest quolibet dierum numero dum vires adsint.</i>	130
<i>Sanguis mittendus in dolore urgente quando.</i>	132
<i>Sanitas hominis integra pendet à bono animi, & corporis statu.</i>	136
<i>Sectio venæ remedium magnum, & præsentaneum.</i>	92
<i>Sectio venæ in morbis magnis necessaria.</i>	113
<i>Senectus morbus naturalis.</i>	196
<i>Senectus Philippi quæ.</i>	244
<i>Senibus an aperienda vena.</i>	244
<i>Senibus cur omnis morbus periculosus.</i>	138
<i>Serum caprillum ad refrigerandam febrientium intemperiem optimum.</i>	245
<i>Serum caprillum vetustis omnibus familiarissimum.</i>	141
<i>Signa tecmria quæ sint.</i>	141
<i>Similia similibus interdum curantur.</i>	248
<i>Signa coctionis non perseverantia infida.</i>	160
<i>Somnus qualis in febrientibus.</i>	247
<i>Stranguria symptoma in febribus interdum utilissimum.</i>	89
<i>Sudor bonus, & in febribus salutaris quis.</i>	213
<i>Sudor naturalis est excretio contra Dioclem.</i>	217
<i>Sudorem provocantia varia, tum interna, tum externa.</i>	217
<i>Symptoma quomodo possit habere vim indicandi.</i>	217
<i>Symptoma triplex, morbi, causæ, symptomatis.</i>	225
<i>Symptoma pertinet vel ad actionem læsam, vel ad qualitatem mutatam, vel ad excretum, retentumve immodicum.</i>	223
	226

T

T erminus duplex Medicis in casu doloris constitutus.	227
Temperamentum secundum Galenum est tota mixti substantia.	32
Temperatura quomodo indicet in febribus putridis.	99
Theriaca habet duplicem in febribus usum.	221
Theriacam an liceat assumere in febribus malignis.	221
Theriacæ utilitates plures.	222
Transpirati onis retentio à quot causis fiat, & cur solius obstructionis proponat Galenus remedia in febribus putridis, & continentibus.	165
Transpiratio prohibita in febribus duplex sensibilis, & insensibilis.	45
Triplex	

*Triplex modus recuperandæ sanitatis, ac triplex modus obeunda
mortis.*

250

V *Acuatio triplex naturalis, artificialis, & symptomatica.* 239

Valesij de febre Quintana opinio. 244

Valesij sententia de usu Theriacæ in febribus. 223

Ventriculi roborandi, quæ sint congrua præsidia. 220

Vesicantia qua fuerint occasione adinuenta. 219

Vesicantia quando conueniant in febribus. 219

Virtus ratio præstantissimorum Medicorum instrumentum. 144

Virtus tenuis an plenus præferendus in morbis. 50

Vigilia facit dolorem, laborem, delirium. 230

Vigilia fit à dolore tum corporis tum animi. 228

Vigilia fit à Delirio. 224

Vigiliam perpetuam nullum animal seruare potest. 228

Vigilia curanda quæ remedia. 230

Vina dupliciter putrescunt secundum totum, & secundum partem. 27

Vinum ad compescendam putredinem aptum. 75

Vinum in duplici infirmitate aptum. 75

Vinum habet rationem alimenti, & Medicamenti. 72

Vinum habet vim nutriendi. 73

Vinum quomodo à febre putrida inhibeatur. 73

Vinum valde nutrit. 75

Vinum in declinatione febrium, & in concocta materia propinandum. 76

Vinum omnes euacuationes promouet. 77

Vinum debet inhiberi etiam in deplorata agitudine. 78

Vinum etiam in acutis febribus dandum. 79

Vinum latificat cor hominis. 80

Vini tres gradus in febribus considerandi. 81

Vinum est dandum ratione consuetudinis. 82

Vinum in omni syncope optimum. 59

Vires quæ pendent à conseruatione trium facultatum. 90

Vires quattuor possunt concurrere ad indicandum. 61

Vires consistunt in conseruatione trium facultatum. 60

Vires interdum minuende, interdum augende, interdum conseruanda. 49

Vires omnes quomodo habent suum pabulum, & fulcrum. 71

Vinum substantia ex solidis, carnosis, & spiritibus completur. 52

Vinum imbecillitas triplex. 74

Vinum 74

<i>Viribus qua symptomata potissimum obsint.</i>	226
<i>Viscera qua in febribus potissimum custodienda.</i>	220
<i>Viueri quid sit.</i>	81
<i>Ultimum in inuentione primum in executione quomodo.</i>	104
<i>Unctiones, & cataplasmata impuro corpori non applicanda.</i>	219
<i>Vomitoria placidiora qua.</i>	213
<i>Vomitus materia laudabilis qualis esse debeant.</i>	212
<i>Vomitus familiaris Hippocratis purgatio.</i>	210
<i>Vomitus hyeme an estate magis procurandus, & contradictionis in hoc apud Hippocratem apparentis solutio.</i>	211
<i>Urina copiosa optimum remedium fluoris alui.</i>	239
<i>Urinarum excretio febrientibus utilissima.</i>	213
<i>Urinarum signa coctionis qualia esse debeat.</i>	247
<i>Urinae prouocatio magnum remedium ad sistendam aluum.</i>	239
<i>Urinae praecipue valent ad significandum in febribus.</i>	246
<i>Urinae triplex materia secundum Hippocratem, & qualis.</i>	214
<i>Urinae, & sudoris eadem materia.</i>	216

F I N I S.

LECTORI BENEVOLO.

Quod nulla sit in libri marginibus annotatio, quam plurimi solent adhibere, id factum ex eo fuit, quod in ipso orationis cursu afferuntur Auctorum loci ad rem propositam confirmandam accomodati, ut non fuerit alia animaduersione opus, ne ad actum agendum videremur parati. Iam ab impressore errata non potuerunt euitari omnia, imò commissa multa, inferius annotanda, nam quaedam leniora omitemus, quæ præcipuè ad verba græca pertinent, eorumq; accensus, tuo solerti iudicio, humanissime lector, benetole correcturò relinquenda. Illud hic admonere libet in colligendis erroribus fieri mentionem paginae, & lineæ, ubi extant, numerando utramq; & numerum linearum intelligi ad utramq; columnam pertinentem, ut si non sit in vna, quaratur in altera. Errata ergo ita corrigito. Legitur

In catalogo capitum libri secundi cap. 19. Rationum ab auctoribus venæ sectionem, in febre pestilenti additarum. &c. lege, Rationum ab auctoribus venæ sectionem, in febre pestilenti improbantibus adductarum &c. pag. 14. lin. 26. libri, libris. p. 14. l. 23. commentarij. commentarijs. p. 15. l. 12. dissimulares, dissimilares. p. 9. l. 12. *μεταρ, συμερο*. p. 10. l. 24. diuinxit. deuinxit. p. 11. l. 28. *ανια, ενα*. p. 11. l. 39. *αιτιων*. p. 16. in princip. cap. fallior, fallor. p. 21. l. 28. miscillam. miscellam. p. 15. l. 17. quæda. quædam. p. 18. in princip. cap. ipsorum. ipsarum. p. 28. l. 28. facescat, facessat. p. 32. l. 14. *ιπδ, ιπδ*. p. 32. l. 14. & corruptionem, & corruptio corruptio- nem. p. 37. l. 25. *διαπρον, διαπρον*. p. 37. l. 6. rationes. rariores. p. 40. l. 17. recen- ses, recensens. p. 40. l. 18. arrident, arridet. p. 40. l. 31. nuncupatis, nuncupantis. p. 45. l. 43. præter quam febris quod fieri potest. præter quam febris fieri &c. p. 42. l. 43. despiciatur, despiciatui. p. 47. l. 36. Alter, aliter. p. 56. l. 40. febribus, febrilis. p. 57. l. 13. Hippocratis, Hippocrates. p. 58. l. 28. contingere, contingente. p. 63. l. 9. utrumq; utramq; p. 63. in rubrica cap. obseruandus, obseruandis. p. 64. l. 47. confusa, contusa. p. 77. l. 17. restitutionem. retusionem, p. 86. l. 20. Vini. vim. p. 87. l. 2. habeat. habeant. p. 91. l. 21. concensu. consensu. p. 92. l. 10. commosiones, commotiones. p. 107. l. 20. rationem ratione. p. 108. l. 3. phlegmones. phlegmone. p. 111. l. 21. præter, propter. p. 119. l. 40. reprehendis. reprehendit. p. 121. l. 20. inhibito. inhibito. p. 123. l. 5. continentiam, continentium. p. 128. l. 24. compos. compote. p. 130. l. 27. vinum. virium. p. 139. l. 27. Hippocrates Hippocratis. pag. 137. l. 40. confertam, & effatu dignam, confertam, & copiosam. p. 150. l. 10. frigi- ditatem remissione. frigiditate remissione. p. 150. l. 39. expertim, expertem. pag. 153. l. 3. corpus totus, corpus totum. p. 164. l. 23. Vel victoria lecta. vel victoria lata. p. 164. l. 18. prugnis, pugnis. p. 166. l. 23. &, est. p. 167. l. 30. sanguis, san- guinis. p. 168. l. 33. inaniendi, inaniendis. p. 174. l. 43. inueherem. inuehere. p. 180. l. 34. animaduersione, animaduersionem. p. 184. l. 6. inhibeat, inhibeat. p. 187. l. 24. ut in. 1. lib. ut in hoc lib. p. 187. l. 31. distincti. distincti. p. 189. l. 37. profecta, profectam. p. 198. l. 15. medicamentis, medicamenti. pag. 199. l. 8. obseruari, obseruauit. p. 206. l. 24. meatum. meatuum. p. 210. l. 30. illifionem, illi- tionem. p. 220. l. 30. deputato, depurato.

F I N I S.

SCVNE

